

曾国藩作品集

曾国藩文集

一

中华古典精华文库

曾国藩文集

—

曾国藩 著

目录

修身篇

1 . 沿途赴京遇皇后仙逝.....	001
2 . 九弟病愈不作归计.....	003
3 . 勉励君子应早立志.....	004
4 . 读书应有志有识恒久.....	008
5 . 兄弟相论读史之道.....	011
6 . 读书宜专习字须有恒.....	017
7 . 勉弟应在孝悌上用功.....	019
8 . 凡事皆贵专.....	021
9 . 所寄银两为馈赠族戚之用.....	023
10 . 论诸弟诗书文章.....	031
11 . 吾人应进德修业.....	034
12 . 切莫恃才傲物动谓人不如已.....	036
13 . 学问之道无穷总以有恒为主.....	038
14 . 空言无益务实为宜.....	040
15 . 事事应勤思善问.....	043
16 . 诸弟皆中试欢慰之至.....	045
17 . 只求康安不求为差.....	047
18 . 劝四弟应勤劳早起.....	048
19 . 栽竹种树以聚气象.....	050

20. 贤肖不在高位而在谨朴.....051
21. 告癖疾已有大好之象.....054
22. 凡行公事须深谋远虑.....055
23. 生性已定不能威猛精明.....057
24. 望不求近功速效.....058
25. 带兵应有强毅之气.....059
26. 济人须济急.....061
27. 傲之一字百无一成.....063
28. 圣门教人不外敬恕二字.....065
29. 望慎之又慎以克终为贵.....067
30. 虽处顺境然寸心郁抑.....070
31. 询麻姑之游乐否.....071
32. 罕见之珍以赠诸弟.....072
33. 学箭最足保养起早尤千金妙方.....073
34. 望讲求将略品学.....074
35. 爱禾者必去稗爱贤者必去邪.....075
36. 昔年失之高亢近日稍就平实.....077
37. 不忘君为忠不失信于友为义.....079
38. 弟务当猛省骄矜之意.....081
39. 古今庸人皆以惰字致败古今才人皆以傲字致败.....082
40. 为戒傲惰二字.....083
41. 赞余之日记比日知录恭维太过.....084
42. 谈戒骄戒傲之理.....085
43. 家中子侄当谨守家训.....086
44. 再告诸子侄谨守家训.....088
45. 余心不悦望溪之事.....090
46. 傲为凶德惰为衰气.....092

47. 评沅弟字与季弟挽联.....093
48. 天下事由命不由人.....094
49. 教弟油纸摹贴法.....095
50. 应拚命报国侧身修行.....096
51. 愿以劳谦廉三字自惕.....097
52. 刚柔互用不可偏废.....099
53. 有德者自修而谤亦日息.....100
54. 治心以“广大”为药治身以“不药”为药.....101
55. 宜早起务农疏医远巫.....103
56. 盛时常用衰时想上场当念下场时.....104
57. 誓拚命报国须常存避名之念.....105
58. 季弟须坚持不复服药.....106
59. 兄弟所得赐物概藏于先大夫庙内.....107
60. 军务处处棘手又遭季弟变故.....108
61. 去忿欲以养体存倔强以励志.....109
62. 先有豁达光明之识后有恬淡冲融之趣.....110
63. 文笔不患不详细说明但患不简洁.....112
64. 累世俭朴之风不可尽改.....113
65. 修身养家须以明强为本.....114
66. 弟文宜专从简当二字着力.....115
67. 互勉以“和”为殷鉴.....116
68. 弟之文笔不宜过自菲薄.....117
69. 弟谢恩折已修阅.....119
70. 弟须在奏折上费一番功夫.....120
71. 强字须从明字做出.....121
72. 盼弟自为宽解无稍抑郁.....122
73. 凡事皆当谨慎俭朴.....123

74. 积劳之人非成名之人
 成名之人非享福之人.....124
75. 望弟子俭字加一番功夫.....125
76. 家门太盛有福不可享尽.....126
77. 以俭字相勸则可久矣.....127
78. 患难兄弟惟有互劝互勸互恭.....128
79. 须将万事看空毋恼毋怒.....129
80. 功不必自己出名不必自己成.....131
81. 肝脾两疾全仗以心治之.....132
82. 心肝之病究以自养自医为主.....133
83. 同战金陵于弟才德品望无损.....134
84. 养生以少恼怒为本
 事亲以得欢心为本.....135
85. 有福不可享尽有势不可使尽.....136
86. 彼此互相劝诫存倔强去忿激.....137
87. 男儿自立须有倔强之气.....138
88. 弟之退志兄应成全.....139
89. 吾辈所可勉者但求尽吾心力之所能及.....140
90. 功成名就何以独怀郁闷.....142
91. 金陵功成中外于弟必无闲言.....143
92. 功成身退愈急愈好.....144
93. 弟可趁闲苦学以解平生之憾.....145
94. 弟切莫无端而郁恼.....146
95. 用功不求太猛但求有恒.....147
96. 以昔年拚命之意用力于奏议文章.....148
97. 弟病以不看书不用心为良方.....149
98. 劝沅弟不必抑郁.....150

- 99 . 凡任事之臣当可善始善终..... 151
- 100 . 身体平安惟目光日坏..... 152
- 101 . 不可视文太重而视天下后世太轻..... 153
- 102 . 胜人处不可求强自修处可求强..... 154
- 103 . 养老之法不在进食补药..... 155
- 104 . 占星变吾辈当儆省..... 156
- 105 . 贤才六分本于天生四分由于家教..... 157
- 106 . 咬定牙根徐图自强..... 159
- 107 . 默存一悔字无事不可挽回也..... 161
- 108 . 调度文书以少为好..... 163
- 109 . 须咬牙励志切勿气馁..... 164
- 110 . 心病还须自心医..... 165
- 111 . 耕读为本乃长久之计..... 166
- 112 . 总以保养身体为第一着..... 167
- 113 . 保身莫大于眠食二字..... 168
- 114 . 治病以能进食为急务..... 169
- 115 . 余眩晕之症未痊愈..... 170
- 116 . 余目疾毫无转机..... 171
- 117 . 余目蒙加重..... 172
- 118 . 吾双目俱蒙脚肿未愈..... 173
- 119 . 余病难以支撑..... 174
- 120 . 叙养生之法..... 175
- 121 . 热毒攻身却无从速愈..... 176
- 122 . 余为克顽疾移居于庙..... 178
- 123 . 恶我者拭目以观好我者忧我所为..... 179
- 124 . 懊悔往年嫌隙..... 181
- 125 . 余脉太虚目疾难治..... 182

126. 读书只为进德修业.....	184
127. 论友人之德业.....	188
128. 情愿别人占余便宜.....	191
129. 捐二百金建桥.....	193
130. 追悔昔日开罪人处.....	194
131. 人之得名无关意愿.....	196
132. 谨记拼命报国侧身修行.....	197
133. 成大业半靠天缘半靠迁就.....	198
134. 切记心病还须自心医.....	199
135. 兼顾养生锻炼则志强体健.....	200
136. 一生学业无成不免愧郁交集.....	202

家教篇

1. 读书写字不可间断.....	204
2. 不可浪掷光阴.....	205
3. 读《汉书》之门道.....	206
4. 寄四箴书回家.....	208
5. 读书之法看读写作四者不可缺一.....	209
6. 读书须能涵泳体察.....	211
7. 余平生有“三耻”.....	213
8. 读经外尚须寻研史记.....	215
9. 纪泽看《诗经》注疏可教之作赋.....	216
10. 君子之道莫大乎与人为善.....	217
11. 愿尔专心读书.....	219
12. 读经宜常阅校勘记.....	221

13. 谈读书作文习字之法.....	222
14. 儿为通学之辈乃余之夙愿.....	223
15. 示写字作文用笔之法.....	225
16. 谈论书法派别.....	227
17. 看书应有所择有所得.....	228
18. 作文宜先讲词藻.....	230
19. 读《诗经》不可没有恒心.....	231
20. 论今古文尚书.....	232
21. 近思制古文集.....	234
22. 学书法须通入门之径.....	235
23. 详示作字换笔之法.....	236
24. 儿婚期改日余甚喜慰.....	238
25. 欲稍有成就须从有恒下手.....	239
26. 时记勤敬二字.....	240
27. 心常用则活不用则窒.....	241
28. 论读《文选》之要领.....	242
29. 举止须重行文宜圆.....	243
30. 写字作文总以圆润为主.....	245
31. 派专人抵湖口接儿.....	247
32. 今日至渔亭遍走各营.....	248
33. 时以子侄辈骄傲为虑.....	249
34. 尔兄弟努力读书不怕没饭吃.....	250
35. 举止要重发言要慎.....	251
36. 饭后千步乃养生要诀.....	252
37. 释文中雄奇之道.....	253
38. 写字宜常摹柳贴.....	254
39. 内传为本义外传为余义.....	256

40. “劳”字“谦”字应牢记.....258
41. 儿不可从军亦不必做官.....259
42. 可于省城雇人至家种蔬.....261
43. 论书写篆字等事.....262
44. 看读书作逐日无间.....264
45. 居家之道惟崇俭可以长久.....266
46. 论目录分类之法.....267
47. 女儿出嫁不可过于奢侈.....268
48. 纪鸿科考应请邓师亲送.....269
49. 韩公五言诗之可骇处可笑处须细心领会.....270
50. 儿之才思能古雅而不能雄骏.....271
51. 惟怪眷太隆责任太重深以为危.....273
52. 函慰儿为家常琐事之劳.....274
53. 事无分难易但行之有恒.....275
54. 惟读书可变化气质.....277
55. 贺鸿儿幸取县首.....278
56. 汉人词章未有不精于小学训诂者.....279
57. 当作信教袁婿.....281
58. 戒勿沾富贵气习.....282
59. 吟诗作字法陶潜王羲之.....284
60. 行气为文章第一义.....285
61. 寄尔沅叔信以慰家人之心.....286
62. 嘱再来营团聚.....287
63. 钻研古义望读六家之书.....289
64. 父子一叙可少纾忧郁.....290
65. 诗文欲雄奇须立意脱俗.....291
66. 习字宜从刚字厚字用功.....293

67. 谆劝诸妹以能耐劳忍气为要.....294
68. 兹付去日记等谕旨奏章.....295
69. 尔读书有恒尚须作札记.....296
70. 望以精确之训诂作古茂之文章.....297
71. 寄回圈改之文.....298
72. 尔为秀才凡岁考科考均应前往.....300
73. 余家诸女当教之孝顺翁姑敬事丈夫.....301
74. 行船不可惊动官长.....302
75. 侄等处最顺之境须立定志向.....303
76. 儿一切以勤偷二字为主.....304
77. 凡涉外事请子密作一缄寄我.....305
78. 力去傲惰二弊.....306
79. 借人之力而窃上赏深抱不安.....307
80. 亢旱酷热老人所畏应治之事多搁废.....308
81. 李秀成供词限三日刻成.....309
82. 老年畏热何能任此艰巨行谋谢去矣.....310
83. 改谢恩折二件今日拜发.....311
84. 余拟明日登舟回皖.....312
85. 余愧受恩典.....313
86. 择交是第一要事须择志趣远大者.....314
87. 从从须以勤俭二字自勉长保盛美.....315
88. 奉母总以勤俭自惕接物出以谦慎.....316
89. 后辈夜饭不荤亦养生之宜.....317
90. 近日所看之书尽可自摭所见.....319
91. 儿与幕僚诸友投缘否.....320
92. 询沅叔病此时痊愈否.....321
93. 古来文人均在气势上痛下工夫.....322

94. 阅书即从有恒二字痛下工夫.....324
95. 余将为邵家书墓志.....326
96. 谈四妹成婚之地.....327
97. 闺女在湘阴成婚日期不可更改.....329
98. 速寄《书经稗疏》等书以便刑刻.....330
99. 奉谕旨晋驻许州.....331
100. 既戒恼怒又知啬养生之道尽在我矣.....333
101. 悬系纪泽儿之病.....334
102. 欲翌年接家眷回湘乡.....335
103. 每月致送三十金于钱子密.....336
104. 令儿教匠人刻工之道.....337
105. 惩忿窒欲为养生要诀.....338
106. 细览《聪训斋语》养生有益.....339
107. 儿暂不必来徐州.....340
108. 鸿儿应每旬书一稟贴.....341
109. 盼儿腊月来营相见.....342
110. 水师章程十二月出奏.....343
111. 尔母之病须熬党参膏终年调旦.....344
112. 凡事皆用困知勉行工夫.....345
113. 须认真讲求八股试贴.....347
114. 苦求长进须勿忘而兼以勿助.....348
115. 养生之道皆应顺其自然.....349
116. 观其言论风范再聘师.....351
117. 要体会勤俭刚明忠恕谦浑八德.....352
118. 儿断不可不切实用功.....353
119. 儿侄宜专攻八股试贴.....354
120. 学祖父夜夜洗脚不轻服药.....355

121. 泽儿只可协修湘乡县志.....357
122. 家之兴衰人之穷通皆于勤惰卜之.....359
123. 作文以思路宏开为佳.....360
124. 若胸襟开扩弗药可愈.....361
125. 欣慰鸿儿生男之喜.....363
126. 贵好而知其恶恶而知其美.....364
127. 十三日具片续假一月将来请开各缺.....365
128. 读古文当先认其貌后观其神.....366
129. 莫作代代做官之想须作代代做士民之想.....368
130. 余将不积银钱留与儿孙.....370
131. 虑后辈读书天分平常又无良师善讲者教之.....372
132. 焦虑鸿儿之病.....374
133. 泽儿之情韵趣味皆由天分中得之.....376
134. 望变柔为刚化刻为厚.....377
135. 鸿儿出痘大致极为平顺.....378
136. 惟久不下雨人心惶惶.....379
137. 鸿儿当进场应试.....380
138. 告之各处存银及用途.....381
139. 曹植为诗家之宗师.....382
140. 家中妇女近年好享福
 而全不辛劳余深以为虑.....383
141. 商议安顿家眷之事.....384
142. 余派人至济宁迎家眷.....386
143. 君子之道以知命为第一要务.....388
144. 今精力日衰难了素志.....389
145. 尔诸事宜节省.....391
146. 念百姓遭旱殆无生计.....392

147. 余将赴天津一行.....393
148. 富贵气太重亦非佳象.....394
149. 凡事谦谨为宜.....395
150. 尔在京宜节饮食慎调养.....396
151. 亢旱焦灼甚忧于病耳.....397
152. 尔考荫事宜细心料理.....398
153. 天津教案拟于二十三日奏结.....399
154. 琐事如麻父子均须用心.....401
155. 圣上赏六十生辰之物.....402
156. 每日须有静生养神发愤用功之时.....403
157. 吾初抵扬州.....404
158. 凌云不能强留则送百金.....405
159. 年老尤憾平生学术无成.....406
160. 十五日抵清江身体痊愈.....407
161. 望儿致力于好学养生二事.....408
162. 身体粗健惟眼蒙日甚.....409
163. 诸官为余祝寿.....410
164. 应以慎独主敬求仁习劳相勉.....411
165. 祖父善于调停解危.....414
166. 儿在京自知谨慎.....416
167. 国荃甲三已病愈.....418
168. 谢买寿材及问婢母病.....420
169. 不解九弟迫思南归.....421
170. 九弟始愧悔读书.....423
171. 孙妇已产一女.....425
172. 闻家无负债可喜.....426
173. 望家中附茶叶大布至京.....427

174. 九弟意欲病愈归家.....428
175. 考运不好不必挂怀.....430
176. 详述九弟思归之意.....432
177. 遵手谕节劳节欲节饮食.....435
178. 每年须漆寿具.....436
179. 恭庆祖父母双寿.....438
180. 兄弟和虽穷之民小户必兴
 兄弟不和虽世家宦族必败.....440
181. 详禀大考之况.....442
182. 托带闺墨等物归乡.....444
183. 总期不自满为要.....445
184. 无日不看书虽万事丛忙亦不废正业.....447
185. 禀皮货保养收藏之法.....449
186. 祖母葬事谨遵天理.....451
187. 能勤能敬未有不兴.....454
188. 总须始终如一毋荒.....455
189. 保养之法慎饮食节嗜欲不在多服药.....457
190. 自己不立志虽日与尧舜汤同住
 亦彼自彼我自我矣.....459
191. 议次女婚配之事.....461
192. 择聘子侄之师.....464
193. 凡事皆应“久而敬之”.....466
194. 乱世居华屋广厦非所宜.....468
195. 读弟信不动心者必不友.....470
196. 痛悉兰姊仙逝.....471
197. 送家信赠品于弟.....472
198. 告弟检点以杜小人之谗口.....473

199. 兄弟皆处高明之地惟倍增敬慎.....474
200. 慰贺纪梁侄新入仕途.....475
201. 勿让人讥笑吾家势利.....476
202. 询弟仍修家谱否.....477
203. 为弟书铭旌闻檀香甚烈殊为可异.....478
204. 遣散勇次序不可凌乱.....479
205. 诸事清妥余兄弟进退有余裕.....480
206. 精于八股兼善讲解者请教训子弟.....481
207. 弟勿有拒谏之意.....482
208. 泽儿何必急于乡试.....484
209. 出殡之事一切皆从俭约.....486
210. 凡谕旨章奏付至家中者务宜好为藏去.....488
211. 勤则兴懒则败.....489
212. 三女许字意欲择一俭朴耕读之家.....491
213. 沅弟之字不可抛荒.....492
214. 戒傲戒惰保家之道也.....494
215. 惊悉鼎二侄殇逝.....495
216. 弟若不得志不妨来京广耳目豁心胸.....496
217. 纪泽颇思南归.....498
218. 赴圆明园正大当明殿考试.....499
219. 仰承祖上余荫六弟成就功名.....501
220. 用吹手执事接诰封数里.....502
221. 特命四弟专程送诰.....504
222. 欲迁祖母之坟.....506
223. 只要天不管地不管伏案用功而已.....507
224. 万望总持大纲以细微事附之四弟.....509
225. 近得次孙郭雨三欲妻之以女.....510

226. 气势团聚山水环抱者乃可寻地.....	512
227. 竞相以女配纪泽.....	513
228. 家中改屋便利为要.....	515
229. 贺澄弟生子.....	517
230. 奉寄纹银佳补.....	519
231. 望查失信.....	520
232. 在京祭祖父.....	522
233. 父母来京男不胜欣喜.....	524
234. 澄弟出京归家.....	525
235. 纪泽订婚尚待商酌.....	526
236. 拟绕道返家.....	528
237. 发谢署湖北巡抚之恩折.....	529
238. 纪泽须多写来信.....	530
239. 宜在家尽温清之职.....	532
240. 家中应种蔬养鱼养猪栽竹.....	533
241. 在兰溪舟次为长男四女订庚.....	534
242. 洪弟在家可留心学习.....	535
243. 后辈子侄宜教之以礼.....	536
244. 同游麻源.....	538
245. 宜和睦尽孝道.....	539
246. 每遇得意时便有失意相随.....	541
247. 折奏温弟殉节事.....	543
248. 寻得温弟无头之骸.....	544
249. 望沅弟速来.....	545
250. 拟改葬考妣之墓.....	547
251. 温弟奉追赠为太常寺卿.....	549
252. 悼叔父.....	550

253. 以八字诀为治家之道.....552
254. 乱世婚嫁宜早.....553
255. 哀恸季弟溘逝.....554
256. 商季弟灵柩迎置事宜.....555
257. 议季弟安葬马公塘.....557
258. 沅弟天性厚福泽无量.....558
259. 入城治季弟丧.....559
260. 登船迎接季弟灵柩.....560
261. 撰书季弟挽联.....561
262. 季弟蒙追赠按察使.....562
263. 弟尽可请本身夫妇诰轴.....563
264. 欲合葬季弟夫妇.....564
265. 请遂沅弟之愿葬马公塘.....565
266. 决葬季弟于马公塘.....566
267. 季弟灵柩已抵长沙.....567
268. 季弟得溢靖毅二字.....568
269. 派人送诰命回家.....570
270. 派人船回湘接眷属.....571
271. 家中之事概由老弟主持.....572
272. 力教家中勤俭为主.....573
273. 作寿诗遥贺沅弟生辰.....574
274. 温恒两弟又奉恩命.....575
275. 奏请沅弟开缺回籍调养.....576
276. 宜自知爱惜保养不可过劳.....577
277. 寄谕沅弟进京陛见.....578
278. 喜慰瑞侄考取县试之首.....579
279. 沅弟自以再出为是.....580

280. 纪泽母子至弟署不宜久住.....581
281. 告养生五事及治家之道.....582
282. 内人之病已难挽回.....584
283. 家中奢靡入不敷出.....585
284. 甚幸内人逃命不死.....587
285. 年迈纳妾岂不误人？.....589
- 处世篇
1. 久未接弟信心极悬悬.....591
2. 望加意款待袁铁庵.....592
3. 知漱六亲家去世.....593
4. 润帅事事推动让人虚良不可及.....594
5. 请让作梅先生找地.....595
6. 作挽联悼润帅.....596
7. 与人交际尚求其诚信素孚
 求其协助当亮其力量能为.....597
8. 余愧悔大负次青.....598
9. 唐鹤九作佳联挽季弟.....599
10. 香海不宜主东皋讲习.....600
11. 罗教师掌教东皋书院通县悦服.....601
12. 已换新衔何必辞谢？.....602
13. 弟保举贤才一疏何日拜发.....603
14. 近世保人亦有多少为难处.....604
15. 弟贺万寿折业已代写.....605
16. 春霆之病恐无救.....606
17. 澄弟有病可不必来.....607
18. 周李大挫尤焦灼了.....608
19. 诸弟应勤俭耕读奉亲教子.....609

-
20. 弟随南翁料理戎事足增长识力.....611
21. 应听中丞及左季调度.....613
22. 应专注陆路不必兼筹水师.....615
23. 将回驻弋阳.....616
24. 惦弟行路之苦.....619
25. 特派哨官赴抚州迎弟.....620
26. 轿夫之难得甚于名将.....621
27. 洪弟外出事尚须筹维.....622
28. 昨冒雨赶至祁门.....624

修身篇

1. 沿途赴京遇皇后仙逝

男国藩跪禀父亲母亲大人膝下：

去年十二月十六日，男在汉口寄家信，付湘潭人和纸行，不知已收到否？后于二十一日在汉口开车。二人共雇二把手小车六辆，男占三辆半。行三百余里，至河南八里溪度岁。正月初二日开车，初七日至周家口，即换大车。雇三套篷车二辆，每套钱十五千文。男占四套，朱占二套。初九日开车，十二日至河南省城，拜客耽搁四天，获百余金。十六日起行，即于是日三更趁风平浪静径渡黄河。二十八日到京，一路清吉平安，天气亦好，惟过年二天微雪耳。

到京在长郡会馆卸车。二月初一日移寓南横街千佛庵。屋四间，每月赁钱四千文，与梅、陈二人居址甚近。三人联会，间日一课。每课一赋一诗誊真。初八日是汤中堂老师大课，题“智若禹之行水赋”，以“行所无事则智大矣”为韵，诗题赋得“池面色吹柳絮行”，得“吹”字。三月尚有大课一次。

同年未到者不过一二人，梅、陈二人皆正月始到。岱云江南、山东之行无甚佳处，到京除偿债外，不过存二三百金，又

有八口之家。

男路上用去百金，刻下光景算好。接家眷之说，郑小珊现无回信。伊若龙诺，似尽妥妙；如其不可，则另图善计，或缓一二年亦可，因儿子太小故也。

家中诸事都不挂念，惟诸弟读书不知有进境否？须将所作文字诗赋寄一二首来京。丹阁叔大作亦望寄示。男在京一切谨慎，家中尽可放心。

又稟者，大行皇后于正月十一日开遐，百日以内禁剃发，期年禁燕会音乐。何仙搓年伯于二月初五日溘逝。是日男在何家早饭，并未闻真大病，不数刻而凶音至矣。歿后，加太子太保衔。其次子何子毅，已于去年十一月物故。目前年出京后，同乡相继殁逝者：夏一卿、李高衢、杨宝筠三主事，熊子谦、谢庵及何氏父子凡七人。光景为之一变。男现慎保身体，自奉颇厚。

季仙九师升正詹，放浙江学政，初十日出京。廖钰夫师升尚书。吴甄甫师任福建巡抚。朱师、徐师灵柩并已回南矣。

詹有乾家墨，到京竟不可用，以胶太重也。拟仍付回，或退或用随便。接家眷事，三月又有信回家中。信来，须将本房及各亲戚家附载详明，堂上各老人须一一分叙，以烦琐为贵。

谨此跪稟万福金安。

二月初九日

2. 九弟病愈不作归计

男国藩跪禀父母亲大人万福金安：

正月十七日发第二号家信，不知已收到否？男身体平安，男妇亦如常。九弟之病，自正月十六日后，日见强旺。二月一日开葷，现已全复元矣。二月以来，日日习字，甚有长进。男亦常习小楷，以为明年考差之具，近来改临智永《千字文》帖，不复临颜、柳二家帖，以不合时宜故也。孙男身体甚好，每日桃达欢呼，曾无歇息。孙女亦好。

浙江之事，闻于正月底交战，仍尔不胜。去岁所失宁波府城、定海镇海二县城尚未收复。英夷滋扰以来，皆汉奸助之为虐。此辈食毛践土，丧尽天良，不知何日罪恶贯盈，始得聚而歼灭！湖北崇阳县逆贼钟人杰为乱，攻占崇阳、通城二县。裕制军即日扑灭，将钟人杰及逆党槛送京师正法，余孽俱已搜尽。钟逆倡乱不及一月，党羽姻属，皆伏天诛。黄河去年决口，昨已合龙，大功告成矣。

九弟前病中思归，近因难觅好伴，且闻道上有虞，是以不复作归计。弟自病好后，亦安心不甚思家。李碧峰在寓住三月，现已找得馆地，在唐同年李杜家教书，每月俸金二两，月费一千。男于二月初配丸药一料，重三斤，约计费钱六千文。

男等在京谨慎，望父母亲大人放心。

男谨票二月二十四日

3 勉励君子应早立志

诸位贤弟足下：

十月二十一接九弟在长沙所发信，内途中日记六页，外药子一包。二十二接九月初二日家信，欣悉以慰。

自九弟出京后，余无日不忧虑，诚恐道路变故多端，难以臆揣。及读来书，果不出吾所料。千辛万苦，始得到家。幸哉幸哉！郑伴之不足恃，余早已知之矣。郁滋堂如此之好，余实不胜感激。在长沙时，曾未道及彭山妃，何也？又为祖母买皮袄，极好极好，可以补吾之过矣。

观四弟来信甚详，其发奋自励之志，溢于行间。然必欲找馆出外，此何意也？不过谓家塾离家太近，容易耽搁，不如出外较清净耳。然出外从师，则无甚耽搁；若出外教书，其耽搁更甚于家塾矣。且苟能发奋自立，则家塾可读书，即旷野之地，热闹之场亦可读书，负薪牧豕，皆可读书；苟不能发奋自立，则家塾不宜读书，即清净之乡、神仙之境皆不能读书。何必择地？何必择时？但自问立志之真不真耳！

六弟自怨数奇，余亦深以为然。然屈于小试辄发牢骚，吾窃笑其志之小，而所忧之不大也。君子之立志也，有民胞物与之量，有内圣外王之业，而后不恭于父母之所生，不愧为天地之完人。故其为忧也，以不如舜不如周公为忧也，以德不修学不讲为忧也。是故顽民梗化则忧之，蛮夷猾夏则忧之，小人在位贤才否闭则忧之，匹夫匹妇不被己泽则忧之，所谓悲天命而

悯人穷，此君子之所忧也。若失一易之屈伸，一家之饥饱，世俗之荣辱得失、贵贱毁誉，君子固不暇忧及此也。大弟屈于小试，自称数奇，余窃笑其所优之不大也。

盖人不读书则已，亦即自省曰读书人，则必从事于“大学”。“大学”之纲领有三：明德、新民、上至善，皆我分内事也。若读书不能体贴到身上去，谓此三项与我身毫不相涉，则读书何用？虽使能文能诗，博雅自诩，亦只算得识字之牧猪奴耳！岂得谓之明理有用之人也乎？朝廷以制艺取士，亦谓其能代圣贤立言，必能明圣贤之理，行圣贤之行，可以居官莅民、整躬率物也。若以明德、新民为分外事，则虽能文能诗，而于修己治人之道实茫然不讲，朝廷用此等人做官，与用牧猪奴做官何以异哉？然则既自名为读书人，则“大学”之纲领，皆己立身切要之事明矣。其条目有人，自我观之，其致功之处，则仅二者而已：曰格物，曰诚意。

格物，致知之事也；诚意，力行之事也。物者何？即所谓本末之物也。身、心、意、知、家、国、天下皆物也，天地万物皆物也，日用常行之事皆物也。格者，即格物而穷真理也。如事亲定省，物也；究其所以当定省之理，即格物也。事兄随行，物也；究其所以当随行之理，即格物也。吾心，物也；究其存心之理，又博究其省察涵养以存心之理，即格物也。吾身，物也；究其敬身之理，又博究其立齐坐尸以敬身之理，即格物也。每日所看之书，句句皆物也；切己体察，穷究其理即格物也。此致知之事也。所谓诚意者，即其所知而力行之，是不欺也。知一句便行一句，此力行之事也。此二者并进，下学在此，上达亦在此。

吾友吴竹如格物工夫颇深，一事一物，皆求其理。倭良峰先生则诚意工夫极严，每日有日课册，一日之中一念之差、一

事之失、一言一默皆笔之于书。书皆楷字，三月则订一本。自己未年起，今三十本矣。盖其慎独之严，虽妄念偶动，必即时克治，而著之于书。故所读之书，句句皆切身之要药。兹将艮峰先生日课抄三页付归，与诸弟看。余自十月初一日起亦照艮峰样，每日一念一事，皆写之于册，以便触目克治，亦写楷书。冯树堂与余同日记起，亦有日课册。树堂极为虚心，爱我如兄，敬我如师，将来必有所成。余向来有无恒之弊，自此次写日课本子起，可保终身有恒矣。盖明师益友，重重夹持，能进不能退也。本欲抄余日课册付诸弟阅，因今日镜海先生来，要将本子带回去，故不及抄。十一月有白折差，准抄几页付回也。

余之益友，如倭艮峰之瑟僩，令人对之肃然。吴竹如、窦兰泉之精义，一言一事，必求至是。吴子序、邵蕙西之谈经，深思明辨。何子贞之谈字，其精妙处，无一不合，其谈诗尤最符契。子贞深喜吾诗，故吾自十月来已作诗十八首。兹抄二页，付回与诸弟阅。冯树堂、陈岱云之立志，汲汲不遑，亦良友也。镜海先生，吾虽未尝执贽请业，而心已师之矣。

吾每作书与诸弟，不觉其言之长，想诸弟或厌烦难看矣。然诸弟苟有长信与我，我实乐之，如获至宝。人固各有性情也。

余自十月初一日起记日课，念念欲改过自新。思从前与小珊有隙，实是一朝之忿，不近人情，即欲登门谢罪。恰好初九日小珊来拜寿，是夜余即至小珊家久谈。十三日与岱云合伙，请小珊吃饭。从此欢笑如初，前隙尽释矣。

金竺虔报满用知县，现住小珊家，喉痛月余，现已全好。李笔峰在汤家如故。易莲舫要出门就馆，现亦甚用功，亦学倭艮峰者也。同乡李石梧已升陕西巡抚。两大将军皆锁拿解京治罪，拟斩监候。英夷之事，业已和抚。去银二千一百万两，又各处让他码头五处。现在英夷已全退矣。两江总督牛鉴，亦锁

解刑部治罪。

近事大略如此。容再续书。

兄国藩手具 十月二十六日

4. 读书应有志有识恒久

诸位贤弟足下：

十一月十七寄第三号信，想已收到。父亲到县纳漕，诸弟何不寄一信，交县城转寄省城也？以后凡遇有便，即须寄信，切要切要。九弟到家，遍走各亲戚家，必各有一番景况，何不详以告我？

四妹小产以后生育颇难，然此事最大，断不可以人力勉强。对渠家只须听其自然，不可过于矜持。又闻四妹起最晚，往往其姑反服事她。此反常之事，最足折福。天下未有不孝之妇而可得好处者，诸弟必须时劝导之，晓之以大义。

诸弟在家读书，不审每日如何用功？余自十月初一立志自新以来，虽懒惰如故，而每日楷书写日记，每日读史十页，每日记茶余偶谈一则，此三事未尝一日间断。十月二十一日立誓永戒吃水烟，泊今已两月不吃烟，已习惯成自然矣。予自立课程甚多，惟记茶余偶谈、读史十页、写日记楷本，此三事者誓终身不间断也。诸弟每人自立课程，必须有日日不断之功，虽行船走路，俱须带在身边，除此三事外，他课程不必能有成；而此三事者，将终身以之。

前立志作曾氏家训一部，曾与九弟详细道及。后因采择经史，若非经史烂熟胸中，则割裂零碎，毫无线索，至于采择诸子各家之言，尤为浩繁，虽抄数百卷犹不能尽收。然后知古人作《大学衍义》、《衍义补》诸书，乃胸中自有条例自有议论，

而随便引书以证明之，非翻书而遍抄之也。然后知著书之难，故暂且不作曾氏家训。若将来胸中道理愈多，议论愈贯串，仍当为之。

现在朋友愈多。讲躬行心得者，则有镜海先生、艮峰前辈、吴竹如、龚兰泉、冯树堂；穷经知道者，则有吴子序、邵蕙西；讲诗、文、字而艺通于道者，则有何子贞；才气奔放，则有汤海秋；英气逼人志大神静，则有黄子寿。又有王少鹤（名锡振，广西主事，年二十七岁，张筱浦之妹夫）、朱廉甫（名琦，广西乙未翰林）、吴菩莘畬（名尚志，广东人，吴抚台之世兄）、庞作人（名文寿，浙江人）。此四君者，首闻予名而先来拜。虽所造有浅深，要皆有志之士，不甘居于庸碌者也。京师为人文渊薮，不求则无之，愈求则愈出。近来闻好友甚多，予不欲先去拜别人，恐徒标榜虚声。盖求友以匡己之不逮，此大益也；标榜以盗虚名，是大损也。天下有益之事，即有足损者寓乎其中，不可不辨。黄子寿近作《选将论》一篇，共六千余字，真奇才也。黄子寿戊戌年始作破题，而六年之中遂成大学问，此天分独绝，万不可学而至。诸弟不必震而惊之，予不愿诸弟学他，但愿诸弟学吴世兄、何世兄。吴竹如之世兄现亦学艮峰先生写日记，言有矩，动有法，其静气实实可爱。何子贞之世兄，每日自朝至夕总是温书。三百六十日，除作诗文时，无一刻不温书。真可谓有恒者矣。故予从前限功课教诸弟，近来写信寄弟，从不另开课程，但教诸弟有恒而已。盖十人读书，第一要有志，第二要有识，第三要有恒。有志则断不甘为下流；有识则知学问无尽，不敢以一得自足，如河伯之观海，如井蛙之窥天，皆无识者也；有恒则断无不成之事。此三者缺一不可。诸弟此时，惟有识不可以骤几，至于有志有恒；则诸弟勉之而已。予身体甚弱，不能苦思，苦思则头晕，不耐久坐，久坐则倦乏，时时

属望惟诸弟而已。

明年正月恭逢祖父大人七十大寿，京城以进十为正庆。予本拟在戏园设寿筵，羹兰泉及艮峰先生劝止之，故不复张筵。盖京城张筵唱戏，名为庆寿，实则打把戏。兰泉之劝止，正以此故。现在作寿屏两架。一架淳化笺四大幅，系何子贞撰文并书，字有茶碗口大。一架冷金笺大小幅，系吴子序撰文，予自书。淳化笺系内府用纸，纸厚如钱，光彩耀目，寻常琉璃厂无有也。昨日偶有之，因买四张。子贞字甚古雅，惜太大，万不能寄回。奈何奈何！

侄儿甲三体日胖而颇蠢，夜间小解知自报，不至于湿床褥。女儿体好，最易扶携，全不劳大人费心力。

今年冬间，贺藕庚先生寄三十金，李双圃先生寄二十金，其余尚有小进项。汤海秋又自言借百金与我用。计还清兰溪、寄云外，尚可宽裕过年。统计今年除借会馆房钱外，仅借百五十金。岱云则略多些。岱云言在京已该帐九百余金，家中亦有此数，将来正不易还。寒十出身，不知何日是了也！我在京该账尚不过四百金，然苟不得差，则日见日紧矣。

书不能尽言，惟诸弟鉴察。

兄国藩手草 十二月二十日

5. 兄弟相论读史之道

诸位老弟足下：

正月十五日接到四弟、六弟、九弟十二月初五日所发家信。

四弟之信三页，语语平实。责我待人不恕，甚为切当。谓月月书信徒以空言责弟辈，却又不能实有好消息，令堂上阅兄之书疑弟辈粗俗庸碌，使弟辈无地可容云云。此数语，兄读之不觉汗下。

我去年曾与九弟闲谈，云为人子者，若使父母见得我好些，谓诸兄弟俱不及我，这便是不孝，若使族党称道我好些，谓诸兄弟俱不如我，这便是不悌。何也？盖使父母心中有贤愚之分，使族党口中有贤愚之分，则必其平日有讨好的意思，暗用机计，使自己得好名声，而使其兄弟得坏名声，必其后日之嫌隙由此而生也。刘大爷、刘三爷兄弟皆想做好人，卒至视如仇讎。因刘三爷得好名声于父母族党之间，而刘大爷得坏名声故也。今四弟之所责我者，正是此道理，我所以读之汗下。但愿兄弟五人，各各明白这道理，彼此互相原谅。兄以弟得坏名为忧，弟以兄得好名为快。兄不能使弟尽道得令名，是兄之罪；弟不能使兄尽道得令名，是弟之罪，若各各如此存心，则亿万年无纤芥之嫌矣。

至于家塾读书之说，我亦知其甚难，曾与九弟面谈及数十次矣。但四弟前次来书，言欲找馆出外教书。兄意教馆之荒功误事，较之家塾为尤甚。与其出而教馆，不如静坐家塾。若云一出家塾便有明师益友，则我境之所谓明师益友者，我皆知之，

且已夙夜熟筹之矣。惟汪觉庸师欧阳沧溟先生，是兄意中所信为可师，按衡阳风俗，只有冬学要紧，自五月以后，师弟皆奉行故事而已。同学之人，类皆庸鄙无志者，又最好讪笑人(其笑法不一，总之不离乎轻薄而已。四弟若到衡阳去，必以翰林之弟相笑。薄俗可恶)。乡间无朋友，实是第一恨事。不惟无益，且大有损。习俗染人，所谓与鲍鱼处，亦与之俱化也。兄曾与九弟道及：谓衡阳不可以读书，涟滨不可以读书，为损友太多故也。今四弟意必从觉庵师游，则千万听兄嘱咐，但取明师之益，无受损友之损也。

接到此信，立即率厚二到觉庵师处受业。其束脩，今年谨具钱十挂。兄于八月准付回，不至累及家中。非不欲从丰，实不能耳。兄所最虑者，同学之人无志嬉游，端节以后放散不事事，恐弟与厚二效尤耳。切戒切戒。凡从师必久而后可以获益。四弟与季弟今年从觉庵师，若地方相安，则明年仍可从游；若一年换一处，是即无恒者，见异思迁也，欲求长进难矣。

此以上答四弟信之大略也。

六弟之信，乃一篇绝妙古文。排鼻似昌黎，勘很似半山。予论古文，总须有倔强不驯之气，愈勘愈深之意。故于太史公外，独取昌黎、半山两家。论诗亦取傲兀不群者，论字亦然。每蓄此意，而不轻谈。近得何子贞意见极相合，偶谈一二句，两人相视而笑，不知六弟乃生成有此一枝妙笔。往时见弟文，亦无大奇特，今观此信，然后知吾弟真不羁才也。欢喜无极，欢喜无极！凡兄所有志而力不能为者，吾弟皆可为之矣。

信中言兄与诸君子讲学，恐其渐成朋党。所见甚是。然弟尽可放心。兄最怕标榜，常存暗然尚絅之意，断不至有所谓门户自表者也。信中言四弟浮躁不虚心，亦切中四弟之病。四弟当视为良友药石之言。

信中又有荒芜已久，甚无纪律二语。此甚不是。臣子与君亲，但当称扬善美，不可道及过错；但当谕亲于道，不可疵议细节。兄从前常犯此大恶，但尚最腹诽，未曾形之笔墨。如今思之，不孝孰大乎是？常与阳牧云并九弟言及之，以后愿与诸弟痛惩此大罪。六弟接到此信，立即至父亲前磕头，并代我磕头请罪。

信中又言弟之牢骚，非小人之热中，乃志士之惜阴。读至此，不胜惘然，恨不得生两翅忽飞到家，将老弟劝慰一番，纵谈数日乃快。然向使诸弟已入学，则谣言必谓学院做情。众口铄金，何从辩起！所谓塞翁失马，安知非福。科名迟早，实有前定，虽惜阴念切，正不必以虚名萦怀耳。

来信言看《礼记疏》一本半，浩浩茫茫，苦无所得，今已尽弃，不敢复阅，现读《朱子纲目》，日十余页云云。说到此处，兄不胜悔恨。恨早岁不曾用功，如今虽欲教弟，譬盲者而欲导人之迷途也，求其不误难矣。然兄最好苦思，又得诸益友相质证，于读书之道，有必不可易者数端：

穷经必专一经，不可泛鹜。读经以研寻义理为本，考据名物为末。读经有一耐字诀。一句不通，不看下句；今日不通，明日再读；今年不精，明年再读。此所谓耐也。读史之法，莫妙于设身处地。每看一处，如我便与当时之人酬酢笑语于其间。不必人人皆能记也，但记一人，则恍如接其人；不必事事皆能记也，但记一事，则恍如亲其事。经以穷理，史以考事。舍此二者，更别无学矣。

盖自西汉以至于今，识字之儒约有三途：曰义理之学，曰考据之学，曰词章之学。各执一途，互相诋毁。兄之私意，以为义理之学最大。义理明则躬行有要而经济有本。词章之学，亦所以发挥义理者也。考据之学，吾无取焉矣。此三途者，皆

从事经史，各有门径。吾以为欲读经史，但当研究义理，则心一而不纷，是故经则专守一经，史则专熟一代，读经史则专主义理。此皆守约之道，确乎不可身着也。

若失经史而外，诸子百家，汗牛充栋。或欲阅之，但当读一人之专集，不当东翻西阅。如读昌黎集，则目之所见，耳之所闻，无非昌黎。以为天地间，除昌黎集而外，更别无书也。此一集未读完，断断不换他集，亦专字诀也。六弟谨记之。

读经、读史、读专集、讲义理之学，此有志者万不可易者也。圣人复起，必从吾言矣。然此亦仅为有大志者言之。若夫为科名之学，则要读四书文，读试帖、律赋，头绪甚多。四弟、九弟、厚二弟天质较低，必须为科名之学。六弟既有大志，虽不科名可也，但当守一耐字诀耳。观来信言读《礼记疏》似不能耐者，勉之勉之。

兄少时天分不甚低，厥后日与庸鄙者处，全无所闻，窍被茅塞久矣。及乙未到京后，始有志学诗古文并作字之法，亦苦无良友。近年得一二良友，知有所谓经学者经济者，有所谓躬行实践者，始知范、韩可学而至也，司马迁、韩愈亦可学而至也，程、朱亦可学而至也。慨然思尽涤前日之污，以为更生之人，以为父母之肖子，以为诸弟之先导。元如体气本弱，耳鸣不止，稍稍用心，便觉劳顿。每自思念，天既限我以不能苦思，是天不欲成我之学问也。故近日以来，意颇疏散。计今年若可得一差，能还一切旧债，则将归田养亲，不复恋恋于利禄矣。粗识几字，不敢为非以蹈大戾已耳，不复有志于先哲矣。吾人第一以保身为要。我所以无大志愿者，恐用心太过，足以疲神也。诸弟亦须时时以保身为念，无忽无忽。

来信又驳我前书，谓必须博雅有才，而后可明理有用。所见极是。兄前书之意，盖以躬行为重，即子夏“贤贤易色”章

之意。以为博雅者不足贵，惟明理者乃有用，特其立论过激耳。六弟信中之意，以为不博雅多闻，安能明理有用？立论极精，但弟须力行之，不可徒与兄辩驳见长耳。

来信又言四弟与季弟从游觉庵师，六弟、九弟仍来京中，或肄业城南云云。兄之欲得老弟共住京中也，其情如孤雁之求曹也。自九弟辛丑秋思归，兄百计挽留，九弟当能言之。及至去秋决计南归，兄实无可如何，只得听其自便。若九弟今年复来，则一岁之内忽去忽来，不特堂上诸大人不肯，即旁观亦且笑我兄弟轻举妄动。且两弟同来，途费须得八十金，此时实难措办。弟云能自为计，则兄窃不信。曹西垣去冬已到京，郭筠仙明年始起程，目下亦无好伴。惟城南肄业之说，则甚为得计。兄于二月间准付银二十两至金竺虔家，以为六弟、九弟省城读书之用。竺虔于二月起身南旋，其银四月初可到。

弟接到此信，立即下省肄业。省城中兄相好的如郭筠仙、凌笛舟、孙芝房，皆在别处坐书院，贺蔗农、俞岱青、陈尧农、陈庆覃诸先生皆官场中人，不能伏案用功矣。惟闻有不君者（名叙忠，号秩臣，长沙廪生），学问切实，践履笃诚。兄虽未曾见面，而稔知其可师，凡与我相好者，皆极力称道丁君。两弟到省，先到城南住斋，立即去拜丁君（托陈季牧为介绍），执贽受业。凡人必有师；若无师，则严惮之心不生。即以下君为师，此外择友则慎之又慎。昌黎曰：“善不吾与，吾强与之附；不善不吾恶，吾强与之拒。”一生之成败，皆关乎朋友之贤否，不可不慎也。

来信以进京为上策，以肄业城南为次，舱弟兄非不欲从上策，因九弟去来太速，不好写信禀堂上。不特九弟形迹矛盾，即我禀堂上亦必自相矛盾也。又目下实难办途费。六弟言能自为计，亦未历甘苦之言耳。若我今年能得一差，则两弟今冬与

朱啸山同来甚好。目前且从次，如六弟不以为然，则再写信来商议可也。此答六弟信之大略也。

九弟之信，写家事详细，惜说话太短。兄则每每太长，以后截长补短为妙。尧阶若有大事，诸弟随去一人帮他几天。牧云接我长信，何以全无回信？毋乃嫌我话太直乎？扶乱之事，全不足信。九弟总须立志读书，不必想及此等事。季弟一切皆须听诸兄话。此次折弃走甚急，不暇抄日记本。余容后告。

冯树堂闻弟将到省城，写一荐条，荐两朋友。弟留心访之可也。

正月十七日

6. 读书宜专习字须有恒

温甫六弟左右：

五月二十九、六月初一连接弟三月初一、四月二十五、五月初一三次所发之信，并四书文二首，笔力实实可爱。

信中有云“于兄弟则直达其隐，父子祖孙间不得不曲致其情”，此数语有大道理。余之行事，每自以为至诚可质天地，何妨直情径行。昨接四弟信，始知家人天亲之地，亦有时须委曲以行之者，吾过矣，吾过矣。

香海为人最好，吾虽未与久居，而相知颇深，尔以兄事之可也。丁秩臣、王衡臣两君，吾皆未见，大约可为弟之师。或师之，或友之，在弟自为审择。若果威仪可则、淳实宏通，师之可也；若仅博雅能文，友之可也。或师或友，皆宜常存敬畏之心，不宜视为等夷，渐至慢褻，则不复能受其益矣。

弟三月之信所定功课太多，多则必不能专，万万不可。后信言已向陈季牧借《史记》，此不可不熟看之书。尔既看《史记》，则断不可看他书。功课无一定章法，但须专耳。余从前教诸弟，常限以功课。近来觉限大以课程，往往强人以所难，苟其不愿，虽日日遵照限程亦复无益，故近来教弟但有一专字耳。专字之外，又有数语教弟，兹特将冷金笺写出。弟可贴之座右，时时省览，并抄一副寄家中三弟。

香海言时文须学《东莱博议》，甚是。弟先须用笔圈点一遍，然后自选几篇读熟，即不读亦可。无论何书，总须从首至

尾通看一遍。不然，乱翻几页，摘抄几篇，而此书之大局精处茫然不知也。

学诗从“中州集”人亦好。然吾意读总集，不如读专集。此事人人意见各殊，嗜好不同。吾之嗜好，于五古则喜读《文选》，于七古则喜读昌黎集，于五律则喜读杜集，七律亦最喜杜诗，而苦不能步趋，故兼读元遗山集。吾作诗最短于七律，他体皆有心得；惜京都无人可与畅语，弟要学诗，先须看一家集，不要东翻西阅。先须学一体，不可各体同学。盖明一体，则皆明也。凌笛舟最善为律诗，若在省，尔可就之求教。

习字临《千字文》亦可，但须有恒。每日临帖一百字，万万无间断，则数年必成书家矣。陈季牧最喜谈字，且深思善悟。吾见其寄岱云信，实能知写字之法，可爱可畏。弟可从之切磋。此等好学之友，愈多愈好。

来信要我寄诗回南。余今年身体不甚壮健，不能用心，故作诗绝少，仅作感春诗七古五章。慷慨悲歌，自谓不让陈卧子，而语太激烈，不敢示人。余则仅作应酬诗数首，了无可观。顷作寄贤弟诗二首，弟观之以为何如？京笔现在无便可寄，总在秋间寄回。若无笔写，暂向陈季牧借一支，后日还他可也。

兄国藩手草六月初六日

7. 勉弟应在孝悌上用功

澄侯、叔淳、季洪三弟左右：

五月底连接三月一日、四月十八两次研发家信。

四弟之信，具见真性情，有因心横虑、郁积思通之象。此事断不可求速效。求速效必助长，非徒无益，而又害之。只要日积月累，如愚公之移山，终久必有豁然贯通之候；愈欲速则愈锅蔽矣。

来书往往词不达意，我能深谅其苦。今人都将学字看错了。若细读《贤贤易色》一章，则绝大学间即在家庭日用之间。于孝悌两字上尽一分便是一分学，尽十分便是十分学。今人读书皆为科名起见，于孝悌伦纪之大，反似与书不相关。殊不知书上所载的，作文时所代圣贤说的，无非要明自这个道理。若果事事做得，即笔下说不出何妨！若事事不能做，并有亏于伦纪之大，即文章说得好，亦只算个名教中之罪人。贤弟性情真挚，而短于诗文，何不日日在孝悌两字上用功？《曲礼》、《内则》所说的，句句依他做出，务使祖父母、父母、叔父母无一时不安乐，无一时不顺适；下而兄弟妻子皆蔼然有恩，秩然有序，此真大学问也。若诗文不好，此小事，不足计；即好极，亦不值一钱。不知贤弟肯听此语否？

科名之所以可贵者，谓其足以承堂上之欢也，谓禄仕可以养亲也。今吾已得之矣，即使诸弟不得，亦可以承欢，可以养亲，何必兄弟尽得哉？贤弟若细思此理，但于孝悌上用功，不

于诗文上用功，则诗文不期进而自进矣。

凡作字总须得势，务使一笔可以走千里，三弟之字，笔笔无势，是以局促不能远纵。去年曾与九弟说及，想近来已忘之矣。

九弟欲看余白折。余所写折子甚少，故不付。大铜尺已经寻得。付笔回南，目前实无妙便，俟秋间定当付还。

去年所寄牧云信未寄去，但其信前年劝牧云用功，后年劝凌云莫看地，实有道理。九弟可将其信抄一遍仍交与他，但将纺棉花一段删去可也。地仙为人主葬，害人一家，丧良心不少，未有不家败人亡者，不可不力阻凌云也。至于纺棉花之说，如直隶之三河县、灵寿县，无论贫富男妇，人人纺布为生，如我境之耕田为生也。江南之妇人耕田，犹三河之男人纺布也。湖南如浏阳之夏布、祁阳之葛布、宜昌之棉布，皆无论贫富男妇，人人依以为业。此并不足为骇异也。第风俗难以遽变，必至骇人听闻，不如删去一段为妙。书不尽言。

兄国藩手草六月初六日

8. 凡事皆贵专

四位老弟左右：

正月二十三日接到诸弟信，系腊月十六在省城发，不胜欣慰。四弟女许朱良四姻伯之孙，兰姊女许贺孝七之子，人家甚好，可贺。惟蕙妹家颇可虑，亦家运也。

六弟、九弟今年仍读书省城，罗山兄处附课甚好。既在此附课，则不必送诗文与他处看，以明有所专主也。凡事皆贵专。求师不专，则受益也不入；求友不专，则博爱而不亲。心有所专宗，而博观他途以扩其识，亦无不可。无所专宗，而见异思迁，此眩彼夺，则大不可。罗山兄甚为刘霞仙、欧晓岑所推服，有杨生(任光)者，亦能道其梗概，则其可为师表明矣，惜吾不得常与居游也，在省用钱，可在家中文用(银三十两则够二弟一年之用矣，亦在吾寄一千两之内)。予不能别寄与弟也。

我去年十一月二十日到京，彼时无折差回南，至十二月中旬始发信，乃两弟之信骂我糊涂。何不检点至此！赵子舟与我同行，曾无一信，其糊涂更何如耶？余自去年五月底至腊月初未尝接一家信。我在蜀可写信由京寄家，岂家中信不可由京寄蜀耶？又将骂何人糊涂耶！凡动笔不可不检点。

陈尧农先生信至今未接到。黄仙垣未到京。家中付物，难于费心，以后一切布线等物，均不必付。九弟与郑、陈、冯、曹四信，写作俱佳，可喜之至。六弟与我信字太草率，此关乎

一生福分，故不能不告汝也。四弟写信语太不圆，由于天分，吾不复责，余容续布，诸惟心照。

兄国藩手草 正月二十六日

9. 所寄银两为馈赠族戚之用

六弟、九弟左右：

三月八日接到两弟二月十五所发信，信面载第二号，则知第一号信未到。比去提塘追索，渠云并未到京，恐尚在省未发也。以后信宜交提塘挂号，不宜交折差手，反致差错。

来书言自去年五月至十二月，计共发信七八次。兄到京后，家人仅检出二次：一系五月二十二日发，一系十月十六日发。其余皆不知，远信难达，往往似此。

腊月信有糊涂字样，亦情之不能禁。盖望眼欲穿之时，疑信杂生，怨怒交至。惟骨肉之情愈挚，则望之愈殷；望之愈殷，则责之愈切。度日如年，居室如圆墙，望好音如万金之获，闻谣言如风声鹤唳；又加以堂上之悬思，重以严寒之逼人。其不能不出怨言以相詈，情之至也。然为兄者观此二字，则属曲谅其情，亦不能不责之；非责其情，责其字句之不检点耳。何芥蒂之有哉！

至于回京时有折弁南还，则兄实不知。当到家之际，门儿如市，诸务繁剧，吾弟可想而知。兄意谓家中接榜后研发一信，则万事可以放心矣，岂尚有悬挂者哉？来书辩论详明，兄今不复辩，盖彼此之心虽隔万里，而赤诚不啻目见，本无纤毫之疑，何必因二字而多费唇舌！以后来信，万万不必提起可也。

所寄银两，以四百为馈赠族戚之用。来书云：“非有未经审量之处，即似稍有近名之心。”此二语推勘入微，兄不能不

内省者也。又云，“所识穷乏得我而为之，抑逆知家中必不为此慷慨，而姑为是言。”斯二语者，毋亦拟阿兄不伦乎？兄虽不肖，亦何至鄙且奸至于如此之甚！所以为此者，盖族戚中有断不可不有一援手之人，而其余则牵连而及。

兄己亥年至外家，见大舅陶穴而居，种菜而食，为侧然者久之。通十舅送我，谓曰：“外甥做外官，则阿舅来作烧火夫也。”南王舅送至长沙，握手曰：“明年送外甥妇来京。”余曰：“京城苦，舅勿来。”舅曰：“然。然吾终寻汝任所也。”言已泣下。兄念母舅皆已年高，饥寒之况可想。而十舅且死矣，及今不一援手，则大舅、五舅，又能占我辈之余润乎？十舅虽死，兄意犹当恤其妻子；且从俗为之延僧，如所谓道场者，以慰逝者之魂而尽吾不忍死其舅之心。我弟我弟，以为可乎？

兰姊、蕙妹家运皆舛。兄好为识微之妄谈，谓姊犹可支撑，蕙妹再过数年则不能自存活矣。同胞姊妹，纵彼无触望，吾能不视如一家一身乎？

欧阳沧溟先生夙债甚多，其家之苦况，又有非吾家可比，故其母丧，不能稍隆厥礼。岳母送余时，亦涕泣而道。兄赠之独丰，则犹徇世俗之见也。

楚善叔为债主逼迫，入地无门。二伯祖母尝为余泣言之。又泣告子植曰：“八儿夜来泪注地湿，围径五尺也。”而田货于我家，价既不昂，事又多磨。尝胎书于我，备陈吞声饮泣之状。此子植所亲见，兄弟尝唏嘘久之。

丹阁叔与宝田表叔昔与同砚席十年，岂意今日云泥隔绝至此！知其窘迫难堪之时，必有饮恨于实命之不犹者矣。丹阁戊戌年曾以钱人千贺我。贤弟谅其景况，岂易办人千者乎？以为喜极，固可感也；以为钓饵，则亦可怜也。

任尊叔见我得官，其欢喜出于至诚，亦可思也。

竟希公一项，当甲午年抽公项三十二千为贺礼，渠两房颇不悦，祖父曰：“待藩孙得官，第一件先复竟希公项。”此语言之已熟，特各堂叔不敢反唇相讥耳。同为竟希公之嗣，而菀枯悬殊若此。设造物者一旦移其菀于彼二房，而移其枯于我房，则无论六百，即六两亦安可得耶？

六弟、九弟之岳家皆寡妇孤儿，槁饿无仓，我家不拯之，则孰拯之者？我家少八两，未必遂为债户逼取；渠得八两，则举室回春。贤弟试设身处地而知其如救水火也。

彭王姑待我甚厚，晚年家贫，见我辄泣。兹王姑已没，故赠宜仁王姑丈，亦不忍以死视王姑之意也。腾七则姑之子，与我同孩提长养。各舅祖则推祖母之爱而及也，彭舅曾祖则推祖父之爱而及也。陈本七、郑升六二先生，则因觉庵师而牵连及之者也。

其余馈赠之人，非实有不忍于心者，则皆因人而及。非敢有意讨好沽名钓誉，又安敢以己之豪爽形祖父之刻啬，为此奸鄙之心之行也哉？

诸弟生我十年以后，见诸戚族家皆穷，而我家尚好，以为本分如此耳，而不知其初皆与我家同盛者也。兄悉见其盛时气象，而今日零落如此，则大难为情矣。凡盛衰在气象，气象盛则虽饥亦乐，气象衰则虽饱亦忧。今我家方全盛之时，而贤弟以区区数百金为极少，不足比数。设以贤弟处楚善、宽五之地，或处葛、熊二家之地，贤弟能一日以安乎？凡遇之丰啬顺舛，有数存焉，虽圣人不能自为主张。天可使吾今日处丰亨之境，即可使吾明日处楚善、宽王之境。君子之处顺境，兢兢常觉天之过厚于我，我当以所余补人之不足。君子之处啬境，亦兢兢焉常觉天之厚于我：非果厚也，以为较之尤啬者，而我固已厚矣。古人所谓境地须看不如我者，此之谓也。

来书有“区区千金”四字，其母乃不知天之已厚于我兄弟乎？兄尝观“易”之道，察盈虚消息之理，而知人不可无缺陷也。日中则昃，月盈则亏，天有孤虚，地阙东南，“未有常全而不缺者”。“剥”也者，“复”之几也，君子以为可喜也。“夬”也者，“姤”之渐也，君子以为可危也。是故既吉矣，则由吝以趋于凶；既凶矣，则由悔以趋于吉。君子但知有悔耳。悔者，所以守其缺而不敢求全也。小人则时时求全；全者既得，而吝与凶随之矣。众人常缺，而一人常全，天道屈伸之故，岂若是不公乎？今吾家椿萱重庆，兄弟无故，京师无比美者，亦可谓至万全者矣。故兄但求缺陷，名所居曰求缺斋。盖求缺于他事，而求全于堂上。此则区区之至愿也。家中旧债不能悉清，堂上衣服不能多办，诸弟所需不能一给，亦求缺陷之义也。内人不明此意，而时时欲置办衣物，兄亦时时教之。今幸朱全备，待其全时，则吝与凶随之矣。此最可畏者也。贤弟夫妇诉怨于房闼之间，此是缺陷，吾弟当思所以弥其缺而不可尽给其求，盖尽给则渐几于全矣。吾弟聪明绝人，将来见道有得，必且黠余之言也。

至于家中欠债，则兄实有不尽知者。去年二月十六接父亲正月四日手谕，中云：“年事一切，银钱敷用有余。上年所借头息钱，均已完清。家中极为顺遂，故不窘迫。”父亲所言如此，兄亦不甚了了。不知所完究系何项？未完尚有何项？兄所知者，仅江孝八外祖百两、朱岚暄五十两而已。其余如耒阳本家之帐，则兄由京寄还，不与家中相干。甲午冬借添梓坪钱五十千，尚不知作何还法，正拟此次稟问祖父。此外帐目，兄实不知。下次信来，务望详开一单，使兄得渐次筹划，如弟所云家中欠债千余金，若兄早知之，亦断不肯以四百赠人矣。如今信去已阅三月，馈赠族戚之语，不知乡党已传播否？若以传播

而实不至，则祖父受蓄吝之名，我加一信，亦难免二三其德之消。此兄读两弟来书，所为踌躇而无策者也。兹特里堂上一禀。依九弟之言书之。谓朱啸山、曾受恬处二百落空，非初意所料。其馈赠之项，听祖父、叔父裁夺。或以二百为赠，每人减半亦可；或家中十分窘迫，即不赠亦可。戚族来者，家中即以此信示之，庶不悖于过则归己之义。贤弟观之以为何如也？若祖父、叔父以前信为是，慨然赠之，则此禀不必付归，兄另有安信付去。恐堂上慷慨持赠，反因接吾书而疑沮。凡仁心之发，必一鼓作气，尽吾力之所能为。稍有转念，则疑心生，私心亦生。疑心生则计较多，而出纳吝矣；私心生则好恶偏，而轻重乖矣。使家中慷慨乐与，则慎无以吾书生堂上之转念也。使堂上无转念，则此举也，阿兄发之，堂上成之，无论其为是为非，诸弟置之不论可耳。向使去年得云贵、广西等省苦差，并无一钱寄家，家中亦不能责我也。

九弟来书，楷法佳妙，余爱之不忍释手。起笔收笔皆藏锋，无一笔撒手乱丢，所谓有往皆复也。想与陈季牧讲究，彼此各有心得，可喜可喜。然吾所教尔者，尚有三事焉。一曰换笔。古人每笔中间必有一换。如绳索然。第一股在上，一换则第二股在上，再换则第三股在上也。笔尖之着纸者仅少许耳。此少许者，吾当作四方铁笔用。起处东方在左，西方向右，一换则东方向右矣。笔尖无所谓方也，我心中常觉其方。一换而东，再换而北，三换而西，则笔尖四面有锋，不仅一面向向矣。二曰结字有法。结字之法无穷，但求胸有成竹耳。

六弟之信，文笔拗而劲，九弟文笔婉而达，将来皆必有成。但目下不知各看何书？万不可徒看考墨卷，汨设性灵。每日习字不必多，作百字可耳。读背诵之书不必多，十页可耳。看涉猎之书不必多，亦十页可耳。但一部未完，不可换他部，此万

万不易之道。阿兄数千里外教尔，仅此一语耳。

罗罗山兄读书明大义，极所钦仰，借不能会面畅谈。

余近来读书无所得，酬应之繁，日不暇给，实实可厌。惟古文各体诗，自觉有进境，将来此事当有成就；恨当世无韩愈、王安石一流人与我相质证耳。贤弟亦宜趁此时学为诗、古文，无论是否，且试拈笔为之。及今不作，将来年长，愈怕丑而不为矣。每月大课，不必其定作时文也。古文、诗、赋、四六无所不作，行之有常。将来百川分流，同归于海。则通一艺即通众艺，通于艺即通于道，初不分而二之也。此论虽太高，然不能不为诸弟言之。使知大本大原，则心有定向，而不至于摇摇无着。虽当其应试之时，全无得失之见乱真意中，即其用力举业之时，亦于正业不相妨碍。诸弟试静心领略，亦可徐徐会悟也。

外附录“五箴”一首、“养身要言”一纸、“求缺斋课程”一纸，诗文不暇录，惟谅之。

兄国藩手书 三月初十日五箴并序

少不自立，荏苒遂泊今兹，盖古人学成之年，而吾碌碌尚如斯也，不其戚矣！继是以往，人事日纷，德慧日损，下流之赴，抑又可知，夫疾疾所以益智，逸豫所以亡身，仆以中材而履安顺，将欲刻苦而自振拔，谅委其难之！因作“五箴”以自创云。

立志箴

煌煌先哲，彼不犹太。藐焉小子，亦父母之身。聪明福祿，予我者厚哉！弃天而佚，是及凶灾。积悔累千，其终也已。往者不可追，请从今始。荷道以躬，与之以言。一息尚活，永矢弗援。

居敬箴

天地定位，二五胚胎。鼎焉作配，实日三才。伊恪斋明，以凝女命。女之不庄，伐生戕性。谁人可慢？何事可弛？弛事者无成，慢火者反尔。纵彼不反，亦长吾骄。八则下女，天罚昭昭。

主静箴

斋宿日观，天鸡一鸣，万籁俱息，但闻钟声。后有毒蛇，前有猛虎。神定不慑，谁敢余侮？岂伊避人，日对三军。我虑则一，彼纷不纷。驰鹜半生，曾不自主。今其老矣，殆扰扰以终古。

谨言箴

巧语悦人，自扰其身。闲言送日，亦搅女神。解大不夸，夸者不解。道听途说，智笑愚骇。骇者终明，谓女实欺。笑者鄙女，虽矢犹疑。尤悔既丛，铭以自攻。铭而复蹈，磋女既毫。

有恒箴

自吾识字，百历泊兹。二十有八载，则无一知。曩之所忻，阅时而鄙。故者既抛，新者旋徙。德业之不当，曰为物牵。尔之再食，曾未闻或愆。黍黍之增，久乃盈斗。天君司命，敢告马走。

养身要言

癸卯入蜀道中作

一阳初动处，万物始生时，不藏怒焉，不宿怨焉。（右仁所以养肝也。）

内有整齐思虑，外而敬慎威仪。泰而不骄，威而不猛。
(右礼所以养心也。)

饮食有节，起居有常。作事有恒，容止有定。(右信所以养脾也。)

扩然而大公，物来而顺应。裁之吾心而安，揆之天理而顺。
(右义所以养肺也。)

心欲其定，气欲其定，神欲其定，体欲其定。(右智所以养肾也。)

求缺斋课程

癸卯孟夏立

读熟读书十页。看应看书十页。习字一百。数息百人。记过隙影(即日记)。记茶余偶谈一则。(右每日课。)

逢三日写回信。逢八日作诗、古文一艺。(右月课。)

熟读书：易经、诗经、史记、明史、屈子、庄子、杜诗、韩文。

应看书不具载。

10. 论诸弟诗书文章

四位老弟足下：

自三月十三日发信后，至今未寄一信。余于三月二十四日移寓前门内西边碾儿胡同，与城外消息不通。四月间到折差一次，余竟不知。追既知，而折差已去矣。惟四月十九欧阳小岑南归，余寄衣箱银物并信一件。四月二十四梁慕庄南归，余寄书卷零物并信一件。两信皆仅数语，至今想尚未到。四月十三黄仙垣南归，余寄闱墨并无书信，想亦未到。兹将三次所寄各物另开清单付回，待三人到时，家中照单查收可也。

内城现住房共二十八间，每月房租京钱三十串，极为宽敞。冯树堂、郭筠仙所住房屋皆清洁。甲三于三月二十四日上学，天分不高不低，现已读四十天，读至自修齐至平治矣。因其年太小，故不加严。已读者字皆能识。两女皆平安。陈岱云之子在余家亦甚好。内人身体如常，现又有喜，大约九月可生。

余体气较去年略好，近因应酬太繁，天气渐热，又有耳鸣之病。今年应酬较往年更增数倍。第一为人写对联条幅，合四川、湖南两省求书者几日不暇给。第二公车来借钱者甚多，无论有借无借，多借少借，皆须婉言款待。第三则请酒拜客及会馆公事。第四则接见门生，颇费精神。又加以散馆，殿试则代人料理。考差则自己料理。诸事冗杂，遂无暇读书矣。三月二十八日挑甲午科，共挑知县因人、教官十九人。其全单已于梁慕庄所带信内寄回。四月初八日发会试榜，湖南中七人，四川

中大人，去年门生中二人。另有题名录附寄。十二日新进十复试。十四日发一等二十一名，另有单附寄。十六日考差，余在场，二文一诗，皆妥当无弊病，写亦无错落。兹将诗稿寄回。十八日散馆，一等十九名。本家心斋取一等十二名，陈启迈取二等第三名，二人俱留馆。徐棻因诗内皴字误写皱字，改作知县，良可惜也。二十二日散馆者引见，二十六七两日考差者引见，二十八日新进士朝考，三十日发全单附回。二十一日新进士殿试，二十四日点状元，全榜附回。五月初四五两日新进士引见。初一日放云贵试差，初二日钦派大教习二人，初六日奏派小教习大人，余亦与焉。

初十日春上谕，翰林侍读以下，詹事府洗马以下，自十六日起每日召见二员。余名次第六，大约十八日可以召见，从前无逐日分见翰詹之例，自道光十五年始一举行，足证圣上勤政求才之意。十八年亦如之，今年又如之。此次召见；则今年放差大半，奏对称旨者居其半，诗文高取者属其半也。

五月十一日接到四月十三家信，内四弟、六弟各文二首，九弟、季弟各文一首。四弟东皋课文甚洁净，诗亦稳妥。”则何以哉”一篇亦清顺有法，第词句多不圆，笔亦平沓不超脱。平沓最为文家所忌，宜力求痛改此病。六弟笔气爽利，近亦渐就范围。然词意平庸，无才气峥嵘之处，非吾意中之温甫也。如大弟之天姿不凡，此时作文，当求议论纵横，才气奔放，作为如火如荼之文，将来庶有成就。不然一挑半剔，意浅调卑，即使获售，亦当自惭其文之浅薄不堪。若其不售，则又两失之矣。今年从罗山游，不知罗山意见如何？吾谓六弟今年人泮固妙，万一不入，则当尽弃前功，一志从事于先辈大家之文。年过二十，不为少矣，若再扶墙摩壁，役役于考卷截搭小题之中，将来时过而业仍不精，必有悔恨于失计者，不可不早图也。余

当日实见不到此，幸而早得科名，朱受其害。向使至今未尝入泮，则数十年从事于吊渡映带之间，仍然一无所得，岂不靦颜也哉？此中误人终身多矣。温甫以世家之子弟，负过人之姿质，即使终不大泮，尚不至于饥饿，奈何亦以考卷误终身也？九弟要余改文详批，余实不善改小考文，当请曹西垣代改，下次折弁付回。季弟文气清爽异常，喜出望外，意亦层出不穷。以后务求才情横溢，气势充畅，切不可挑剔敷衍，安于庸陋。勉之勉之，初基不可不大也。书法亦有褚字笔意，尤为可喜。总之，吾所望于诸弟者，不在科名之有无，第一则孝悌为端，其次则文章不朽。诸弟若果能自立，当务其大者远者，毋徒汲汲于进学也。

冯树堂、郭筠仙在寓看书作文，功无间断。陈季牧日日习字，亦可畏也。四川门生留京约二十人，用功者颇多。余不尽书。

兄国藩草 五月十二日

11. 吾人应进德修业

四位老弟左右：

昨二十七日接信，快畅之至，以信多而处处详明也。

四弟七夕诗甚佳，已详批诗后。从此多作诗亦甚好，但须有志有恒，乃有成就耳。余于诗亦有工夫，恨当世无韩昌黎及苏、黄一辈大可与吾狂言者。但人事太多，故不常作诗，用心思索，则无时敢忘之耳。

吾人只有进德、修业两事靠得住。进德，则孝悌仁义是也；修业，则诗文作字是也。此二者由我作主，得尺则我之尺也，得寸则我之寸也。今日进一分德，便算积了一升谷；明日修一分业，又算余了一文钱，德业并增，则家私日起。至于功名富贵，悉由命定，丝毫不能自主。昔某官有一门生为本省学政，托以两孙当面拜为门生。后其两孙岁考临场大病，科考丁艰，竟不入学。数年后两孙乃皆入，其长者仍得两榜。此可见早迟之际，时刻皆有前定。尽其在我，听其在天，万不可稍生妄想。六弟天分较诸弟更高，今年受黜，未免愤怨。然及此正可困心横虑，大加卧薪尝胆之功，切不可因愤废学。

九弟劝我治家之法，甚有道理。喜甚慰甚。自荆七遣去之后，家中亦甚整齐，问率五归家便知。《书》曰：“非知之艰，行之维艰。”九弟所言之理，亦我所深知者。但不能庄严威力，使人望若神明耳。自此后，当以九弟言书诸绅而刻刻警省。

季弟信天性笃厚，诚如四弟所云“乐何如之，求我示读书

之法及进德之道，另纸开示。余不具。

国藩手草 八月二十九日

12. 切莫恃才傲物动谓人不如己

四位老弟足下：

前次回信内有因弟诗，想已收到。九月家信有送率五诗五首，想已阅过。吾人为学最要虚心。尝见朋友中有美材者，往往恃才傲物，动谓人不如己，见乡墨则骂乡墨不通，见会墨则骂会墨不通，既骂房官，又骂主考，未入学者则骂学院。平心而论，己之所为诗文，实亦无胜人之处；不特无胜人之处，而且有不堪对人之处。只为不肯反求诸己，便都见得人家不是，既骂考官，又骂同考而先得者。傲气既长，终不进功，所以潦倒一生而无寸进也。

余平生科名极为顺遂，惟小考七次始售。然每次不进，未尝敢出一怨言，但深愧自己试场之诗文太丑而已。至今思之，如芒在背。当时之不敢怨言，诸弟问父亲、叔父及朱尧阶便知。盖场屋之中，只有文丑而侥幸者，断无文佳而埋没者，此一定之理也。

三房十四叔非不勤读，只为傲气太胜，自满自足，遂不能有所成。京城之中，亦多有自满之人。识者见之，发一冷笑而已。又有当名士者，鄙科名为粪土，或好作诗古，或好讲考据，或好谈理学，器器然自以为压倒一切矣。自识者观之，彼其所造，曾无几何，亦足发一冷笑而已。故吾人用功，力除傲气，力戒自满，毋为人所冷笑，乃有进步也。

诸弟平日皆恂恂退让，第累年小试不售，恐因愤激之久，

致生骄傲之气，故特作书戒之，务望细思吾言而深省焉。幸甚幸甚。

国藩手草 十月二十一日

13. 学问之道无穷总以有恒为主

四位老弟足下：

前月寄信，想已接到。余蒙祖宗遗泽、祖父教训，幸得科名，内顾无所忧，外遇无不如意，一无所触矣。所望者再得诸弟强立，同心一力，何患令名之不显？何患家运之不兴？欲别立课程，多讲规条，使诸弟遵而行之，又恐诸弟习见而生厌心；欲默默而不言，又非长兄督责之道。是以往年常示诸弟以课程，近来则只教以有恒二字。所望于诸弟者，但将诸弟每月功课写明告我，则我心大慰矣。乃诸弟每次写信，从不将自己之业写明，乃好言家事及京中诸事。此时家中重庆，外事又有我料理，诸弟一概不管可也。以后写信，但将每月作诗几首，作文几首，看书几卷，详细告我，则我欢喜无量。诸弟或能为科名中人，或能为学问中人，其为父母之令子一也，我之欢喜一也。慎弗以科名稍迟，而遂谓无可自力也。如霞仙今日之身份，则比等闲之秀才高矣。若学问愈进，身份愈高，则等闲之举人、进十又不足论矣。

学问之道无穷，而总以有恒为主。兄往年极无恒，近年略好，而犹未纯熟，自七月初一起，至今则无一日间断。每日临帖百字，抄书百字，看书少亦须满二十页，多则不论。自七月起，至今已看过《王荆公文集》百卷，《归震川文集》四十卷，《诗经大全》二十卷，《后汉书》百卷，皆朱笔加圈批。虽极忙，亦须了本日功课，不以昨日耽搁而今日补做，不以明日有

事而今日预做。诸弟若有恒如此，则虽四弟中等之资，亦当有所成就，况大弟、九弟上等之资乎？

明年肄业之所，不知已有定否？或在家，或在外，无不可者。谓在家不可用功，此乃于卸责者也，吾今在京，日日事务纷冗，而犹可以不间断，况家中万万不及此间之纷冗乎？树堂、筠仙自十月起，每十日作文一首，每日看书十五页，亦板有恒。诸弟试将朱子“纲目”过笔圈点，定以有恒，不过数月即圈完矣。若看注疏，每经亦不过数月即完。切勿以家中有事而间断看书之课，又弗以考试将近而间断看书之课。虽走路之日，到店亦可看；考试之日，出场亦可看也。

兄日夜悬望，独此有恒二字告诸弟，伏愿诸弟刻刻留心。幸甚幸甚。

兄国藩手草 十一月二十一日

14. 空言无益务实为宜

诸位老弟足下：

十四日发十四号家信，因折弁行急，未作书与诸弟。十六早接到十一月十二所发信，内父亲一信、四位老弟各一件。是日午刻又接九月十二所寄信，内父亲及四、六、九弟各一件。俱悉一切，不胜欣幸。

曹石礪明府待我家甚为有礼，可感之至。兹寄一信去。西坤四位，因送项太简，致生嫌隙。今虽不复形之口角，而其心究不免有觖望。故特作信寄丹阁叔，使知我家光景亦非甚裕者。贤弟将此信呈堂上诸大人，以为开诚布公否？如堂上诸大人执意不肯送去，则不送亦可也。四弟之诗又有长进，第命意不甚高超，声调不甚响亮。命意之高，须要透过一层。如说考试，则须说科名是身外物，不足介怀，则诗意高矣；若说必以得科名为荣，则意浅矣。举此一端，余可类推。腔调则以多读诗为主，熟则响矣。去年树堂所寄之笔，亦我亲手买者。春光醉目前每支大钱五百文，实不能再寄，汉壁尚可寄，然必明年会试后乃有使人回南，春间不能寄也。五十读书固好，然不宜以此耽搁自己功课。女子无才便是德，此语不诬也。常家欲与我结婚，我所以不顾者，因闻常世兄最好恃父势作威福，衣服鲜明，仆从烜赫；恐其家女子有宦家骄奢习气，乱我家规，诱我子弟好奢耳。今渠再三要结婚，发甲五八字去，恐渠家是要与我为亲家，非欲与弟为亲家，此语不可不明告之。贤弟婚事，我不敢作主，但亲家为人何如，亦须向汪三处查明。若吃鸦片烟，

则万不可对；若无此事，则听堂上各夫人与弟自主之可也。所谓翰堂秀才者，其父子皆不宜亲近，我曾见过，想衡阳人亦有知之者。若要对亲，或另请媒人亦可，六弟九月之信，于自己近来弊病颇能自知，正好用功自医，而犹曰“终日泄泄”，此则我所不解者也。家中之事，弟不必管。天破了自有女娲管，洪水大了自有禹王管。家事有堂上大人管，外事有我管，弟只安心自管功课而已，何必问其他哉？至于宗族姻党，无论他与我家有隙无隙，在弟辈只宜一概爱之敬之。孔子曰“泛爱众而亲仁”，孟子曰“爱人不亲反其仁”，“礼大不答反其敬”。此刻未理家事，若便多生嫌怨，将来当家立业，岂不个个都是仇人？古来无与宗族多党为仇之圣贤，弟辈万不可专责他人也。十一月信言现看《庄子》并《史记》甚善。但作事必须有恒，不可谓考试在即，便将未看完之书丢下。必须从首至尾，句句看完。若能明年将《史记》看完，则以后看书不可限量，不必问进学与否也。贤弟论袁诗、论作字亦皆有所见，然空言无益，须多做诗多临帖，乃可谈耳。譬如人欲进京，一步不行，而在家空言进京程途，亦何益哉？即言之津津，人谁得而信之哉？九弟之信，所以规劝我者甚切，余览之不觉毛骨悚然。然我用功，实脚踏实地，不敢一毫欺人。若如此做去，不作外官，将来道德文章必粗有成就。上不敢欺天地祖父，下不敢欺诸弟与儿子也。而省城之闻望日隆，即我亦不知其所自来。我在京师，惟恐名浮于实，故不先拜一人，不自诩一言，深以过情之闻为耻耳。来书写大场题及榜信，此间九月早已知之。惟县考案首前列及进学之人，则至今不知。诸弟以后写信，于此等小事及近处族戚家光景，务必一一详载。季弟信亦谦虚可爱，然徒谦亦不好，总要努力前进。此全在为兄者倡率之。余他无可取，惟近来日日有恒，可为诸弟倡率。四弟、六弟纵不欲以有

恒自立，独不怕坏季弟之样子乎？

昨十六日卓秉恬拜大学士，陈官俊得协办大学士。自王中堂死后，隔三年，大学士始故人，亦一奇也。书不宣尽。

兄国藩手具 十二月十八日

15. 事事应勤思善问

四位老弟足下：

去年十二月二十二日寄去书函谅已收到。顷接四弟信，谓前信小注中误写三字。其诗比即付还，今亦忘其所误谓何矣。

诸弟写信总云仓忙，六弟去年曾言城南寄信之难，每次至抚院费奏厅打听云云。是何其蠢也！静坐书院三百六十日，日日皆可写信，何必打听折差行期而后动笔哉？或送至提塘，或送至岱云家，皆万无一失，何必问了无关涉之费奏厅哉？若弟等仓忙，则兄之仓忙殆过十倍，将终岁无一字寄家矣！

送王五诗第二首，弟不能解，数千里致书来问。此极虚心，余得信甚喜。若事事勤思善问，何患不一日千里？兹另纸写明寄回。家塾读书，余明知非诸弟所甚愿，然近处实无名师可从，省城如陈尧农、罗罗山皆可谓明师，而六弟、九弟又不善求益；且住省二年，诗文与字皆无大长进。如今我虽欲再言，堂上大人亦必不肯听。不如安分耐烦，寂处里间，无师无友，挺然特立，作第一等人物。此则我之所期于诸弟者也。昔婺源汪双池先生一贫如洗，三十以前在窑上为人佣工画碗，三十以后读书，训蒙到老，终身不应科举。卒著书百余卷，为本朝有数名儒。彼何尝有师友哉？又何尝出里间哉？余所望于诸弟者，如是而已，然总不出乎立志有恒四字之外也。

买笔付回，刻下实无妙便，须公车归乃可带回。大约府试院试可得用，县试则赶不到也。诸弟在家作文，若能按月付至

京，则余请树堂看。随到随改，不过两月，家中又可收到。书不详尽，余俟续具。

兄国藩手草 二月初一日

16. 诸弟皆中试欢慰之至

男国藩跪禀父母亲大人膝下：

五月初六日，男友第六号家信后，十七日接到诸弟四月二十二日在县所发信。欣悉九弟得取前列第三，余三弟皆取前二十名，欢慰之至。

诸弟前所付诗文到京，兹特请杨春皆改正付回。今年长进甚远，良可忻慰。向来六弟文笔最矫健，四弟笔颇笨滞，观其“为仁矣”一篇，则文笔大变，与六弟并称健者。九弟文笔清贵，近来更圆转如意。季弟诗笔亦秀雅。男再三审览，实堪怡悦。

男在京平安。十六七偶受暑，服药数帖，禁荤数日而愈，现已照常应酬。男妇服补剂已二十余帖，大有效验。医人云虚弱之症，能受补则易好。孙男女及合室下人皆清吉。

长沙馆于五月十二日演戏题名，状元南元朝元三匾，同日张挂，极为热闹，皆男总办，而人人乐从。头门对联云：同科十进士，庆榜三名元。可谓盛矣。

同县邓铁松在京患吐血病，甚为危症，大约不可挽回。同乡有危急事，多有就男商量者，男效祖大人之法，银钱则量力资助，办事则竭力经营。

严丽生取九弟置前列，男理应写信谢他；因其平日官声不甚好，故不愿谢。不审大人意见如何？我家既为乡绅，万不可入署说公事，致为官长所鄙薄。即本家有事，情愿吃亏，万不可与人构讼，令官长疑为倚势凌人。伏乞慈鉴

男谨稟 五月二十九日

17. 只求康安不求为差

男国藩跪禀父母亲大人万福金安：

正月初三日发第一号家信。初七日彭棣楼太守出京，男寄补服四副、蓝顶二个，又寄欧阳沧溟先生江绸褂料一件、对联一副、高丽参二两、鹿胶一斤，又寄彭萑庵表叔鹿胶一斤。二月初寄第三号家信。想俱收到。

男等在京合室平安。男病尚未痊愈，二月初吃龙胆泻肝汤，甚为受累，始知病在肝虚。近来专服补肝之品，颇觉有效。以首乌为君，而加以疾藜、淮山药、赤芍、茯苓、兔丝诸味。男此时不求疮癣遽好，但求脏腑无病，身体如常，即为如天之福。今年虽不能得差，男亦毫无怨尤。

同乡张钟涟丁艰，男代为张罗一切，令之即日奔丧回里。黎樾乔于二月十四到京。

四弟近日读书，专以求解为急，每日摘疑义二条来问。为男煮药求医及纪泽教书，皆因弟独任其劳。六弟近日文思大进，每月作四书文六首、经文三首，同人无不击节称赏。

请封之事，大约六月可以用玺，秋冬可以寄家。余详四弟书中。

男谨禀 二月十六日

18. 劝四弟应勤劳早起

四弟、九弟、季弟足下：

六月二十八日发第九号家信，想已收到。七月以来，京寓大小平安。癖疾虽头面微有痕迹，而于召见已绝无妨碍。从此不治，听之可也。

丁士元散馆，是诗中“皓月”误写“浩”字。胡家玉是赋中“先生”误写“先王”。

李竹屋今年在我家教书三个月，临行送他俸金，渠坚不肯受。其人知情知义，予仅送他褂料被面等物，竟未送银。渠出京后来信三次。予有信托立夫先生为渠荐馆。昨立夫先生信来，已请竹屋在署教读矣，可喜可慰。

藕庚先生革职，同乡莫不嗟叹。而渠屡次信来，绝不怪我，尤为可感可敬。

《岳阳楼记》，大约明年总可寄到。家中《五种遗规》，四弟须日日看之，句句学之。我所望于四弟者，惟此而已。家中蒙祖父厚德余荫，我得恭列卿贰，若使兄弟妯娌不和睦，后辈子女无法则，则骄奢淫佚，立见消败。虽贵为宰相，何足取哉？我家祖父、父亲、叔父三位大人规矩极严，榜样极好，我辈踵而行之，极易为力。别家无好榜样者，亦须自立门户，自立规条；况我家祖父榜样，岂可不遵行之而忍令坠落之乎？现在我不在家，一切望四弟作主。兄弟不和，四弟之罪也；妯娌不睦，四弟之罪也；后辈骄恣不法，四弟之罪也。我有三事奉

劝四弟：一曰勤，二曰早起，三曰看《五种遗规》。四弟能信此三语，便是爱兄敬兄；若不信此三语，便是弁髦视兄。我家将来气象之兴衰，全系乎四弟一人之身。

大弟近来气性极和平，今年以来未曾动气，自是我家好气象。惟兄弟俱懒。我以有事而懒，大弟无事而亦懒，是我不甚满意处。若二人俱勤，则气象更兴旺矣。吴、彭两寿文及小四书序、正待聘之父母家传，俱于八月付回，大约九月可到。

袁漱六处，予意已定将长女许与他，六弟已当面与他说过几次矣，想堂上大人断无不允。予意即于近日订庚，望四弟稟告堂上。陈岱云处婚事，予意尚有迟疑。前日四弟信来，写堂上允诺欢喜之意。筠仙已经看见，比书信告岱云矣。将来亦必成局，而予意尚有一二分迟疑。岱云丁艰，余拟送奠仪，多则五十，少则四十，别有对联之类，家中不必另致情也。余不尽言。

兄国藩手草 七月十八日

19. 栽竹种树以聚气象

男国藩跪禀父母亲大人万福金安：

十二月初五接到家中十一月初旬所发家信，俱悉一切。男等在京身体平安。男癖疾已痊愈，六弟体气如常。纪泽兄妹五人皆好。男妇怀喜平安，不服药。

同乡各家亦皆无恙。陈本七先生来京，男自有处置之法，大人尽可放心，大约款待从厚，而打发从薄。男光景颇窘，渠来亦必自悔。

九弟信言母亲常睡不着。男妇亦患此病，用熟地、当归蒸母鸡食之，大有效验。九弟可常办与母亲吃。乡间鸡肉、猪肉最为养人，若常用黄芪、当归等类蒸之，略带药性而无药气，堂上五位大人食之，甚有益也，望诸弟时时留心办之。

老秧田背后三角丘是竹山湾至我家大路，男曾对四弟言及，要将路改于墪下，在檀山嘴那边架一小轿，由豆土排上横穿过来。其三角丘则多栽竹树，上接新塘墪大松树，下接檀山嘴大藤包裹，甚为完紧，我家之气更紧。望堂上大人细思。如以为可，求叔父于明春栽竹种树；如不可，叔父写信示知为幸。

男等于二十日期服已满，敬谨祭告。二十九日又祭告一次。余俟续具。

十二月初六日

20. 贤肖不在高位而在谨朴

澄侯、温甫、子植、季洪足下：

四月十四日接到己酉三月初九研发第四号来信，次日又接到二月二十三研发第三号来信，其二月初四研发第二号信则已于前次三月十八接到矣，惟正月十六七所发第一号信则至今未接到。京寓今年寄回之家书：正月初十发第一号(折弁)，二月初八发第二号(折弁)，二十六发第三号(折弁)，三月初一发第四号(齐心农太守)，大约五月初可到省；十九发第五号(折弁)，四月十四发第六号(由陈竹伯观察)，大约五月底可到省。《岳阳楼记》，竹伯走时尚未到手，是以未交渠。一两月内，不少妥便，亦必可寄到家也。祖父大人之病，日见日甚如此，为子孙者远隔数千里外，此心何能稍置！温弟去年若未归，此时在京，亦刻不能安矣。诸弟仰观父、叔纯孝之行，能人人竭力尽劳，服事堂上，此我家第一吉祥事。我在京寓，食膏粱而衣锦绣，竟不能效半点孙子之职；妻子皆安坐享用，不能分母亲之劳。每一念及，不觉汗下。

吾细思凡天下官宦之家，多只一代享用便尽。其子孙始而骄佚，继而流荡，终而沟壑，能庆延一二代者鲜矣。商贾之家，勤俭者能延三四代；耕读之家，谨朴者能延五六代；孝友之家，则可以绵延十代八代。我今赖祖宗之积累，少年早达，深恐其以一身享用殆尽，故教诸弟及儿辈，但愿其为耕读孝友之家，不属其为仕宦之家。诸弟读书不可不多。用功不可不勤，切不可时时为科第仕宦起见。若不能看透此层道理，则虽巍科显宦，

终算不得祖父之贤肖，我家之功臣。若能看透此道理，则我钦佩之至。澄弟每以我升官得差，便谓我是肖子贤孙，殊不知此非贤肖也。如以此为贤肖，则李林甫、卢怀慎辈，何尝不位极大臣，赫奕一时，诘得谓之贤肖哉？予自问学浅识薄，谬膺高位，然所刻刻留心者，此时虽在宦海之中，却时作上岸之计。要令罢官家居之日，己身可以淡泊，妻子可以服劳，可以对祖父兄弟，可以对宗族乡党。如是而已，诸弟见我之立心制行与我所言有不符处，望时切实箴规。至要至要。鹿茸一药，我去腊甚想买就寄家，曾请漱六、岷樵两人买五六天，最后买得一架，定银九十两。而请人细看，尚云无力。其有力者，必须百余金，到南中则值二百余金矣；然至少亦须四五两乃可奏效。今澄弟来书，言谭君送四五钱便有小效，则去年之不买就急寄，余之罪可胜悔哉！近日拟赶买一架付归。以父、叔之孝行推之，祖大人应可收药力之效。叔母之病，不知宜用何药？若南中难得者，望书信来京购买。

安良会极好。地方有盗贼，我家出力除之，正是我家此时应行之事。细毛虫之事，尚不过分，然必须到这田地方可动手。不然，则难免恃势欺压之名。既已惊动官长，故我特作书谢施梧冈，到家即封口送县可也。去年欧阳家之事，今亦作书谢伍仲常，送阳凌云，嘱其封口寄去可也。

澄弟寄俩裳书，无一字不合。蒋祝三信已交渠。兹有回信，家中可专人送至渠家，亦免得他父母悬望。予因身体不旺，生怕得病，万事废弛，抱疚之事甚多。本想诸弟一人来京帮我，因温、沅乡试在迩，澄又为家中必不可少之人，洪则年轻，一人不能来京；且祖大人未好，岂可一人再离膝下？只得挨明年再说。

希六之事，余必为之捐从九品。但恐秋间乃能上兑，乡试

后南旋者乃可带照归耳。书不能详，余俟续寄。

国藩手草 四月十六日

21. 告癯疾已有大好之象

澄侯、温甫、子植、季洪足下：

四月十八日发家信第七号，想已收到。近一月余无折弁来，以新抚台尚未到任。五月十一接澄弟四月八日所发第五号信，并二十六日研发第六号信，而正月十七第一号信至今未到，诚不可解。

京寓自四月以来，一切平安。癯疾经邹墨林开方做丸药，有附子、黄芪等补阳之药，愈见大好。面上、头上，生人全看不出矣。纪泽几近作史论，略成章句。兹命其誉两首寄呈堂上一阅。次儿之名，音与叔父名相近，已改名纪鸿。体甚肥大，尚不能行动。不能说话。四女皆好。闰四月初九日考差题“士志于道”一章，经题“闰月则阖门左扉”，诗题赋得“岁丰仍节俭”，得“仍”字。

澄弟《岳阳楼记》拟交广西主考带去，大约七月初旬可到长沙。澄弟若高兴入闱，中元前后到长沙，定可接到。然温、植二弟到省以后，恐家中无人侍候，澄弟即不入闱亦可。宜禀堂上，间宜如何耳。

去年冬底所寄各族戚家微资，今年家书总未提及，不知竟一一如数交去否？乞示知。余不详尽，俟下次续具。

兄国藩手草 五月十五日

22. 凡行公事须深谋远虑

澄侯、温甫、子植、季洪四位老弟足下：

八月十四日发第九号信，至十七日接到家信第七、第八二号，欣悉一切。

左光八为吾乡巨盗，能除其根株，扫其巢穴，则我境长享其利，自是莫大阴功。第湖南会匪所在勾结，往往牵一发而全身皆动。现在制军程公特至湖南，即是奉旨查办此事。盖恐粤西匪徒穷窜，一人湖南境内，则楚之会匪因而窃发也。左光八一起，想尚非巨伙入会者流。然我境办之，亦不可过激而生变。现闻其请正绅保举，改行为良，且可捉贼自效，此自一好机会。万一不然亦须相机图之，不可用力太猛，易发难收也。

公议粮饷一事，果出通邑之愿，则造福无量。至于帮钱垫官之亏空，则我家万不可出力。盖亏空万六千两，须大钱三万余千，每都几项派千串。现在为此说者，不过数大绅士一时豪气，为此急公好义之言。将来各处分派，仍是巧者强者少出而讨好于官之前，拙者弱者多出而不免受人之勒。穷乡殷实小户，必有怨声载道者矣。且此风一开，则下次他官来此，既引师令之借钱办公为证，又引朱令之民帮垫亏为证，或亦分派民间出钱帮他，反党无辞以谢。若相援为例，来一官帮一官，吾邑自此无安息之日矣。

凡行公事，须深谋远虑。此事若各绅有意，吾家不必拦阻；

若吾家倡议，则万万不可。且官之补缺皆有呆法，何缺出轮何班补，虽抚藩不能稍为变动。澄弟在外多年，岂此等亦未知耶？朱公若不轮到班，则虽帮垫亏空，通邑挽留，而格于成例，亦不可行。若已轮到班，则虽不垫亏空，亦自不能不补此缺。间有特为变通者，督抚专折奏请，亦不敢大违成例。季弟来书，若以朱公之实授与否，全视乎亏空之能垫与否，恐亦不尽然也。曾仪斋若系革职，则不复能穿补子；若系大计休致，则尚可穿。

季弟有志于道义身心之学，余阅其书，不胜欣喜。凡人无不可为圣贤，绝不系乎读书之多寡。吾弟诚有志于此，须熟读《小学》及《五种遗规》二书。此外各书能读固佳，不读亦初无所损。可以为天地之完人，可以为父母之肖子，不必因读书而后有所加于毫末也。匪但四六古诗可以不看，即古文为吾弟所愿学者，而不看亦自无妨。但守《小学》《遗规》二书，行一句算一句，行十句算十句，贤于记诵词章之学万万矣。季弟又言愿尽孝道，惟亲命是听。此尤足补我之缺憾。我在京十余年，定省有阙，色笑远违，寸心之疚，无刻或释。若诸弟在家能婉愉孝养，视无形，听无声，则余能尽忠，弟能尽孝，岂非一门之祥瑞哉？愿诸弟坚持此志，日日勿忘，则兄之疚可以稍释。幸甚幸甚。书不十一，余俟续具。

兄国藩手草 八月十九日

23. 生性已定不能威猛精明

澄、沅、洪三弟左右：

三十日奉至父大人手谕及三弟信件，俱悉一切。

长夫俱留在此，吃上头饭，每日给钱百文，实无一事可劳其筋力，故不能不略减也。借用厉伯苻之抽箱，内竟无抄录《说文便考》，不知何处遗失，俟查出付回。

沅弟言我仁爱有余威猛不足，澄弟在此时亦常说及，近日友人爱我者人人说及。无奈性已生定，竟不能威猛。所以不能威猛，由于不能精明。事事被人欺侮，故人得而玩易之也。

甲三之论、甲王之小讲，已加批付回。科一、科三、科因之字俱好。科一请安稟，其字画粗大，颇有乃父之风。

季弟在益阳所领钱文，绅士文任吾等已料理清楚，在湘阴时即在兄处领得实收，兄到岳州忘告季弟耳。

四月初一日与中丞会奏请调贵州、广东兵，兹于二十六日奉寄谕，抄录付回。余不一一。

国藩手 五月初一日

24. 望不求近功速效

沉浦九弟左右：

本日送弟起行后，温弟问季牧所索树堂之信，盖忘之矣。兹写就托黄父台寄省，弟妥交季牧可也。所言效吾之长、惩吾之短及不求近功速效三者，千万勿忘。家中一切尽可放心。

兄涤生手草 九月初八日

25. 带兵应有强毅之气

沅浦、九弟左右：

十二月二十八日接第二十一日手书，欣悉一切。

临江已复，吉安之克实意中事。克吉之后，弟或带中营围攻抚州，听候江抚调度；或率师随迪安北剿皖省，均无不可。届时再行相机商酌。此事我为其始，弟善其终，补我之阙，成父之志，是在贤弟竭力而行之，无为遽怀归志也。

弟书自谓是笃实一路人，吾自信亦笃实人，只为阅历世途，饱更事变，略参些机权作用，把自家学坏了。实则作用万不如人，徒惹大笑，教人怀恨，何益之有？近日优居猛省，一味向平实处用心，将自家笃实的本质还我真面、复我固有。贤弟此刻在外，亦急须将笃实复还，万不可走入机巧一路，日趋日下也。纵火以巧诈来，我仍以浑含应之，以诚愚应之；久之，则人之意也消。若钩心斗角，相迎相距，则报复无已时耳。

至于强毅之气，决不可无，然强毅与刚愎有别。古语云自胜之谓强。曰强制，曰强恕，曰强为善，皆自胜之义也。如不惯早起，而强之未明即起；不惯庄敬，而强之坐尸立斋；不惯劳苦，而强之与士卒同甘苦，强之勤劳不倦。是即强也。不惯有恒，而强之贞恒，即毅也。舍此而求以客气胜人，是刚愎而已矣。二者相似，而其流相去霄壤，不可不察，不可不谨。

李云麟气强识高，诚为伟器，微嫌辩论过易，弟可令其即日来家，与兄畅叙一切。

兄身体如常。惟中怀郁郁，恒不甚舒畅，夜间多不成寐，拟请刘镜湖三爷来此一为诊视。闻弟到营后体气大好，极慰极慰。

九弟媳近亦平善。元旦至新宅拜年，叔父、六弟亦来新宅。余与澄弟等初二至白玉堂，初三请本房来新宅。任尊家酬完龙愿三日，因五婶脚痛所许，初四即散，仅至女家及攸宝庵，并未烦动本房。温弟与迪安联姻，大约正月定庚。科四前耍包铤药之纸，微伤其手，现已痊愈。邓先生订十八入馆。葛先生拟十六去接。甲三婚事拟对筱房之季女，现尚永定。三女对罗山次子，则已定矣。刘詹岩先生(绎)得一见否？为我极道歉忱。黄莘翁之家属近况何如？苟有可为力之处，弟为我多方照拂之。渠为劝捐之事枢气不少，吃亏颇多也。母亲之坟，今年当觅一善地改葬。惟兄脚力太弱，而地师又无一可信者，难以下手耳。余不一一，顺问近好，诸惟心照。

国藩手具 正月初四夜

再，带勇总以能打仗为第一义。现在久顿坚城之下，无仗可打，亦是闷事。如可移扎水东，当有一二大仗开。第弟管之勇锐气有余，沈毅不足，气浮而不敛，兵家之所忌也，尚祈细察。偶作一对联箴弟云：打仗不慌不忙，先求稳当，次求变化；办事无声无臭，既要精到，又要简捷。贤弟若能行此数语，则为阿兄争气多矣。

国藩又行

26. 济人须济急

沅浦九弟左右：

二十七日刘福一等四人者归，接弟信，并“二十二史”七十二套，金、史贖银三百两，俱悉一切。此书十七史系汲古阁本。“宋”“辽”“金”“元”系宏简录，《明史》系殿本。较之兄丙申年所购者多《明史》一种，余略相类，在吾乡已极为难得矣。吾后在京亦未另置有金史，仅添实“辽”“金”“元”“明”四史及“史”“汉”各佳本而已，《宋史》至今未办，盖阙典也。

吉贼决志不窜，将来必与浔贼同一办法，想非夏末秋初不能得手。弟当坚耐以待之。迪安去岁在浔于开濠守逻之外，间亦读书习字。弟处所掘长濠如果十分可靠，将来亦有闲隙可以偷看书籍，目前则须极力讲求濠工巡逻也。

澄弟于二十二日下县。赖明府于蝗于事办理极为认真，有信邀绅士去。温弟于二十五日回家。亦山先生二十二日归，二十六复来。瀛皆先生二十上学，二十二日开课，亦山亦执贖受业。甲五日疾总未甚好，右目外云如故，左目已属大好，究不能与常人一般。九弟妇体气极弱，服峻补之剂，日有起色。再过数日，应可出房照料杂事。青山二十七日暂归，余嘱其初一复来。二十八日夕接弟二十二日信，亦请青山在此多住月余，二月内必坚留之也。

周济受害绅民，非泛爱博施之谓，但偶遇一家之中杀害数

口者、流转迁徙归来无食者、房屋被焚栖止靡定者，或与之数十金，以周其急。先星冈公云济人须济急时无。又云随缘布施，专以目之所触为主，即孟子所称“是乃仁术也”。若目无所触而泛求被害之家而济之，与造册发赈一例，则带兵者专行沽名之事，必为地方官所讥，且有挂小漏万之虑。弟之所见，深为切中事理。余系因昔年湖口绅士受害之惨，无力济之，故推而及于吉安，非欲弟无故而为沽名之举也。

金、史、谢信此次未写，少迟再寄。李雨苍二十九日到家。孙朗青、吴贯槎均来。初四日系先大夫初周年忌辰，敬办小祥祭事。俟日内再行详布。即问近好，诸惟心照。

兄国藩手草 正月二十九日

27. 傲之一字百无一成

沅浦九弟左右：

初三日刘福一等归，接来信，借悉一切。

城贼围困已久，计不久亦可攻克。惟严断文报是第一要义，弟当以身先之。

家中四宅平安。季弟尚在湘潭，澄弟初二日自县城归矣。余身体不适。初二日住白玉堂，夜不成寐。温弟何日至吉安？在县城、长沙等处尚顺遂否？

古来言凶德致败者约有二端：曰长傲，曰多言。丹朱之不肖，曰傲曰嚣讼，“即多言也。历观名公巨卿，多以此二端败家丧生。余生平颇病执拗，德之傲也；不甚多言，而笔下亦略近乎嚣讼。静中默省尤，我之处处获戾，其源不外此二者。温弟性格略与我相似，而发言尤为尖刻。凡傲之凌物，不必定以言语加入，有以神气凌之者矣，有以面色凌之者矣。温弟之神气稍有英发之姿，面色间有蛮狠之象，最易凌人。凡中心不可有所恃，心有所恃则达于面貌，以门第言，我之物望大减，方且恐为子弟之累；以才识言，近今军中炼出人才颇多，弟等亦无过人之处。皆不可恃。只宜抑然自下，一味言忠信、行笃敬，庶几可以遮护旧失、整顿新气。否则，人皆厌薄之矣。沅弟持躬涉世，差为妥洽。温弟则谈笑讥讽，要强充老手，犹不免有旧习。不可不猛省！不可不痛改！闻在县有随意嘲讽之事，有怪太差帖之意，急宜惩之。余在军多年，岂无一节可取？只因

傲之一字，百无一成，故谆谆教诸弟以为戒也。九弟妇近已全好，无劳挂念。沅在营宜整刷精神，不可懈怠。至嘱。

兄国藩手草 三月初六日

28. 圣门教人不外敬恕二字

沅浦九弟左右：

十三日安五等归，接手书，借知一切。抚、建各府克复，惟吉安较迟，弟意自不能无介。然四方围逼，成功亦当在六七两月耳。

家中四宅眷口平安。十二日叔母寿辰，男女共九席，家人等三席。罨山先生十四日来馆，瀛皆先生十五日来馆。澄侯弟于十二晚往永丰一带吊各家之丧，均要余作挽联。余挽贺映南之夫人云：柳絮因风，阆内先芬堪继武(姓谢)；麻衣如雪，阶前后嗣总能文。挽胡信贤之母云：元文太姬，祖德溯二千余载；周姜京室，帝梦同九十三龄(胡母九十三岁)。近来精力日减，惟此事尚颇如常。澄弟谓此亦可卜其未遽衰也。

袁漱六之戚郑南乔自松江来，还往年借项二百五十两。具述漱六近状，官声极好，宪眷极渥，学问与书法大进，江南人仰望甚至，以慰以愧。

杨家滩周俊大兄号少濂，与余同读同考，多年相好。频年先祖、先考妣之丧均来致情。昨来家中，以久试不进，欲投营博一功名，求荐至吉营。余以功牌可得，途费可赠，保举则不可必。渠若果至吉营，望弟即日填功牌送之，兼送以来往途费。如有机可假，或恰逢克复之日，则望保以从龙县丞之类；若无机会，亦不勉强，以全余多年旧好。余音在军营不妄保举，不乱用钱，是以人心不附，至今以后诟病。近日揣摩风会，一变

前志，上次有孙、韩、王之托，此次又有周君之托，盖亦情之不得已者。孙、韩、王三人或保文职亦可，渠辈眼高，久已厌薄千、把也。仙屏在营，弟须优保之，借此以汲引人才。余未能超保次青，使之沉沦下位，至今以为大愧大恨之事。仙屏无论在京在外，皆当有所表见。成章鉴是上等好武官，亦宜优保。

弟之公牍信启俱大长进。上次谢玉雁汀一缄，系弟一手所成了抑系魏、彭辈初稿润色？祈复示。吴子序现在何处？查明见复，并详问其近况。

余身体尚好，惟出汗甚多，三年前虽酷暑而不出汗，今胸口汗珠累累，而肺气日弱，常用惕然。甲三体亦弱甚，医者劝服补剂，余未敢率尔也。弟近日身体健否？科四、六体气甚好，科四比弟在家时更为结实，科六则活泼如常，是为可喜。甲五日疾十愈其八，右目光总欠四分耳。余不一一，即问近好。

再者，人生适意之时不可多得，弟现在上下交誉，军民咸服，颇称适意，不可错过时会，当尽心竭力，做成一个局面。圣门教人不外敬恕二字，天德王道，彻始彻终，性功事功，俱可包括。余生平于敬字无工夫，是以五十而无所成。至于恕字，在京时亦曾讲求及之。近岁在外，恶人以白眼藐视京官，又因本性倔强，渐近于愎，不知不觉做出许多不恕之事，说出许多不恕之话，至今愧耻无已。弟于恕字颇有工夫，天质胜于阿兄一筹。至于敬字，则亦未尝用力，宜从此日致其功，于“论语”之九思，“玉藻”之九容，勉强行之。临之以庄，则下自加敬。习惯自然，久久遂威德器，庶不至徒做一场话说，四五十而无闻也。

兄国藩手草 五月十六日

29. 望慎之又慎以克终为贵

沅浦九弟左右：

正七归，接一信。启五等归，又接一信。五七以症，故不能遽回营。启五求于尝新后始去。兹另遣人送信至营，以慰远廬。

三代祠堂或分或合，或在新宅，或另立规模，统俟弟复古后归家料理。造祠之法，亦听弟与诸弟为之，落成后，我作一碑而已。看地之事，宽十现在代觅，冒暑裹粮，一出动十日半月，又不取我家盘缠，颇为可感。惟吉壤难得，即仅图五患之免，亦不易易。余意欲王父母、父母改葬后，将神道碑立毕，然后或出或处，乃可惟余所欲。

目下在家意绪极不住。回思往事，无一不惭愧，无一不偏浅。幸弟去秋一出，而江西、湖南物望颇隆。家声将替，自弟振之，兹可欣慰。”靡不有初，鲜克有终”，望弟慎之又慎，总以克终为贵。

家中四宅大小平安。二十三四大水，县城、永丰受害颇甚，我境幸平安无恙。闻季洪有油在永丰，亦已被淹，渠信未之详也。澄弟以三十日赴永丰，因修丞署及蝗虫事。

弟寄归之书皆善本，林氏续选古文雅正，虽向不知名，亦通才也。如有《大学衍义》、《衍义补》二书可买者，望买之。学问之道，能读经史者为根柢，如两“通”（杜氏“通典”、马氏“通考”）两“衍义”及本朝两“通”（余乾学《读礼通

考》、秦蕙《五礼通考》)皆萃“六经”诸史之精，该内圣外王之要。若能熟此六书，或熟其一二，即为有本有末之学。家中现有四“通”而无两“衍义”，祈弟留心。弟目下在营不可看书，致荒废正务。天气炎热，精神有限，宜全用于营事中也。余近作《宾兴堂记》，抄稿寄阅。久荒笔墨，但有间架，全无精意。愧甚愧甚，顺问近好。

兄国藩手草 五月三十日

再，弟尚有二女未许字人。余前与次青约请两家订为婚姻，以申永好。渠二子皆已定聘，余许以渠若于三年之内续生男子，即以弟本年生女许之。当复信之时，未曾与弟往返函商，亦因弟与温、季两弟平日皆佩服次青之为人也。兹特奉告，望弟莞允。次青节孝之后，此次赏不偿劳，余实负之。将来天佑其家，必有余庆也。又及。

此次信交龙勇六送营。勇六即愿留营，不复带回信归也，望弟收用之。倘有家信，另派长夫送归可耳。抚、建之贼，究系窜闽？抑仍入浙？望查明寄归。

玉班观察家订婚之说，余主持之，尽可对，九弟妇意欲少缓，仍请弟为主。月半道场亦待弟归再办也。

余有戈什因人(陈考元、向子荣、蒋魁宾、詹鸿宾)在得胜营，望告知普钦堂，遇便保之。又罗德煌从我最久，现在刘培元营，宜设法优保之，可与刘一商也。余不一一。

再，近日天气炎热，余心绪尤劣，愧恨交集。每中夜起立，有怀吾弟，不得相见一为倾吐。外间讥议之辞，弟应得闻十一，便中可密及也。弟近日所事俱合于理，余甚欣慰。惟闻早间曼起，临事少庄敬之象，是亦宜速改者。至嘱至嘱。外江西抚藩粮道信三件，次青信一件，即日专丁驰送。前杨、李、彭公信尚无复音，何也？浙抚信一件，浙绅信一件，专勇飞送次青处，

由次青派下送杭州也。又行。

兄国藩再具 五月三十日

30. 虽处顺境然寸心郁抑

沅浦九弟左右：

在湖口专丁送去一缄，至南昌由绎递发去一缄，均接到否？不接我弟家信已四十日，焦灼之至，未审弟病已痊愈否？

余于二十四日出省城登舟，二十五日开船，二十六午刻至瑞洪。闻吴国佐二十七八可至南昌，故在此稍等。兹因谢兴六赴吉安之便，再寄一缄，询问近状。如吉安尚无克复之势，千万不必焦急。达生编六字诀，有时可施之行军者，戏书以佐吾弟之莞尔。余向来虽处顺境，寸心每多沉闷郁抑，在军中尤甚。此次专求怡悦，不复稍存郁损之怀。“晋”初爻所谓“裕无咎”者也。望吾弟亦从裕字上打叠此心，安安稳稳。顺间近好。

兄国藩手具 七月=十八日于瑞洪舟次

31. 询麻姑之游乐否

麻姑之游乐乎？衡湘等处似此者颇多，借没有康乐、颜鲁公辈题记耳。闻麻源特胜，迟日终当一往。家信小缄并封入。沅弟夕佳。

涤致 十月初四日

32. 罕见之珍以赠诸弟

澄侯、沅浦两弟左右：

昨初四日发去一缄，声明俊四即日送书归去。兹交俊四蔑簏一担，内殿板初印《十三经注疏》一部、端砚一方、《圣教序》帖一本、耕织图墨一匣，皆许仙屏所送者。墨似是御府所赐，应是戴中堂家之物。沅弟前索之墨并非佳品，兹以此墨赠沅。《圣教序》以给纪泽儿。纪泽好作字，此帖即属难得者。仙屏送此四物，皆罕见之珍。渠北上时，余当有以酬之。此外送余各书无甚精者，皆未寄回，即存营看也。《注疏》余用油纸包过，应可不汗坏。外寄魏德三银信一件照收。即问近好。

兄国藩手草 十二月初五日

33. 学箭最足保养起早尤千金妙方

澄侯、沅浦两弟左右：

二十二日接初七日研发家信，内澄弟一件、沅弟一件、纪泽一件！知叔父大人已于三月二日安厝马公塘，两弟于家中两代各位老人养病送死之事，皆备极诚敬，将来必食报于子孙。闻马公塘山势平衍，可决其无水蚁凶灾，尤以为慰。澄弟服补剂而大愈，甚幸甚幸！丽参、鹿茸虽享福稍早，而体气本弱，亦属无可如何。吾生平颇讲求惜福二字之义，近来亦补药不断，且菜蔬亦比往年较奢。自愧享用太过，然亦体气太弱，不得不尔。胡润帅、李希庵常服辽参，则其享受更有过于余者。澄弟平日太劳伤精，锁呐伤气，多酒伤脾。以后戒此三事，而常服补剂，自可日就痊可。丽参、鹿茸服毕后，余可再寄，不可间断，亦不可过多，每早服二钱可也。

家中后辈子弟个个体弱，锁呐、吃洒二事须早早戒之，不可开此风气。学射最足保养，起早尤千金妙方、长寿金丹也。

纪泽今年耽搁太多，此次宜静坐两个月。《汉魏六朝百三名家》，京中带回一部，江西带回一部，可付一部来营。纪鸿《通鉴》讲至何处？并问。即候日好。

兄国藩手草 三月二十四日

再，抚州绅士刻余所书《拟砚台记》，共刷来八份，兹寄五份回家。澄弟一份，沅弟一份，纪泽一份，外二价送家中各位先生。暂不能遍送也。

34. 望讲求将略品学

季弟左右：

顷接沅弟信，知弟接行知，以训导加国子监学正衔，不胜欣慰。官阶初晋，虽不足为吾季荣，惟弟此次出山，行事则不激不随，处位则可高可卑，上下大小，无人不翕然悦服。因而凡事皆不拂意，而官阶亦由之而晋。或者前数年抑塞之气，至是将畅然大舒乎？《易》曰：“天之所助者顺也，人之所助者信也。”我弟若常常履信思顺，如此名位岂可限量？

吾湖南近日风气蒸蒸日上。凡在行间，人人讲求将略，讲求品行，并讲求学术。弟与沅弟既在行间，望以讲求将略为第一义，点名看操等粗浅之事必躬亲之，练胆料敌等精微之事必苦思之。品、学二者，亦宜以余力自励。目前能做到湖南出色之人，后世即推为天下罕见之人矣。大哥岂不欣然哉！哥做几件衣道贺。

沅弟以陈米发民夫挑濠，极好极好！此等事，弟等尽可作主，兄不吝也。

六月二十七日

35. 爱禾者必去稗爱贤者必去邪

沅、季弟左右：

二十二日申刻接专丁二十日发缄，二十三日辰刻接马递十八、九两日发缄，得悉一切。应复各件，条列如左：

一、骆去文继，湖南局势不能不变。裕公赴粤，似难留。南公之局，且待文公莅任后，认准题目再行具奏。吾非怕硬也，恐难为南老耳。

一、建德二马业已到祁，尚有要证未到，难遽结案，一月后再说。

一、武明良改扎南岸甚好。添人之详，已照准矣。吾方欲另招一营以防南岸，添一哨岂不便益？

一、沈霍鸣已未令其当巡捕矣。渠好体面，保和县后即不愿当巡捕，例也情也。咨回江西一节尚可略缓。

一、彭山岷因濠墙草率而摘顶，并革营务处，所以傲河溪兵也。现患疟未愈，迟当以中军位置之。

一、辛秉衡、李熙瑞均可留弟处当差。辛、李、卫、霍（西汉之名将，也，弟好待之。

一、细阅来图，办理真为妥善。战守既有把握，则皖城早迟终可成功。特守濠之法尚未详言及之，不知已定章程否？

一、纪泽以油纸摹欧字非其所愿，然古今书家实从欧公别开一大门径，厥后李北海及颜、柳诸家皆不能出其范围。学书者不可不一窥此宫墙也。弟作字大有心得，惜未窥此一重门户。

如得有好帖，弟亦另用一番工夫，开一番眼界。纪泽笔乏刚劲之气，故令其勉强习之。

一、公牍之繁，深以为苦。节后少荃赴淮，仅余一手为之，则更苦矣。今日飞函去请意城，不知其肯来否。

一、季弟错诸枉之道，极为当今要务。爱禾者必去稗，爱贤者必去邪，爱民必去害民之吏，治军必去蠢军之将，一定之理也。第所谓诸枉者何人？弟如有所闻，飞速告我。

日内闻厂德收复，此心略为舒畅，然宁国尚未解围，焦灼仍深。字之忙乱，与九弟之忙相似。

七月二十三日

36. 昔年失之高亢近日稍就平实

沅、季两弟左右：

十一日接沅弟初六日信，是夕又接两弟初八日信，知有作一屈公公之喜。初七家信尚未到也。应复事，条列如左：

一、进驻徽州，待胜仗后再看，此说甚是。目下池洲之贼思犯东、建，普营之事均未妥协，余在祁门不宜轻动，已派次青赴徽接印矣。

一、僧邸之败，沅弟去年在抚州之言皆验，实有当验之理也。余处高位，蹈危机，观陆、何与僧覆辙相寻，弥深悚惧，将有何道可以免于大庆？弟细思之而详告我。吾恐治先人羞，非仅为一身计。

一、癸冬屏绝颇严，弟可放心。周之翰不甚密迩，或三四日一见。若再疏，则不能安其居矣。吴退庵事，断不能返汉，且待到后再看。文十之自命过高、立论过亢，几成通病。吾所批其硬在嘴、其劲在笔，此也。然天分高者，亦可引之一变而至道。如罗山、璞山、希庵皆极高亢后乃渐归平实。即余昔年亦失之高亢，近日稍就平实。周之翰、吴退庵，其弊亦在高亢，然品行究不卑污。如此次南坡稟中胡镛、彭汝琮等，则更有难言者。余虽不愿，而不能不给札，以此衡之，亦未宜待彼太宽而待此太偏也。大抵天下无完全无间之人才，亦无完全无隙之交情。大者得正，而小者包荒，斯可耳。

一、浙江之贼之退，一至平望，一至石门，当不足虑，余

得专心治皖南之事。春霖尚未到，殊可怪也。

八月十三日

37. 不忘君为忠不失信于友为义

沅弟左右：

初九夜接初五日一缄，初十早又接初八日巳、午刻二缄，俱悉一切。

初九夜所接弟信，满纸骄矜之气，且多悖谬之语。天下之事变多矣，义理亦深矣，人情难知，天道亦难测，而吾弟为此一手遮天之辞、狂妄无稽之语，不知果何所本？恭亲王之贤，吾亦屡见之而熟闻之，然其举止轻浮，聪明太露，多谋多改。若驻京太久，圣驾远离，恐日久亦难尽惬人心。僧王所带蒙古诸部在天津、通州各仗，盖已挟全力与逆夷死战，岂尚留其有余而不肯尽力耶？皇上又岂禁制之而故令其不尽力耶？力已尽而不胜，皇上与僧邱皆浩叹而莫可奈何。而弟屡次信来，皆言宜重用僧邱，不知弟接何处消息，谓僧邱见疏见轻，敝处并未闻此耗也。

分兵北援以应诏，此乃臣子必尽之分。吾辈所以恭窃虚名，为众所附者，全凭忠义二字。不忘君，谓之忠；不失信于友，谓之义。令銮与播迁，而臣子付之不闻不问，可谓忠乎？万一京城或有疏失，热河本无银米，从驾之兵难保其不哗溃。根本倘拔，则南服如江西、两湖三省又岂能支持不败？庶民岂肯完粮？商旅岂肯抽厘？州县将士岂肯听号令？与其不人援而同归于尽，先后不过数月之间，孰若入援而以正纲常以笃忠义？纵使百无一成，而死后不白悔于九泉，不诒议于百世。弟谓切

不可听书生议论，兄所见即书生迂腐之见也。

至安庆之围不可撤，兄与希庵之意皆是如此。弟只管安庆战守事宜，外间之事不可放言高论毫无忌憚。孔子曰“多闻阙疑，慎言其除”，弟之闻本不多，而疑则全不阙，言则尤不慎。捕风捉影，扣盘扞烛，遂欲硬断天下之事。天下事果如是之易了乎？大抵欲言兵事者，须默揣本军之人才，能坚守者几人，能陷阵者几人；欲言经济，须默揣天下之人才，可保为督抚者几人，可保为将帅者几人。试令弟开一保单，未必不寤也。弟如此骄矜，深恐援贼来扑或有疏失。此次复信，责弟甚切。嗣后弟若再有荒唐之信如初五者，兄即不复信耳。

九月初十日

38. 弟务当猛省骄矜之意

沅、季弟左右：

初十日接弟初六、七之信，借悉一切。

平江勇已全数撤遣。此次平江勇之可恶，实出情理之外。沅弟昔尝力言平江勇断不可用，余今悔信之不笃也。次青走出皖南境外，至浙江衢州、江西广信等处，至今尚未回老营，尤可骇异。

弟要饱银，兄处现亦无之。如北岸果十分吃紧，由水管买三四千石米送安庆城下，吾力犹能为之。若稍舒裕，则必践前此二万之约。枞阳塞河千串，当在二套口厘金项下支取。此雪琴每月以四千串交内银钱所者也，望弟与雪琴商之。弟虽以有饷为把握，而吾深以弟之意矜气浮为虑，务当返躬猛省，千万千万！初五日午刻来信，吾读之且惧且恶也。季弟不欲撤安庆之围，此是至当之论，吾亦力持此议。

希庵之是否早调商、固等处，则由润帅主持耳。希庵十二日由祁动身回营，鲍、张尚未进兵。左公初五日自江西开船，计到皖当在二十间。

九月十一夜

39. 古今庸人皆以惰字致败

古今才人皆以傲字致败

沅弟左

右：

接二十日午刻信并伪文二件，知安庆之贼望援孔切，只要桐城、青草融少能坚定，自有可破之理。

此间诸事如常。有寄希庵一书未封口，交弟阅后封寄。次青十六日回祁，仅与余相见一次。闻其精神尚好，志气尚壮，将来或可有为，然实非带勇之才，弟军中诸将有骄气否？弟日内默省，傲气少平得几分否？天下古今之庸人，皆以一惰字致败，天下古今之才人，皆以一傲字致败。吾因军事而推之，凡事皆然，愿与诸弟交勉之。此次徽贼窜浙，若浙中失守，则不能免于吴越之痛骂，然吾但从傲惰二字痛下工夫，不问人之骂与否也。

九月二十二日

40. 为戒傲惰二字沅、季弟左右：

恒营专人来，接弟各一信并季所寄干鱼，喜慰之至。久不见此物，两弟各寄一次，从此山人足鱼矣。

沅弟以我切责之缄，痛自引咎，惧蹈危机而思自进于谨言慎行之路，能如是，是弟终身载福之道，而吾家之幸也。季弟信亦平和温雅，远胜往年傲岸气象。

吾于道光十九年十一月初二日进京散馆，十月二十八早侍祖父星冈公于阶前，请曰：“此次进京，求公教训。”星冈公曰：“尔的官是做不尽的，尔的才是好的，但不可傲。满招损，谦受益，尔若不傲，更好全了。”遗训不远，至今尚如耳提面命。今吾谨述此语告诫两弟，总以除傲字为第一义。唐虞之恶人曰丹朱，傲；曰象，傲；桀纣之无道，曰强足以拒谏，辩足以饰非，曰谓己有天命，谓敬不足行，皆傲也。吾自八年六月再出，即为戒惰字以儆无恒之弊。近来又为戒傲字。昨日徽州未败之前，次青心中不免有自是之见，既败之后，余益加猛省。大约军事之败，非傲即惰，二者必居其一；巨室之败，非傲即惰，二者必居其一。

余于初六日所发之折，十月初可奉谕旨。余若奉旨派出，十日即须成行。兄弟远别，未知相见何日。惟愿两弟戒此二字，并戒各后辈常守家规，则余心大慰耳。

九月二十四日

41. 赞余之日记比日知录恭维太过

沅弟、季弟左右：

初二日接沅弟二十八日两缄，俱悉一切。桐城二十六日又获胜仗，欣慰之至。日记册可比顾氏《日知录》，未免恭维太过。四川有一秀才，与卓海帆相国同年同月同时生，只小一日，又同年入学。厥后卓相登庸，渠寄诗云：“只因日上差些子，笑向蜀江作钓翁。”余之日记比顾之《日知》，亦恐日上差些子也。至于添一条，则亦可不必。将来兄弟老境，同在家园畅聚，请动族戚调出文卷，于后批清一笔，胜于我之自添一条多矣。

前后两哨均于初二日到祁门。左季翁来祁已五日。其部下各营二十二日在贵溪打一胜仗，二十九日在德兴打一胜仗。闻初一将开大仗。若能打开德兴，则可进婺源，同进攻休宁也。

芝生所荐之熊姓，未知何如。请师乃第一要紧事，子弟之成败，全系乎是。弟须十二分慎重也。即问近好。

十一月慈寿日

42. 谈戒骄戒傲之理

澄侯四弟左右：

二月初一日唐长山等来，接正月十四日弟发之信，在近日可谓极快者。

弟言家中子弟无不谦者，此却未然，余观弟近日心中即甚骄傲。凡畏人，不敢妄议论者，谦谨者也，凡好讥评太短者，骄傲者也。弟于营中之人，如极高、次青、作梅、树堂诸君子，弟皆有信来讥评其短，且有讥至两次三次者。营中与弟生疏之人，尚且讥评，则乡间之与弟熟识者，更鄙睨嘲斥可知矣。弟尚如此，则诸子侄之藐视一切，信口雌黄可知矣。谚云：“富家子弟多骄，贵家子弟多傲。”非必锦衣玉食、动手打人而后谓之骄傲也，但使志得意满毫无畏忌，开口议人短长，即是极骄极傲耳。余正月初四信中言戒骄字，以不轻非笑人为第一义；戒惰字，以不晏起为第一义。望弟常常猛省，并戒子侄也。

此间鲍军于正月二十六日大获胜仗；去年建德大股金行退出，风波三月，至此悉平矣。余身体平安，无旁系念。

二月初四日

43. 家中子侄当谨守家训

澄侯四弟左右：

上次送家信者，三十五日即到。此次专人，四十日未到。盖因乐平、饶州一带有贼，恐中途绕道也。

自十二日克复休宁后，左军分出八营在于甲路地方小挫，退扎景镇。贼幸未跟踪追犯，左公得以整顿数日，锐气尚未大减。目下左军进剿乐平、鄱阳之贼。鲍公一军，因抚、建吃紧，本调渠赴江西省，先顾根本，次援抚、建。因近日鄱阳有敬，景镇可危，又暂留鲍军不遽赴省。胡宫保恐狗逆由黄州下犯安庆沅弟之军，又调鲍军救援北岸。其祁门附近各岭，二十三日又被贼破两处。数月以来，实属应接不暇，危险迭见。而洋鬼又纵横出入于安庆、湖口、湖北、江西等处，并有欲来祁门之说。看此光景，今年殆万难支持。然余自咸丰三年科以来，久已以身计国。愿死疆场，不愿死牖下，本其素志。近年在军办事，尽心竭力，毫无愧怍，死即瞑目，毫无悔憾。

家中兄弟子侄，惟当记祖父之八个字，曰：“考、宝、早、扫、书、蔬、鱼、猪。”又谨记祖父之三不信，曰：“不信地仙，不信医药，不信僧巫。”余日记册中又有八本之说，曰：“读书以训诂为本，作诗文以声调为本，事亲以得欢心为本，养生以戒恼怒为本。立身以不妄语为本（即不扯谎也），居家以不晏起为本，作官以不要钱为本，行军以不扰民为本。”此八本者，皆余阅历而确有把握之论，弟亦当教诸子侄谨记之。无

论世中乱，家之贫富，但能守星冈公之八字与余之八本，总不失为上等人家。余每次写家信，必谆谆嘱咐。盖因军事危急，故预告一切也。

余身体平安。营中虽欠饷四月，而军心不甚涣散。或尚能支持，亦未可知。家中不必悬念。顺问近好。

兄国藩手草 二月二十四日

44. 再告诸子侄谨守家训

澄、沅、季弟左右：

余于初二日自祁门起行至渔亭，初三日至休宁。初四日派各营进攻徽州。所有祁门、渔亭之营，皆派七八成队来此，老营空虚。闻景德镇于二月三十日失守，陈一军溃散，左京堂亦被围困，不知能守住营盘否？景镇既失，祁、黟、休三县之米粮接济已断。若能打开徽州，尚可通浙江米粮之路；若不能打开徽州，则四面围困，军心必涣，殊恐难支。

余近年在外勤谨和平，差免衍尤，惟军事总无起色。自去冬至今，无日不在危机骇浪之中。所欲常常告诫诸弟与子侄者，惟星冈公之八字，三不信及余之大本、三致祥而已。八字曰“考、宝、早、扫、书、蔬、鱼、猪”也，三不信曰“药医也，地仙也，僧巫也”，大本曰“读书以训诂为本，作诗文以声调为本，事亲以得欢心为本，养生以少恼怒为本，立身以不妄言为本，居家以不晏起为本，做官以不爱钱为本，行军以不扰民为本”，三致祥曰“孝致祥，勤致祥，恕致祥”。兹因军事日危，旦夕不测，又与诸弟重言以申明之。家中无论老少男妇，总以习勤劳为第一义，谦谨为第二义。劳则不佚，谦则不傲，万善皆从此生矣。此次家信，专人送安庆后再送家中，因景镇路梗故也。顺间近好。

兄国藩手草 三月初四日辰正于休宁

城中

外黄南坡挂屏交安庆转寄，柳帖二幅寄家交纪泽。

45. 余心不悦望溪之事

沅弟左右：

专人至，接来信，城池未克，而遽索犒赏之古文，未免揭盖太早。湖南主考放王昉、胡家玉。毛公之奏停，系听胡恕堂言浙江之失，由先年借办江南乡试，招引奸细大城云云。兹将毛信抄寄一阅。虽不免士子之讥议，而为慎守省城起见，毛固不失为贤者耳。润公专人守候，余因作《箴言书院记》，勉强交卷，文不称意，抄寄弟阅。四伪王究由宿松至怀、桐否？查明见告。日内闻池州之贼已退，不知确否？即问近好。

再，望溪先生之事，公私均不甚愜。

公牍中须有一事实册，将生平履历，某年中举中进士，某年升官降官，某年得罪，某年昭雪，及生平所著书名，与列祖褒赞其学问品行之语，一一胪列，不作影响约略之词，乃合定例。望溪两次获罪，一为戴名世《南山集》序入刑部狱，一为其族人方某(忘其名)挂名逆案，将方氏通族编入旗籍，雍正间始准赦宥，免隶旗籍，望溪文中所云因臣而宥及合族者也。今欲请从祀孔庙，须将两案历奉谕旨一一查出，尤须将国史本传查出，恐有严旨碍眼者，易于驳诘。从前入祀两庑之案，数十年而不一见，近年层见迭出，几于无岁无之。去年大学士九卿等议复陆秀夫从祀之案，声明以后外间不得率请从祀，兹甫及一年，若遽违新例而入奏，必驳无疑。右三者，公事之不甚愜者也。

望溪经学勇于自信，而国朝巨儒多不甚推服，《四库书目》中于望溪每有贬词，《皇清经解》中并未收其一册一句。姬传先生最推崇方氏，亦不称其经说。其古文号为一代正宗，国藩少年好之，近十余年，亦别有宗尚矣。国藩于本朝大儒，学问则宗顾亭林、王怀祖两先生，经济则宗陈文恭公，若奏请从祀，须自三公始。李厚庵与望溪，不得不置之后图。右私志之不甚愜者也。

六月二十九日

46. 傲为凶德惰为衰气

澄侯四弟左右：

十三日刘德四、王厚一来，接弟信并纪泽儿信，俱悉家中五宅平安。弟以捐事赴娄底一带，尚未集事否？

此间军事，四眼狗纠同正伪王救援安庆，其打先锋者十二已至集贤关。九弟屡信皆言坚守后濠，可保无虞。但能坚持十日半月之久，城中粮米必难再支，可期克复矣。徽州六属俱平安，欠饷多者(凯)七个月，少者(左、朱、唐、沅、鲍)四五月不等，幸军心尚未涣散。江西省城戒严，附近二三十里处处皆贼。余派鲍军往救，十一二应可到省。湖北之南岸已无一贼，北岸德安、随州等处有金、刘与成大吉三军。必可日有起色。余癖疾未痊，日来天气亢燥，甚以为苦。幸公事勉强能了，近日无积搁之弊。总督关防、盐政印信于初四日到营，余即于初六日开用。

家中雇长沙园丁已到否？菜蔬茂盛否？诸子侄无傲气否？傲为凶德，惰为衰气，二者皆败家之道。戒惰莫如早起，戒傲莫如多走路，少坐轿，望弟时时留心儆戒。如闻我有傲惰之处，亦写信来规励。即间近好。

国藩手草 七月十四日

47. 评沅弟字与季弟挽联

沅、季两弟左右：

接沅弟初五日申刻一缄、季弟初五夜一缄，俱悉一切。沅弟之字，骨秀得之于天，手稳本之于习，所欠者势与味耳。此二信写瘦硬一路，将来必得险峭之势。当见旧拓《颜家庙碑》，圭确峭厉，转折分明，结类欧书，不似近日通行本之痴肥也。

季弟所作润帅挽联，“载”字改“年”，即协韵（平一仄二。）通首妥惬，不必多改。裁料尽可代出，缮写似不宜顶替，待弟来安庆时，再面定缮送不迟。余拟候接到饬终谕旨再送礼也。今日接官相咨到夹片二件，抄去送阅，不知何以二十余日始到。顺问近好。

顷又得沅弟一信，厘金盐每石改为四百，甚是。吾意可改五百也。

九月初六日

48. 天下事由命不由人

沅弟左右：

初十日未刻接初八夜信，俱悉一切，黄公信已加封寄去，冠北之札亦发，鹤汀早年在京极熟，容少缓再调。

约旨卑思四字，实近来方寸隐微之弊，亦阅历太久，见得天下事由命不由人也。澄弟信一件寄阅。顷接舫仙禀论进兵事，望弟取阅，度量行之。顺问近好。

九月初十日未正

49. 教弟油纸摹贴法

季弟左右：

五舅父归，接弟信，辩“爱人以德”四字之不确。十三日又接十二夜两信。俱悉一切。

吾兄弟三人在外，一人归尚不着迹，两人归则嫌太多。吾心中恐弟遽归，故以希师之批待沅来为是。

油纸摹帖，初为之，则写次行而首行未干，揩摩墨迹，狼藉满纸，迨摹习称久，则手腕不甚粘滞，纸上墨迹自少矣。弟习油纸，即以此自试效验可也。

巢县铜林闸之贼果有投诚之意否？余身上痒尚未愈并告。即问近好。

十一月十四日

50. 应拚命报国侧身修行

沅弟左右：

十七日钦奉谕旨，兄拜协办大学士之命，弟拜浙江近察使之命。一门之内，迭被殊恩，无功无能，忝窃至此，惭愧何极？惟当同心努力，仍就拚命报国，侧身修行八字上切实做法。前奉旨赏头品顶戴，尚未谢恩，此次一并具哲叩谢。到省后，或将新营交杏南等带来，而弟坐轻舟先行，兼程赴营，筹商一切，俾少荃得以速赴上海。至要至要。少荃现有四千五百人，望弟再拨一二营与之，便可独当一路。渠所部淮扬水师，余嘱其留两营在上游归弟调遣。弟将来若另造炮船，自增水师，此二营仍退还黄、李，弟自有水师两营。其余大处仍请杨、彭协同防剿，庶几可分可合，不伤和气。

正月十八日

51. 愿以劳谦廉三字自惕

沅、季弟左右：

帐棚即日赶办，大约五月可解六营，六月再解六营，使新勇略得却暑也。抬小枪之药，与大炮之药，此间并无分别，亦未制造两种药。以后定每月解药三万斤至弟处，当不致更有缺乏。王可升十四日回省，其老营十六可到。到即派往芜湖，免致南岸中段空虚。

雪琴与沅弟嫌隙已深，难遽期其水乳。沅弟所批雪信稿，有是处，亦有未当处。弟谓雪声色俱厉。凡目能见千里，而不能自见其睫，声音笑貌之拒人，每苦于不自见，苦于不自知。雪之厉，雪不自知；沅之声色，恐亦未始不厉，特不自知耳。曾记咸丰七年冬，余咎骆、文、耆待我之薄，温甫则曰：“兄之面色，每予人以难堪。”又记十一年春，树堂深咎张伴山简傲不敬，余则谓树堂面色亦拒人于千里之外。观此二者，则沅弟面色之厉，得毋似余与树堂之不自觉乎？

余家目下鼎盛之际，余忝窃将相，沅所统近二万人，季所统四五百人，近世似此者曾有几家？沅弟半年以来，七拜君恩，近世似弟者曾有几家？日中则昃，月盈则亏，吾家亦盈时矣。管子云：斗斛满则大概之，人满则天概之。余谓天之概无形，仍假手于人以概之，霍氏盈满，魏相概之，宣帝概之；诸葛恪盈满，孙峻概之，吴主概之。待他人之来概而后悔之，则已晚矣。吾家方丰盈之际，不待天之来概、人之来概，吾与诸弟当

设法先自概之。

自概之道云何，亦不外清、慎、勤三家而已。吾近将清字改为廉字，慎字改为谦字，勤字改为劳字，尤为明浅，确有可下手之处。沅弟昔年于银钱取与之际不甚斟酌，朋辈之讥议菲薄，其根实在于此。去冬之买犁头嘴、栗子山，余亦大不谓然。以后宜不妄取分毫，不寄银回家，不多赠亲族，此廉字工夫也。谦之存诸中者不可知，其着于外者，约有四端：曰面色，曰言语，曰书函，曰仆从属员。沅弟一次添招六千人，季弟并未禀明，径招三千人，此在他统领所断做不到者，在弟尚能集事，亦算顺手。而弟等每次来信，索取帐棚子药等件，常多讥讽之词，不平之语，在兄处书函如此，则与别处书函更可知矣。沅弟之仆从随员颇有气焰，面色言语，与人酬接时，吾未及见，而申夫曾述及往年对渠之词气，至今饮憾。以后宜于此四端痛加克治，此谦字工夫也。每日临睡之时，默数本日劳心者几件，劳力者几件，则知宣勤王事之处无多，更竭诚以图之，此劳字工夫也。

余以各位太隆，堂恐祖宗留诒之福自我一人享尽，故将劳、谦、廉三字时时自惕，亦愿两贤弟之用以自惕，且即以自概耳。

湖州于初三日失守，可悯可敬。

五月二十五日

52. 刚柔互用不可偏废

沅、季弟左右：

沅于人概天概之说，不甚厝意，而言及势利之天下，强凌弱之天下。此岂自今日始哉？盖从古以然矣。

从古帝王将相，无人不由自立自强做出，即为圣贤者，亦各有自立自强之道，故能独立不惧，确乎不拔。昔余往年在京，好与诸有大名大位者为仇，亦未始无挺然特立不畏强御之意。近来见得天地之道，刚柔互用，不可偏废，太柔则靡，太刚则折。刚非暴虐之谓也，强矫而已；柔非卑弱之谓也，谦退而已。趋事赴公，则当强矫，争名逐利，则当谦退；开创家业，则当强矫，守成安乐，则当谦退；出与人物应接，则当强矫，人与妻孥享受，则当谦退。若一面建功立业，外享大名，一面求田问舍，内图厚实，二者皆有盈满之象，全无谦退之意，则断不能久。此余所深信，而弟宜默默体验者也。

五月二十八日

53. 有德者自修而谤亦日息

沅弟左右：

此次洋枪合用，前次解去之百支，果合用否？如有不合之处，一一指出，盖前次亦花大价钱买来，若过于吃亏，不能不一一与之申说也。

吾因近日办事，名望关系不浅，以鄂中疑季之言相告，弟则谓我不应述及。外间指摘吾家昆弟过恶，吾有所闻，自当一一告弟，明责婉劝，有则改之，无则加勉，岂可秘而不宣？鄂之于季，自系有意与之为难。名望所在，是非于是乎出，赏罚于是乎分，即饷之有无，亦于是乎判。去冬金眉生被数人参劾，后至抄没其家，妻孥中夜露立，岂果有万分罪恶哉？亦因名望所在，赏罚随之也。众口悠悠，初不知其所自起，亦不知其所由上。有才者忿疑谤之无因，而悍然不顾，则谤且日腾；有德者畏疑谤之无因，而抑然自修，则谤亦日息。吾愿弟等之抑然，不愿弟等之悍然。愿弟等敬听吾言，手足式好，同御外侮，不愿弟等各逞己见，于门内计较雌雄，反忘外患。

至阿兄忝窃高位，又窃虚名，时时有颠坠之虞。吾通阅古今人物，似此名位权势，能保全善终者极少。深恐吾全盛之时，不克庇荫弟等，吾颠坠之际，或致连累弟等，惟于无事时，常以危词苦语，互相劝诫，庶几免于大戾。酷热不能治事，深以为苦。

六月二十日

54. 治心以“广大”为药治身以“不药”为药

沅、季弟左

右：

季弟病似疟病、近已痊愈否？吾不以季病之易发为虑，而以季好轻下药为虑。吾在外日久，阅事日多，每劝人以不服药为上策。吴彤云近病极重，水米不进已十四日矣。十六夜四更，已将后事料理，手函托我，余一概应允，而始终劝其不服药。自初十日起，至今不服药十一天，昨夜竟大有转机，疟疾减去十之因，呃逆各症减去十之七八、大约保无他变。希庵五月之季病势极重，余缄告之，云治心以广大二字为药，治身以下药二字为药、并言作梅医道不可恃。希乃断药月余，近日病已痊愈，咳嗽亦止。是二人者，皆不服药之明效大验。季弟信药太过，自信亦太深，故余所虑不在于病，而在于服药。兹谆谆以不服药为戒，望季曲从之，沅力劝之。至要至嘱。

季弟信中所商六条皆可允行。回家之期，不如待金陵克后乃去，庶几一劳永逸。如管中难耐久劳，或来安庆闲散十日八日，待火轮船之便，复还金陵本营，亦无不可。若能耐劳耐烦，则在营久熬更好，与弟之名曰贞、号曰恒者，尤相符合。其余各条皆办得到，弟可放心。

上海四万尚未到，到时当全解沅处。东征局于七月三万之外，又有专解金陵五万，到时亦当全解沅处。东局保案，自可照准，弟保案亦日内赶办。雪琴今日来省，彼泉亦到。

七月二十日

55. 宜早起务农疏医远巫

沅、季弟左右：

久不接来信，不知季病痊愈否？各营平安否？东征局专解沅饷五万，上海许解四万，至今尚未到皖。阅新闻纸，其中一条言何根云六月初七正法，读之悚俱惆怅。

余去岁腊尾买鹿茸一架，银百九十两，嫌其太贵，今年身体较好，未服补药，亦未吃丸药。兹将此茸药送至金陵，沅弟配制后，与季弟分食之。中秋凉后，或可渐服，但偶有伤风微恙，则不宜服。余阅历已久，觉有病时断不可吃药，无病时可偶服补剂调理，亦不可多。吴彤云大病二十日，竟以下药而愈，邓寅皆终身多病，未尝服药一次。季弟病时好服药，且好易方，沅弟服补剂，失之太多，故余切戒之，望弟牢记之。

弟营起极早，饭后始天明，甚为喜慰。吾辈仰法家训，惟早起、务农、疏医、远巫四者尤为切要。

七月二十五日

56. 盛时常用衰时想上场当念下场时

澄弟左右：

沅、霆两军病疫，迄未稍愈。宁国各属军民死亡相继，道殣相望，河中积尸生虫，往往缘船而上，河水及井水皆不可食。其有力者，用舟载水于数百里之外。臭秽之气中人，十病八九。诚宇宙之大劫，军行之奇苦也。

洪容海投诚后，其党黄、朱等目复叛，广德州既得复失，金柱关常有贼窥伺，近闻增至三四万人，深可危虑。余心所悬念者，惟此二处。

余体气平安，惟不能多说话，稍多则气竭神乏，公事积搁，恐不免于贻误。弟体亦不甚旺，总宜好好静养。莫买田产，莫管公事。吾所嘱者，二语而已。盛时常作衰时想，上场当念下场时，富贵人家，不可不牢记此二语也。

八月初四日

57. 誓拼命报国须常存避名之念

沅弟左右：

排递一缄，知守局平安如常，至以为慰。大官圩等处之粮多为我军所焚，则金陵援贼之粮必难久支，城贼之粮多寡，则不敢必耳，计忠、侍引退之期必不甚远。吾前有信嘱弟以追为退，改由东坝进兵，先剿溧阳，以至宜兴。先占太湖之两岸，水师亦由东坝进兵，俾李朝斌先在太湖西岸立住脚跟，则战船处处可到，而环湖之十四府州县处处震动，贼则防不胜防，我则后路极稳。较之株守金陵者，有死活之分，有险易之别，但无赫赫之名耳。

凡行军最忌有赫赫之名，为天下所指目，为贼匪所必争。莫若从贼所不经意之处下手，既得之后，贼乃知其为要隘，起而争之，则我占先着矣。余今欲弃金陵而改攻东坝，贼所经意之要隘也；若占长兴、宜兴、太湖西岸，则贼所不经意之要隘也。愿弟早定大计，趁势图之，莫为浮言所惑，谓金陵指日可下，株守不动，贪赫赫之名，而昧于死活之势。至嘱至嘱。如弟之志必欲围攻金陵，亦不妨掀动一番，且去破东坝，剿溧阳，取宜兴，占住太湖西岸，然后折回再围金陵，亦不过数月间事，未为晚也。吾兄弟誓拼命报国，然须常存避名之念，总从冷淡处着笔，积劳而使人不知其劳，则善矣。

十月初三日

58. 季弟须坚持不复服药

沅弟左右：

季弟之病，微有转机。不知十五以后，又复如何？伤寒而反复者，每以服药致误，服补药则更易误。欲求季之有转机，弟须坚持不复服药。今年吴彤云之病，余坚持不服药之说，果得痊愈。虽不可一概而施，然亦可见病情反复之时，惟不服药而症乃有定象也。

十一月十九日

59. 兄弟所得赐物概藏于先大夫庙内

沅弟左右：

弟处气象日稳，为之少慰。

萧军克复运漕，闯将进剿铜城闸。鲍军粮路虽未大通，而古、赖等专人至霆营投诚，黄、胡等逆亦自狡而不悍。或者支撑此局，风波渐定亦未可知。季弟棺漆过三次，而匠工不甚精细，此后当亲监教之。铭旌必须改写，旧者对灵焚化。

余生平不信鬼神怪异之说，而八年五月三日扶鸾，预料九江一军之必败，厥后果有三河之变。及昨二十九日写铭旌时，异香满室，余所亲见亲闻，又觉神异之不尽虚妄也。

弟蒙赏之衣料，宜制成后，拜赐服之。服数次后，敬谨收藏。将来兄弟所得赐物、浩轴，概藏于先大夫庙内。

十二月十五日

60. 军务处处棘手又遭季弟变故

澄弟左右：

三次寄缄论季弟丧事，想均接到。闻季弟灵柩尚在西梁山一带，不知何日始达安庆。皖北暂有平稳之象，惟鲍军十分危急。鲍若不支，则宁郡之老湘营亦必难坚守。宁若不支，则徽州亦难久守，日夜忧灼，无可设法。

余以军务处处棘手，又遭季弟之变，寸心如焚。纪泽须留家中办季弟大事，二三月尚不能来营。但望军事稍顺，则余怀可渐渐舒畅矣。季弟柩过安庆，余欲留停二十天，一则多漆几次，二则到家后不进曹禾冲等屋，直进马公塘，则一切丧礼应行之仪注，即在安庆行之。且待到此后，再行斟酌。

家中诸子侄，望弟概教之习劳起早，不轻服药，一切照星冈公在日规矩。至嘱至嘱。

十二月初四日

61. 去忿欲以养体存倔强以励志

沅弟左右：

十九日接弟十四日缄，交林哨官带回者，俱悉一切。

肝气发时，不惟不和平，并不恐惧，确有此境。不特弟之盛年为然，即余渐衰老，亦常有勃不可遏之候。但强自禁制，降伏此心，释氏所谓降龙伏虎。龙即相火也，虎即肝气也。多少英雄豪杰打此两关不过，亦不仅余与弟为然。要在稍稍遏抑，不令过炽。降龙以养水，伏虎以养火。古圣所谓窒欲，即降龙也；所谓惩忿，即伏虎也。释儒之道不同，而其节制血气，未尝不同，总不使吾之嗜欲戕害吾之躯命而已。

至于倔强二字，却不可少。功业文章，皆须有此二字贯注其中，否则柔靡不能成一事。孟子所谓至刚，孔子所谓贞固，皆从倔强二字做出。吾兄弟皆秉母德居多，其好处亦正在倔强。若能去忿欲以养体，存倔强以励志，则日进无疆矣。

新编五营，想已成军。郴桂勇究竟何如？殊深悬系。吾牙疼渐愈，可以告慰。刘馨室一信抄阅，顺问近好。

兄国藩手草 正月二十日

62. 先有豁达光明之识后有恬淡冲融之趣

沅弟左右：

二十三日张成旺归，接十八日来缄，旋又接十九日专人一缄，俱悉一切。

弟读邵子诗，领得恬淡冲融之趣，此自“是”襟怀长进处。自古圣贤豪杰、文人才士，其志事不同，而其豁达光明之胸大略相同。以诗言之，必先有豁达光明之识，而后有恬淡冲融之趣。如李白、韩退之、杜牧之则豁达处多，陶渊明、孟浩然、白香山则冲淡处多。杜、苏二公无美不备，而杜之五律最冲淡，苏之七古最豁达。邵尧夫虽非诗之正宗，而豁达、冲淡二者兼全。吾好读《庄子》，以其豁达足益人胸襟也。去年所讲生而美者，若知之，若不知之，若闻之，若不闻之一段，最为豁达。推之即舜禹之有天下而不与，亦同此襟怀也。

吾辈现办军务，系处功利场中，宜刻刻勤劳，如农之力穡，如贾之趣利，如篙工之上滩，早作夜思，以求有济。而治事之外，此中却须有一段豁达冲融气象。二者并进，则勤劳而以恬淡出之，最有趣味。余所以令刻“劳谦君子”印章与弟者，此也。

无为之贼十九日围扑庐江后，未得信息。捻匪于十八日陷宿松后，闻二十一日至青草塢。庐江吴长庆、桐城周厚斋均无信来，想正在危急之际，成武臣亦无信来。春霆二十一日尚在泥汊，顷批令速援庐江。祁门亦无信来，不知若何危险。少荃

已克复太仓州，若再克昆山，则苏州可图矣。吾但能保沿江最要之城隘，则大局必日振也。顺问近好。

国藩手草 三月二十四日

63. 文笔不患不详尽但患不简洁

沅弟左右：

昨日专人送喜信，想已接到。弟之谢恩折，尚可由安庆代作代写代递。初膺开府重任，心中如有欲说之话，思自献于君父之前者，尽可随时陈奏。奏议是人臣最要之事，弟须加一番工夫。弟文笔不患不详尽，但患不简洁，以后从简当二字上着力。

春霆由枞阳、庐江进援六安，未知现抵何处。六安守兵系蒋之纯部下二营，二十五六七业已坚守三日夜。二十六日城塌数丈，贼匪猛扑，亦能御之，或可保全。枞阳周、张二营，吾批令一面驰回裕溪口，一面稟请弟示。安庆与庐江、桐城三处犄角坚守，枞阳尽可不须陆兵，但用水师分布于枞阳、上枞阳、大纲窑、练潭等处。安庆城守十分坚固，弟可放心也。希庵初十起行，病势加剧，十七始至县城，此最可虑。昨日接家信四件送去，本日接毛、黄二信抄阅。顺问近好。

国藩手草 四月初一日酉刻

64. 累世俭朴之风不可尽改

澄弟左右：

接弟三月二十五日县城发信，知已由长沙归，带陈媢夫妇回门。希庵之病，不知近日何如？此间望之真如望岁矣。

六安州以初六日解围，闻伪忠正因太仓州为少荃中丞所克，遂率大股回援苏州，不复上犯湖北。鄂之幸，亦余之幸也。鲍军现由庐州进攻巢县，萧为则与彭杏南初九日攻破铜城闸，毛竹丹、刘南云初七日攻破东关，北岸之事大有转机。苗沛霖复叛，攻围寿州已半月，尚能坚守。城中仅五百人，苗之伎俩实不足畏也。南岸芜湖、金柱关、宁国皆极平稳，徽州近日亦松，江西之北边亦不致被贼冲入，皆可喜之事。饷银虽极缺乏，然米粮充足，除度五、六、七荒月外，大约可剩谷二万余石。

余身体平安，入夏渴睡甚多。欧阳凌云于初八日赴金陵，晓岭于十一日抵皖。泽儿果起行东来否？如其来营，必约金二外甥与袁媢同来。甥到此读书可豁眼界，媢亦可略就范围耳。闻弟居家用费甚奢，务宜收啬，累世俭朴之风，不可尽改。至嘱至嘱。即问近好。

兄国藩手草 四月十四日

65. 修身养家须以明强为本

沅弟左右：

二十七日接二十一日来信，俱悉一切。

弟辞抚之意如此坚切，余二十二日代弟所作之折想必中意矣。来信“乱世功名之际尤为难处”十字实获我心。本日余有一片，亦请将钦篆、督篆二者分出一席，另简大员。兹将片稿抄寄弟阅。吾兄弟常存此兢兢业业之心，将来遇有机缘，即便抽身引退，庶几善始善终，免蹈大戾乎？至于担当大事，全在明强二字。《中庸》学、问、思、辨、行五者，其要归于愚必明，柔必强。弟向来倔强之气，却不可因位高而顿改。凡事非气不举，非刚不济，即修身养家，亦须以明强力本。

巢县既克，和、含必可得手。以后进攻二浦，望弟主持一切，函告鲍、萧、彭、刘四公。余相隔太远，不遥制也。顺问近好。

国藩手草 四月二十七日

弟公文不宜用咨呈。用咨以符通例。

66. 弟文宜专从简当二字着力

沅弟左右：

日内未接来信，不知城贼又出扑我营否？寿州之围断不能解，大约如前年安庆故事，援贼看我破城耳。顷接云仙信，于弟疏稿不甚以为然，兹寄阅。余批弟疏亦寄去查收。弟平日于文章一途最谦退不敢自信，寄云仙处请益晰疑，原无不可。祭文寄京师刘韞翁处，则似自信为能文者，不似乎日之谦谨。京师人文荟莽，韞翁交游最广，万目传观，究为非宜。以后弟文宜专从简当二字着力，每日读书一时工夫亦不可少。

方子白谨厚朴实，或有裨于弟，而无桃薄难近之态，弟若欲延之，则另派员署和州也。刘冰如一信抄阅，系寄湖北司道者，读之寒心。李黼堂在湖北偶一蹉跌，便若半身不遂者，不知真病乎？抑装病乎？顺问近好。

国藩手草 五月初九日

67. 互勉以“和”为殷鉴

沅弟左右：

十五日接弟初六、四、初十日三次信，十六日又接初八日信，俱悉一切。所应复者，条列如左：

一、二浦既克，现依弟议，移韦守巢县、东关，梁、王、万三营守西梁山、铜城闸，腾出萧军分守二浦，刘军围攻九洑，鲍军南渡打东坝、二漂，另有公牒知会矣。

一、弟在湖南索取之药四万斤、银万两、绳十万，今日已到此间。除催令速行外，余又另解三万、米三千、子弹五万斤，又解还弟代济鲍营米一千九百石，均于日内成行。

一、陈氏即葬于安庆城外，已买得地一处，定于二十一日下殡。

一、靖毅公墓志，此时可写矣，日内当添数语寄去。

去年进兵雨花台，忠、侍以全力来援，俾浙沪皆大得手。今年攻克各石城，俾二浦速下，扬州、天、六之贼皆回南岸，此弟功之最大处，然此等无形之功，吾辈不宜形诸奏牒，并不必腾诸口说，见诸书牒，此时谦字之真工夫。所谓君子之所不可及，在人之所不见也。吾时时以和为殷鉴，望弟时时以和为殷鉴。比之向忠武，并不甚劣，弟不必郁郁也。顺问近好。

国藩手草 五月十六日

68. 弟之文笔不宜过自菲薄

沅弟左右：

二十一日接弟十三日信，盖连日南风极大，故到省极迟。应商事件，条列如左：

一、十七晚有轮舟自金陵经过，亲见九洑洲实已克复。宜以萧军守二浦，南云酌留二营守九洑洲，非畏长毛之复来也，畏李世忠之盘踞耳。如李业已派兵扎二浦城内，则弟须商之厚、雪与萧，用蛮教驱之使去(李最欺善怕恶)，令萧军速入，占守二城。李见我军威方盛，必不敢十分违抗。李有牒来，报渠兵克复桥林、二浦，余当批斥之，不准渠部再入二浦城也。

一、二浦、九洑即克，霆军日内必已南渡，或竟围扎孝陵卫一带，或先打二溧，均听弟与厚、雪、霆四人商办，余不遥制。昨已函告弟处，顷又函告雪琴矣。余平日本先攻二溧、东坝，不主合围之说。今见事机大顺，忠酋又已回苏，金陵城贼必甚惊慌，亦改而主合围之说。且天气太热，霆军奔驰太苦，不如令扎金陵东北，以资休息。待七月年间伏过暑退，弟与霆军各抽行队去打东坝、二溧，尚不为晚。届时江、席、李三军亦可由广德、建平以达东坝矣。

一、合围之道，总以断水中接济为第一义。百余里之城，数十万之贼，断非肩挑陆运所能养活。从前有红单船接济，有洋船接济，今九洑洲既克，二者皆可力禁。弟与厚、雪以全副精神查禁水次接济，则克城之期，不甚远矣。九洑洲可设一厘

卡，弟处有贤员可派否？樊沛仁声名极坏，当严行查办。

一、余批折稿中，有一条不当于事理，弟亦不必愠气。余之意，不过想弟军常常有一大文活兵在外耳。今江北既一律肃清，则大局已好，或合围或激击，均无不可，余兄弟议论不至参差矣。至于云仙之意，则当分别观之。渠不以弟疏稿为然，诚所不免；谓渠遵例回避，愿入弟幕草奏尽出客气，却又不然。胡文忠八年初丁艰时，屡函称遵旨夺情，不愿作官，愿入迪庵幕中草奏帮办。人人皆疑其矫，余则知其爱迪敬迪出于至诚。云仙之爱弟敬弟，亦极诚挚，弟切莫辜负其意也。往时咸丰三、四、五年间，云仙之扬江、罗、夏、朱而抑鄙人，其书函言词均使我难堪，而日久未尝不谅其心。

至弟之文笔，亦不宜过自菲薄，近于自弃。余自壬子出京，至今十二年，自问于公牍书函、军事吏事、应酬书法无事不大长进。弟今年四十，较我壬子之时尚少三岁，而谓此后便无长进，欺人乎？自弃乎？弟文有不稳之处，无不通之处；有不简之处，无不畅之处，不过用功一年二载便可大进。昔温弟谅余曰：“兄精神并非不足，便吝借不肯用耳。”余今亦以此意谏弟也。顺问近好。

国藩手草 五月二十一日

69. 弟谢恩折已修阅

沅弟左右：

十八日接十三日酉刻之信，畅论扬、镇两不宜调来会剿，甚是甚是！余十二日折中有一面咨调扬、镇兵等语，诚恐寄谕与都、冯两处，便尔提及。此间无咨牒，渠自不轻动也。弟谢恩折昨日改定，今日写定。不料轮舟明日尚不开行，只得交来弁带还。弟处借有附近府县印花否？兹寄去一颗，以便封发。如有府县印，则不必借总督印。军情无可多说，不能不稍着议论，故将次卿折全数涂改，惠甫折则未动也。金陵近得透雨否？酷热少解否？顺问近好。

国藩手草 六月二十日夜

夹板正折一件、稿一件、家信二件照收。

70. 弟须在奏折上费一番功夫

沅弟左右：

接二十六日已刻来信，俱悉一切。

奏折一事，弟须用一番工夫。秋凉务闲之时试作二三篇，眼界不必太高，自谦不必太甚。上次惠甫、次卿二稿，只须改润一二十字，尽可去得。目下外间咨来之折，惟浙沪湘三处较优，左、李、郭本素称好手也。此外如官、骆、沈、严、僧、吴、都、冯之折，弟稍一留心即优为之。以后凡有咨送折稿到弟处者，弟皆视如学生之文，圈点批抹。每折看二次，一次看其办事之主意、大局之结构，一次看其造句下字之稳否。一日看一二折，不过月余，即可周知时贤之底蕴。然后参看古人奏稿，自有进益。每日极多不过二三刻工夫，不可懒也。二十五日拜发之件，尽可咨行邻省。

金眉生与鹤侪积怨甚深，吾辈听言，亦须独具权衡。权位所在，一言之是非，即他人之荣辱予夺系焉。弟性爽快，不宜发之太骤。顺问近好。

兄国藩手书 七月初一日

71. 强字须从明字做出

沅弟左右：

初十夜接初六日专人来信，俱悉一切。

鹤侨捎留弟营委员至三个月之久，宜弟恚怒不平。弟去之严札，其是处余以圆圈识之，其太繁处余以尖圈识之。乔来之慈禀，余亦以圆圈尖圈识之。何铄之事，本拟俟筠仙查复后再行严办。今筠公有抚粤之行，后来者不知为谁。意欲严惩何铄，竟不知如何下手乃为恰如其分。盖谴罚有罪，亦须切当事理，乃服人心。筠、南二公日内必到此间，商定后再行举发可也。

近人折稿，弟处咨到者少，余当饬抄成本，陆续寄去，每月寄送二份。古人奏疏，亦当抄二三十篇，以备揣摩。

强字原是美德，余前寄信亦谓明强二字断不可少。第强字须从明字做出，然后始终不可屈挠。若全不明白，一味横蛮，待他人折之以至理，证之以后效，又复俯首输服，则前强而后弱，京师所谓瞎闹者也。余亦并非不要强之人，特以耳目太短，见事不能明透，故不肯轻于一发耳。又吾辈方鼎盛之时，委员在外，气焰薰灼，言语放肆，往往令人难进。吾辈若专尚强劲，不少敛抑，则委员仆从等不闹大祸不止。

盐务规复引地，余有寄南坡一信，抄稿付阅。所索子药太多，候酌发之，即问近好。

国藩手草 七月十一日

72. 盼弟自为宽解无稍抑郁

沅弟左右：

十一日接弟初六日信，尚不甚佛郁。至慰至慰！然此间余与一二知者皆恐弟触动肝气，极不放心。惠甫则语次几欲垂涕，足见其知己之感，血性过人。渠本定于十月起程，余催其九月即行，与南坡翁同赴金陵，大约二十外始可泛舟东下。此半月中，弟当自为宽解，无稍抑郁。盖此七船乃恭邸数年苦心经营之事，近则既经愆气，又复抱歉，正在十分不自得之际（将来回我十二日一信亦必有微词），疑弟折意含讥讽，故触其怒，而一为发舒，非皇太后另有所咎于弟也。

晓岭即决计不赴湖口，派何敦五往代其役。两岸盐务折将金之刊本章程十六条改为八条，兹寄弟处，请专人送泰州许、金、张一阅。如有不妥，签出飞送寄来。弟营应分之厘与利，较金之原议更加矣。顺问近好。

兄国藩手草 九月十三日

73. 凡事皆当谨慎俭朴

澄弟左右：

接弟九月中旬信，俱悉一切。

此间近事，自石埭、太平、旌德三城投诚后，又有高淳县投诚，于十月初二日收复，东坝于初七日克复，宁国、建平于初六、初九日收复，广德亦有投诚之信，皖南即可一律肃清。淮上苗逆虽甚猖獗，而附苗诸圩因派粮派人诛求无厌，纷纷叛苗而助官兵，苗亦必不能成大气候矣。

近与儿女辈道述家中琐事，知吾弟辛苦异常，凡关孝友根本之事，弟无不竭力经营。惟各家规模总嫌过于奢华。即如四轿一事，家中坐者太多，闻纪泽亦坐四轿，此断不可。弟曷不产加教责？即弟亦只可偶一坐之，常坐则不可。蔑结轿而远行，四抬则不可；呢轿而四抬则不可入县城、衡城，省城则尤不可。湖南现有总督因人，皆有子弟在家，皆与省城各署来往，未闻有坐四轿。余昔在省办团，亦未四抬也。以此一事推之，凡事皆当存一谨慎俭朴之见。

八侄女发嫁，兹寄去奁仪百两、套料裙料各一件。科三盖新屋移居，闻费钱颇多。兹寄去银百两，略为协助。吾恐家中奢靡太惯，享受太过，故不肯多寄钱物回家，弟必久亮之矣。即问近好。

国藩手草 十月十四日

74. 积劳之人非成名之人成名之人非享福之人

沅弟左右：

接初四、初六日两次来信，知初五夜地道轰陷贼城十余丈，被该逆抢堵，我军伤亡三百余人。此盖意中之事。城内多百战之寇，阅历极多，岂有不能抢堵缺口之理？苏州先复，金陵尚遥遥无期，弟切不必焦急。

古来大战争、大事业，人谋仅占十分之三，天意恒居十分之七。往往积劳之人非即成名之人，成名之人非即享福之人。此次军务，如克复武汉、九江、安庆，积劳者即是成名之人，在天意已算十分公道，然而不可恃也。吾兄弟但在积劳二字上着力，成名二字则不必问及，享福二字则更不必问矣。

厚庵坚请回籍养亲侍疾，只得允准，已于今日代奏。

苗逆于二十六夜擒斩，其党悉行投诚。凡寿州、正阳、颖上、下蔡等城一律收复，长、淮指日肃清，真堪庆幸。

郭世兄于十二日到此，大约暂留安庆小住，牧云定十五以后回湘。弟近日身体健旺否？吾所嘱者二端：一曰天怀淡定，莫求速效；二曰谨防援贼城内外猛扑，稳俱御之。顺问近好。

国藩手草 十一月十二日

75. 望弟子俭字加一番功夫

澄弟左右：

十一月十一日朱斋三来，接十月初六日一函，俱悉一切。

围山嘴桥稍嫌用钱太多，南塘竟希公祠宇亦尽可不起。湖南作督抚者不止我曾姓一家，每代起一祠堂，则别家恐无比例，为我曾姓所创见矣。沅弟有功于国，有功于家，千好万好，但规模太大，手笔太廓，将来难乎为继。吾与弟当随时斟酌，设法裁减。此时竟希公祠宇业将告竣，成事不说，其星冈公祠及温甫、事恒两弟之祠皆可不修，且待过十年之后再看（好从慢处来）。至嘱至嘱。

余往年撰联赠弟，有“俭以养廉，直而能忍”二语。弟之直人人知之，其能忍，则为阿兄所独知；弟之廉人人料之，其不俭，则阿兄所不及料也。以后望弟于俭字加一番工夫，用一番苦心，不特家常用度宜俭，即修造公费，周济人情，亦须有一俭字的意思。总之，爱惜物力，不失寒士之家风而已。莫怕寒村二字，莫怕悭吝二字，莫贪大方二字，莫贪豪爽二字。弟以为然否？

温弟妇今年四十一岁，兹寄去银一百、燕菜二匣，以为贺生之礼。其余寄亲族之炭，敬芝圃之对，均交牧云带回。此间自苏州克复、苗沛霖伏诛后诸事平安。即问近好。

国藩手草 十一月十四日

76. 家门太盛有福不可享尽

澄弟左右：

十一月十七日接弟十月二十八衡州一缄，俱悉一切。

此间近事，惟李少荃在苏州杀降王八人最快人意。兹将渠寄总理衙门信稿一件抄寄弟阅。戈登虽屡称欲与少荃开仗，少荃自度力足制之，并不畏怯，戈登亦无如之何，近日渐就范围矣。

衡州之粤盐，只禁船载，不禁路挑，弟所见极为有理。江西新城县亦为禁闽盐之路挑，竟被私贩将委员殴毙。现在衡州每挑既补二百四十，若再加，亦必激变。从前道光年间，衡州严禁粤私，从未禁遏得住。将来新章到衡，弟可与府县及厘卡说明，只有水卡查船载之私每斤加作八文，其陆卡查路挑之私概不再加分文。亦不必出告示，亦不必办公牒，但得水卡一处稽查，便算依了我之新章目。兹将新刻章程三本寄回。

牧云于十七日回籍，带去银二十余封。兹将原单寄去，请弟照单查收。又内人寄澄弟妇菲仪五十两，余亦寄弟银百两，弟得母笑，黄河千年而始一清乎？又朱金权本年薪水银二十两，望即转给。弟家之渐趋奢华，闻因人客太多之故。此后总须步步收紧，切不可步步放松。禁坐四轿，姑从星冈公子孙做起，不过一二年，各房亦可渐改。总之，家门太盛，有福不可享尽，有势不可使尽。人人须记此二语也。即问近好。

国藩手草 十一月二十四日

77. 以俭字相勸则可久矣

澄弟左右：

十二月二十九日接十五日县城所发之缄，俱悉一切。

五十侄女生子，恭喜弟又做一屈外公。余兄弟屡见孙女，尚未抱孙，不知何年乃做真公公。科四今春完娶，想三家之中不久必有佳音耳。

此间年底平安。各营腊月皆放一个月满饷，近岁所仅见也。惟米贵异常，年前已卖至五千二百文一石。九弟及各军近日均无战事。苗沛霖既诛，其部下头目为僧王擒斩殆尽。李世忠亦知畏罪。近有文书来，将渠所据城池交出，请我派人去守，其枪炮亦愿缴出。将来江北可无后患。

余身体平安，合署内外俱好，惟俭字日减一日。余兄弟无论为官在家，彼此常以俭字相勸，则可久矣。顺问新岁吉好。

国藩手草 正月初四日

78. 患难兄弟惟有互劝互勸互恭

沅弟左右：

接二十七、八日两信，俱悉一切。

地道既难中止，听弟加工再挖，余不复遥制。徽、休、祁、移俱无恙，贼已由婺境横窜遂安、华埠，将仍走玉山、广信以犯抚、建，闻剃头者甚多，并不杀人放火，或有各自逃散之意亦未可知。弟军今年饷项之少为历年所无，余岂忍更有挑剔，况近来外侮纷至迭乘，余日夜战兢恐俱，若有大祸即临眉睫者。即兄弟同心御侮，尚恐众推墙倒，岂肯微生芥蒂？又岂肯因弟词气稍戆藏诸胸臆？又岂肯受他人千言万语遂不容胞弟片语乎？老弟千万放心，千万保养。此时之兄弟，实患难风波之兄弟，惟有互劝互勸互恭而已。

余日内所患者三端：一则恐弟过劳生病，弃勇因饷细而散漫；二则恐霆营人心涣散，另生祸变，兹将霆营周委员寄鄂台一信抄阅；三则恐汉中大股东窜，庐（普守）、巢（何绍彩守巢）、和、滁俱不能守，西梁山亦无兵可以拨防。此三事中，弟有法可以补救一二否？即问近好。

四月初三日

79. 须将万事看空毋恼毋怒

沅弟左右：

十三日接弟初十日书，俱悉一切。

其时适闻初六常州克复、初八丹阳克复之信，正深欣慰，而弟信中有云肝病已深，瘤疾已成，逢人辄怒，遇事辄忧等语，读之不胜焦虑。今年以来，苏浙克城甚多，独金陵迟迟尚无把握，又饷项奇绌，不如意之事机、不入耳之言语纷至迭乘。余尚愠郁成疾，况弟之劳苦百倍阿兄，心血久号数倍于阿兄乎？余自春来，常恐弟发肝病，而弟信每含糊言之，此四句乃露实情。此病非药饵所能为力，必须将万事看空，毋恼毋怒，乃可渐渐减轻。蝮蛇螫手，则壮士断其手，所以全生也。吾兄弟欲全其生，亦当视恼怒如蝮蛇，去之不可不勇。至嘱至嘱。

余年来愧对老弟之事，惟拨去程学启一名将，有损于阿弟。然有损于家，有益于国，弟不必过郁，兄亦不必过悔。顷见少荃为程学启请恤一疏，立言公允，兹特寄弟一阅，请弟抄后寄还。李世忠事，十二日奏结，兹咨弟处。渠见此奏，或可将三十万串迅速解来，并请弟抄折再咨李处（余已咨矣，恐其到缓）。又饷绌情形一片抄阅，即为将来兄弟引退之张本。余病假于四月二十五日满期，余意二十五再请续假，弟意以为何如？淮北票盐、课厘两项，每岁共得八十万串，拟概供弟一军。此亦巨款，而弟尚嫌其无几，且愧对万、忠，盖亦眼大口大之过。余于咸丰四、五、六、七、八、九等年从无一年收过八十万者，

再筹此等巨款，万不可得矣。顺问近好。

四月十三日

80. 功不必自己出名不必自己成

沅弟左右：

得弟十三日信，俱悉一切。常、丹之克，此间已先得报矣。各城皆得，仅余金陵。城之坚而大，贼之悍而多，实非他处可比。弟切勿焦灼致疾，听其自然而已。如奉旨饬少荃中丞前来会攻金陵，弟亦不必多心，但求了毕兹役。独克固佳，会克亦妙。功不必自己出，名不必自己成，总以保全身体，莫生肝病为要。善于保养，则能忠能孝，而兼能悌矣。

泽几近日痊愈，“望勿记念。昨得沈中丞信，寄去一阅。上海头批十五万已到否？春霆之九万已另咨商少荃矣。顺问近好。

四月十六日

81. 肝脾两疾全仗以心治之

沅弟左右：

昨寄一缄，旋接初二日来信，俱悉弟腹泄小愈。腹泄及不食油荤均不足介意，惟肝脾二家全仗老弟以心治之，非阿兄所能助谋，亦非良医所能为功，弟之天君即神医也。

江西宜黄、崇仁失守，省城吃紧，实出意外。兹有催杨军门之咨，请弟转递。余排递弟处信三日可到，而排递杨、彭信总须八九日，州县之以亲疏为势利，可恶如此。昌歧来此，必厚待之如初。前澄弟寄弟信与茶叶，久未专送，顷又接澄付弟信，兹一并排递，而另派亲兵送茶叶去。火药即日再解二万，以资应用。

金陵贼情，常、丹克复与未克时有异乎？无异乎？顺问近好。

五月初六日

82. 心肝之病究以自养自医为主

沅弟左右：

初九日接弟初六日书，俱悉一切。厚庵亦于是夜到皖，坚辞督办一席。渠之赴江西与否，余不能代为主持。至于具折，则必须渠亲自陈奏，余断不能代辞。厚帅现拟在此办折，拜疏后仍回金陵水管。春霆、昌歧闻亦日内可到。春霆回籍之事，却不能不代为奏慰也。弟病近日少愈否？肝病余所深知，腹疼则不知何症。屡观朗山脉按，以扶脾为主，不求速效，余深以为然。然心肝两家之病，究以自养自医为主，非药物所能为力。今日偶过裱画后，见弟所写对联，光彩焕发，精力似甚完足。若能认真调养，不过焦灼，必可渐渐复元。

五月份之火药三万斤，拟于日内起解，银亦可解三万。江西之贼，初四日尚未至漳树。省城援兵已到，当安稳矣。复问近好。

五月初十日

83. 同战金陵于弟才德品望无损

沅弟左右：

三日未接弟信，不知弟身体何如？接吾十二暨十四五六日各信，不更加焦灼增疾否？余闻昌歧言弟精神完足、小恙无碍而放心，闻曾恒德、刘高山言弟病势不轻而悬念，见弟信劝科一乡试，字迹奇润而喜慰，见弟信言贼米日发一斤四两而忧灼。春霆过此，其于吾弟感激钦佩，迥异寻常。厚庵于弟亦契合无间言。故余十五日与少荃之一咨一信，惟愿弟之速送，又惟恐弟之径送，反复无定，为弟所笑，亦必为弟所谅也。

今日命纪泽赴金陵省视老弟。余于六月初间亦必往，兄弟畅叙。届时少荃若到，余即在彼，不避回皖。如少荃不到，余即坐轮船速归。总之，弟以保身为主。无论少荃与余会剿与否，于弟威名微减，而弟之才德品望毫无损也。顺问近好。

五月十七日

84. 养生以少恼怒为本事亲以得欢心为本

沅弟左右：

二十五日辰刻接弟第二一夜信，知地道又被斗穿三洞，实堪愤闷。然与其轰开而被贼以火球堵住伤亡尤多，又不如被其掘穿，我之士气不大挫减也。弟须多方劝慰诸将无过忧郁。凡子弟生徒，平日懒惰，场文荒谬而不售者，则当督责之；至平日劳苦，场文极佳而不售者，则当奖慰之。弟所统诸将，皆劳苦佳文之生徒也。余中厅悬大本堂匾，跋云：“养生以少恼怒为本，事亲以得欢心为本。”弟久劳之躯，当极力求少恼怒。纪泽事叔如事父，当极力求得欢心也。

又闻江西之贼将由青阳、芜湖回救金陵。厚庵调湘后三营，撤金柱关之防，余极不放心。渠言当面商吾弟，果商及否？望弟加意慎重。陆防江西、湖州之援贼，水防江面之接济，只要此二事办得认真，金陵终有蕝事之日，无以地道无成、苏军将至稍涉大意也。千万千万！顺问近好。

五月二十五日

85. 有福不可享尽有势不可使尽

澄弟左右：

六月四日接五月二十二日信，初一日接十一日信，俱悉一切。震四果尔早世，四妹适朱家，万缘皆空。吾骨肉中今年何多变也！老弟终日奔驰劳苦，身体吃得住否？深为系念。

此间近状平安。大女儿病六、七日，今已痊愈。沅弟病亦愈矣，闻二十五六日每日又骑行百余里。余命泽儿往看沅病，初二归来云“尽可放心”，但六月尚盖棉被三床，体亦弱矣。弟能从此少管公事，甚慰甚慰。余蒙先人余荫忝居高位，与诸弟及子侄谆谆慎守者但有二语，曰“有福不可享尽，有势不可使尽”而已。福不多享，故总以俭字为主，少用仆婢，少花银钱，自然惜福矣；势不多使，则少管闲事，少断是非，无感者亦无怕者，自然悠久矣。余详日记中，顺问近好。

外李北冈一信，阅毕专人送去。

六月初四日

86. 彼此互相劝诫存倔强去忿激

沅弟左右：

初十日接初七日申正信，于余初四日言及苏沪厘饷一事劝譬详明，深识名谕，可慰可敬。弟近年于阿兄忿激之时，辄以嘉言劝阻；即弟自发忿激之际，亦常有发有收。以此卜弟之德器不可限量，后福当亦不可限量。大抵任天下之大事以气，气之郁积于中者厚，故倔强之极，不能不流为忿激。以后吾兄弟动气之时，彼此互相劝诫，存其倔强，而去其忿激，斯可耳。十二日之疏决不提及，弟于初九日秘诀一信亦决不可从。初十日接奉寄谕，词旨温润，无催迫之意，兹抄阅。将来咨文不另抄也。顺问近好。

六月十一日

87. 男儿自立须有倔强之气

沅弟左右：

接第十二夜信，知连日辛苦异常，猛攻数日，并未收队，深为惦念。弟向来督攻，好往来于炮子如雨之中，此次想无二致也。少泉前奏至湖州一看，仍回苏州。此次十六启行，不知径来金陵乎？抑先至湖州乎？难禁风浪四字壁还，甚好甚慰。古来豪杰皆以此四字为大忌。吾家祖父教人，亦以懦弱无刚四字为大耻。故男儿自立，必须有倔强之气。惟数万人困于坚城之下，最易暗销锐气。弟能养数万人刚气而久不销损，此是过人之处，更宜从此加功。

子弹日内装就，明日开行，不知果赶得上否？余启行之期，仍候弟一确信也。顺问近好。

六月十六日年初

88. 弟之退志兄应成全

沅弟左右：

数日未寄信于弟，想弟悬系无已。余于二十二宿芜湖，二十六宿池洲，二十八坐一小舟回省寓中，内外平安。二十五日接到初七日所发一折之批、一明谕、一寄谕，舟中匆匆，尚未咨弟。兹接弟二十六日信，已赶办咨文矣。

弟撤勇之事，余必一一速办，除催李世忠及办里下河之捐外，再札上海官绅办沪捐六十万，并加函托苏、常绅十，必有所获，弟可放心。昨得云仙信，已办六万径解弟营矣。弟之退志，兄应成全，兄之门面亦赖弟成全。第一要紧守金陵、芜湖、金柱三处，第二要分一支出剿广德，以塞众望。即令朱南桂与刘松山、易开俊三人进剿广德。而弟处派三支，分防宁郡、泾旌，或亦一道，望弟早为酌定。倘兄之门面撑立不住，弟亦无颜久居山中矣。熊登武、张诗日、刘南云三人，弟万万不可放走。陈舫仙稍迟一步，明年再退可也。此外孰留孰散，听弟裁酌，总不便我遽倒门面为要。千万千万。弟肝气不能平伏，深为可虑。究之弟何必郁郁？从古有大勋劳者，不过本身得一爵耳！弟则本身既挣一爵，又赠送阿兄一爵。弟之赠送此礼，人或忽而不察，弟或谦而不居，而余深知之。顷已详告妻子知之，将来必遍告家人宗族知之。吾弟于国事家事，可谓有志必成，有谋必就，何郁郁之有？千万自玉自重。顺问近好。

七月二十九日

89. 吾辈所可勉者但求尽吾心力之所能及

沅弟左右：

初四夜接初一夜来函，俱悉一切。

贡院九月可以毕工，大慰大慰。但规模不可狭小，工程不可草率。吾辈办事，动作百年之想。昨有一牘，言主考房后添造十八房住屋，须将长毛所造仓屋拆去另造，即不欲草率之意。此间所购木料，中秋前可到一批，九月再到一批。

弟中怀抑郁，余所深知。究竟弟所成就者，业已卓然不朽。古人称立德、立功、立言为三不朽。立德最难，而亦最空，故自周、汉以后，罕见以德传者。立功如萧、曹、房、杜、郭、李、韩、岳，立言如马、班、韩、欧、李、杜、苏、黄，古今曾有几入？吾辈所可勉者，但求尽吾心力之所能及，而不必遽希千古万难攀跻之人。弟每取立言中之万难攀跻者，而将立功中之稍次者一概抹杀，是孟子钩金舆羽、食重礼轻之说也。呜呼可哉？不若就现有之功，而加之以读书养气，小心大度，以求德亦日进，言亦日醇。譬如筑室，弟之立功已有绝大基址，绝好结构，以后但加装修工夫。何必汲汲皇皇，茫若无主乎？刘、朱两军，望弟迅速发来。必须安庆六县无贼，兄乃可撑住门面，乃可速赴金陵。至要至要。弟所遣散之勇，皆令在长沙领补全饷，必办不到。十八万盐本何能遽尔畅销？须令过长沙时暂补一半（遣散者今年发全饷，则留者皆不愿留），余则营官给一限期票与勇（余于萧、毛两军拟用银期票札）。弟给一限期

札与营官，明年再补可也。顺问近好。
八月初五日

90. 功成名就何以独怀郁闷

澄弟左右：

日内未接弟信，想七月底到县即至李家陪吊客矣。

此间诸事平顺，拟于九月初全家移至金陵。衰孀自五月赴金陵，至今未归。罗孀于八月十六日先去，为沅弟叩寿。沅弟湿毒与肝郁二者总未痊愈。湿毒因太劳之故，肝疾则沅心太高之故。立此大功，成此大名，而独怀郁郁，天下何一乃为快意之事？何年乃是快意之时哉？余于本月为代具请假折，九月再奏请开缺，十月当可成行。余之精神日疲，亦难当此重任，然目下不能遽行引退，且待沅弟退后再作计议。

纪鸿抵家后，九月初仍可命之东来。过汉口时，应至淮盐督销局杜小舫处一行，其妻舅郭慕徐在杜处寄寓，约定留信在彼也。近日家中内外大小，勤俭二字做得几分？门第太盛，非此二字断难久支，务望慎之。即问近好。

八月十四日

91. 金陵功成中外于弟必无闲言

沅弟左右：

十八日专人送家信一包，是夕接弟初十日信。哨官易光南行至九日始到，可恶也。湿毒更炽，遍身发烧，是秋天秋燥之故。余于二十六年秋亦遍身发烧，医者皆言是杨梅疮毒气发作，余不敢服攻伐猛剂。吴竹如劝每日服槐花一碗，亦无寸效。其时余又彻夜不寝，则是别有心肝之疾，与皮肤烧热了不相涉。总之，皮肤之病，世间无甚于我者，尚非要命之症。弟疾较我轻松数倍，尽可不必服药，切不可因肝郁之症牵连而治之。至嘱至嘱。

期票既不可行，一切听弟料理。病假之事，接弟咨复，八月杪发第一折，九月发第二折，可赶至家中过年，却不能赶十一月初三祭期。” 荅臣谋国，尚未尽善”，此温旨非微词也。金陵功成，中外于弟必无闲言，切不可多心多疑。顺问近好。

八月十九日

兰泉信附去。

92. 功成身退愈急愈好

沅弟左右：

初二日接第二十九夜信，知弟气已稍畅，痛亦少止，至以为慰。余于初一日自安庆登舟，行六十里住李阳河。初二阻风，一日未开。初三行九十里住王家套。日日逆风，惟尚可略行耳。

麓轩信阅过，已作札调之。黄南坡翁信言湘盐极好，抄阅。十一月举行乡试，断无更改。弟回籍之折，余斟酌再三，非开缺不能回籍。平日则嫌其骤，功成身退，愈急愈好。弟阅折稿，毫无牵强之处，当放心矣。顺问近好。

九月初三日

93. 弟可趁闲苦学以解平生之憾

沅弟左右：

闻京中贾侍御锋奏参湖南厘局东局之事。因胡小蘧查毛寄帅之案，便查此案。不知近日已查毕否？寄翁之事，不知仅在长沙了，抑须果至广东一行？弟素性喜抱公愤，又待发甚厚，此时告病在家，切不可干预丝毫。湖南厘卡薪水太重，何子贞在此亦颇议及，不知黄、郭得免牵涉否？弟初到家时，伤风咳嗽，近日痊愈否？此次《鸣原堂论文抄》、东坡万言书，弟阅之。如尚有不能解者，宜写信来问。弟每次问几条，余每次批几条，兄弟论文于三千里外，亦不减对床风雨之乐。弟以不能文为此生缺憾，宜趁此家居时苦学二三年，不可抛荒片刻也。顺问近好。

十二月十六日

94. 弟切莫无端而郁恼

沅弟左右：

前奉饬南云赴豫之旨，殊难筹画，少荃亦以刘铭传赴豫为难。此次谕旨概免中州之行，以后诸事皆易措置。惟春霆须速赴新疆，刘铭传赴闽归左帅调度，尚非二将所愿耳。

弟病近日大愈否？疮癣皆皮肤之疾，决无损于元气，切不可轻用克伐之剂，谓之无罪攻伐。吾观弟在途所寄簾轩之对、眉生之屏，皆圆湛秀劲，其福泽必方兴未艾。韞斋先生谓京中言及弟者，贤愚皆俯首无异辞。弟若无端而郁恼，是与无罪而攻伐同一失也。

余近事极顺，弟可放心。愿兄弟常诵《常棣》《小宛》二诗以自保耳。

正月十四日

95. 用功不求太猛但求有恒

沅弟左右：

弟信言寄文每月以六篇为率，余意每月三次，每次未滿千字者則二篇，千字以上者則止一篇。選文之法，古人選三之二，本朝人選三之一，不知果當弟意否？

弟此時講求奏議尚不為遲，不必過於懊悔。天下督撫二十餘人，其奏疏有過弟者，有魯衛者，有不及弟者。弟此時用功不求太猛，但求有恒，以弟攻金陵艱苦之力，用之他事，又何事不可為乎？

正月二十四日

96. 以昔年拚命之意用力于奏议文章

澄、沅弟左右：

金陵昭忠祠纪将士劳苦之碑，沅不肯稍编节略，其名似谦，其实懒耳。

弟以不能文为深耻，无以怔仲体弱，过于自恕自逸。如元年八九月雨花台之役，弟昼夜不眠至五十余日之久。三年四、五、六月，弟忧劳更甚，为日更久。岂当时体气忽健，异于生平乎哉？因众人藐视沅浦非能克金陵之人，发愤欲一雪其耻而伸其志，故忘其为积弱之躯也。目下用力于奏议文章，亦当稍存昔年拚命之意。不过一二年间，谕旨必屡催出山。一经履任治事，诸务冗杂，欲再专用于文章，则不能矣。

三月初七日

97. 弟病以不看书不用心为良方

澄、沅弟左右，

接两弟信并渠侄夫妇安禀，欣喜。新妇有和顺截稿之象，从此和室宜男，家庆绵长，企慰无似。纪鸿儿于四月二十一日完婚，外间既无一客。衙门办喜事，似较家乡稍简易也。

沅弟寄到折稿，当略为修饰，日内拜发。陈舫仙、未必槛到此陈谢恩折，亦于日内附报发去。魏柳南自京师归，亦恰至此。凡徒弟当差者，无不恩明谊美，将来出任，当能束躬自爱。

弟病以怔忡不寝为最要之症，外毒及善忘多感伤皆不甚要紧。开卷心疼，总由于心肝血亏之故。治之之道，非药力所能遽效，自以不看书不用心为良方。

余因闻霆营之变，近日毫无欢惊。又接两弟信，梁葆颐在衡既不相宜，余即批令归湖南酌委署事，不复与闻盐务耳。

四月二十四日

98. 劝沅弟不必抑郁

澄、沅弟左右：

沅弟病虽愈，而尚黄瘦，实深悬系。建非常之功勋，而疑谤交集，虽贤哲处此，亦不免于抑郁牢骚。然盖世之事业既已成就，寸心究可自怡而自慰，悠悠疑忌之来，只堪付之一笑。但祝积年之劳伤湿毒，日渐轻减，则正气日旺，固可排遣一切耳。舫仙知沅颇深，感恩尤切。每言沅公精神极好，后来勋业方长，区区小病，不足为虑。余闻之常为一慰。李季荃与舫仙亲如骨肉，言其功劳极大，牢骚甚深，而病颇可虑。余欢季荃虽瘦削异常，而精神尚足，当无他虑。

兄抵临淮，罗、张、朱六营于初二日到，刘松山亦到。雒河集之围危急如故。刘铭传一军日间可到，不知能解围否。若果解围，则西窜河南、湖北，恐不出沅弟所料；若各路重兵齐到，而卒不能解围，则中原糜烂矣。余身体尚好，惟朱、唐、金三军闹饷，处置宽严皆有不宜，寸心忧灼。蒙、亳、宿、颍一带人心甚坏，亲近捻匪，仇视官兵，亦久乱之气象也。

六月初五日

99. 凡任事之臣当可善始善终

澄、沅弟左右：

吾以淮军分布济宁、徐州、归德、周家口等处，此次捻匪东窜，处处被我军拦头击败，若自投罗网者然。从此或不敢肆意流窜，恐将为湖北之害耳。

沅弟已具折谢恩否？如身体果未全好。明年二月再行辞谢，尚不为迟，目下则不宜疏辞。以朝廷之仁厚，凡任事之臣，当可善始善终。两弟悉心酌之。

《鸣原堂论文》已抄若干篇？此间无底稿可查。请弟抄一目录寄来，拟再续批数十篇以成完编。或取佳文，或取伟人，总期足以感发兴起耳。

十月十五日

100. 身体平安惟目光日坏

澄、沅弟左右：

四月初三日接澄弟二月二十七日信，系专勇刘廷爵等带回者。其时沅弟已至长沙，另有驿信，故无附信。家中各宅清吉，子弟发奋读书，至以为慰。抄录兑契二纸阅悉。以少田兑多田，以未找作已找，界限清楚，情意深厚，余惟学早三之多谢，兼含三之受承而已。

此间军事已详于初三日驿递沅弟信中，本日又有一折一片抄寄弟阅。

古老坪山高阴寒，湿气尤重，子弟读书其中，恐不相宜，吾乡多山，须开阳干燥者乃为美宅，请酌之。七十侄女何以移居县城？岂乡间旧屋有不相安之处耶？

兄身体平安，惟目光日坏，蒙蒙如有一层障隔者，幸写字手熟，不甚吃力。阎中丞日内来济宁，相待尚为款洽，余事详日记中，不赘述。顺问近好。

四月初六日 济宁州

101. 不可视文太重而视天下后世太轻

沅弟左右：

六月六日连接五月十八日、二十四日两次来信。同一排单，何以迟速悬殊？足毒居然全好，大慰大慰。不特鼻子无缺，并脚梗亦不短欠丝毫，足以间执逸匿之口。豹岑处，弟复雨亭信，未令西来，从此即作罢论。一万二千之数，恐不足保鄂省疆土，自可量力多招。至于有文一篇，便使天下后世知某某为小人云云，则未免视文太重，而视天下后世太轻。此室所论之是非，易一室而彼不以为然，易一邑而其说更变矣；此乡所服之贤士，易一乡而彼不以为然，易一府而屡变不一变矣。况天下乎？况后世乎？

此间军情，凡大处调度，均已咨达弟署。若各股均渡至沙河、淮河之南，余当以淮军扼守沙河、贾鲁河。此数月内鄂境虽十分吃紧，而使贼不得回窜东北平旷之区，各军得悉萃于西南山多田多之处，剿办当稍易为力。恐其半过沙河以南，半留沙河以北，则尤疲于奔命耳。

以贤四本家为罪魁，诚为笃论。惟信风本家向来在京在粤声望极劣，人以巨憨目之，尚须细察。绅士如藿郊、畏之尚相洽否？子寿、孝凤、廉卿等曾晋省一晤否？小舫、云黼等曾通信否？皆顺斋排行之至交也。本日寄谕中有左帅折片，另咨抄阅。余详日记中。顺问近好。

六月十二日

102. 胜人处不可求强自修处可求强

沅弟左右：

九月初六接弟八月二十七、八日信，初十日接初五樊城研发之信。俱悉一切。

顺斋一事业已奏出，但望内召不甚着迹，换替者不甚掣肘，即为至幸。弟谓命运作主，余素所深信；谓自强者每胜一筹，则余不甚深信。凡国之强，必须多得贤臣；兄家之强，必须多出贤子弟。此亦关乎天命，不尽由于人谋。至一身之强，则不外乎北宫黝、孟施舍、曾子三种。孟子之集义而慊，即曾子之自反而缩也。惟曾、孟与孔子告仲由之强，略为可久可常。此外斗智斗力之强，则有因强而大兴，亦有因强而大败。古来如李斯、曹操、董卓、杨素，其智力皆横绝一世，而其祸败亦迥异寻常。近世如陆、何、萧、陈亦皆予知自雄，而俱不保其终。故吾辈在自修处求强则可，在胜人处求强则不可。若专在胜人处求强，其能强到底与否尚未可知。即使终身强横安稳，亦君子所不屑道也。

贼匪此次东窜，东军小胜二次，大胜一次，刘、潘大胜一次，小胜数次，似已大受惩创，不似上半年之猖獗。但求不窜陕、洛，即窜鄂境，或可收夹击之效。余定于明日请续假一月，十月请开各缺，仍留军营，刻一木戳，会办中路剿匪事宜而已。余详日记中。顺问近好。

九月十二日

103. 养老之法不在进食补药

澄弟左右：

九月八日接八月初九信，二十六日接八月二十二日信，十月初一日接九月初五之信，俱悉一切。弟之两孙元五、元六派名广文、广敷，余孙元七拟取派名广钧，既无偏旁合为一律，惟广字下一字用十一真、十二文之韵，声调较为清亮。科三侄以直隶州知州用，系克复金陵后第二次恩旨。季洪弟赠内阁学士，亦系确有其事，即日当查出付回，尽可不花部费。蔡贞斋投营，无好差使可派。若其果来，不过如邹至堂、沈蕙亭之数，赠银百金，附案保奖。在我已属竭力周旋，而在渠仍无大益。或渠不来，余便寄百金遥周故旧，不知可否？弟一酌之。

服药之事，余阅历极久，不特标病服表剂最易错误，利害参半，即本病服参茸等味亦鲜实效。如胡文忠公、李勇毅公（希庵）以参茸燕菜作家常酒饭，亦终少补救。余现在调养之法，饭必精啣，蔬菜以肉汤煮之，鸡鸭鱼羊豕炖得极烂，又多办酱菜腌菜之属，以为天下之至味，大补莫过于此。孟子及《礼记》所载养老之法、事亲之道皆不出乎此。岂古之圣贤皆愚，必如后世之好服参茸燕菜鱼翅海参而后为智耶？星冈公之家法，后世当守者极多，而其不信巫医地仙和尚，吾兄弟尤当竭力守之。

兄近日身体平安。军事总无起色，西股已过洛阳，东股尚在山东，无术制之，实深焦灼。余详日记中。顺问近好。

十月初六日

104. 占星变吾辈当儆省

沅弟左右：

二十六日接二十一日信，三十日接二十五日信，初一日又接二十六日专差之信并承送湖棉被及腊肉小菜多件，谢。老年怕冷异常，顷已制青狐嗉袍及阿龙袋、狷俐马褂，又托人办湖绵小袄并裤，不独怕冷为向来所未有也。

入京陛见之谕，定于腊杪正初起程，本日附片复奏。前寄信命纪泽来营随侍进京，近思住京不过半月上下，何必唤渠远来？明日当寄信止之，即带鸿儿一行。二月回豫，即可令鸿儿回湘。

《古文四象》目录抄付查收。所谓四象者：识度即太阴之属，气势则太阳之属，情韵少阴之属，趣味少阳之属。其中所选之文，颇失之过于高古。弟若依此四门而另选稍低者、平日所嗜者抄读之，必有进益。但趣味一门，除我所抄者外，难再多选耳。

七月二日星变，既有此占，吾辈当儆省，何可乘机劾人？弟平日居心似不如此二次，或失言耳。”明年上半年见机而作”，此亦错计。今春甫出，岂可倏起倏灭？左帅虽横行一世，尚未弹劾如官、胡之贵显者。然此次西行不辞艰险，亦以平日苛责他人，畏人之议其后耳。弟作此石破天惊之事，而能安居乡井乎？宜早熄此念，敬慎图之。顺问近好。

十一月初二日

105. 贤才六分本于天生四分由于家教

澄弟左右：

十一月二十三日芳四来，接弟长信并墓志，二十六日接弟十一日在富塿发信，俱悉一切。

余于十月二十五接入覲之旨，次日写信召纪泽来营，厥后又三次信止其勿来，不知均接到否？自十一月初六接奉回江督任之旨，十七日已具疏恭辞；二十八日又奉旨令回本任，初三日又具疏恳辞。如再不获命，尚当再四疏辞。但受恩深重，不敢遽求回籍，留营调理而已。兹将初三折稿付阅。余从此不复作官。同乡京官，今冬炭敬犹须照常馈送。昨令李燾汉回湘送罗家二百金，李家二百金，刘家百金，昔年曾共患难看也。

前致弟处千金，为数极少，自有两江总督以来，无待胞弟如此之薄者。然处兹乱世，钱愈多则患愈大，兄家与弟家总不宜多存现银。现钱每年足敷一年之用，便是天下之大富，人间之大福。家中要得兴旺，全靠出贤子弟。若子弟不贤不才，虽多积银积钱积谷积产积衣积书，总是枉然。子弟之贤否，六分本于天生、四分由于家教。吾家代代皆有世德明训，惟星冈公之教尤应谨守牢记。吾近将星冈公之家规编成八句，云：“书、蔬、鱼、猪，考、早、扫、宝，常说常行，八者都好；地、命、医理、僧巫、祈祷、留客久住，六者俱恼。”盖星冈公于地、命、医、僧、巫五项人，进门便恼，即亲友远客久住亦恼。此八好六恼者，我家世世守之，永为家训。子孙虽愚，亦必略有

范围也。

写至此，又接弟十一月二十三日信并纪泽信矣。余详日记中。顺问近好。

十二月初六日

106. 咬定牙根徐图自强

沅弟左右：

十四、十五六日接弟初十日函、十二日酉刻及四更二函。贼已回窜东路，淮、霆各军将近五万，幼泉万人尚不在内，不能与之一为交手，可恨之至！岂天心果不欲灭此贼耶？抑吾辈办贼之法实有未善耶？目下深虑黄州失守，不知府县尚可靠否？略有防兵否？山东、河南州县一味闭城坚守，乡间亦闭寨坚守，贼无火药，素不善攻，从无失守城池之事，不知湖北能开此风气否？鄂中水师不善用命，能多方激劝，扼住江、汉二水，不使偷渡否？少泉言捻逆断不南渡，余谓任逆以马为命，自不肯离淮南北，赖逆刚未尝不窥伺大江以南。屡接弟调度公牒，从未议及水师，以后务祈留意。

奉初九、十三等日寄谕，有严行申饬及云梦县等三令不准草留之旨。弟之忧灼，想尤甚于初十以前。然困心横虑，正是磨炼英雄，玉汝于成。李申夫尝谓余愠气从不说出，一味忍耐，徐图自强，因引谚曰“好汉打脱牙和血吞”。此二语是余生平咬牙立志之诀，不料被申夫看破。余庚戌、辛亥间为京师权贵所唾骂，癸丑、甲寅为长沙所唾骂，乙卯、丙辰为江西所唾骂，以及岳州之败、靖江之败、湖口之败，盖打脱牙之时多矣，无一次不和血吞之。弟此次郭军之败、三县之失，亦颇有打脱门牙之象。来信每怪运气不好，便不似好汉声口。惟有一字不说，咬定牙根，徐图自强而已。

子美尚难整顿，恐须催南云来鄂。鄂中向有之水陆，其格格不入者，须设法笼络之，不可灰心懒漫，遽萌退志也。余奉命克期回任，拟奏明新正赴津，替出少泉来豫，仍请另简江督。顺问近好。

十二月十八夜

107. 默存一悔字无事不可挽回也

沅弟左右：

鄂署五福堂有回禄之灾，幸人口无恙，上房无恙，受惊已不小矣。其屋系板壁纸糊，本易招火。凡遇此等事，只可说打杂人役失火，固不可疑会匪之毒谋，尤不可怪仇家之奸细。若大惊小怪，胡思乱猜，生出多少枝叶，仇家转得传播以为快。惟有处处泰然，行所无事。申甫所谓“好汉打脱牙和血吞”，星冈公所谓“有福之人善退财”，真处逆境者之良法也。

弟求兄随时训示申儆。兄自问近年得力惟有一悔字诀。兄昔年自负本领甚大，可屈可伸，可行可藏，又每见得人家不是。自从丁巳、戊午大悔大悟之后，乃知自己全无本领；凡事都见得人家有几分是处。故自戊午至今九载，与四十岁以前迥不相同，大约以能立能达为体，以不怨不尤为用。立者，发奋自强，站得住也；达者，办事圆融，行得通也。吾九年以来，痛戒无恒之弊。看书写字，从未间断，选将练兵，亦常留心。此皆自强能立工夫。奏疏公牍，再三斟酌，无一过当之语自夸之词。此皆圆融能达工夫。至于怨天本有所不敢，尤人则常不能免，亦皆随时强制而克去之。弟若欲自儆惕，似可学阿兄丁戊二年之悔，然后痛下箴砭，必有大进。

立达二字，吾于己未年曾写于弟之手卷中，弟亦刻刻思自立自强，但于能达处尚欠体验，于不怨尤处尚难强制。吾信中言皆随时指点，劝弟强制也。赵广汉本汉之贤臣，因星变而劾

魏相，后乃身当其灾，可为殷鉴。默存一悔字，无事不可挽回也。

正月初二日

108. 调度文书以少为好

沅弟左右：

得春霆信，贼去樊城仅六十里。余为雪所阻，今日在归德停住一日。批令霆军在河南西路六府专追任、赖一股，暂不赴秦。业已抄咨弟处。

盖以大局而论，任、赖纵横五省，不可无多军缀之。张逆仅在陕西三府一州之境，左、刘二军已足支持。以私计而论，春霆与左帅积不相能，恐其溃败决裂，又生金口之变；若留于南阳、汝襄等处，豫西鄂北俱属有益。望弟将余苦心告知春霆，令其莫再奏事。余将来奏定。令渠军专办南、汝、襄、许四府州可也。

弟之奏稿及咨札稿，动称剿灭此股，亦欠斟酌。余于奏咨函牒，但称或可大加惩创而已。余见弟与各处函牒，亦颇觉烦读忙乱。以后调度文书以少为好。昔胡文忠亦失之太多，多则未有不纷乱者，殄灭等字，不可轻用也。

正月初十日 行次归德府

109. 须咬牙励志切勿气馁

沅弟左右：

十八之败，杏南表弟阵亡，营官亡者亦多，计亲族邻里中或及于难，弟日内心绪之忧愁万难自解。然事已如此，只好硬心狠肠，付之不问而一意料理军务。补救一分，即算一分。弟已立大功于前，即使屡挫，识者犹当恕之。比之兄在岳州、靖港败后栖身高峰寺，胡文忠在饒山败后舟居六溪口气象，犹当略胜。高峰寺、六溪口尚可再振，而弟今不求再振乎？

此时须将劾官相之案、圣眷之隆替、言路之弹劾一概不管。袁了凡所谓从前种种譬如昨日死，以后种种譬如今日生，另起炉灶，重开世界，安知此两番之大败，非天之磨炼英雄，使弟大有长进乎？谚云吃一堑长一智，吾生平长进全在受挫受辱之时。务须咬牙励志，蓄其气而长其智，切不可戡茶然自馁也。

二月二十九日

110. 心病还须自心医

沅弟左右：

弟手痛极苦，字迹亦露艰难之状，殊深忧系。若专由于风湿，自非药物不能为力；若肝家积郁血不养筋所致，则心病还须自心医，非药力所能达，非他人所能谋也。

春霆果系真病。余前日误信人言，谓渠尚在襄城演戏燕乐，是以初七调娄云庆疏内未将霆大加褒赞，于宋国永且有贬辞。发折后接霆信，颇用悔之，幸疏中亦未说坏春霆耳。

四月十二日

111. 耕读为本乃长久之计

澄弟左右：

吾乡雨水沾足，甲五、科三、科九三侄妇皆有梦熊之祥，至为欢慰。吾自五十以后百无所求，惟望星冈公之后丁口繁盛，此念刻刻不忘。吾德不及祖父远甚，惟此心则与祖父无殊。弟与沅弟望后辈添丁之念，又与阿兄无殊。或者天从人愿，鉴我三兄弟之诚心，从此丁口日盛，亦未可知。且即此一念，足见我兄弟之同心，无论哪房添丁，皆有至乐。和气致祥，自有可卜昌盛之理。

沅弟自去冬以来忧郁无极。家眷拟不再接来署。吾精力日衰，断不能久作此官，内人率儿妇辈久居乡间，将一切规模立定，以耕读二字为本，乃是长久之计。

五月初五日

112. 总以保养身体为第一着

沅弟左右：

湘乡土匪业已扫灭，为之一慰。余日来有焦虑者四事：大者则恐枯旱终不下雨，又恐捻匪窜至运河以东；小者则恐湘乡之会匪与阜宁之海匪养成气候。今幸两处之匪皆已扫除，金陵已得大雨，不至竟成旱灾，三事可放心矣。惟捻匪由东平境内窜过运河，大局弥坏，凶焰弥炽，江苏之东北四府处处可虑。

顷见邸抄，御史佛尔国春参弟之案，尚有劾官相、肃党不实照例反坐之说，虽经谕旨平反调停，而痕迹殊重。弟见之心更懊恼，又增几分退志。余观军务日形吃紧，朝廷必不允弟告病之请，而弟之中怀郁郁，勉强久留，恐致生病，兄亦踌躇不能代决。弟之主意定后，如决志告病，望派专弁搭轮船前来，将折稿送兄斟酌商定再发。盖世局日变，物论日淆，吾兄弟高爵显官，为天下第一指目之家，总须于奏疏中加意检点，不求获福，但求免祸。云仙得借词规避之批，盖乃遵前言进京候简等语，本不稳妥也。弟此时无论如何懊怫，如何穷窘，总以保养身体为第一着。

五月二十一日

113. 保身莫大于眠食二字

字谕纪泽、纪鸿儿：

十六酉刻接纪泽十五日禀，具悉一切。

余今日早发，行六七里始天明。自小惠庄至双口住宿，凡九十里。距天津尚三十五里，明日到津。恐须二十或二十一日乃起行回省，途次须四日也。尔母及冢妇病均宜温补，但恐有不宜经补、不宜专补者，全赖良医细察耳。

保身莫大于眠食二字。尔兄弟体气俱弱，吾效星冈公法，每夜用极热水洗脚，颇有效验，尔等可于年少时行之。吾曾函示沅叔，似未行也。泽儿牙疼，宜于无事之时，服滋阴之剂。此嘱。

涤生手示 十月十六夜

114. 治病以能进食为急务

字谕纪泽、纪鸿儿：

十八日接十七日禀，具悉一切。谢医开方后，竹舫旋到。渠不惮三千里雇车而来，良可感也。富贵之家有病，一切呼应较灵，但主意不可太乱，吾意总以能进饭食为急务。吾今日住天津一日，除小舫上所言谢医精于脉理，最能预决吉凶。其果然乎？竹舫宜住署内，已腾屋否？余不多及。

涤生手示 十月十八夜

115. 余眩晕之症未痊愈

字谕纪译儿：

二十七日折弁归，见尔与纪鸿之信，知二十五日考试平安完卷，二十八日引见，外用内用尚不可知。尔云须见堂官，则已作分部计矣。余眩晕之症略愈，尚未大好。现以周虎文、黎竹龄为主，旭亭间来一商，本日管才叔亦来一商。必须将晕症全愈，乃能兼治目疾。而天气亢旱狂风，人心惶惶，余焦灼异常，恐此疾亦难就痊。

京中有肉桂可觅否？保定盐蛋若其不成，京中若有成者，可酌带来省。此嘱。

涤生手示 四月二十七日申初

同治九年一八五一

回省之迟速，听尔斟酌，此间无成见也。

116. 余目疾毫无转机

字谕纪译儿：

十三日折弁归，接尔十一日禀。初九日信局所寄禀尚未到也。

余眩晕之症十愈七八，虽未能除根，而周、黎皆云总可除净，现尚服滋阴降火之品。

周虎文定于十五日回京。渠初以五月验看，七八月赴江西到省，似难再留。到部谒堂似非难事，尔云多延十日，何也？折弁言尔将以十八日出京，余拟以二十一、二日具折续假。若尔能于二十、二十一日到省方为妥善。切盼切盼。

保定亢旱异常，人心惶惶，焦虑何极！接家信，四女之子全愈，足一堪慰之事。季女许字聂家，沅叔即日代办下定事件。余目疾毫无转机。在京曾询访一二否？余不及详。

涤生手示 五月十三日酉刻

适派弁至总理衙门送信，便带此函到京。

117 余目蒙加重

字谕纪泽儿：

余日内胃口更开，是一好消息，而两腿软重难行，目光更蒙。尚有人索书对者，尔命王庆云寄竺枝来可也。

涤生手示 七月十四日

118. 吾双目俱蒙脚肿未愈

字谕纪译 纪鸿儿：

接纪泽初三、四日两票，知纪鸿业已抵省。余进京展觐，若值生日期内，则唱戏宴客、收辞各礼，断非病躯所能料理。拟于十三四日具奏，二十、二十一起程入都，十月初六、七日必须出京，别敬不能速送，只好与诸公订定出京后补送，或腊底再送炭金。保定寄存之二万金，大抵须用去八九千。能不在京遇生日，或虽病尚可支持。

写至此，接尔等初五日两禀。尔等奉母若能于十九、二十日抵津，余尚可与家人一见，再行进京。八年正月在京送别敬帐簿、十二月送同乡炭敬帐单，令潘文质寻出，或先行付来亦可。高列三与潘擲师均今日回保定也，作梅与存之、摯甫，李中堂均留之仕于直隶。惟桐云、勉林、俪秋、鹭卿拟调回江南，难于具奏耳。余目蒙、脚肿未痊，余尚轻健。去年史济源手所制木器及江南器物，可留与李相者，或交作梅、李、陈分用，开单妥交。此囑。

涤生手示 九月初六日

119. 余病难以支撑

字谕纪泽、纪鸿儿：

接纪泽十九、二十、二十一三日禀，具悉一切。

余于十八日抵扬，十九日拜客。旋至运署查库，即饮戏酒。二十日阅操，申正毕。旋在厉伯苻家饮酒。二十一日阅操，申初毕。旋在何廉昉家戏酒，司道公请也。二十二早开船，风逆水逆，仅行二十里。二十三日亦仅行二十里，顷始到邵伯耳。

脚肿于十五六日消去十分之九。在扬昼夜应酬，未能再消，且似更肿。盖此症宜于清闲养之，不宜劳心劳力也。今日难支，似有外感。魏荫亭送鹿茸一架，廉昉送鹿茸面子五两，昨夜已试服二钱。

阳星泉既遭家艰，余意讷信且缓寄云。昨有信致李相，末一页说星泉事，兹抄寄一览。石泉信已核过，兹付回并付官封一件，署中缮正后或交鉴海带去，或另发邮递，均无不可。黎竹林言接纪鸿信，又孙体有不适，不知是何病症？尔母所缠洋绒，是否在金陵所买？如金陵有之，则可买就寄至行轅；如金陵无之，则余适时在镇江自买可也。余不一一。

涤生手示邵伯书 八月二十三日申正

120. 叙养生之法

字谕纪泽、纪鸿儿：

二十五接纪泽二十二三日两禀，具悉一一。

芑泉信稿收到，少迟核过寄回，鉴海似须送五十金，不可再少。石泉信已发，俟下次再谢申夫事也。余二十四宿露筋词。二十五查堤工，泊宿马棚湾。

脚肿似已全消。养生无甚可恃之法，其确有益者：曰每夜洗脚，曰饭后千步，曰黎明吃白饭一碗不沾点菜，曰射有常时，曰静坐有常时。纪泽脾不消化，此五事中能做得三四事，即胜于吃药。纪鸿及否生等亦可酌做一二事。余仅办洗脚一中，已觉大有裨益。孙方与回籍，自可不候余信。余日来应酬极繁，尚可勉支。瑞亭今日来见，臀痛久未痊，弱瘦之状可虑。余不一一。

涤生手示马棚湾 八月二十五夜

121. 热毒攻身却无从速愈

四位老弟足下：

七月十六发第十号家信，想已收到。二十九日折差到京问之，系七月十一在省起行。维时诸弟正在省，想是府考将毕之时，岱云之弟及各家皆有信来京，而我弟无信来，何也？余自十四日接到澄侯六月二十三之信，不胜欣慰，日日望府考信到。乃折差至而竟无信，殊不可解。

余在京身体如常。前日之病，近来请医生姜姓名士冠细看，云是肺胃两家之热发于皮毛，现在自头上颈上以至腹下，无处无之。其大者如钱，小者如豆。其色白，以蜜涂之，则转红紫色，爬破亦无水。不喜着衣盖被，盖燥象也。此外毫无所病，一切饮食起居大小二便并皆如常。据姜医云，须用清凉药，使肺胃之热退尽，然后达于皮毛，不可求速效，两月内则可全好矣。言之甚为有理，余将守其说而不摇。

六弟之文，昨日始找出“乐道人之善”一首。其文甚有识见道理，准于下次折差带回。此外诸弟尚有文在京者否？若有，须写信来清出。

汪觉庵师寿文，今日始作就，付回查收。若有不妥处，即请觉庵师改正可也。

邓铁松病势不轻，于八月初五日起行回南。此人利心甚炽。余去年送大钱十千，今又送盘费十两，渠尚快快有缺望。

王荆七自去年来不常至我家，昨日因奉父亲大人之命，故

唤他来。许他凡我得外差或外官，即带他出京。他现欢天喜地，常来请安。然自此次惩戒之后，想亦不敢十分嚣张矣。

今年县前列第二名，是葛二一之子关一否？下次书来乞示我。余俟续市。

兄国藩手具 七月三十日

122. 余为克顽疾移居于庙

侄国藩谨启叔父母大人座下：

屡次家书或呈祖父或寄诸弟，想叔父大人皆赐观览，今年已寄十一次矣。而家中诸弟寄京信，侄每嫌其不详。平日在家时寄省无便，侄亦不怪。昨府考以六月十八到省，而折差七月初九进京，诸弟无信。八月初一折差进京，仅四弟一信，六弟、九弟、季弟皆无信。四弟信又太略。府考共考几场？每场是何题目？开点何人？前列何人？皆不写一句。院考题目，考古题目，道案首及进学何人，亦皆不写一句。去年考试亦如此。侄期望甚切，而毫不能得音信，真不可解。九弟前在京时，望家信亦甚切，而归去后，亦懒于寄信，何也。

侄今年自五月满身热毒，烦躁之至，加以应酬最繁，而每次家信必详细言之。现在身上热毒，已服药四十八帖尚未得好。据医者云虽无大害，然必至十一月乃能去尽。幸饮食起居如恒。因家中客多，不甚清净，于昨十八日移寓吕祖阁庙内，离家不过半里，而在庙内起火食，无事从不归去。家中侄妇及侄孙侄孙女三人皆平安如常。侄孙“诗经”已读至“定之方中”。同乡诸家亦皆如旧。同年中祁雋藻放湖北黄州府知府。本家心斋仙逝，实为可哀，下次折差，必作书慰毅然宗伯。

四弟、六弟不审已进京否？若未来，仍须发奋，不可牢骚废学。

侄谨启 八月二十一日

123. 恶我者拭目以观好我者忧我所为

沅浦九弟左右：

初五日贵溪途次，专老湘营勇秦大中等二人送信至吉安营中，甫发二时许，而弟二十四日所遣之人至。接弟信，知体气尚未全愈。初五夜曾福亦至，得悉弟之近状。弟素体弱，大黄攻伐之品，非弟所能堪，而误服之后，此复元较难。吉安克后，病当全去，元神尚亏，可至家中将养一月，仍来兄处帮办一切。或带勇或不带，或多带或少带，均听弟之自便，但不可不来帮我。我近来精神日减，此次之出，恶我者拭目以观其后效。好我者关心而虑其失坠。意城在此帮助，颇称水乳，手笔亦能曲达人意。特约定至玉山后即当别去，专望弟来照料一切。外和军旅，内检琐务，大小人才，悉心体察，庶可补余之短。弟决不可怀一不来之见也。

刘培元营不申用，兄决计不调，向亦无与左公约定。李大雄得胜军，即当与江抚会札撤之。玉班处，弟送礼甚妥。余亦当作言唁之。胡润之中丞太夫人处，余作挽联云：“武昌居天下上游，看郎君新整乾坤，纵横扫荡三千里；陶母为女中人杰，痛仙驭永辞江汉，感激悲歌百万家。”胡家联句必多，此对可望前五名否？成章鉴极好，阿兄又当自诩眼力之不谬。余不一一，顺问近好。

再，来勇李信六、刘升文于初五日午刻至贵溪县，较之罗逢元之专丁张正魁、杨和贵二十四日自吉安起行，二十九日即

到安仁者，迟速相去多矣。莘田叔日内即至吉安，先此告知。
(初六日贵溪上三十里舟次。是日始得秋雨，舟中新凉。)

兄国藩手草 八月初六日

124. 懊悔往年嫌隙

澄侯四弟左右：

初四早发家信，是夕接弟二十三夜之信。今年以来，贤弟实太劳苦，较之我在军营，其劳殆过十倍，万望加意保养也。祁阳之贼或可不窜湘乡，万一窜入，亦系定数，余已不复悬系。

余自去年六月再出，无不批之稟，无不复之信。往年之嫌隙尤悔，业已消去十分之七八。惟办理军务仍不能十分尽职，盖精神不足也，贤弟闻我在外近日尚有些什么错处，不妨写信告我。

内人问纪泽招赘之事，予复信请弟做主，或五月招赘，或八月成婚皆可，余无成见耳。科三、九读书之进否，家信须提及，即候近佳。

兄国藩手具 五月初六日

125. 余脉太虚目疾难治

澄、沅弟左右：

初八日彭芳四回家送菲仪于亲族，付去一函，不知何日可到。日内此间平安，余身体粗健。眩晕、疝气诸症未发，脚肿因穿洋袜而消，幸未再发。惟眼蒙日甚，无术挽回。请医诊视，云两尺脉甚虚，然尚可以补救。惟目疾难治，近世亦无精于眼科者，不如不治为上策。署中大小平安。镜初、健斋前往署中，近皆归去。竹林亦即日告归。留此者惟陈松生、欧阳仲谐、刘康侯。本月二十二日移居新衙门，屋多人少，殊觉空旷。

聂宅世兄尚无来江之信。渠中间有一函，商及送女至粤成婚。兄回信，仍请送男来江，故耽延一二月也。接澄弟十月二十八日信及十一月初三与纪泽信，知刘、王二公急欲借洋饷六十万，余前复信虽已允许，而仍多筹商为难之辞，不知韞帅接到后如何定计？新任上海沈道月内必来敝处，当再与熟商之。

湘省督销局入款分拨甘省淮军，留湘用者无几，能还此巨款否？李筱帅查办之案已就绪否？韞帅无大处分否？宦途险（山戍），在官一日，即一日在风波之中，能妥帖登岸者实不易。如韞帅之和厚中正以为可免于险难，不谓人言藉藉，莫测所由，遽至于此。

李申夫回籍后光景甚窘，今年托兄追索浙江运使任内养廉。杨石泉慨然许给三千七百余金，亦小可慰也。

八、九、十月日记，此次专人送去。霁、筠二公复信，请

即妥寄。顺问近好。

兄国藩手具 十一月十七日

126. 读书只为进德修业

四位老弟足下：

九弟行程，计此时可以到家。自任丘发信之后，至今未接到第二封信，不胜悬悬，不知道上有甚艰险否？四弟、六弟院试，计此时应有信，而折差久不见来，实深悬望。

予身体较九弟在京时一样，总以耳鸣为苦。问之吴竹如，云只有静养一法，非药物所能为力。而应酬日繁，予又素性浮躁，何能着实养静？拟搬进内城住。可省一半无谓之往还，现在尚未找得。予时时自悔，终未能洗涤自新。

九弟归去之后，预定刚日读经，柔日读史之法。读经常懒散不沉着。读《后汉书》，现已丹笔点过八本，虽全不记忆，而较之去年读《前汉书》，领会较深。九月十一日起同课人议每课一文一诗，即于本日申刻用白折写。予文、诗极为同课人所赞赏。然予于八股绝无实学，虽感诸君奖许之殷，实则自愧愈深也。待下次折差来，可付课文数篇回家。予居家懒做考差工夫，即借此课以摩厉考具，或亦不至临场窘迫耳。

吴竹如近日往来极密，来则作竟日之谈，所言皆身心国家大道理。渠言有窦兰泉者（云南人），见道极精当平实。窦亦深知予者，彼此现尚未拜往。竹如必要予搬进城住，盖城内镜海先生可以师事，倭良峰先生、窦兰泉可以友事。师友夹持，虽儒夫亦有立志。予思朱子言，为学譬如熬肉，先须用猛火煮，然后用慢火温。予生平工夫全未用猛火煮过，虽略有见识，乃

是从悟境得来。偶用功，亦不过优游玩索已耳。如未沸之汤，遽用慢火温之，将愈煮愈不熟矣。以是急思搬进城内，屏除一切，从事于克己之学。镜海、艮峰两先生亦劝我急搬。而城外朋友，予亦有思常见者数人，如邵蕙西、吴子序、何子贞、陈岱云是也。

蕙西尝言：“‘与周公谨交，如饮醇醪’，我两人颇有此风味。”故每见辄长谈不舍。子序之为人，予至今不能定其品。“然识见最大且精；尝教我云：“用功譬若掘井，与其多掘数井而皆不及泉，何若老守一井，力求及泉而用之不竭乎？”此语正与予病相合。盖予所谓掘井多而皆不及泉者也。

何子贞与予讲字极相合，谓我“真知大源，断不可暴弃”。予尝谓天下万事万理皆出于乾坤二卦。即以作字论之：纯以神行，大气鼓荡，脉络周通，潜心内转，此乾道也；结构精巧，向背有法。修短合度，此坤道也。凡乾以神气言，凡坤以形质言。礼乐不可斯须去身，即此道也。乐本于乾，礼本于坤。作字而优游自得真力弥满者，即乐之意也；丝丝入扣转折合法，即礼之意也。偶与子贞言及此，子贞深以为然，谓渠生平得力，尽于此矣。陈岱云与吾处处痛痒相关，此九弟所知者也。

写至此，接得家书。知四弟、六弟未得入学，怅怅。然科名有无迟早，总由前定，丝毫不能勉强。吾辈读书，只有两事：一者进德之事，请求乎诚正修齐之道，以图无忝所生；一者修业之事，操习乎记诵词章之术，以图自卫其身。进德之事难以尽言，至于修业以卫身，吾请言之：

卫身莫大于谋食。农工商劳力以求食者也，士劳心以求食者也。故或食禄于朝，教授于乡，或为传食之客，或为入幕之宾，皆须计其所业，足以得食而无愧。科名者，食禄之阶也，亦须计吾所业，将来不至尸位素餐，而后得科名而无愧。食之

得不得，穷通由天作主，予夺由人作主；业之精不精，则由我作主。然吾未见业果精，而终不得食者也。农果力耕，虽有饥谨必有丰年；商果积货，虽有壅滞必有通时；士果能精其业，安见其终不得科名哉？即终不得科名，又岂无他途可以求食者哉？然则特患业之不精耳。

求业之精，别无他法，日专而已矣。谚曰：“艺多不养身”，谓不专也。吾掘井多而无泉可饮，不专之咎也。诸弟总须力图专业。如九弟志在习字，亦不必尽废他业。但每日习字工夫，断不可不提起精神，随时随事，皆可触悟。四弟、六弟，吾不知其心有专嗜否？若志在穷经，则须专守一经；志在作制义，则须专看一家文稿；志在作古文，则须专看一家文集。作各体诗亦然，作试帖亦然，万不可以兼营并鹜，兼营则必一无所能矣。切嘱切嘱，千万千万。此后写信来，诸弟各有专守之业，务须写明。且须详问极言，长篇累牍。使我读其手书，即可知其志向识见。凡专一业之人，必有心得，亦必有疑义。诸弟有心得，可以告我共赏之；有疑义，可以问我共析之。且书信既详，则四千里外之兄弟不啻晤言一室，乐何如乎？

予生平于伦常中，惟兄弟一伦抱愧尤深。盖父亲以其所知者尽以教我，而我不能以吾所知者尽教诸弟，是不孝之大者也。九弟在京年余，进益无多，每一念及，无地自容。嗣后我写诸弟信，总用此格纸，弟宜存留，每年装订成册，其中好处，万不可忽略看过。诸弟写信寄我，亦须用一色格纸，以便装订。

谢果堂先生出京后，来信并诗二首。先生年已六十余，名望甚重，与予见面，辄彼此倾心，别后又拳拳不忘，想见老辈爱才之笃。兹将诗并予送诗附阅，传播里中，使共知此名为大君子也。

予有大铜尺一方，屡寻不得，九弟已带归否？频年寄黄英

(芽)白菜子，家中种之好否？在省时已买漆否？漆匠果用何人？
信来并祈详示。

兄国藩手具 九月十八日

127. 论友人之德业

诸位贤弟足下：

十月二十七日寄弟书一封，内信四页、抄倭良峰先生日课三页、抄诗二页，已改寄萧莘五先生处，不由庄五爷公馆矣。不知已到无误否？

十一月前八日已将日课抄与弟阅，嗣后每次家信，可抄三页付回。日课本皆楷节，一笔不苟，惜抄回不能作楷书耳。冯树堂进功最猛，余亦教之如弟，知无不言。可惜九弟不能在京与树堂日日切磋，余无日无刻不太息也。九弟在京半年，余懒散不努力。九弟去后，余乃稍能立志，盖余实负九弟矣。余尝语岱云曰：“余欲尽孝道，更无他事，我能教诸弟进德业一分，则我之孝有一分；能教诸弟进十分，则我孝有十分；若全不能教弟成名，则我大不孝矣。”九弟之无所进，是我之大不孝也。惟愿诸弟发奋立志，念念有恒，以补我不孝之罪。幸甚幸甚。

岱云与易五近亦有日课册，惜其识不甚超越。余虽日日与之谈论，渠究不能悉心领会，颇疑我言太夸。然岱云近极勤奋，将来必有所成。

何子敬近待我甚好，常彼此做诗唱和。盖因其兄钦佩我诗，且谈字最相合，故子敬亦改容加礼。子贞现临隶字，每日临七八页，今年已千页矣。近又考订《汉书》之讹，每日手不释卷。盖子贞之学长于五事：一曰《仪礼》精，二曰《汉书》熟，三曰《说文》精，四曰各体诗好，五曰字好。此五事者，渠意皆

欲有所传于后。以余观之，此三者余不甚精，不知浅深究竟何如。若字，则必传千古无疑矣。诗亦远出时手之上，不能卓然成家。近日京城诗家颇少，故余亦欲多做几首。

金竺虔在小珊家住，颇有面善心非之隙。唐诗甫亦与小珊有隙。余现仍与小珊来往，泯然无嫌，但心中不甚惬意耳。曹西垣与邹云陔十月十六日起程。现尚未到。汤海秋久与之处，其人诞言太多，十句之中仅一二句可信。今冬嫁女二次：一系杜兰溪之子，一系李石梧之子入赘。黎樾翁亦有次女招赘。其婿虽未读书，远胜于冯舅矣。李笔峰尚馆海秋处，因代考供事，得银数十，衣服焕然一新。王翰城捐知州，去大钱八千串。何子敬捐知县，去大钱七千串。皆于明年可选实缺。黄子寿处，本日去看他，工夫甚长进，古文有才华，好买书，东翻西阅，涉猎颇多，心中已有许多古董。何世兄亦甚好，沈潜之至，虽天分不高，将来必有所成。吴竹如近日未出城，余亦未去，盖每见则耽搁一天也。其世兄亦极沈潜，言动中礼，现在亦学倭艮峰先生。吾观何、吴两世兄之资质，与诸弟相等，远不及周受珊、黄子寿。而将来成就，何、吴必更切实。此其故，诸弟能看书自知之。愿诸弟勉之而已。此数人者，皆后起不凡之人才也。定得诸弟与之联镳并驾，则余之大幸也。

季仙九先生到京服阙，待我甚好，有青眼相看之意。同年会课，近皆懒散，而十日一会如故。

余今年过年，尚须借银百五十金，以五十还杜家，以百金用。李石梧到京，交出长郡馆公费，即在公项借用，免出外开口更好。不然，则尚须张罗也。

门上陈升一言不合而去，故余作傲奴诗。现换一周升作门上，颇好。余读“易，旅卦”、“丧其童仆”。象曰：“以旅与下，其义丧也。”解之者曰：“以旅与下者，谓视童仆如旅

人，刻薄寡恩，漠然无情，则童仆亦将视主上如逆旅矣。”余待下虽不刻薄，而颇有视如逆旅之意，故人不尽忠。以后余当视之如家人手足也，分虽严明而情贵周通。贤弟待人亦宜知之。

余每闻折差到，辄望家信。不知能设法多寄几次否？若寄信，则诸弟必须详写日记数天。幸甚。余写信，亦不必代诸弟多立课程，盖恐多看则生厌，故但将余近日实在光景写示而已，伏惟诸弟细察。

十一月十七日

128. 情愿别人占余便宜

澄侯、子植、季洪三弟足下：

自四月二十七日得大考谕旨以后，二十九日发家信，五月十八又发一信，二十九又发一信，六月十八又发一信，不审俱收到否？二十五日接到澄弟六月一日所发信，具悉一切，欣慰之至。

发卷所走各家，一半系余旧友，惟屡次扰人，心殊不安。我自从己亥年在外把戏，至今以为恨事。将来万一作外官，或督抚，或学政，从前施情于我者，或数百，或数千，皆钓饵也。渠若到任上来，不应则失之刻薄，应之则施一报十，尚不足以满其欲。故兄自庚子到京以来，于今八年，不肯轻受人惠，情愿人占我的便益，断不肯我占人的便益。将来若作外官，京城以内无责报于我者。澄弟在京年余，亦得略见其概矣。此次澄弟所受各家之情，成事不说，以后凡事不可占人半点便益，不可轻取人财。切记切记。

彭十九家姻事，兄意彭家发泄将尽，不能久于蕴蓄，此时以女对渠家，亦若从前之以惠妹定王家也。目前非不华丽，而十年之外，局面亦必一变，澄弟一男二女，不知何以急急定婚若此？岂少缓须臾，即恐无亲家耶？贤弟行事，多躁而少静，以后尚期三思。儿女姻缘前生注定，我不敢阻，亦不敢劝，但嘱贤弟少安无躁而已。

成忍斋府学教授系正七品，封赠一代，救命二轴。未必泉

县学教谕系正八品，仅封本身，父母则无封。心翁之父母乃勋封也。家中现有“搢绅”，何不一翻阅？

牧云一等，汪三入学，皆为可喜，嘯山教习，容当托曹西垣一查。

京寓中大小平安。纪泽读书已至“宗族称孝焉”，大女儿读书已至“吾十有五”。前三月买驴子一头，顷赵炳坤又送一头。二品本应坐绿呢车，兄一切向来俭朴，故仍坐蓝呢车。寓中用度比前较大，每年进项亦较多（每年俸银三百两、饭银一百两）。其他外间进项尚与从前相似。

同乡诸人皆如旧。李竹屋在苏寄信来，立夫先生许以乾馆。余不一一。

兄国藩草 六月二十七日

129. 捐二百金建桥

澄弟左右：

接弟十月初三日信，具悉一切。

王开炳在此，既有老弟之信，又有牧云蔼亭日日赞不绝口，目前虽未派差使，将来必重用之。顷已略送盘费二十金，令资日用矣。东征局之得差委者，多黄、郭之族戚故旧，或并不到卡而得干支薪水优加保举，外间颇有违言，余亦颇有所闻。然黄、郭于此事实苦心经营而后办成，且黄受其怨而我享其利，不忍更责之也。

团山嘴桥告成，余只能出二百金，即日寄回。盖沅弟寄回银两太多，半为兄弟五家之私，半为宗族乡党之公，余不能不节俭少寄。为私家固宜少，即公事义举亦宜少。公私虽微有别，其由营搬银回湘乡则一耳。身家自奉固宜少，戚友馈僧亦宜少。人已虽微有别，其以公银作私用则一耳。余九月初四日之信竟尔沉失。十七日曾寄一信，言十月初六日新祠尽可入主，托赵玉班转送。赵误，专人送至安庆。今沅弟又有甲子年入主之说，余概不遥制，听弟主持可也。顺问近好。

国藩手草 十月二十四日

130. 追悔昔日开罪人处

澄、沅弟左右：

久未致书，想我弟悬望之至。屡接弟信，承寄健脾糕、茶叶、腊肉之类，谢谢不尽。又代寄南云茶叶、舫仙漆碗，深为感荷。

朱唐洲、欧阳仲诚先后到此，尚无位置。王上国已派先锋官。王瑞臣派宝应厘局，每月三十六金。曾澧楼管纱帽洲炮船五号，每月五十二千。在此间即算优差。鲁秋航已札令回湘，管陈陵矾花碗岗盐卡。此外皆无差可派。武员望泽者，尤多穷困饥疲。公既无事可委，私又无钱可赠，惟有抱愧而已。

余身体尚好。今年不甚酷热，眩晕、疝气等病未发。惟目光昏蒙如常，亦不吃药点药。内人脚肿已消，膝尚作疼，略可站立，不能行动。久病之后，此已算痊愈矣。

纪鸿之次子(九月元旦生日)日内有疾，食物全不消化，夜不能寐，亦未服药。余满门平安。聂宅婚事，余已两次回信。余于八九月出外府阅操，请渠冬二月选择吉期，在宁招赘。新郎或八九月到宁，或稍迟再到，听渠裁夺。不知一峰近常与沅弟通信否？

冯树堂已抵家否？渠在此小住兼旬，又至上海访涂朗仙，又至六安州代吴竹如先生相择阳宅阴地，并为涂家择地数处，又言八九月间将至湘乡二十四都等处为我预卜葬地。若果至吾乡，请澄弟殷勤款接。渠昔在祁门，余与之口角失欢，至今悔

之。今年渠至此间，余对之甚愧也。

余往年开罪之处，近日一一追悔，其于次青尤甚。昔与次青在营，曾有两家联姻之说。其时温弟、沅弟均尚有未定姻事者，系指同辈说媒言之，非指后辈言之也。顷闻次青欲与纪泽联姻，断无不允之理，特辈行不合，抱惭滋深耳。

长沙无“阅微草堂笔记”，当即以此间一部寄弟。纸板亦坏，较之金陵市店之小板犹略胜耳。

沅弟信中所称德一本家、虎远本家纵容凶恶，与善为仇。诚亦可虑。凡吏治之最忌者，在不分皂白，使贤者寒心，不肖者无忌惮。若犯此症，则百病丛生，不可救药。韞师近日天眷稍替，若更事事将就，则群辈益将恣肆。余近待属吏变殊颛顼。顷派员至三省密查，求去其尤无良者而已。

澄弟索融蜂匣，八月当寄去。梅煦庵顷已到此，待差者虽难位置，然煦庵、唐洲必当有以玉成之也。元六小恙，比已痊愈否？至为系念。顺问近好。

兄国藩手具 六月二十七日酉刻

131. 人之得名无关意愿

沅浦九弟左右：

除夕发去一缄，是夕又接弟二十三夜发信，具悉一切，并京报、厉缄均悉。

吴退庵事，余实不便失信。其确不可用，用必愤事之处，奈亦殊无所见，不知意城诸君子何以烛照几先，遂能为此十成语？以余阅历多年，见事之成功与否，人之得名与否，盖有命焉，不尽关人事也。

东征局既以我为名，自应照我之札办事。今厉观察又来请示，札不可遵，缄则可遵乎？此事余颇厌烦，以后不必再提。

北岸贼至无为州等处，盖意中事。此间搜获伪文，亦言金陵调杨七麻、李寿成援安庆。杨本自立门户，李现在常山修城，均未必肯赴北岸。左、鲍二军，残年均未开仗。闻贼数实有五六万，鲍公请将留渔亭之四营调去。渔亭亦系前敌吃紧，不能调也。即问近好。

国藩手草 正月元日

132. 谨记拼命报国侧身修行

沅弟左右：

二十八夜接奉廷寄谕旨，弟蒙恩补授浙江巡抚，仍办金陵军务。弟处亦有夹板公文一分，余已拆阅。中廷寄一道、谕旨三道，与余处同。嗣后夹板递弟处者，余均不拆，照例不应拆也。前读金陵解围后屡次谕旨及季弟优恤各谕，知圣意宠注吾弟，恐不久于两司。此次畀以开府之任，而仍不令到任，朝廷于此等处苦心斟酌，可感孰甚！吾兄弟报称之道，仍不外拚命报国、侧身修行八字。至军务之要，亦有二语，曰坚守已得之地，多筹游击之师而已。

春霆一军，已檄由舒城进援六安；申夫一军，已檄由潜山横截英、霍；杏、为、竹、南四军，二十七日有复否南一信，兹抄阅。枞阳张、周二营，弟可迅速调回。大江为我有，庐、桐为我有，水师可进枞阳河大菜子湖，直至练潭。省城十分可恃，枞阳不须防兵也。顺问近好。

国藩手草 三月二十九日辰刻

133. 成大业半靠天缘半靠迁就

沅弟左右：

十四、十五日接弟初十、十二两信，系具悉一切。前因批谕词旨严峻，余恐弟怫郁不能自克，深以为系。兹接弟两缄，心气和平，事理通达，大慰大慰！

皖盐亦向泰局领票，由安庆总握其权，则食岸亦渐就范围。日内将南坡米盐互市之议略定章程，作一长折，将漕务彻底一说，即日具奏。

弟增募二万人，银米恐接济不上。且安庆克后，弟添新兵近二万人，此次又添二万，前此老营能战能守之将弁分散太多。譬之一壶酏酒，参水至四五壶，则太淡，不成酒味矣。此余之所深虑。

至水师十二营，尤可不必添募。弟意不过恐杨、彭师船不能应手耳，天下事焉能尽如人意？古来成大事者，半是天缘凑泊，半是勉强迁就。余当寄信与郭意城，请其停止弟募水勇之事。寄信杨、彭，请其不必代弟造船。望弟亦寄信止之。长江肃清之后，忽添水师十余营，于清议亦说不去也。

焦山抽厘之举暂姑缓办。松岩信寄还。幼丹事，言之颇长。兹将幼来之咨与信各一件，又余与孙方伯来往信各一件，抄寄弟阅，亦可略得梗概。又接弟十四日信，知仙屏已到矣。顺问近好。

国藩手草 九月十七日

134. 切记心病还须自心医

沅弟左右：

春霆已赏参四两，娄峻山奉旨来南，“不久当可到金陵。见一二次，即可坐轮船赴鄂接统霆军。芳圃遣其侄来，言病又痊愈，可出治军，并云南云于四月初旬起程，前来金陵。余令二人共招万人。已咨达弟处矣。

余回任后，诸事尚不甚棘手。惟久旱不雨，二麦已伤，稻亦不能下种，深用焦灼。湖北前亦苦旱，近得雨否？

弟之处否，无须谢恩。凡部议重而特旨改轻者，则照例谢恩；依议者则不谢。旧式然也。

余身体如常。惟眼蒙较昔年更剧，作事全无兴致。老境颓唐，分所应尔，理所当然，无足怪者。弟之手疼，尚未及遽成痼疾之年，只要弟心宽和，肝郁稍纾，即可日就康复。古语云：“心病还须自心医”，千万千万。

四月二十日

135. 兼顾养生锻炼则志强体健

澄、沅两弟左右：

屡接弟信，并阅弟给纪泽等谕帖，具悉一切。兄以八月十三出省，十月十五日归署。在外匆匆，未得常寄函与弟，深以为歉。小澄生子，岳松(崧字与岳字重复，应写此松字)入学，是家中近日可庆之事。沅弟夫妇病而速痊，适朱氏侄女生子不育而不甚忧闷，亦属可慰。

吾见家中后辈体皆虚弱，读书不甚长进，曾以养生六事勸儿辈：一曰饭后千步，一曰将睡洗脚，一曰胸无恼怒，一曰静坐有常时，一曰习射有常时(射足以习威仪强筋力，子弟宜多习)。一曰黎明吃白饭一碗不沾点菜。此皆闻诸老人，累试毫无流弊者，今亦望家中诸侄试行之。又曾以为学四字勸儿辈；一曰看生书宜求速，不多阅则太陋；一曰温旧书宜求熟，不背诵则易忘；一曰习字宜有恒，不善写则如身之无衣，山之无木；一曰作文宜苦思，不善作则如人之哑不能言，马之跛不能行。四者缺一不可。盖阅历一生，而深知之深悔之者，今亦望家中诸侄力行之。养生与力学，二者兼营并进，则志强而身亦不弱，或是家中振兴之象。两弟如以为然，望常以此教诫子侄为要。

兄在外两月有余，应酬极繁，眩晕、疝气等症幸未复发，脚肿亦因穿洋袜而愈。惟目蒙日甚，小便太数，衰老相逼，时势当然，无足异也。

聂一峰信来，言其子须明春乃来，又商及送女至粤成婚一

层。余复信仍以招赘为定，但许迟至春间耳。

章合才果为庸才，其军断难得力。刘毅斋则无美不备，将来事业正未可量。其欠饷，余必竭力助之。王辅臣亦庸庸，颇难寻一相宜之差。

东台山为合邑之公地，众人瞩目，且距城太近，即系佳壤，余亦不愿求之已有，信复树堂矣。

茶叶、蛭虾、川笋、酱油均已领到，谢谢！阿兄尚未有一味之甘分与老弟，而弟频致珍鲜，愧甚愧甚。川笋似不及少年乡味，并不及沅六年所送，不知何故？

鸣原堂文，余竟忘所选之为何篇，请弟将目录抄来，兄当选足百篇，以践宿诺。祖父墓表即日必寄去，请沅弟大笔一挥，但求如张石卿壁上所悬之大楷屏(似沅七年所书)足矣，不必谦也。顺问近好。

国藩手具 十月二十三日

136. 一生学业无成不免愧郁交集

澄、沅弟左右：

接澄弟十二月初三、初七、十六日等信，沉弟初六、十六日等信，知如九到家后得见吾九、十、闰月日记。澄弟以心中舒畅以养福躬为劝，聆之生惭。余向来本多优郁，自觉生平之事多可愧者，近因右眼失明，身体衰弱，尤念从前愆咎难再补救，此生学业毫无成就，用是愧郁交乘，有如圣人所称长戚戚者。以视澄弟之处逆境而善自排遣，沉弟之归林下而善寻乐趣，自谢不如矣。

新年以来，余体尚平安，眩晕之症未发。惟目疾日甚，右目久盲，左目亦极昏蒙。日间见客较多，凡改折稿信稿之类不能不于灯下起草，故夜间不能安心静养。内人目病尤深，无可挽回。瑞臣甥于后阴生毒，去粪门稍偏，坐立俱疼，睡时颇适，尚未服药。陈松生夫妇于十三夜入署，一路平安。其余阖署清吉，足慰远念。

郑小山尚书除夕抵江宁，初二日即关门审案，今已研讯十四日。该犯一味狡展，毫无确供，将来只好仍照魁、张二公原奏之法奏结。徐寿蘅侍郎因奏保俞荫甫等十七人，上干严谴，吏部议以降四级调用。渠现尚在苏州一带，尚未还京复命，颇觉进退两难。余观其所奏之折、所保之人并无不妥之处，其在浙江学政任内声名甚好。此次斥谪，必别有所指也。

鼎三侄文章长进，大慰大慰。余老年他无所望，但望星冈

公之后丁口蕃衍，文学蔚起。后辈若体不壮实，即不敢催督加功。闻鼎三身体充实，亦足为切实苦读之基。

沅弟意欲移居省城，已定计否？乡间人客动须留饭留宿，殊觉烦劳。近来日日练团，夜夜防匪，自不如住省之得以妥枕。惟桑梓之地一离则后难再归，妇女幼孩惯于住城者，每不乐于居乡。由乡迁城则易，由城返乡则难，亦不可不预为熟计。至于阳宅阴基风水之说，确有是理。然有缘则可遇，强求则不得，亦定理也。顺问近好。

兄国藩手具 五月十五日

家教篇

1. 读书写字不可间断

字谕纪鸿儿：

家中人来营者，多称尔举止大方，余为少慰。凡人多望子孙为大官，余不愿为大官，但愿为读书明理之君之。勤俭自持，习劳习苦，可以处乐，可以赴约。此君子也。余服官二十年，不敢稍染官宦气习，饮食起居，尚守寒素家风，极俭也可，略丰也可，太丰则吾不敢也。凡仕宦之家，由俭入奢易，由奢返俭难。尔年尚幼，切不可贪爱奢华，不可惯习懒惰。无论大家小家、士农工商，勤苦俭约，未有不兴，骄奢倦怠，未有不败。尔读书写字不可间断，早晨要早起，莫坠高曾祖考以来相传之家风。吾父吾叔，皆黎明即起，尔之所知也。

凡富贵功名，皆有命定，半由人力，半由天事。惟学作圣贤，全自自己作主，不与天命相干涉。吾有志学为圣贤，少时尔居敬工夫，至今犹不免偶有戏言戏动。尔宜举止端庄，言不妄发，则大德之基也。

手谕九月二十九夜在江西抚州门外

2. 不可浪掷光阴

字谕纪泽儿：

胡二等来，接尔安禀，字画尚未长进。尔今年十八岁，齿已渐长，而学业未见其益。陈岱云姻伯之子号杏生者，今年入学，学院批其诗冠通场，渠系戊戌二月所生，比尔仅长一岁，以其无父无母家渐清贫，遂尔勤苦好学，少年成名。尔幸托祖父余荫，衣食丰适，宽然无虑，遂尔酣拳供乐，不复以读书立身为事。古人云劳则善心生，佚则淫心生，孟子云生于忧患，死于安乐，吾虑尔之过于佚也。新妇初来，宜教之入厨作羹，勤于纺织，不宜因其为富贵子女不事操作。大、二、三诸女已能做大鞋否？三姑一嫂，每年做鞋一双寄余，各表孝敬之忱，各争针线之工；所织之布，做成衣袜寄来，余亦得察闺门以内之勤惰也。余在军中不废学问，读书写字未甚间断，惜年老眼蒙，无甚长进。尔今未弱冠，一刻千金，切不可浪掷光阴。四年所买衡阳之田，可觅人售出，以银寄营，为归还李家款。父母存，不有私财，士庶人且然，况余身为卿大夫乎？

余癖疾复发，不似去秋之甚，李次青十七日在抚州败挫，已详寄沅浦函中。现在崇仁加意整顿，三十日获一胜仗。口粮缺乏，时有决裂之虞，深用焦灼。

尔每次安禀详陈一切，不可草率，祖父大人之起居，合家之琐事，学堂之工课，均须详载，切切此谕。

十月初二日

3. 读《汉书》之门道

字谕纪泽儿：

接尔安票，字画略长进，近日看“汉书”。余生平好读“史记”“汉书”“庄子”韩文四书，尔能看“汉书”，是余所欣慰之一端也。

看“汉书”有两种难处，必先通于小学、训诂之书，而后能识其假借奇字；必先习于古文辞章之学，而后能读其奇篇奥句。尔于小学、古文两者皆未曾入门，则“汉书”中不能识之字、不能解之句多矣。欲通小学，须略看段氏“说文”、“经籍纂诂”二书。王怀祖（名念孙，高邮州人）先生有“读书杂志”，中于“汉书”之训诂极为精博，为魏晋以来释“汉书”者所不能及。欲明古文，须略看“文选”及姚姬传之“古文辞类纂”二书。班孟坚最好文章，故于贾谊、董仲舒、司马相如、东方朔、司马迁、杨雄、刘向、匡衡、谷水诸传全录其著作；即不以文章名家者，如贾山、邹阳等四人传、严助、朱买臣等九人传、赵充国屯田之奏、韦元成议礼之疏以及贡禹之章、陈汤之狱奏，皆以好文之故，悉载巨篇。如贾生之文，既著于本传，复载于“陈涉传”“食货志”等篇，子云之文，既著于本传，复载于“匈奴传”“五贡传”等篇，极之充国“赞酒箴”，亦皆录人各传。盖孟坚于典雅瑰玮之文，无一字不甄采，尔将十二帝纪阅毕后，且先读列传。凡文之为昭明既姚氏所选者，则细心读之；即不为二家所选，则另行标识之。若小学、古文二端略得途径，其于读“汉书”之道思过半矣。

世家子弟最易犯一奢字、傲字。不必锦衣玉食而后谓之奢也，但使皮袍呢褂俯拾即是，舆马仆从习惯为常，此即日趋于奢矣。见乡人则嗤其朴陋，见雇工则颐指气使，此即日习于傲矣。”书”称：“世禄之家，鲜克由礼。”“传”称：“骄奢淫佚，宠禄过也。”京师子弟之坏，未有不淤由于骄、奢二字者，尔与诸弟其戒之。至嘱至嘱。

十一月初五日

谕纪泽

4. 寄四箴书回家

字谕纪泽儿：

余于二十早至湘阴，二十一日未刻至岳州。丁义方自九江来，带有书四箴。余留“宋元通鉴”“明史”在营，余皆寄家，尔可便中付去。开单附往查收。尔禀告叔祖、四、二叔可也。

涤生手示 六月二十二日于岳州

谕纪泽

5. 读书之法看读写作四者不可缺一

字谕纪泽儿：

余此次出门，略载日记，即将日记封每次家信中，闻林文忠家书，即系如此方法。尔在省，仅至丁、左两家，余之经出，足慰远怀。

读书之法，看、读、写、作，四者每日不可缺一。看者，如尔去年看“史记”“汉书”韩文“近思录”，今年青“周易折中”之类是也。读者，如“四书”“诗”“书”“易轻”“左传”诸经、“昭明文选”、李杜韩苏之诗、韩欧曾王之文，非高声朗诵则不能得其雄伟之概，非密咏恬吟则不能探其深远之韵。譬之富家居积，看书则在外贸易，获利三倍者也，读书则在家慎守，不轻花费者也；譬之兵家战争，看书则攻城略地，开拓土宇者也，读书则深沟坚垒，得地能守者也。看书如子夏之“日知所亡”相近，读书与“无忘所能”相近，二者不可偏废。至于写字，真行篆隶，尔颇好之，切不可间断一日。既要求好，又要求快。余生平因作字迟钝，吃亏不少。尔须力求敏捷，每日能作楷书一万则几矣。至于作诸文，亦宜在二三十岁立定规模；过三十后，则长进极难。作四书文，作试帖诗，作律赋，作古今体诗，作古文，作骈体文，数者不可不一一讲求，一一试为之。少年不可怕丑，须有狂者进取之趣，过时不试为之，则后此弥不肯为矣。

至于作人之道，圣贤千言万语，大抵大外敬恕三字。”仲弓问仁”一章，言敬恕最为亲切。自此以外，如立则见参于前

也，在车则见其倚于衡也；君子无众寡，无小大，无敢慢，斯为泰而不骄；正其衣冠，严然人望而畏，斯为威而不猛。是皆言敬之最好下手者。孔言欲立立人，欲达达人；孟言行有不得，反求诸己。以仁存心，以礼存心，有终身之优，无一朝之患。是皆言恕之最好下手者。尔心境明白，于恕字或易著功，敬字则宜勉强行之。此立德之基，不可不谨。

科场在即，亦宜保养身体。余在外平安，不多及。

再，此次日记，已封入澄侯叔函中寄至家矣。余自十二至湖口，十九夜五更开船晋江西省，二十一申刻即在章门。余不多及。又示。

涤生手谕 七月二十一日舟次樵舍下法江西省城八十里

6. 读书须能涵泳体察

字谕纪泽：

八月一日，刘曾撰来营，接尔第二号信并薛晓帆信，得悉家中四宅平定，至以为慰。

汝读“四书”无甚心得，由不能虚心涵泳，切己体察。朱子教人读书之法，此二语最为精当。尔现读“离娄”，即如“离娄”首章“上无道揆，下无法守”，吾往年读之，亦无甚警惕。近岁在外办事，乃知上之人必揆诸道，下之人必守乎法。若人人以道揆自许，从以而不从法，则下凌上矣。“爱人不亲”章，往年读之，不甚亲切。近岁阅历日久，乃知治人不治者，智不足也。此切己体察之一端也。涵泳二字，最不易识，余尝以意测之。曰：涵者，如春雨之润花，如清渠之溉稻。雨之润花，过小则难透，过大则离披，适中则涵濡而滋液；清渠之溉稻，过小则枯槁，过大则伤涝，适中则涵养而勃兴。泳者，如鱼之游水，如人之濯足。程子谓鱼跃于渊，活泼泼地；庄子言濠梁观鱼，安知非乐？此鱼水之快也。左太冲有“濯足万里流”之句，苏子瞻有夜卧濯足诗，有浴罢诗，亦人性乐水者之一快也。善读书者，须视书如水，而视此心如花如稻如鱼如濯足，则涵泳二字，庶可得之于意言之表。尔读书易于解说文义，却不甚能深入，可就朱子涵泳体察二语悉心求之。

邹叔明新刊地图甚好。余寄书左季翁，托购致十副。尔收得后，可好藏之。薛晓帆银百两宜璧还。余有复言，可许交季

翁也。此囑。

父滌生字 八月初三日

7. 余平生有“三耻”

字谕纪泽儿：

十九日曾六来营，接尔初七日第五号家信并诗一首，具悉。次日入闱，考具皆齐矣。此时计已出闱还家。

余于初八日至河口。本拟由铅山入闽，进捣崇安，已拜疏矣。光泽之贼窜扰江西。连陷泸溪、金溪、安仁三县，即在安仁屯踞。十四日派张凯章往剿。十五日余亦回驻弋阳。待安仁破减后，余乃由泸溪云际关入闽也。

尔七古诗，气清而词亦稳，余阅之忻慰。凡作诗，最宜讲究声调。余所选抄五古九家、七古六家，声调皆极铿锵，耐入百读不厌。余所未抄者，如左太冲、江文通、陈子昂、柳子厚之王古，鲍明远、高达夫、王摩诘、陆放翁之七古，声调亦清越异常。尔欲作五古七古，须熟读五古七古各数十篇。先之以高声朗诵，以昌其气；继之以密咏恬吟，以玩其味。二者并进，使古人之声调，拂拂然若与我之喉舌相习，则下笔为诗时，必有句调凑赴腕下。读成自读之，亦自觉琅琅可诵，引出一种兴会来。古人云“新诗改罢自长吟”，又云“毁诗未就且长吟”，可见古人惨淡经营之时，亦纯在声调上下工夫。盖有字句之诗，人籁也；无字句之诗，天籁也。解此者，能使天籁人籁凑泊而成。则于诗之道思过半矣。

尔好写字，是一好习气。近日墨色不甚光润，较去年春夏已稍退矣。以后作字，须讲究墨色。古来书家，无不善使墨者，能令一种神光活色浮于纸上，固由临池之勤染翰之多所致，亦

缘于墨之新旧浓淡，用墨之轻重疾徐，皆有精意远乎其间，故能使光气常新也。

余生平有三耻：学问各途，皆略涉其涯涘，独天文算学，毫无所知，虽恒星五纬亦不识认，一耻也；每作一事，治一业，辄有始无终，二耻也；少时作字，不能临摹一家之体，遂致屡变而无所成，迟钝而不适于用，近岁在军，因作字太钝，废阁殊多，三耻也。尔若为克家之子，当思雪此三耻。推步算学，纵难通晓，恒星五纬，观认尚易。家中言天文之书，有“十七史”中各天文志，及“五体通考”中所辑观象授时一种。每夜认明恒星二三座，不过数月，可毕识矣。凡作一事，无论大小难易，皆宜有始有终。作字时，先求圆匀，次求敏捷。若一日能作楷书一万，少或七八千，愈多愈熟，则手腕毫不费力。将来以之为学，则手抄群书，以之从政，则案无留牍。无穷受用，皆自写字之匀而且捷生出。三者皆足弥吾之缺憾矣。

今年初次下场，或中或不中，无甚关系，榜后即当看“诗经”注疏。以后穷经读史，二者迭进。

国朝大儒，如顾、阎、江、戴、段、王数先生之书，亦不可不熟读而深思之。光阴难得，一刻千金。以后写安禀来营，不妨将胸中所见，简编所得，驰骋议论，俾余得以考察尔之进步，不宜太寥寥。此谕。

八月二十日书于弋阳军中

8. 读经外尚须寻研史记

字谕纪泽儿：

闻儿经书将次读毕，差用少慰。自“五经”外，“周礼”“仪礼”“尔雅”“孝经”“公羊”“谷梁”六书自古列之于经，所谓十三经也。此六经宜请塾师口授一遍。尔记性平常，不必求熟。十三经外所最宜熟读者莫如“史记”“汉书”“庄子”“韩文”四种。余生平好此四书，嗜之成癖，恨未能一一话释笺疏，穷力讨治。自此四种而外，又如“文选”“通典”“说文”“孙武子”“方輿纪要”、近人姚姬传所辑“古文辞类纂”、余所抄十八家诗，此七书者，亦余嗜好之次也。凡十一种，吾以配之“五经”“四书”之后，而“周礼”等六经者，或反不知笃好，盖未尝致力于其间，而人之性情各有所近焉尔。吾儿既读“五经”“四书”，即当将此十一书寻究一番，纵不能讲习贯通，亦当思涉猎其大略，则见解日开矣。

涤生手谕 九月二十八日

9. 纪泽看《诗经》注疏可教之作赋

澄侯、季洪两弟左右：

十月三日发一信交右九、芝三带归。初八日接纪泽九月十九日一信，初十日接纪泽二十五日一信。澄弟寄沅弟之信，叔父贺阮弟喜信，皆得见之。家中四宅平宅，无任忻慰。

营中诸事平善，惟勇夫病者过多。张凯章营驻扎资福桥，已稍愈矣。自度杉关入闽境，又添病者百余人，殊焦灼也。李筱泉于初九日到营，将留于建昌住两月，即至湖口办理报销。

纪泽看“诗经”注疏，议论大有长进。其间时艺可否暂置，抑或他有所作？可教之每课作赋一首，或古赋，或律赋皆可。余下次再有信教之。即问近好。

兄国藩手具 十月初十日

10. 君子之道莫大乎与人为善

字谕纪泽：

十月十一日接尔安禀，内附隶字一册。二十四日接澄叔信，内附尔临“元教碑”一册。王五及各长夫来，具述家中琐事甚详。

尔信内言读“诗经”注疏之法，比之前一信已有长进。凡汉人传注、唐人之疏，其恶处在确守故训，失之穿凿，其好处在确守故训，不参私见。释谓为勤，尚不数见，释言为我，处处皆然，盖亦十口相传之诂，而不复顾文气之不安。如“伐木”为文王与友人入山，“鸳鸯”为明王交于万物，与尔所疑“蠡斯”章解，同一穿凿。朱子“集传”，一扫旧障，专在涵泳神味，虚而与之委蛇，然如“郑风”诸什注疏，以为皆刺忽者固非。朱子以为皆淫奔者，亦未必是。尔治经之时，无论看注疏，看宋传，总宜虚心求之。其惬意者，则以朱笔识出；其怀疑者，则以另册写一小条，或多为辩论，或仅著数字，将来疑者渐晰，又记于此条之下，久久渐成卷帙，则自然日进。高邮王怀祖先生父子，经学为本朝之冠，皆自札记得来。吾虽不及怀祖先生，而望尔为伯申氏甚切也。

尔问时艺可否暂置，抑或它有所学？余惟文章之可以道吉，可以适今者，莫如作赋。汉魏六朝之赋，名篇巨制，具载于“文选”，余尝以“西征”、“芜城”及“恨”、“别”等赋示尔矣。其小品赋，则有“古赋识小象”。律赋，则有本朝之吴谷人、顾耕石、陈秋舫诸家。尔若学赋，可于每三、八日

作一篇大赋，或数千字，小赋或仅数十字，或对或不对，均无不可。此事比之八股文略有意趣，不知尔性与之相近否？尔所临隶书“孔庙碑”，笔太拘束，不甚松活，想系执笔太近毫之故，以后须执于管顶。余以执笔太低，终身吃亏，故教尔趁早改之。”无教碑”墨气甚好，可喜可喜。郭二姻叔嫌左肩太俯，右肩太耸，吴子序年伯欲带归示其子弟。尔字姿于草书尤相宜，以后专习真草二种，篆隶置之可也。四体并习，恐将来不能一工。

余癖疾近日大愈，目光平平如故。营中各勇夫病者，十分已好六七，惟尚未复元，不能拔管进剿，良深焦灼。闻甲五目疾十愈八九，忻慰之至。尔为下辈之长，须常常存个乐育诸弟之念。君子之道，莫大乎与人为善，况兄弟乎？临三、昆八，系亲表兄弟，尔须与之互相劝勉。尔有所知者，常常与之讲论，则彼此并进矣。此谕。

十月二十五日

11. 愿尔专心读书

字谕纪泽：

二十五日寄一信，言读“诗经”注疏之法。二十七日县城二勇至，接尔十一日安禀，具悉一切。

尔看天文，认得恒星数十座，甚慰甚慰。前信言“五体通考”中观象授时二十卷内恒星图最为明晰，曾翻阅否？国朝大儒于天文历数之学，讲求精熟，度越前古。自梅定九、王寅旭以至江、戴诸老，皆称绝学，然皆不讲占验，但讲进步。占验者，观星象云气以卜吉凶，“史记·天官书”“汉书·天文志”是也。推步者，测七政行度，以定授时，“史记·律书”“汉书·律历志”是也。秦味经先生之观象授时，简而得要。心壶既肯究心此事，可借此书与之阅看（“正礼通考”内有之，“皇清经解”内亦有之）。若尔与心壶二人能略窥二者之端绪，则足以补余之阙憾矣。四六落脚一字粘法，另纸写示（因接安徽信，遂不开示）。

书至此，接赵克彰十五夜自桐城发来之信，温叔及李迪庵方伯，尚无确信，想已殉难矣，悲悼易极！来信寄叔祖父封内中有往六安州之信，尚有一线生机。余官至二品，诰命三代，封妻荫子，受恩深重，久已置死生于度外，且常恐无以对同事诸君子于地下。温叔受恩尚浅，早岁不获一第，近年在军，亦不甚得志，设有不测，赉憾有穷期耶？军情变幻不测，春夏间方冀此贼指日可平，不图七月有庐州之变，八九月有江浦、六合

之变，兹又有三河之大变，全局破坏，所咸丰四年冬间相似，情怀难堪。但愿尔专心读书，将我所好看之书领略得几分，我所讲求之事钻研得几分，则余在军中，心常常自慰。尔每日之事，亦可写日记，以便查核。

十月二十九日于建昌营次

12. 读经宜常阅校勘记

字谕纪泽：

初一日接尔十二日一禀，得知四宅平安，尔将有长沙之行，想此时又归也。少庚早世，贺家气象日以凋耗，尔当常常寄信与尔岳母，以慰其意。每年至长沙走一二次，以解其忧。耦耕先生学问文章，卓绝辈流，居官亦恺惻慈祥，而家运若此，是不可解！尔挽联尚稳妥。

“诗经”字不同者，余忘之。凡经文版本不合者，阮氏校勘记最详（阮刻“十三经注疏”，今年六月在岳州寄回一部，每卷之末皆附校勘记，“皇清经解”中亦刻有校勘记，可取阅也）。凡引经不合者，段氏撰异最详（段茂堂有“诗经撰异”“书经撰异”等著，俱刻于“皇清经解”中）。尔翻而校对之，则疑者明矣。

十二月初三日

13 . 谈读书作文习字之法

字谕纪泽：

日来接尔两禀，知尔“左传”注疏将次看完。“三礼”注疏，非将江慎修“礼书纲目”认得大段，则注疏亦殊难领会，尔可暂缓，即“公”“谷”亦可缓看。尔明春将胡刻“文选”细看一遍，一则含英咀华，可医尔笔下枯涩之弊；一则吾熟读此书，可常常教尔也。沅叔及寅皆先生望尔作四书文，极为勤恳。余念尔庚申、辛酉下两科场，文章亦不可太丑，惹人笑话。尔自明年正月起，每月作四书文三篇，俱由家信内封寄营中。此外或作得诗赋论策，亦即寄呈。写字之中锋者，用笔尖着纸，古人谓之蹲锋，如狮蹲虎蹲犬蹲之象。偏锋者，用笔毫之腹着纸，不倒于左，则倒于右，当将倒未倒之际，一提笔则为蹲锋，是用偏锋者，亦有中锋时也。此谕。

涤生字 十二月二十三日

14. 儿为通学之辈乃余之夙愿

字谕纪泽：

闻尔至长沙已逾月余，而无禀来营，何也？少庚讪信百余件，闻皆尔亲笔写之。何不发刻？或请人帮写？非谓尔宜自惜精力，盖以少庚年未三十，情有等差，礼有隆杀，则精力亦不宜过竭耳。近想已归家度岁。今年家中因温甫叔之变，气象较之往年迥不相同。余因去年在家，争辩细事，与乡里鄙人无异，至今深抱悔憾。故虽在外，亦惻然寡欢。尔当体我此意，于叔祖各叔父母前尽些爱敬之心。常存休戚一体之念，无怀彼此歧视之见，则老辈内外必器爱尔，后辈兄弟姊妹以为榜样，日处日亲，愈久愈敬。若使宗族乡党皆曰纪泽之量大于其父之量，则余欣然矣。

余前有信教尔学作赋，尔复禀并未提及。又有信言涵养二字，尔复禀亦未之及。嗣后我信中所论之事，尔宜一一禀复。余于本朝大儒，自顾亭林之外，最好高邮王氏之学。王安国以鼎甲官至尚书，谥文肃，正色立朝，生怀祖先生。念孙经学精卓。生王引之，复以鼎甲官尚书，谥文简。三代皆好学深思，有汉书氏、唐颜氏之风。余自憾学问无成，有愧王文肃公远甚，而望尔辈为怀祖先生，为伯申氏，则梦寐之际，未尝须臾忘也。怀祖先生所著“广雅疏证”“读书杂志”，家中无之。伯申氏所著“经义述闻”“经传释词”，“皇清经解”内有之。尔可试取一阅。其不知者，写信来问。本朝穷经者。皆精小学，大

约不出段、王两家之范围耳。余不一一。

父涤生示 十二月三十日

再，纪泽明春须至罗家、刘家、李家拜年，如今年正月之样。刘峙衡待我极好，余至今念之，拟寄银百两交其妻子，泽儿至峙家，顺便仍宜拜沅堂老师。李家迪公之事，余当在营厚贖之。

涤生再示

15. 示写字作文用笔之法

字谕纪泽：

三月初二日接尔二月二十日安禀，得知一切。

内有贺丹麓先生墓志，字势流美，天骨开张，览之忻慰。惟间架间有太松之处，尚当加功。大抵写字只有用笔、结体两端。学用笔，须多看古人墨迹；学结体，须用油纸摹古贴。此二者，皆决不可易之理。小儿写影本，肯用心者，不过数月，必与其摹本字相肖。吾自三十时，已解古人用笔之意，只为欠却间架工夫，便尔作字不成体段。生平欲将柳诚悬、赵子昂两家合为一炉，只为间架欠工夫，有志莫遂。尔以后当从间架用一番苦功，每日用油纸摹帖，或百字，或二百字，不过数月，间架与古人逼肖而不自觉。能合柳、赵为一，此吾之素愿也。不能，则随尔自择一家，但不可见异思迁耳。不特写字宜摹仿古人间架，即作文亦宜摹仿古人间架。”诗经”造句之法，元一句无所体。”左传”之文，多现成句调。扬子云为汉代文宗，而其”太玄”摹”易”，“法言”摹”论语”，“方言”摹”尔雅”，“十二箴”摹”虞箴”，“长杨赋”摹”难蜀父老”，“解嘲”摹”客难”，“甘泉赋”摹”大人赋”，“剧秦美新”摹”封禅文”，“谏不许单于朝书”摹”国策”“信陵君谏伐韩”，几于无篇不摹。即韩、欧、曾、苏诸巨公之文，亦皆有所摹拟，以成体段，尔以后作文作诗赋，均宜心有摹仿，而后间架可立，其收效较速，其取径较便。前信教尔暂不必看“经义述闻”，今尔此信言业看三本，如看得有些滋味，即

一直看下去。不为或作或辍，亦是好事。惟“周礼”“仪礼”“大戴礼”“公”“谷”“尔雅”“国语”“太岁考”等卷，尔向来未读过正文者，则王氏述闻，亦暂可不观也。

尔恩来营省觐，甚好，余亦思尔来一见。婚期既定五月二十六日，三四月间自不能来，或七月晋省乡试，八月底来营省觐亦可。身体虽弱，处多难之世，若能风霜磨炼、苦心劳神，亦自足坚筋骨而长识见，沅浦叔向最羸弱，近日从军，反得壮健，亦其证也。赠伍嵩生之君臣画像乃俗本，不可为典要，奏折稿当抄一目录付归。余详诸叔信中。

三月初三日

16. 谈论书法派别

字谕纪泽儿：

二十二日接尔桌并“书谱叙”，以示李少荃、次青、许仙屏诸公，皆极赞美。云尔钩联顿挫，纯用孙过庭草法，而间架纯用赵法，柔中寓刚，绵里藏针，动合自然等语。余听之亦欣慰也。

赵文敏集古今之大成，于初唐四家内师虞永兴，而参以钟绍京，因此以上窥二王，下法山谷，此一径也；于中唐师李北海，而参以颜鲁公、徐季海之沈着，此一径也；于晚唐师苏灵芝，此又一径也。由虞永兴以溯二王及晋六朝诸贤，世所称南派者也；由李北海以溯欧、褚及魏北齐诸贤，世所谓北派者也。尔欲学书，须窥寻此两派之所以分。南派以神韵胜，北派以魄力胜。宋四家，苏、黄近于南派，米、蔡近于北派。赵子昂欲合二派而汇为一。尔从赵法入门，将来或趋南派，或趋北派，皆可不迷于所往。

我先大夫竹亭公，少学赵书，秀骨天成。我兄弟王人，于字皆下苦功，沅叔天分尤高。尔若能光大先业，甚望甚望！

制艺一道，亦须认真用功。邓瀛师，名手也。尔作文，在家有邓师批改，付营有李次非批改，此极难得，千万莫错过了。付回赵书“楚国夫人碑”，可分送三先生（汪、易、葛）二外甥及尔诸堂兄弟。又旧宣纸手卷、新宣纸横幅，尔可学“书谱”，请徐柳臣一看。此囑。

父涤生手渝 三月二十三日

17. 看书应有所择有所得

字谕纪泽：

前次于诸叔父信中，复示尔所问各书帖之目。乡间苦于无书，然尔生今日，吾家之书，业已百倍于道光中年矣。买书不可不多，而看书不可不知所择。以韩退之为千古大儒，而自述其所服膺之书，不过数种：曰“易”、曰“书”、曰“诗”、曰“春秋左传”、曰“庄子”、曰“离骚”、曰“史记”、曰相如、子云。柳子厚自述其所得，正者：曰“易”、曰“书”、曰“诗”、曰“礼”、曰“春秋”；旁者：曰“谷梁”、曰“孟”“荀”、曰“庄”“老”、曰“国语”、曰“离骚”、曰“史记”。二公所读之书，皆不甚多。本朝善读古书者，余最好高邮王氏父子，曾为尔屡言之矣。今观怀祖先生“读书杂志中所考订之书：曰“逸周书”、曰“战国策”、曰“史记”、曰“汉书”、曰“管子”、曰“晏子”、曰“墨子”、曰“荀子”、曰“淮南子”、曰“后汉书”、曰“老”“庄”、曰“吕氏春秋”、曰“韩非子”、曰“杨子”、曰“楚辞”、曰“文选”，凡十六种。又别著“广雅疏证”一种、伯申先生“经义述闻”中所考订之书：曰“易”、曰“书”、曰“诗”、曰“周官”、曰“仪礼”、曰“大戴礼”、曰“礼记”、曰“左传”、曰“国语”、曰“公羊”、曰“谷梁”、曰“尔雅”，凡十二种。王氏父子之博，古今所罕，然亦不满三十种也。余于“四书”、“五经”之外，最好“史记”“汉书”“庄子”韩文四种，好之十余年，惜不能熟读精考。又好“通鉴”“文选”及姚惜抱所选“古文辞类纂”、

余所选“十八家诗抄”四种，共不过十余种。早岁笃志为学，恒思将此十余书贯串精通，略作札记，仿顾亭林、王怀祖之法。今年齿衰老，时事日艰，所志不克成就，中夜思之，每周愧悔。泽儿若能成吾之志，将“四书”、“五经”及余所好之八种一一熟读而深思之，略作札记，以志所得，以著所疑，则余欢欣快慰，夜得甘寝，此外别无所求矣。至王氏父子所考订之书二十八种，凡家中所无者，尔可开一单来，余当一一购得寄回。

学问之途，自汉至唐，风气略同，自宋至明，风气略同；国朝又自成一种风气，其尤著者，不过顾、阎(百诗)、戴(东原)、江(慎修)、钱(辛楣)、秦(昧经)、段(懋堂)、王(怀祖)数人，而风会所扇，群彦云兴。尔有志读书，不必别标汉学之名目，而不可不窥数君子之门径。凡有所见闻，随时稟知，余随时谕答，较之当面回答，更易长进也。

四月二十一日

18. 作文宜先讲词藻

字谕纪泽儿：

余送叔父母生日礼目，鱼翅二斤太大，不好带，改送洋带一根。此带颇奇，可松可紧，可大可小，大而星冈公之腹可用也，小而鼎二、三之腰亦可用也。此二根皆送轩叔，春罗送叔母。

“尔作时文，宜先讲词藻，欲求词藻富丽，不可不分”类抄撮体面话头。近世文人，如袁简齐、赵瓯北、吴谷人，皆有手抄词藻小本。此众人所共知者。阮文达公为学政时，搜出生童夹带，必自加细阅。如系亲手所抄，略有条理者，即予进学；如系请人所抄，概录陈文者，照例罪斥。阮公一代闾儒，侧知文人不可无手抄夹带小本矣。昌黎之记事提要、纂言钩玄，亦系分类手抄小册也。尔去年乡试之文，太无词藻，几不能敷衍成篇。此时下手工夫，以分类手抄词藻为第一义。

尔此次复信，即将所分之类开列目录，附禀寄来。分大纲子目，如伦纪类为大纲，则君臣、父子、兄弟为子目；王道类为大纲，则井田、学校为子目。此外各门可以类推。尔曾看过“说文”“经义述闻”，二书中可抄者多。此外如江慎修之“类腋”及“子史精华”“渊鉴类函”，则可抄者尤多矣，尔试为之。此科名之要道，亦即学问之捷径也。此谕。

父涤生字 五月初四日

19. 读《诗经》不可没有恒心

字谕纪泽儿：

初四夜接尔二十六号禀。所刻“心经”微有“西安圣教”笔意，总要养得胸次博大活泼，此后当更有长进也。

尔去年青“诗经”注疏已毕否？若未毕，自当补看，不可无恒耳。讲“通鉴”，即以我过笔者讲之。亦可将来另购一部，尔照我之样过笔一次可也。

冯树堂师诗草曾寄营矣。尔复信言十二年进京，程资不敢领。新写闾深肃穆四匾字，拓一分付回。余不多及。

父涤生字 五月初四日

再，同县拔贡生傅泽鸿寄朱卷数十本来营，兹付去程仪三十两，尔可觅便寄傅家，或专人送去。又示。

20. 论今古文尚书

字谕纪泽儿：

接尔二十九、三十号两禀，得悉“书经”注疏看“商书”已毕。“书经”注疏颇庸陋，不知“诗经”之赅博。我朝儒者，如阎百诗、姚姬传诸公皆辨别古文“尚书”之伪。孔安国之传，亦伪作也。盖秦燔书后，汉代伏生所传，欧阳及大小夏侯所习，皆仅二十八篇，所谓今文“尚书”者也。厥后孔安国家有古文“尚书”，多十余篇，遭巫蛊之事，未得立于学官，不传于世。厥后张霸有“尚书”百两篇，亦不传于世。后汉贾逵、马、郑作古文“尚书”注解，亦不传于世。至东晋梅賾始献古文“尚书”并孔安国传，自六朝唐宋以来承之，即今通行之本也。自吴才老及朱子、梅鼎祚、归震川，皆疑其为伪。至阎百诗遂专著一书以痛辩之，名曰“疏证”。自是辨之者数十家，人人皆称伪古文、伪孔氏也。“日知录”中略著其原委。王西庄、孙渊如、江艮庭三家皆详言之（“皇清经解”中皆有江书，不足观）。此亦“六经”中一大案，不可不知也。

尔读书记性平常，此不足虑。所虑者第一怕无恒，第二怕随笔点过一遍，并未看得明白。此却是大病。若实看明白了，久之必得些滋味，寸心若有怡悦之境，则自略记得矣。尔不必求记，却宜求个明白。

邓先生讲书，仍请讲“周易折中”。余圈过之“通鉴”，暂不必讲，恐污坏耳。尔每日起得早否？并问。此谕。

涤生手示 六月十四日辰刻

21. 近思制古文集

字谕纪泽儿：

正月间曾以“欧阳生文集序”寄晓岑，久无复信，不知寄到否？便中一查。又去年托小岑买得刘石庵小横幅，已取回否？此幅极佳，余笃好之，曾交银十两，尔取回为要。

余往年作“原才”一篇，去岁于尔案间见之，尔可抄一稿寄营。又甲辰年作“五箴”及“祭汤海秋文”，尔见稿否？亦可抄来也。近思将历年所作古文清一稿本，虽无佳者，亦不忍听其零落耳。日内当写一目录至各处查出也。

涤生示 六月十九日早

22. 学书法须通入门之径

字谕纪泽儿：

尔前寄所临“书谱”一卷，余比送徐柳臣先生处，请其批评。初七日接渠回信，兹寄尔一阅。十三日晤柳臣先生，渠盛称尔草字可以入古，又送尔扇一柄，兹寄回。刘世兄送“西安圣教”，兹与卷并寄回查收。

尔前用油纸摹字，若常常为之，间架必大进。欧、虞、颜、柳四大家是诗家之李、杜、韩、苏，天地之日星江河也。尔有志学书，须窥寻因人门径。至嘱至嘱！

涤生手示 七月十四日

23. 详示作字换笔之法

字谕纪泽儿：

接尔七月十三、二十七日两禀，并赋一篇，尚有气势，兹批出发还（尚未批，下次再发）。凡作文，末数句要吉祥；凡作字，墨色要光润。此先大夫竹亭公常以教余与诸叔父者。父谨记之，无忘祖训。尔问各条，分列示知：

尔问“五箴”末句“敢告马走”。凡箴以“虞箴”力量古（左传·襄公），其末曰“鲁臣司原，敢告仆夫”。意以鲁臣有司郊原之责，吾不敢直告之，但告其仆耳。扬子云仿之作“州箴”。冀州曰：牧臣司冀，敢告在阶。扬州曰：牧臣司扬，敢告执筹。荆州曰：牧臣司荆，敢告执御。青州曰：牧臣司表，敢告执矩。徐州曰：牧臣司徐，敢告仆夫。余之“敢告马走”，即此类也。走犹仆也（见司马迁“任安书”注、班固“实戏”注）。朱子作“敬箴”，曰“敢告灵台”，则非仆御之类，于古人微有歧误矣。凡箴以官箴为本，如韩公“五箴”、程子“四箴”、朱子各箴、范俊“心箴”之属，皆失本义。余亦相沿失之。

尔问看注疏之法，“‘书经’文义奥衍，注疏勉强牵合”，二语甚有所见。“左”疏浅近，亦颇不免。国朝如王西庄（鸣盛）、孙渊如（星衍）、江良庭（声）皆注“尚书”，顾亭林（炎武）、惠定宇（栋）、王伯申（引之）皆注“左传”，皆刻“皇清经解”中。“书经”则孙注较胜，王、江不甚足取。“左传”则顾、惠、王三家俱精。王亦有“书经述闻”，尔曾看一次矣。

太抵“十三经注疏”以三“礼”为最善，“诗”疏次之。以外皆有醇有驳。尔既已看动数经，即须立志全看一边，以期作事有恒，不可半途而废。

尔问作字换笔之法，凡转折之处，如“YL08”之类，必须换笔，不待言矣。至并无转折形迹，亦须换笔者。如以一横言之，须有三换笔(末向上挑，所谓磔也，中折而下行，所谓波也，左向上行，所谓勒也；初入手，所谓直来横受也)。以一直言之，须有两换笔(直横入)，所谓横来直受也，上向左行，至中腹换而右行，所谓努也)。捺与横相似，特末笔磔处更显耳(直波磔人)。撇与直相似，特末笔更撇向外耳(停掠横入)。凡换笔，皆以小圈识之，可以类推。凡用笔，须略带欹斜之势，如本斜向左，一换笔则向右矣；本斜向右，一换则向左矣。举一反三，尔自悟取可也。

李春醴处，余拟送之八十金。若家中未先送，可寄信来。凡家中亲友有庆吊事，皆可寄信由营致情也。

涤生手示 八月十二日于黄州

24 . 儿婚期改日余甚喜慰

字谕纪泽儿：

二十一日得家书，知尔长沙一次，何不寄安禀来营？婚期改九月十六，余甚喜慰。余老境侵寻，颇愿将儿女婚嫁早早料理。袁漱六亲家嗜患血疾，昨专人走松江看视，若得复元，吾即思明春办大女儿嫁事。袁铁庵来我家时，尔禀问母亲，可以吾意商之。

京中书到时，有胡刻“通鉴”一部，留家中讲解，即将吾圈过一部寄来营可也。又汲古阁初印“五代史”一部，亦寄来。皮衣等件，速速寄来。吾买贴数十部，下次寄尔。此谕。

九月二十四日

25. 欲稍有成就须从有恒下手

字谕纪泽儿：

接尔十九、二十九日两禀，知喜事完毕，新妇能得尔母之欢，是即家庭之福。

我朝列圣柏承，总是寅正即起，至今二百年不必。我家高曾祖考相传早起，吾得见竟希公“星冈公皆未明即起，冬寒起坐约一个时辰，始见天亮。吾父竹亭公亦甫黎明即起，有事则不待黎明，每夜必起看一二次不等，此尔所及见者也。余近亦黎明即起，思有以绍先人之家风。尔既冠授室，当以早起为第一先务。自力行之，亦率新妇力行之。

余生平坐无恒之弊，万事无成。德无成，业无成，已可深耻矣。逮办理军事，自矢靡他，中间本志变化，尤无恒之大者，用为内耻。尔欲稍有成就，须从有恒二字下手。

余尝细观星冈公仪表绝人，全在一重字。余行路容止亦颇重厚，取法于星冈公。尔之容止甚轻，是一大弊病，以后宜时时留心。无论行坐，均须重厚，早起也，有恒也，重也，三者皆尔最要之务。早起是先人之家法，无恒是吾身之大耻，不重是尔身之短处，故特谆谆戒之。

吾前一信答尔所问者三条，一字中换笔，一“敢告马走”一注疏得失，言之颇详，尔来禀何以并未提及？以后凡接我教尔之言，宜条条禀复，不可疏略。此外教尔之事，则详于寄寅皆先生看读写作一缄中矣。此谕。

十月十四日

26. 时记勤敬二字

字谕纪泽儿：

接尔元夕稟，知叔父大人病极沉重。余未在家，尔宜常至白玉堂服侍汤药，勤敬二字断不可忽。若在老宅而有倦色有肆容，则与不去无异。余往年在外多愧悔之端，近两年补救不少。至在家亦有可愧悔者，几为我补救可也。澄叔分居上腰里，应用粗细器皿须由下腰里分去。尔稟母亲雇工陆续送去。尔至长沙看贺岳母，须待叔祖病减乃去，稟商澄、沅两叔父遵行。

涤生手示 二月初四日

27. 心常用则活不用则窒

字谕纪泽儿：

二十日接二月二日来禀并祭文稿，文尚条畅，惟意义太少。叔祖之德全未称道，亦非体制，词藻亦太寒俭。尔现看“文选”，宜略抄典故藻，分类抄记，以为馈贫之粮。“文选”前数本系汉人之赋，极难领会，后半则身看矣。余所见友朋中，无能知汉赋之意味者。尔不能记忆，亦由于不知其意味。此刻不必求记，将来若能识得意味，自可渐记一二。余向来记性极坏，近老年反略好些，由于识得意味也。时文亦不必苦心孤诣去作，但常常作文。心常用则活，不用则窒；常用则细，不用则粗。

江忠烈之太夫人，余将寄银一百、幛一悬，写兄弟四人名，家中不必另致情。江太夫人大事，岷樵曾赠银二百，余收一百。先大夫大事，达州曾赠纹银五十，余收二十也。

余前允尔来营省觐，兹因陈作梅来吾乡着地，须尔在家中陪款，恐作梅先生未到湘时，沅叔业已先出，尔须等候作梅先生，在家住二十余日，再送陈至省展谒贺岳母，小住即仍归去。闻儿妇或有梦熊之喜。尔于下半年再请来营省觐可也。此嘱。

涤生手示 二月二十四日

28. 论读《文选》之要领

字谕纪泽：

初一日接尔十六日禀，澄叔已移寓新居，则黄金堂老宅，尔为一家之主矣。昔吾祖星冈公最讲求治家之法，第一起早，第二打扫洁净，第三诚修祭祀，第四善待亲族邻里。凡亲族邻里来家，无不恭敬款接，有急必周济之，有讼必排解之，有喜必庆贺之，有疾必问，有丧心吊。此四事之外，于读书、种菜等事尤为刻刻留心，故余近写家信，常常提及书、蔬、鱼、猪四端者，盖祖父相传之家法也。尔现读书无暇，此八事，纵不能一一亲自经理，而不可不识得此意，请朱运四先生细心经理，八者缺一不可。其诚修祭祀一端，则必须尔母随时留心。凡器皿第一等好者留作祭祀之用，饮食第一等好者亦备祭祀之需。凡人家不讲究祭祀，纵然兴旺，亦不久长。至要至要。

尔所论看“文选”之法不为未见。吾观汉魏文人，有二端最不可及：一曰训诂精确，二曰声调铿锵。”说文”训诂之学，自中庸以后人多不讲，宋以后说经尤不明故训，及至我朝巨儒始通小学。段茂堂、王怀祖两家，遂精研乎古人文字声音之本，乃知“文选”中古赋所用之字，无不典雅精当。尔若能熟读段、王两家之书，则知眼前常见之字，凡唐宋文人误用者，惟“六经”不误，“文选”中汉赋亦不误也。即以尔禀中所论“三都赋”言之，如“蔚若相如，皤若君平”，以一蔚字赅括相如之文章，以一皤字赅括君平之道德，此虽不尽关乎训诂，亦足见其下字之不苟矣。至声调之铿锵，如“开高轩以临山，列绮窗

而瞰江” ，“碧出苍宏之血，鸟生社字之魂” ，“洗兵海岛，刷马江洲” ，“数军实乎桂林之苑，飨戎旅乎落星之楼” 等句，音响节奏，皆后世所不能及。尔看“文选”，能从此二者用心，则渐有入理处矣。

作梅先生想已到家，尔宜恭敬款接。沅叔既已来营，则无人陪往益阳，闻胡宅专人至吾乡迎接，即请作梅独去可也。尔舅父牧云先生身体不甚耐劳，即请其无庸来营。吾此次无信，尔先致吾意，下次再行寄信。此嘱。

闰三月初四日

29. 举止须重行文宜圆

字谕纪泽儿：

二十七日刘得四到，接尔禀。所谓论“文选”俱有所得，问小学亦有条理，甚以为慰。

沅叔于二十七到宿松。初三日由宿至集贤关，将尔禀带去矣。余不能悉记，但记尔问种种二字。此字段茂堂辩论甚晰。種为艺也(犹吾乡言栽也、点也、插也)。种为后熟之本，“诗”之“黍稷重穋”(“七月”“闾宫”)“说文”作“种稷”。种，正字也。重，假借字也。穋与稷，异同字也。隶书以稷种二字互易，今人于耕穋，概用种字矣。吾于训诂、词章二端颇尝尽心。尔看书若能通训诂，则于古人之故训大义、引申假借渐渐开悟，而后人承讹袭误之习可改。若能通词章，则于古人之文格文气、开合转折渐渐开悟，而后人硬腔滑调之习可改。是余之所厚望也。嗣后尔每月作三课，一赋、一古文、一时文，皆交长夫带至营中，每月恰有三次长夫接家信也。

吾于尔有不放心者二事：一则举止不甚重厚，二则文气不甚圆适。以后举止留心一重字，行文留心一圆字。至嘱。

涤生手示 四月初四日

四月题：

赤壁破曹军赋(以周瑜纵火烧曹兵于赤壁下为韵)

后汉党锢论

以善养人然后能服天下

30. 写字作文总以圆润为主

字谕纪泽儿：

十六日接尔初二日禀并赋二篇，近日大有长进，慰甚。

无论古今何等文人，其下笔造句，总以珠圆玉润四字为主。无论古今何等书家，其落笔结体，亦以珠圆玉润四字为主。故吾前示尔书，专以一重字救尔之短，一圆字望尔之成也。世人论文字之语圆而藻丽者，莫如徐陵、庾信，而不知江淹、鲍照则更圆，进之沈约、任昉则亦圆，进之潘岳、陆机则亦圆，又进而溯之东汉之班固、张衡、崔駰、蔡邕则亦圆，又进而溯之西汉之贾谊、晁错、匡衡、刘向则亦圆。至于司马迁、相如、子云三人，可谓力趋险奥，不求圆适矣；而细读之，亦未始不圆。至于昌黎，其志意直欲凌驾子长、卿、云三人，戛戛独造，力避圆熟矣，而久读之，实无一字不圆，无一句不圆。尔于古人之文，若能从江、鲍、徐、庾四人之圆步步上溯，直窥卿、云、马、韩四人之圆，则无不可读之古文矣，即无不可通之经史矣。尔其勉之。余于古人之文，用功甚深，惜未能一一达之腕下，每歉然不怡耳。

江浙贼势太乱，江西不久亦当震动，两湖亦难安枕。余寸心坦坦荡荡，毫无疑怖。尔禀告尔母，尽可放心。人谁不死，只求临终心无愧悔耳。家中暂不必添起杂屋，总以安静不动为妙。

寄回银五十两，为邓先生束脩。四叔四婶四十生日，余先寄燕窝一匣、秋罗一匹，容日续寄寿屏。甲五婚礼，余寄银五

十两、袍褂料一付，尔即妥交。赋立为发还。

涤生手示 四月二十四日

31. 派专人抵湖口接儿

字谕纪泽儿：

余于初四日自建德启行，十一日至祁门县。闻尔于二十八日自长沙开船，计此时可抵湖口矣，特专人往接。尔或由湖口、彭泽小路入祁门境，或由建德循余所经过之路来祁门皆可，但不可走景德镇，以太远也。

牧云舅氏处先行部安。

涤生手示 六月十六日

32. 今日至渔亭遍走各营

字谕纪泽儿：

余今日至渔亭，遍走各营，颇劳。闻凯章、作梅明日由此经过，不得不等候一送。因便至齐云山一游，初二日始回祁门也。有廷寄及家信送来，余不必送。此谕。

涤生手草 七月二十九日

33. 时以子侄辈骄傲为虑

沅、季弟左右：

朱祖贵来，接沅弟信，强中营勇回，接沅、季二信，皆二十五六日研发。自二十七日以后，弟处发信，想皆因中途有警折回矣。日内不知北岸贼情何如，至为系念。

此间鲍、张初二三并未开仗，唐桂生赴祁、建交界之区，亦未见贼也。季第赐纪泽途费太多。余给以二百金，实不为少。余在京十四年，从未得人二百金之赠，余亦未尝以此数赠人，虽由余交激太寡，而物力艰难亦可概见。余家后辈子弟，全未见过艰苦模样，眼孔大，口气大，呼奴喝婢，习惯自然，骄傲之气人于膏肓而不自觉，吾深以为虑。前函以傲家箴规两弟，两弟不深信，犹能自省自惕，若以傲字告诫子侄，则全然不解。盖自出世以来，只做过大，并未做过小，故一切茫然，不似两弟做过小，吃过苦也。

十月初四日夜

34. 尔兄弟努力读书不怕没饭吃

字谕纪泽、纪鸿儿：

泽儿在安庆研发各信及在黄石矾湖之信，均已接到。鸿儿所呈拟连珠体寿文，初七日收到。

余以初九日出营至黟县查阅各岭，十四日归营，一切平安。鲍超、张凯章二军，自二十九、初四获胜后未再开仗。杨车门带水陆三千余人至南陵，破贼四十余垒，拔出陈大富一军。此近日最可喜之事。英夷业已就抚，余九月六日请带兵北援一疏，奉旨无庸前往，余得一意办东南之事，家中尽可放心。

泽儿看书天分高，而文笔不甚劲挺，又说话太易，举止太轻，此次在祁门为过进浅，未将一轻字之弊除尽，以后须于说话走路时刻刻留心。鸿儿文笔劲健，可慰可喜。此次连珠文，先生政者若干字？拟体系何人主意？再行详禀告我。银钱、田产最易长骄气逸气，我家中断不可积钱，断不可买田，尔兄弟努力读书，决不怕没饭吃。至嘱。澄叔处此次未写信，尔禀告之。

闻邓世兄读书甚有长进，顷阅贺寿之单帖寿禀，书法清润，兹付银十两，为邓世兄(汪汇)买书之资。此次未写信寄寅阶先生，前有信留明年教书，仍收到矣。

十月十六日

35. 举止要重发言要慎

字谕纪泽、纪鸿儿：

十月二十九日接尔母及澄叔信，又棉鞋瓜子二包，得知家中各宅平安。泽儿在汉口阻风六日，此时当已抵家。举止要重，发言要韧。尔终身要牢记此二语，无一刻可忽也。

余日内平安，鲍、张二军亦平安。左军二十二日在贵溪获胜一次，二十九日在德兴小胜一次，然贼数甚众，尚属可虑。普军在建德，贼以大股往扑，只要左、普二军站得住，则处处皆稳矣。

泽儿字，天分甚高，但少刚劲之气，须用一番苦工夫，切莫把天分自弃了。家中大小，总以起早为第一义。澄叔处，此次未写信，尔等禀之。

涤生手示 十一月初四日

36. 饭后千步乃养生要诀

字谕纪泽儿：

曾名琮来，接尔十一月二十五日禀，知十五、十七尚有两禀未到。尔体甚弱，咳吐咸痰，吾尤以为虑，然总不宜服药。药能活人，亦能害人。良医则活火者十之七，害人者十之三；庸医则害人者十之七，活人者十之三。余在乡在外，凡目所见者，皆庸医也。余深恐其害人，故近三年来，决计不服医生所开之方药，亦不令尔服乡医所开之方药。见理极明，故言之极切，尔其敬听而遵行之。每日饭后走数千步，是养生家第一秘诀。尔每餐食毕，可至唐家铺一行，或至澄叔家一行，归来大约可三千余步。三个月后，必有大效矣。

尔看完《后汉书》，须将《通鉴》看一遍。即将京中带回之《通鉴》，仿照余法，用笔点过可也。尔走路近略重否？说话略钝否？千万留心，此谕。

涤生手示 十二月二十四日

37. 释文中雄奇之道

字谕纪译儿：

腊月二十九日接尔一禀，系十一月十四日送家信之人带回，又由沅叔处送尔初归时二信，慰悉。尔以十四日到家，而鸿儿十八日禀中言尔总在日内可到，何也？岂鸿信十三四写就而朱金权于十八日始署封面耶？霞仙先生之令弟仙逝，余于近日当写唁信，并寄奠仪。尔当先去吊唁。

尔问文中雄奇之道。雄奇以行气为上，造句次之，选字又次之。然未有字不古雅而句能古雅，句不古雅而气能古雅者；亦未有字不雄奇而句能雄奇，句不雄奇而气能雄奇者。是文章之雄奇，其精处在行气，其粗处全在造句选字也。余好古人雄奇之文，以昌黎为第一，扬子云次之。二公之行气，本之天授。至于人事之精能，昌黎则造句之工夫居多，子云则选字之工夫居多。

尔问叙事志传之文难于行气，是殊不然。如昌黎《曹成王碑》、《韩许公碑》，固属千奇万变，不可方物，即卢夫人之铭、女孥之志，寥寥短篇，亦复雄奇崛强。尔试将此四篇熟看，则知二大二小，各极其妙矣。

尔所作《雪赋》，词意颇古雅，惟气势不畅，对仗不二。两汉不尚对仗，潘、陆则对矣，江、鲍、庚、徐则工对矣。尔宜从对仗上用工夫。此囑。

涤生手示 正月初四日

38. 写字宜常摹柳贴

字谕纪泽儿：

正月初十日接尔腊月十九日一禀，十二日又由安庆寄到尔腊月初四日之禀，具知一切。长夫走路太慢，而托辞于为营中他信绕道长沙耽搁之故。此不足信。譬如家中遣人送信至白玉堂，不能按期往返，有责之者，则曰被杉木坝、周家老屋各佃户强我送担耽搁了。为家主者但当严责送信之迟，不管送担之真与否也；况并无佃户强令送担乎？营中送信至家与黄金堂送信至白玉堂，远近虽殊，其情一也。

尔求抄古文目录，下次即行寄归。尔写字笔力太弱，以后即常摹柳帖亦好。家中有柳书《玄秘塔》《琅邪碑》《西平碑》各种，尔可取《琅邪碑》日临百字、摹百字。临以求其神气，摹以仿其间架。每次家信内，各附数纸送阅。

《左传》注疏阅毕，即阅看《通鉴》将京中带回之《通鉴》，仿我手校本，将目录写于面上。其去秋在营带去之手校本，便中仍当寄送祁门。余常思翻阅也。

尔言鸿儿为邓师所赏，余甚欣慰。鸿儿现阅《通鉴》，尔亦可时时教之。尔看书天分甚高，作字天分甚高，作诗文天分略低，若在十五六岁时教导得法，亦当不止于此。今年已二十三岁，全靠尔自己挣扎发愤，父兄师长不能为力。作诗文是尔之所短，即宜从短处痛下工夫。看书写字尔之所长，即宜拓而充之。走路宜重，说话宜迟，常常记忆否？

余身体平安，告尔母放心。

涤生手示 正月十四日

39 内传为本义外传为余义

字谕纪泽儿：

正月十四发第二号家信，谅已收到。日内祁门尚属平安。鲍春霆自初九日在洋塘获胜后，即追贼至彭泽。官军驻牯牛岭，贼匪踞下隅坂，与之相持，尚未开仗。日内雨雪泥泞，寒风凛冽，气象殊不适人意。伪忠王李秀成一股，正月初五日围玉山县，初八日围广丰县，初十日围广信府，均经官军竭力坚守，解围以去，现窜铅山之吴坊、陈坊等处。或由金溪以窜抚、建，或径由东乡以扑江西省城，皆意中之事。余嘱刘养素等坚守抚、建，而省城亦预筹防守事宜。只要李逆一股不甚扰江西腹地，黄逆一股不再犯景德镇等，三四月间，安庆克复，江北可分兵来助南岸，则大局必有转机矣。目下春季必尚有危险迭见，余当谨慎图之，泰然处之。

余身体平安，惟齿痛时发。所选古文，已抄目录寄归。其中有未注明名氏者，尔可查出补注，大约不出《百三名家全集》及《文选》《古文辞类纂》三书之外。尔问《左传》解《诗》《书》《易》与今解不合。古人解经，有内传，有外传。内传者，本义也；外传者，旁推曲衍，以尽其余义也。孔子系《易》，小象则本义为多，大象则余义为多。孟子说《诗》，亦本子贡之因贫富而悟切磋，子夏之因素绚而悟礼后，亦证余义处为多。《韩诗外传》，尽余义也。《左传》说经，亦以余义立言者多。

袁史生之二百金，余去年曾借松江二百金送季仙先生，此

项只算还袁宅可也。树堂先生送尔三百金，余当面言只受百金。尔写信寄营酬谢，言受一璧二云云。余在营中备二百金，并尔信函交冯可也。此字并送澄叔一阅，此次不另作书矣。

涤生手示 正月二十四日

40 “劳”字“谦”字应牢记

字谕纪泽、纪鸿儿：

得正月二十四日信，知家中平安。此间军事，自去冬十一月至今，危险异常，幸皆化险为夷。目下惟左军在景德镇一带十分可危，余俱平安。余将以十七日移驻东流、建德。

付回银八两，为我买好茶叶陆续寄来。下手竹茂盛，屋后内仍须栽竹，复吾父在日之旧观，余七年在家芟伐各竹，以倒厅不光明也。乃芟后而黑暗如故，至今悔之，故嘱尔重栽之，劳字、谦字，常常记得否？

涤生手示 二月十四日巳刻

41 儿不可从军亦不必做官

字谕纪泽、纪鸿儿：

接二月二十三日信，知家中五宅平安，甚慰甚慰。

余以初三日至休宁县，即闻景德镇失守之信。初四日写家书，托九叔处寄湘，即言此间局势危急，恐难支持，然犹意力攻徽州，或可得手，即是一条生路。初五日进攻，强中、湘前等营在西门挫败一次。十二日再行进攻，未能诱贼出仗。是夜二更，贼匪偷营劫村，强中、湘前等营大溃。凡去二十二营，其挫败者八营（强中三营、老湘三营、湘前一、震字一），其幸而完全无恙者十四营（老湘六、霆三、礼二、亲兵一、峰二），与咸丰四年十二月十二夜贼偷湖口水营情形相仿。此将未挫之营较多，以寻常兵事言之，此尚为小挫，不甚伤元气。目下值局势万紧之际。四面梗塞，接济已断，加此一挫，军心尤大震动。所盼望者，左军能破景德镇、乐平之贼，鲍军能从湖口迅速来援，事或略有转机，否则不堪设想矣。

余自从军以来，即怀见危授命之志。丁、戊年在家抱病，常恐溘逝牖下，渝我初志，失信于世。起复再出，意尤坚定。此次若遂不测，毫无牵恋。自念贫窶无知，官至一品，寿逾五十，薄有浮名，兼秉兵权，忝窃万分，夫复何憾！惟古文与诗，二者用力颇深，探索颇苦，而未能介然用之，独辟康庄。古文尤确有依据，若遽先朝露，则寸心所得，遂成广陵之散。作字用功最浅，而近年亦略有人处。三者一无所成，不无耿耿。至

行军本非余所长，兵贵奇而余太平，兵贵诈而余太直，岂能办此滔天之贼？即前此屡有克捷，已为侥幸，出于非望矣。尔等长大之后，切不可涉历兵间，此事难于见功，易于造孽，尤易于貽万世口实。余久处行间，日日如坐针毡，所差不负吾心，不负所学者，未尝须臾忘爱民之意耳。近来阅历愈多，深谙督师之苦。尔曹惟当一意读书，不可从军，亦不必作官。

吾教子弟不离八本、三致祥。八者曰：读古书以训诂为本，作诗文以声调为本，养亲以得欢心为本，养生以少恼怒为本，立身以不妄语为本，治家以不晏起为本，居官以不要钱为本，行军以不扰民为本。三者曰：孝致祥，勤致祥，恕致祥。吾父竹亭公之教人，则专重孝字。其少壮敬亲，暮年爱亲，出于至诚，故吾纂墓志，仅叙一事。吾祖星冈公之教人，则有八字，三不信。八者曰：考、宝、早、扫、书、蔬、鱼、猪。三者，曰僧巫，曰地师，曰医药，皆不信也。处兹乱世，银钱愈少，则愈可免祸；用度愈省，则愈可养福。尔兄弟奉母，除劳字俭字之外，别无安身之法。吾当军事极危，辄将此二字叮嘱一遍，此外亦别无遗训之语，尔可禀告诸权及尔母无忘。

三月十三日

42 可于省城雇人至家种蔬

字谕纪泽儿：

三月三十日建德途次接澄侯弟在永丰所发一信，并尔将去省时在家所留之禀。尔到省后所寄一禀，却于二十八日先到也。

余于二十六日自祁门拔营起行，初一日至东流县。鲍军七千余人于二十五日自景德镇起行，三十日至下隅坂。因风雨阻滞，初三日始渡江，即日进援安庆，大约初八九可到。沅弟、季弟在安庆稳守十余日，极为平安。朱云岩带五百人，二十四日自祁门起行，初二日已至安庆助守营濠，家中尽可放心。此次贼救安庆，取势乃在千里以外，如湖北则破黄州，破德安，破孝感，破随州、云梦、黄梅、蕲州等属，江西则破吉安，破瑞州、吉水、新淦、永丰等属，皆所以分兵力，亟肆以疲我，多方以误我。贼之善于用兵，似较昔年更狡更悍。吾但求力破安庆一关，此外皆不遽与之急得失。转旋之机，只在一二月可决耳。

乡间早起之家，蔬菜茂盛之家，类多兴旺。晏起无蔬之家，类多衰弱，尔可于省城菜园中，用重价雇人至家种蔬，或二人亦可。其价若干，余由营中寄回。此嘱。

涤生手示 四月初四日东流县

此次未写信与澄叔，尔禀告之。

43 论书写篆字等事

字渝纪泽：

六月二十日唐介科回营，接尔初三日稟并澄叔一函，具悉一切。

今年彗星出于北斗与紫微垣之间，渐渐南移，不数日而退出右辅与摇光之外，并未贯紫微垣，亦未犯天市也。占验之说，本不足信，即有不祥，或亦不大为害。

省雇园丁来家，宜废田一二丘，用为菜园。吾现在营课勇夫种菜，每块土约三丈长，五尺宽，窄者四尺余宽，务使芸草及摘蔬之时，人足行两边沟内，不践菜土之内。沟宽一尺六寸，足容便桶。大小横直，有沟有浚，下雨则水有所归，不便积潦伤菜。四川菜园极大，沟浚终岁引水长流，颇得古人井田遗法。吾乡一家园土有限，断无横沟，而直沟则不可少。吾乡老农，虽不甚精，犹颇认真，老圃则全不讲究。我家开此风气，将来荒山旷山，尽可开垦，种百谷杂蔬之类。如种茶亦获利极大，吾乡无人试行，吾家若有山地，可试种之。

尔前问《说文》中逸字，今将贵州郑子尹所著二卷寄尔一阅。渠所补一百六十五文，皆许书本有之字，而后世脱失者也。其子知同，又附考三百字，则许书本无之字，而他书引《说文》有之，知同辨为不当有者也。尔将郑氏父子书细阅一遍，则知叔重原有之字，被传写逸脱者，实已不少。

纪渠侄近写篆字甚有笔力，可喜可慰。兹圈出付回。尔须

教之认熟篆文，并解明偏旁本意。渠侄、湘侄要大字横匾，余即日当写就付归。寿侄亦当付一匾也。家中有李少温篆帖《三坟记》《迁先茔记》，亦可寻出，呈澄叔一阅。澄弟作篆字，间架太散，以无帖意故也。邓石如先生所写篆字《西铭》《弟子职》之类，永州杨太守新刻一套，尔可求郭意诚姻叔拓一二分，俾家中写篆者有所摹仿。家中有褚书《西安圣教》《同州圣教》，尔可寻出寄营，《王圣教》亦寄来一阅。如无裱者，则不必寄也。《汉魏六朝百三家集》，京中一分，江西一分，想俱在家，可寄一部来营。

余疮疾略好，而癖大作，手不停爬，幸饮食如常。安庆军事甚好，大约可克复矣。此次未写信与澄叔，尔将此呈阅，并问澄弟近好。

六月二十四日

44 看读写作逐日无间

字谕纪泽：

前接来禀，知尔抄《说文》，阅《通鉴》，均尚有恒，能耐久坐，至以为慰。去年在营，余教以看、读、写、作，四者阙一下可。尔今阅“通鉴”，算看字工夫；抄《说文》，算读字工夫。尚能临帖否？或临《书谱》，或用油纸摹欧、柳楷书，以药尔柔弱之体，此写字工夫，心不可少者也。尔去年曾将《文选》中零字碎锦分类纂抄，以为属文之材料，今尚照常摘抄否？已卒業否？或分类抄《文选》之词藻，或分类抄《说文》之训诂，尔生平作文太少，即以此代作字工夫，亦不可少者也。尔十余岁至二十岁虚度光阴，及今将看、读、写、作四字逐日无间，尚可有成。尔语言太快，举止太轻，近能力行迟重二字以改救否？

此间军事平安。援贼于十九、二十、二十一日扑安庆后濠，均经击退。二十二日自己刻起至五更止，猛扑十一次，亦竭力击退。从此当可化险为夷，安庆可望克复矣。余痲疾未愈，每日夜手不停爬，幸无他病。皖南有左、张，江西有鲍，均可放心。目下惟安庆较险，然过二十二之风波，当无虑也。

七月二十四日

45 居家之道惟崇俭可以长久

字谕纪泽：

八月二十日胡必达、谢荣凤到，接尔母子及澄叔三信，并《汉魏百三家》《圣教序》三帖。二十二日谭在荣到，又接尔及澄叔二信。具悉一切。

蔡迎五竟死于京口江中，可异可悯！兹将其口粮三两补去外，以银二十两赈恤其家。朱运四先生之母仙逝，兹寄去奠仪银八两。蕙姑娘之女一贞，于今冬发嫁，兹付去奩仪十两。家中可分别妥送。大女儿择于十月初三发嫁，袁家已送期来否？余向定妆奩之资二百金，兹先寄百金回家，制备衣物，余百金俟下次再寄。其自家至袁家途费暨六十侄女出嫁奩仪，均俟下次再寄也。居家之道，惟崇俭可以长久，处乱世尤以戒奢侈为要义，衣服不宜多制，尤不宜大镶大滚，过于绚烂。尔教导诸妹，敬听父训，自有可久之理。

牧云舅氏书院一席，余已函托寄云中丞，沅叔告假回长沙，当面再一提及，当无不成。余身体平安。二十一日成服哭临，现在三日已毕。疮尚未好，每夜搔痒不止，幸不甚为害。湖叔近患疟疾，二十二日全愈矣。此次未写澄叔信，尔将此呈阅。

八月二十四日

46 论目录分类之法

字谕纪泽：

接尔八月十四日禀并日课一单、分类目录一纸。日课单批明发还。

目录分类，非一言可尽。大抵有一种学问，即有一种分类之法，有一人嗜好，即有一人摘抄之法。若从本原论之，当以“尔雅”为分类之最古者。天之星辰，地之山川，鸟兽草本，皆古圣贤人办其品汇，命之以名。《书》所称大禹主名山川，《礼》所称黄帝正名百物是也。物必先有名，而后有是字，故必知命名之原，乃知文字之原。舟车、弓矢、俎豆、钟鼓日用之具，皆先王制器以利民用，必先有器而后有是字，故又必知制器之原，乃知文字之原。君臣、上下、礼乐、兵刑、赏罚之法，皆先王立事以经纶天下，或先有事而后有字，或先有字而后有事，故又必知万事之本，而后知文字之原。此三者物最初，器次之，事又次之。三者既具，而后有文词《尔雅》一书，如释天、释地、释山、释水、释草木、释鸟兽虫鱼，物之属也；释器、释官、释乐，器之属也；释亲，事之属也；释诂、释训、释言，文词之属也。《尔雅》之分类，惟属事者最略，所世之分类，惟属事者最详。事之中又判为两端（焉：曰虚事，曰实事。虚事者，如经之三《礼》，马之八《书》，班之十《志》，及三《通》之区别门类是也。实事者，就史鉴中已往之事迹，分类纂记，如《事文类聚》《白孔六帖》《太平御览》及我朝

《渊鉴类函》《子史精华》等书是也。尔所呈之目录，亦是抄摘实事之象，而不如《子史精华》中目录之精当。余在京藏《子史精华》，温叔于二十八年带回，想尚在白玉堂，尔可取出核对，将子目略为减少。后世人事日多，史册日繁，摘类书者，事多而器物少，乃势所必然。然即可照此抄去，但期与《子史精华》规模相仿，即为善本。其未附古语鄙谚，虽未必无用，而不如径摘抄《说文》训诂，庶与《尔雅》首三篇相近也。余亦思仿《尔雅》之例抄纂类书，以记日知月无忘之效，特患年齿已衰，军务少暇，终不能有所成。或余少引其端，尔将来继成之可耳。

余身体尚好，惟疮久不愈。沅叔已拔营赴庐江、无为州，一切平安。胡官保仙逝，是东南大不幸事，可伤之至。紫兼豪营中无之。兹付笔二十支、印章一包查收。蓝格本下次再付。澄叔处尚未写信，将此送阅。

九月初四日

47 女儿出嫁不可过于奢侈

字谕纪泽儿：

昨见尔所作《说文》分韵解字凡例，喜尔今年甚有长进，固请莫君指示错处。莫君名友芝，字子偲，号侣亭，贵州辛卯举人，学问淹雅。丁未年在琉璃厂与余相见，心敬其人。七月来营，复得郁谈。其学于考据、词章二者皆有本原，义理亦践修不苟。兹将渠批订尔所作之凡例寄去，余亦批示数处。

又寄银百五十两，合前寄之百金，均为大女儿于归之用。以二百金办奁具，以五十金为程仪，家中切不可另筹银钱，过于奢侈。遭此乱世，虽大富大贵，亦靠不住，惟勤俭二字可以持久。又寄丸药二小瓶，与尔母服食。尔在家常能早起否？诸弟妹早起否？说话迟钝、行路厚重否？宜时时省记也。

涤生手示 九月二十四日

48 纪鸿科考应请邓师亲送

字谕纪泽儿：

接沅叔信，知二女喜期，陈家择于五月二十八日入赘，澄叔欲于乡间另备一屋。余意即在黄金堂成礼，或借曾家坳头行礼，三朝后仍接回黄金堂。想尔母子与诸叔已有定议矣。兹寄回银二百两，为二女儿奁资。外五十金，为酒席之资，俟下次寄回(亦于此次寄矣)。

浙江全省皆失。贼势浩大，迥异往时气象。鲍军在青阳，亦因贼众兵单，未能得手。徽州近又被围。余任大责重，忧闷之至。疮痍并未少减。每当痛痒极苦之时，常恩与尔母子相见，因贼氛环逼，不敢遽接家眷。又以罗氏女须嫁，纪鸿须出考，且待明春察看。如贼焰少衰，安庆无虑，则接尔母来此一行。尔夫妇与陈婿在家照料一切。若贼氛日甚，则仍接尔来此一行。明年正二月，再有准信。纪鸿县府各考，均须请邓师亲送。澄叔前言纪鸿至书院读书，则断不可。

前蒙恩赐遗念衣一、冠一、搬指一、表一，兹用黄箱送回(宣宗遗念衣一、玉珮一，亦可藏此箱内)，敬谨尊藏。此嘱。

涤生手示 十二月十四日

49 韩公五言诗之可骇处可笑处须细心领会

字谕纪泽儿：

十一日接十一月二十二日来禀，内有鸿儿诗四首。十二日又接初五日来禀，其时尔初自长沙归也。两次皆有澄叔之信，具悉一切。

韩公五言诗本难领会，尔且先于怪奇可骇处、诙谐可笑处细心领会。可骇处，如咏落叶，则曰“谓是夜气灭，望舒陨其圆”；咏作文，则曰“蛟龙弄角牙，造次欲手揽”。可笑处，如咏登科，则曰“侪辈妒且热，喘如竹筒吹”；咏苦寒，则曰“羲和送日出，恇怯频窥覘。”尔从此等处用心，可以长才力，亦可添风趣。鸿儿试帖，大方而有清气，易于造就，即日批改寄回。

季叔奉初六恩旨追赠按察使，照按察使军营病故例议恤，可称极优。兹将谕旨录归。此间定于十九日开吊，二十日发引，同行者为厚四、甲二、甲六、葛罨山、江龙三诸族戚，又有员弁亲兵等数十人送之。大约二月可到湘潭。葬期若定二月底三月初，必可不误。

下游军事渐稳。北岸萧军于初十日克复运漕，鲍军粮路虽不甚通，而贼实不悍，或可勉强支持。此信送澄叔一阅。外冯春皋对一付查收。

涤生手示 十二月十四日

50 儿之才思能古雅而不能雄骏

字谕纪泽：

正月十三四连接尔十二月十六、二十四两禀，又得澄叔十二月二十一缄、尔母十六日一缄，备悉一切。

尔诗一首阅过发回。尔诗笔远胜于文笔，以后宜常常为之。余久不作诗，而好读诗。每夜分辄取古人名篇高声朗诵，用以自娱。今年亦当闲作二三首，与尔曹相和答，仿苏氏父子之例。尔之才思，能古雅而不能雄骏，大约宜作五言，而不宜作七言。余所选十八家诗，凡十厚册，在家中，此次可交来了带至营中。尔要读古诗，汉魏六朝，取余所选曹、阮、陶、谢、鲍、谢六家，专心读之，必与尔性质相近。至于开拓心胸，扩充气魄，穷极变态，则非唐之李杜韩白、宋金之苏黄陆元八家不足以尽天下古今之奇观。尔之质性，虽与八家者不相近，而要不可不将此八人之集悉心研究一番，实《六经》外之巨制，文字中之尤物也。尔于小学粗有所得，深用为慰。欲读周汉古书，非明于小学无可问津。余于道光末年，始好高邮王氏父子之说，从事戎行未能卒业，冀尔竟其绪耳。

余身体尚可支持，惟公事太多，每易积压。癣痒迄未甚愈。家中索用银钱甚多，其最要紧者，余必付回。京报在家，不知系报何喜？若节制四省，则余已两次疏辞矣。此等空空体面，岂亦有喜报耶？

葛家信一封，匾字四个付回。澄叔处此次未写信，尔将此

呈阅。

涤生手示 正月十四日

51 惟怪眷太隆责任太重深以为危

字谕纪泽儿：

二月十三日接正月二十三日来禀并澄侯叔一信，知五宅平安。二女正月二十日喜事诸凡顺遂，至以为慰。

此间军事如恒。徽州解围后贼退不远，亦未再来犯。左中丞进攻遂安，以为攻严州保衢州之计。鲍春霆顿兵青阳，近未开仗。洪叔在三山夹收降卒三千人，编成四营。沅叔初七日至汉口，十五后当可抵皖。李希帅初九日至安庆，三月初赴六安州。多礼堂进攻庐州，贼坚守不出。上海屡次被贼扑犯，洋人助守，尚幸无恙。

余身体平安。今岁间能成寐，为近年所仅见。惟圣眷太隆，责任太重，深以为危，知交有识者亦皆代我危之，只好刻刻谨慎，存一临深履薄之想而已。

今年县考在何时？鸿儿赴考，须请寅师送往。寅师父子一切盘费，皆我家供应也。共需若干，尔付信来，由营寄来。

七十侄女于归，寄去银百两、褂料一件并裹裙料一件。尔所需笔墨等件付回，照单查收。

此信并呈澄叔一阅，不另具。

涤生手示 二月十四日

52 函慰儿为家常琐事之劳

字谕纪译儿：

三月十三日接尔二月二十四日安禀并澄叔信，具悉五宅平安。尔至葛家送亲后，又须至浏阳送陈婿夫妇，又须赶回黄宅送亲，又须接办罗氏女喜事。今年春夏，尔在家中，比余在营更忙。然古今文人学人。莫不有家常琐事之劳，其身莫不有世态冷暖之撻其心。尔现当家门鼎盛之时，炎凉之状不接于目，衣食之谋不萦于怀，虽奔走烦劳，犹远胜于寒士困苦之境也。尔母咳不止，其病当在肺家。兹寄去好参四钱五分、高丽参半斤，好者如试之有效，当托人到京再买也。余近久不吃丸药，每月两逢节气，服归脾汤三剂。途来渴睡甚多，不知是好是歹。

军事平安。鲍公于初七日在铜陵获一大胜仗。少荃坐火轮船于初八赴上海，其所部六千五百人当陆续载去。希庵所派救颍州之兵，颍郡于初五日解围。第三女于四月二十二日于归罗家，兹寄去银二百五十两查收。余不详，即呈澄叔一阅。此嘱。

涤生手示 三月十四日

53 事无分难易但行之有恒

字谕纪泽儿：

连接尔十四、二十二日在省城研发禀，知二女在陈家，门庭雍睦，衣食有资，不胜欣慰。

尔累月奔驰酬应，犹能不失常课，当可日进无已。人生惟有常是第一美德，余早年于作字一道，亦尝苦思力索，终于所成。近日朝朝摹写，久不间断，遂觉月异而岁不同。可见年无分老少，事无分难易，但行之有恒，自如种树蓄养，日见其大而不自觉耳。尔之在短处在言语欠钝讷，举止欠端重，看书能深入而作文不能峥嵘。若能从此三事上下一番苦工，进之以猛，持之经恒，不过一二年，自尔精进而不觉。言语迟钝，举止端重，则德进矣。作文有峥嵘快之气，则业进矣。尔前作诗，差有端绪，近亦常作否？李、杜、韩、苏四家之七古，惊心动魄，曾涉猎及之否？

此间军事，近日极得手。鲍军连克青阳、古埭、太平、泾县四城。沅叔连克巢县、和州、含山三城暨铜城闸、雍家镇、裕溪口、西梁山四隘。满叔连克繁昌、南陵二城壁鲁港一隘。现仍稳慎图之，不敢骄矜。

余近日疮癣大发，与去年九十月相等。公事业集。竟日忙冗，尚多积阁之件。所幸饮食如常，每夜安眠或二更三更之久，不似往昔彻夜不寐，家中可以放心。此信并呈澄叔一阅，不另致也。

涤生手示 四月初四日

54 惟读书可变化气质

字谕纪译、纪鸿儿：

今日专人送家信，甫经成行，又接王辉四等带来四月初十之信，尔与澄叔各一件，藉悉一切。

尔近来写字，总失之薄弱，骨力不坚劲，墨气不丰腴，与尔身体向来轻字之弊正是一路毛病。尔当用抽纸摹颜字之“郭家庙，柳字之“琅琊碑”“玄秘塔”，以药其病。日日留心，专从厚重二字上用工。否则字质太薄，即体质亦因之更轻矣。人之气质，由于天生，本难改变，惟读书则可变化气质。古之精相法“者”，并言读书可以变换骨相。欲求变之之法，总须先立坚卓之志。即以余生平言之，三十岁前最好吃烟，片刻不离，至道光壬寅十一月二十一日立志戒烟，至今不再吃。四十六岁以前作事无恒，近五年深以为戒，现在大小事均尚有恒。即此二端，可见无事不可变也。尔于厚重二字，须立志变改。古称金丹换骨，余谓立志即丹也。满叔四信偶忘送，故特由驿补发。此嘱。

涤生示 四月二十四日

55 贺鸿儿幸取县首

澄弟左右：

纪鸿儿幸取县首，诗文虽不甚稳惬，而其中多有精警之句、疏宕之气，寅皆先生时雨之化，可敬可感。当略备微仪，以申鄙意。府院考皆当极热之时，鸿儿体弱，不知能耐此酷暑否？今年乡试，鸿儿即可不必入场。盖工夫尚早，年纪太轻，本无望中之理，又恐鸿儿难熬此九日之辛葳也。

军事平善。多将军于十四夜攻克庐州府城，皖北数十州县为粤匪所占，今皆克复，一律肃清，只余二三城为捻匪、苗逆所占，想亦易于就绪。四眼狗未经擒戮，北窜河南，殊为后患。沅弟由西梁山渡江南岸，进攻金柱关，季弟尚在鲁港。鲍春霆进剿宁国府，徽、衢等处贼皆退，江西今年得保平安。

余身体平安，家中不必挂念。

四月二十四日

56 汉人词章未有不精于小学训诂者

字谕纪译儿：

接尔四月十九日一禀，得知五宅平安。尔“说文”将看毕，拟先看各经注疏，再从事于词章之学。

余观汉人词章，未有不精于小学训诂者，如相如、子云，孟坚于小学皆专著一书，“文选”于此三人之文著录最多。余于古文，志在效法此三人，并司马迁、韩愈五家。以此五家之文，精于小学训诂，不妄下一字也。尔于小学，既粗有所见，正好从词章上用功。“说文”看毕之后，可将“文选”细读一遍。一面细读，一面抄记，一面作文，以仿效之。凡奇僻之字，雅故之训，不手抄则不能记，不摹仿则不惯用。自宋以后能文章者不通小学，国朝诸儒通小学者又不能文章，余早岁窥此门径，因人事太繁，又久历戎行，不克卒业，至今用为疚憾。尔之天分，长于看书，短于作文。此道太短。则于古书之用意行气，必不能看得谛当。目下宜从短处下工夫，专肆力于“文选”，手抄及摹仿二者皆不可少。待文笔稍有长进，则以后诂经读史，事事易于着手矣。

此间军事平顺。沅、季两叔皆直逼金陵城下。兹将沅信二件寄家一阅。惟沅、季两军进兵太锐，后路芜湖等处空虚，颇为可虑。余现筹兵补此瑕隙，不知果无疏失否？余身体平安。惟公事日繁，应复之信积搁甚多，余件尚能料理，家中可以放心。此信送澄叔一阅。余思家乡茶叶甚切，迅速付来为要。

涤生手示 五月十四日

57 当作信教袁婿

字谕纪泽：

二十日接家信，系尔与澄叔五月初二研发，二十二日又接澄侯衡州一信，具悉五宅平安，三女嫁事已毕。

尔信极以袁婿为虑，余亦不料其遽尔学坏至此，余即日当作信教之。尔等在家却不宜过露痕迹，人所以稍顾体面者，冀人之敬重也。若人之傲惰鄙弃业已露出，则索性荡然无耻，摒弃不顾，甘与正人为仇，而以后不可救药矣。我家内外大小于袁婿处礼貌均不可疏忽，若久不悛改，将来或接至皖营，延师教之亦可。大世家子弟，钱不可多，衣不可多，事虽至小，所关颇大。

此间各路军事平安。多将军赴援陕西，沅、季在金陵孤军无助，不无可虑，湖州于初三日失守。鲍攻宁国，恐难遽克。安徽亢，顷间三日大雨，人心始安。谷即在长沙买，以后澄叔不必挂心。此次不另寄澄信，尔禀告之。此嘱。

五月二十四日

58 戒勿沾富贵气习

字谕纪鸿儿：

前闻尔县试幸列首选，为之欣慰。所寄各场文章，亦皆清润大方。昨接易芝生先生十三日信，知尔已到省。城市繁华之地，尔宜在寓中静坐，不可出外游戏征逐。兹余函商郭意城先生，在于东征局兑银四百两，交尔在省为进学之用。如郭不在省，尔将此信至易芝生先生处借银亦可。印卷之费，向例两学及学书共三分，尔每分宜送钱百千。邓寅师处谢礼百两，邓十世兄处送银十两，助渠买书之资。余银数十两，为尔零用及略添衣物之需。

凡世家子弟衣食起居，无一不与寒士相同，庶可以成大器；若沾染富贵气习，则难望有成。吾忝为将相，而所有衣服不值三百金，愿尔等常守此俭朴之风，亦惜福之道也。其照例应用之钱，不宜过吝（谢廩保二十千，赏号亦略丰）。谒圣后，拜客数家，即行归里。今年不必乡试，一则尔工夫尚早，二则恐体弱难耐劳也。此谕。

涤生手示

再，尔县考诗有错平仄者。头场（末句移），二场（三句禁，仄声用者禁止禁戒也，平声用者犹云受不住也，谚云禁不起），三场（四句节俭仁惠崇系倒写否？十句逸仄声），五场（九、十句失粘）。过院考时，务将平仄一一检点，如有记不真者，则

另换一字。抬头处亦宜细心。再谕。
五月二十七日

59 吟诗作字法陶潜王义之

字谕纪泽儿：

曾代四、王飞四先后来营，接尔二十日、二十六日两禀，具悉五宅平安。

和张邑侯诗，音节近古，可慰可慰。五言诗，若能学到陶潜之冲淡之味和谐之音，亦天下之至乐，人间之奇福也。尔既无志于科名禄位，但能多读古书，时时吟诗作字，以陶写性情，则一生受用不尽。第宜束身圭璧，法王义之、陶渊明之襟韵潇洒则可，法嵇、阮之放荡名教则不可耳。

希庵丁艰，余即在安庆送礼，写四兄弟之名，家中似可不另送礼。或鼎三侄另送礼物亦无不可，然只可送祭席挽幛之类，银钱则断不必送。尔与四叔父、六婶母商之。希庵到家之后，我家须有人往吊，或四叔，或尔去皆可，或目下先去亦可。近年以来，尔兄弟读书，所以不甚耽搁者，全赖四叔照料大事，朱金权照料小事。兹寄回鹿茸一架、袍褂料一会，寄谢四叔。丽参三两、银十二两，寄谢金权。又袍褂料一付，补谢寅皆先生。尔一一妥送。家中贺喜之客，请金权恭敬款接，不可简慢，至要至要。

贤五先生请余作传，稍迟寄回。此次未写复信，尔先告之。家中有殿板《职官表》一书，余欲一看，便中寄来。抄本国史文苑、儒林传尚在否？查出禀知。此嘱。

涤生手草 七月十四日

60 行气为文章第一义

字谕纪泽儿：

接尔七月十一日禀并澄叔信，具悉一切。鸿儿十三日自省起程，想早到家。

此间诸事平安。沅、季二叔在金陵亦好。惟疾疫颇多，前建清醮，后又陈龙灯狮子诸戏，仿古大雉之礼，不知少愈否？鲍公在宁国招降童容海一股，收用者三千人。余五万人悉行遣散，每人给钱一千。鲍公办妥此事，即由高淳、东坝会剿金陵。希帅由六安回省，初三已到。久病之后，加以优戚，气象黑瘦，咳嗽不止，殊为可虑。本日接奉谕旨，不准请假回籍，赏银八百，饬地方官照料。圣恩高厚，无以复加，而希帅思归极切。观其病象，亦非回籍静养断难痊愈。渠日内拟自行具折陈情也。

尔所作拟庄三首，能识名理，兼通训诂，慰甚慰甚。余近年颇识古人文章门径，而在军鲜暇，未尝偶作，一吐胸中之奇。尔若能解《汉书》之训诂，参以《庄子》之诙诡，则余愿偿矣。至行气为文章第一义，卿、云之跌宕，昌黎之倔强，尤为行气不易之法。尔宜先于韩公倔强处揣摩一番。京中带回之书，有《谢秋水集》（国初南丰人），可交来人带营一看。澄叔处未另作书，将此呈阅。

涤生手示 八月初四日

61 寄尔沅叔信以慰家人之心

字谕纪译儿：

接尔闰月禀，知澄叔尚在衡州未归，家中五宅平安，至以为慰。

此间连日恶风惊浪。伪忠王在金陵苦攻十六昼夜，经沅叔多方坚守，得以保全。伪侍王初三四亦至，现在金陵之贼数近二十万。业经守二十日，或可化险为夷。兹将沅叔初九、十与我二信寄归，外又有大夫第信，一慰家人之心。鲍春霆移扎距宁郡城二十里之高祖山，虽病弁太多，十分可危，然凯军在城主守，春霆在外主战，或足御之。惟宁国县城于初六日失守，恐贼猛扑徽州、旌德、祁门等城，又恐其由间道径窜江西，殊可深虑。余近日优灼，迥异寻常气象，与八年春间相类。盖安危之机，关系太大，不仅为一己之身名计也。但愿沅、霆两处幸保无恙，则他处尚可徐徐补救。此信送澄叔一阅，不详。

涤生手示 九月十四日

62 嘱再来营团聚

字谕纪泽儿：

旬日未接家信，不知五宅平安如常否？此间军事，金柱关、芜湖及水师各营，已有九分稳固可靠；金陵沅叔一军，已有七分可靠；宁国鲍、张各军，尚不过五分可靠。此次风波之险，迥异寻常。余忧惧太过，似有怔忡之象，每日无论有信与无信，寸心常若皇皇无主。前此专虑金陵沅、季大营或有疏失，近日金陵已稳，而忧惶战栗之象不为少减，自是老年心血亏损之症。欲尔再来营中省视，父子团聚一次。一则或可少解怔忡病症，二则尔之学问亦可稍进。或今冬起行，或明年正月起行，稟明尔母及澄叔行之。尔在此住数月归去，再令鸿儿来此一行。

寅皆先生明年定在大夫第教书，鸿儿随之受业。金二外甥有志向学，尔可带之来营。余详日记中，此谕。

涤生手示 十月初四日

63 钻研古义望读六家之书

字谕纪泽儿：

十月初十日接尔信与澄叔九月二十日县城发信，具悉五宅平安。希庵病亦渐好，至以为慰。

此间军事，金陵日就平稳，不久当可解围。沅叔另有二信，余不赘告。鲍军日内甚为危急。贼于湾沚渡过河西，梗塞霆营粮路。霆军当士卒大病之后，布置散漫，众心颇怨，深以为虑。鲍若不支，则张凯章困于宁国郡城之内，亦极可危；如天之福，宁国亦如金陵之转危为安，则大幸也。

尔从事小学、“说文”，行之不倦，极慰极慰。小学凡三大宗。言字形者，以“说文”为宗。古书惟大小徐二本，至本朝而段氏特开生面，而钱坫、王筠、桂馥之作亦可参观。言训诂者，以“尔雅”为宗。古书惟郭注邢疏，至本朝而邵二云之“尔雅正义”、王怀祖之“广雅疏证”、郝兰皋之“尔雅义疏”，皆称不朽之作。言音韵者，以“唐韵”为宗，古书惟“广韵”、“集韵”，至本朝而顾氏“音学五书”乃为不刊之典，而江（慎修）、戴（东原）、段（茂堂）、王（怀祖）、孔（巽轩）、江（晋三）诸作，亦可参观。尔欲于小学钻研古义，则三宗如顾、江、段、邵、郝、王六家之书，均不可不涉猎而探讨之。

余近日心绪极乱，心血极亏。其慌忙无措之象，有似咸丰八年春在家之时，而优灼过之。甚思尔兄弟来此一见。不知尔何日可来营省视？仰观天时，默察人事，此贼竟无能平之理。

但求全局不遽决裂，余能速死，而不为万世所痛骂，则幸矣。
此信送澄叔一阅，不另致。

涤生手示 十月十四日

64 父子一叙可少纾忧郁

字谕纪泽、纪鸿儿：

日内未接家信，想五宅平安。此间军事，金陵于初五日解围，营中一切平安，惟满叔有病未愈。目下危急之处有三：一系宁国鲍、张两军粮路已断，外无援兵；一系旌德朱品隆一军被贼围扑，粮米亦缺；一系九洑洲之贼窜过北岸，恐李世忠不能抵御。大约此三处者断难幸全。余两月以来，十分优灼，牙疼殊甚，心绪之恶，甚于八年春在家、十年春在祁门之状。尔明年新正来此，父子一叙，或可少纾忧郁。

尔近日走路身体略觉厚重否？说话略觉迟钝否？鸿儿近学作试帖诗否？袁氏婿近常在家否？尔若来此，或带袁婿与金二外甥同来亦好，澄叔处未另致。

涤生手示 十月二十四日

65 诗文欲雄奇须立意脱俗

字谕纪泽儿：

二十九接尔十月十八在长沙研发之信，十一月初一又接尔初九日一禀，并与左镜和唱酬诗及澄叔之信，具悉一切。

尔诗胎息近古，用字亦皆的当。惟四言诗最难有声响，有光芒，虽“文选”书孟以后诸作，亦复尔雅有余，精光不足。扬子云之“州箴”“百官箴”诸四言，刻意摹古，亦乏作作之光，渊渊之声。余生平于古人四言，最好韩公之作，如“祭柳子厚文”“祭张署文”“进学解”“送穷文”诸四言，固皆光如皎日，响如春霆。即其他凡墓志之铭词及集中如“淮西碑”“元和圣德”各四言诗，亦皆于奇崛之中进出声光。其要不外意义层出、笔仗雄拔而已。自韩公而外，则班孟坚“汉书·叙传”一篇，亦四言中之最俊雅者。尔将此数篇熟读成诵，则于四言之道自有悟境。镜和诗雅洁清润，实为吾乡罕见之才，但亦少奇矫之致。凡诗文欲求雄奇矫变；总须用意有超群离俗之想，乃能脱去恒蹊。尔前信读‘马洗督谏’，谓其沈郁似“史记”，极是极是。余往年亦笃好斯篇。尔若于斯篇及“芜城赋”“哀江南赋”“九辨”“祭张署文”等篇吟玩不已，则声情自茂，文思汨汨矣。

此间军事危迫异常。九洑洲之贼纷窜江北，巢县、和州、含山俱有失守之信。余日夜优灼，智尽能索，一息尚存，优劳不懈，它非所知耳！尔行路渐重厚否？纪鸿读书有恒否？至为

廩念。余详日记中。此次澄叔处无信，尔详禀告。
涤生手示 十一月初四日

66 习字宜从刚字厚字用功

字谕纪泽儿：

二十二三日连寄二信与澄叔，驿递长沙转寄，想俱接到。季叔赍志长逝，实堪伤恻。沅叔之意，定以季棣葬马公塘，与高轩公合冢。尔即可至北港迎接。一切筑坟等事，稟问澄叔，必恭必懿。俟季叔葬事毕后再来皖营可也。

尔现用抽纸摹帖否？字乏刚劲之气，是尔生具短处，以后宜从刚字厚字用功。特嘱。

涤生手示 十一月二十四日

67 谆劝诸妹以能耐劳忍气为要

字谕纪泽儿：

萧开二来，接尔正月初五日禀，得知家中平安。罗太亲翁仙逝，此间当寄奠仪五十金、祭幛一轴，下次付回。

罗婿性情乖戾，与袁婿同为可虑，然此无可如何之事。不知平日在三女儿之前亦或暴戾不近人情否？尔当谆嘱三妹柔顺恭谨，不可有片语违忤。三纲之道，君为臣纲，父为子纲，夫为妻纲，是地维所赖以立，天柱所赖以尊。故“传”曰：君，天也；父，天也；夫，天也。”仪礼”记曰：君至尊也，父至尊也，夫至尊也。君虽不仁，臣不可以不忠；父虽不慈，子不可以不孝；夫虽不贤，妻不可以不顺。吾家读书居官，世守礼义，尔当告戒大妹三妹忍耐顺受。吾于诸女妆奁甚薄，然使女果贫困，吾亦必周济而覆育之。目下陈家微窘，袁家、罗家并不忧贫。尔谆劝诸妹，以能耐劳忍气为要。吾服官多年，亦常在耐劳忍气四字上做工夫也。

此间近状平安。自鲍春霆正月初六日泾县一战后，各处未再开仗。春霆营士气复旺，米粮亦足，应可再振，伪忠王复派贼数万续渡江北，非希庵与江味根等来恐难得手。

余牙疼大愈，日内将至金陵一晤沅叔。此信送澄叔一阅，不另致。

涤生手示 正月二十四日

68 兹付去日记等谕旨奏章

字谕纪泽儿：

今日已由驿排递寄一信与澄叔矣，而逢四专人送信仍不可废。兹付去日记一本、谕旨奏章二本、沅叔信一件。季叔棹到长沙甚速，出吾意料之外。家中尚无所误否？

涤生手示 二月初四日

69 尔读书有恒尚须作札记

字谕纪泽儿：

二月二十一日在运漕行次，接尔正月二十二日、二月初三日两禀，并澄叔两信，具悉家中五宅平安。大姑母及季叔葬事，此时均当完毕。尔在团山嘴桥上跌而不伤，极幸极幸。闻尔母与澄叔之意欲修石桥，尔写禀来，由营付归可也。“礼”云：“道而不径，舟而不游。”古之言孝者，专以保身为重。乡间路窄桥孤，嗣后吾家子侄凡遇过桥，无论轿马，均须下而步行。吾本意欲尔来营见面，因远道风波之险，不复望尔前来，且待九月霜降水落，风涛性定，再行寄谕定夺。目下尔在家饱看群书，兼持门户。处乱世而得宽闲之岁月，千难万难，尔切莫错过此等好光阴也。

余以十六日自金陵开船而上，沿途闻看金柱关、东西梁山、裕溪口、运漕、无为州等处，军心均属稳固，布置亦尚妥当。惟兵力处处单薄，不知足以御贼否。余再至青阳一行，月杪即可还省。南岸近亦吃紧。广匪两股窜扑徽州，古、赖等股窜扰青阳。其志皆在直犯江西以营一饱，殊为可虑。

澄叔不愿受沅之赐封。余当寄信至京，停止此举，以成澄志。尔读书有恒，余欢慰之至。第所阅日博，亦须札记一二条，以自考证。脚步近稍稳重否？常常留心。此嘱。

涤生手示 二月十四日澄叔此次未另写信，将此禀告。

70 望以精确之训诂作古茂之文章

字谕纪泽儿：

接尔二月十三日稟并“闻人赋”一首，具悉家中各宅平安。尔于小学训诂颇识古人源流，而文章又窥见汉魏六朝之门径，欣慰无已。余尝怪国朝大儒如戴东原、钱辛楣、段懋堂、王怀祖诸老，其小学训诂实能超越近古，直逼汉唐，而文章不能追寻古人深处，达于本而阂于末，知其一而昧其二，颇所不解。私窃有志，欲以戴、钱、段、王之训诂，发为班、张、左、郭之文章（晋人左思、郭璞小学最深，文章亦逼两汉，潘、陆不及也）。久事戎行，斯愿莫遂，若尔曹能成我未竟之志，则至乐莫大乎是。即日当批改付归。尔既得此津筏，以后便当专心一志，以精确之训诂，作古茂之文章。由班、张、左、郭上而扬、马而“庄”“骚”而“六经”，靡不息息相通，下而潘、陆而任、沈而江、鲍、徐、庾，则词愈杂，气愈薄，而训诂之道衰矣。至韩昌黎出，乃由班、张、扬、马而上跻“六经”，其训诂亦甚精当。尔试观“南海神庙碑”、“送郑尚书序”诸篇，则知韩文实与汉赋相近。又观“祭张署文”、“平淮西碑”诸篇，则知韩文实与“诗经”相近。近世学韩文者，皆不何其与扬、马、班、张一鼻孔出气。尔能参透此中消息，则几矣。尔阅看书籍颇多，然成诵者太少，亦是一短。嗣后宜将“文选”最惬意者熟读，以能背诵为断，如“两都赋”“西征赋”“芜城赋”及“九辩”“解嘲”之类皆宜熟读。“选”后之

文，如“与杨遵彦书”（徐）“哀江南赋”（庾）亦宜熟读。又经世之文如马贵与“文献通考”序二十四首，天文如丹元之子之“步天歌”（“文献通考”载之，“五礼通考”载之），地理如顾祖禹之州域形势叙（见“方輿纪要”首数卷，低一格者不必读，高一格者可读，其排列某州某郡无文气亦不必读）。以上所选文七篇三种，尔与纪鸿儿皆当手抄熟读，互相背诵，将来父子相见，余亦课尔等背诵也。

尔拟以四月来皖，余亦甚望尔来，教尔以文。惟长江风波，颇不放心，又恐往返途中抛荒学业，尔稟请尔母及澄叔酌示。如四月起程，则只带袁婿及金二甥同来，加八九月起程，则奉母及弟妹妻女合家同来，到皖住数月，孰归孰留，再行商酌。目下皖北贼犯湖北，皖南贼犯江西，今年上半年必不安静，下半年或当稍胜。尔若于四月来谒，舟中宜十分稳慎，如八月来，则余派大船至湘潭迎接可也。余详日记中，尔送澄叔一阅，不另函矣。

涤生手示 三月初四日

71 寄回圈改之文

字谕纪泽儿：

顷接尔禀及澄叔信，知余二月初四在芜湖下研发二信同日到家，季叔与伯姑母葬事皆已办妥。尔自赭山归来，俗务应稍减少。

此间近日军事最急者，惟石涧埠毛竹丹、刘南云营盘被围。自初三至初十，昼夜环攻，水泄不通。次则黄文金大股由建德窜犯景德镇。余本檄鲍军救援景镇，因百润埠危急，又令鲍改攻援北岸。沅叔亦拨七营援救石涧埠。只要守住十日，两路援兵皆到，必可解围。又有捻匪由湖北下窜，安庆必须安排守城事宜。各路交警，应接不暇，幸身体平安，尚可支持。

“闻人赋”圈批发还，尔能抗心希古，大慰余怀。纪鸿颇好学否？尔说话走路，比往年较迟重否？付去高丽参一斤，备家中不时之需。又付银十两，尔托赭山为我买好茶叶若干斤。去年寄来之茶，不甚好也。此信送与澄叔一看，不另寄。奏章谕旨一本查收。

涤生手示 三月十四日

72 尔为秀才凡岁考科考均应前往

字谕纪鸿儿：

接尔禀件，知家中五宅平安，子侄读书有恒为慰。

尔问今年应否往过科考？尔既作秀才，凡岁考科考，均应前往入场，此朝廷之功令，士子之职业也。惟尔年纪太轻，余不放心，若邓师能晋省送考，则尔凡事有所禀承，甚好甚好。若邓师不赴省，则尔或与易芝先生同住，或随睪山、镜和、子祥诸先生同伴，总须得一老成者照应一切，乃为稳妥。尔近日常作试贴诗否？场中细检一番，无错平仄，无错抬头也。此次未写信与澄叔，尔为禀告。

涤生手示 五月十八日

73 余家诸女当教之孝顺翁姑敬事丈夫

字谕纪鸿儿：

接尔澄叔七月十八日信并尔寄泽儿一缄，知尔奉母于八月十九日起程来皖，并三女与罗婿一同前来。

现在金陵未复，皖省南北两岸群盗如毛，尔母及四女等姑嫂来此，并非久住之局。大女理应在袁家侍姑尽孝，本不应同来安庆，因榆生在此；故吾未尝写信阻大女之行。若三女与罗婿，则尤应在家事姑事母，尤可不必同来。余每见嫁女贪恋母家富贵而忘其翁姑者，其后必无好处。余家诸女当教之孝顺翁姑，敬事丈夫，慎无重母家而轻夫家，效浇俗小家之陋习也。三女夫妇若尚在县城省城一带，尽可令之仍回罗家奉母奉姑，不必来皖。若业已开行，势难中途折回，则可同来安庆一次。小住一月二月，余再派人送归。其陈婿与二女，计必在长沙相见，不可带之同来。俟此间军务大顺，余寄信去接可也。

此间一切平安。纪泽与袁婿、王甥初二俱赴金陵。此信及奏稿一本，尔禀寄澄叔，交去人送去。余未另信告澄叔也。

涤生手示 八月初四日

74 行船不可惊动官长

字谕纪鸿儿：

尔于十九日自家起行，想九月初可自长沙挂帆东行矣。船上有大帅字旗，余未在船，不可误挂。经过府县各城，可避者略为避开，不可惊动官长，烦人应酬也。余日内平安。沅叔及纪泽等在金陵亦平安。此谕。

涤生手示 八月十二日

75 侄等处最顺之境须立定志向

字寄纪瑞侄左右：

前接吾侄来信，字迹端秀，知近日大有长进。纪鸿奉母来此，询及一切，知侄身体业已长成，孝友谨慎，至以为慰。吾家累世以来，孝悌勤俭。辅臣公以上吾不及见，竟希公、星冈公皆未明即起，竟日无片刻暇逸。竟希公少时在陈氏宗祠读书，正月上学，辅臣公给钱一百，为零用之需。五月归时，仅用去一文，尚余九十九文还其父。其俭如此。星冈公当孙入翰林之后，犹亲自种菜收粪。吾父竹亭公之勤俭，则尔等所及见也。今家中境地虽渐宽裕，侄与诸昆弟切不可忘却先世之艰难，有福不可享尽，有势不可使尽。勤字工夫，第一贵早起、第二贵有恒；俭字工夫，第一莫着华丽衣服，第二莫多用仆婢雇工。凡将相无种，圣贤豪杰亦无种，只要人肯立志，都可以做得到的。侄等处最顺之境，当最富之年，明年又从最贤之师，但须立定志向，何事不可成？何人不可作？愿吾侄早勉之也。荫生尚算正途功名，可以考御史。待侄十八九岁，即与纪泽同进京应考。然侄此际专心读书，宜以八股试帖为要，不可专恃萌生为基，总以乡试会试能到榜前，益为门户之光。

纪官闻甚聪慧，侄亦以立志二字，兄弟互相劝勉，则日进无疆矣。顺问近好。

涤生手示 十二月十四日

76 儿一切以勤俭二字为主

字谕纪泽儿：

二十四日申正之稟，二十六申刻接到。余于二十五日巳刻抵金陵陆营，文案各船亦于二十六日申刻赶到。沅叔湿毒未愈，而精神甚好。伪忠王曾亲讯一次，拟即在此杀之。由安庆咨行各处之折，在皖时未办咨札稿，兹寄去一稿。若已先发，即与此稿不符，亦无碍也。刻折稿寄家可一二十份，或百份亦可。沅叔要二百份，宜先尽沅叔处，此外各处不宜多散。此次令王洪升坐轮船于二十七日回皖，以后送包封者仍坐舢板归去。包封每日止送一次，不可再多。尔一切以勤俭二字为主。至嘱。

涤生手示 六月二十六日酉刻

顷见安庆付来之咨行稿甚妥，此间稿不用矣。

77 凡涉外事请子密作一缄寄我

字谕纪泽儿：

连接二十九日、初一、初二日三次四禀，具悉一切。

小泉竟尔不起，深用悼惨，尔往吊祭，余再致联幛、赙仪也。各处咨文尽可不粘保单。兹将排单寄去十余份。如咨文尚未发，排可也，不排亦可也。各省发咨太迟，今亦不复谕矣。

安庆并无长龙解饷，此间已派长龙数号回皖。外间司道及各署有应商之事，余曾嘱其就子密一商。以后凡涉外事，请子密作一缄寄我可也。

裱地图，面背皆用白纸，但用黄绫镶边而已。和州图稍展，令宽四旁略有可折为妥。此嘱。

涤生手示 七月初四日

今日逢四送信之期，余寄四叔信一缄，日记一本，尔阅后专人送去。

78 力去傲惰二弊

字谕纪鸿：

自尔起行后，南风甚多，此五日内却是东北风，不知尔已至岳州否？余以二十五日至金陵，沅叔病已痊愈。二十八日戮洪秀全之尸，初六日将伪忠王正法。初八日接富将军咨，余蒙恩封侯，沅叔封伯。余研发之折，批旨尚未接到，不何同事诸公得何懋赏，然得五等者甚少。余借人之力以窃上赏，寸心不安之至。

尔在外以谦谨二字为主，世家子弟，门第过盛，万目所瞩。临行时，教以三戒之首，末二条及力去傲惰二弊，当已牢记之矣。场前不可与州县来往，不可送条子，进身之始，务知自重，酷热尤须保养身体。此嘱。

七月初九日

79 借人之力而窃上赏深抱不安

字谕纪泽儿：

初九接尔初六申刻之禀，知二十三日之折，批旨尚未到皖，颇不可解。岂已递至官相处耶？各处来信皆言须用贺表，余亦不可不办一份。尔请程伯敷为我撰一表，为沅叔撰一表。伯敷前后所作谢折太多，此次拟另送润笔费三十金，盖亦仅见之美事也。

得五等之封者似无多人。余借人之力而窃上赏，寸心深抱不安。从前三藩之役，封爵之人较多，救阙斋西间有“皇朝文献通考”一部，尔试查“封建考”中三藩之役共封几人？平准部封几人？平回部封几回？开单寄来。

伪幼主有逃到广德之说，不知确否？此谕。

涤生手示 七月初九日

80 亢旱酷热老人所畏应治之事多搁废

字谕纪泽儿：

初十、十一二等日戏酒三日，沅叔料理迥到，精力沛然，余则深以为苦。亢旱酷热。才人所畏，应治之事多搁废者。江西周石一案，奏稿久未核办，尤以为疚。自六月二十三日起，凡人证皆由余发及盘川，以示体恤。尔托子密告两司可也。

鄂刻地图，尔可即送一份与莫偲老。”轮船行江说”，三日内准付回。另纸缮写，粘贴大图空处。万簏轩、忠鹤皋及泰州、扬州各爱情日内均来此一见。李少泉亦拟来一晤，闻余将以七月回皖，遂不来矣。此谕。

涤生手示 七月十三日巳刻

81 李秀成供词限三日刻成

字谕纪泽儿：

十四日接尔十二申刻禀，具悉一切。初十至十二戏酒请客三日。十三日各统领请余兄弟，无戏。酷热如火，沅叔应酬无倦，余则惫矣。李秀成供如尚未刻成，可令书局工匠众手赶到，限三日刻成。分两次付五十本来此，以便分咨各处。余本日寄澄叔信，尔专人送湘。并寄恩旨二道，初七日疏一通。如已刻成，则多寄几份可也。

金陵十日内未得雨，亢热异常，盼泽极矣。余续告。

涤生手示 七月十四日

82 老年畏热何能任此艰巨行谋谢去矣

字谕纪泽儿：

十五日接尔十三日禀，具悉一切。

此间亢热如故，今日微有风耳，余二日内当作各折片，殊以为苦。袁榆生之叔以今日去世，有家信一封，尔为速交金陵。若不得大雨，病未已也，余积摺文牍甚多，而江西一案无繁难，老年畏热，何能任此艰巨！行谋谢去矣。榆婿信并付阅。余续告。

涤生手示 七月十五日

83 改谢恩折二件今日拜发

字谕纪泽儿：

十六早接尔十四申刻禀，十六申刻又接尔十五申刻禀，具悉一切。

余昨日改谢恩折二件，今日拜发，派王廷贵、曾恒德赍京。富将军过江，定于十八日来此会晤。余起程应俟二十矣。

“轮舟行江浅深说”，即照此缮写，贴于图之空处。但须方、刘一对，图与说不至两歧为要。筱岑信及贺表具待八月再商，鲍军初四大捷，江西事应松耳。余续告。

涤生手示 七月十六夜

84 余拟明日登舟回皖

字谕纪泽儿：

二日未接尔禀，盖北风阻滞之故。此间十七日大风大雨，萧然便有秋气。

富将军今日来拜，畅谈一切。余拟明日登舟，乘坐民船，不求其快，舟中须作周石狱事一折，非三四日不能了。沅叔处无一人独坐之位，无一刻清净之时，故未办也。其他积搁之事亦尚不少，皆须在船一为清理。到皖当在月杪矣。此嘱。

涤生手示 七月十八日

85 余愧受恩典

字谕纪泽儿：

十九日接尔十七日禀，知十一日之信至十七早始赶到安庆。哨官疲缓如此，不能不严惩也。余于十九日回拜富将军，即起程回皖，约行七十里乃至棉花堤。今日未刻发报后，长行顺风，行七十里泊宿，距采石不过十余里。

接奉谕旨，诸路将帅督抚均免造册报销，真中兴之特恩也。顷又接尔十八日禀，抄录封爵单一册。我朝酬庸之典，以此次最隆，愧悚战兢，何以报称！尔曹当勉之矣。

涤生手示七月二十日

86 择交是第一要事须择志趣远大者

字谕纪鸿：

自尔还湘启行后，久未接尔来禀，殊不放心。今年天气奇热，尔在途次平安否？

余在金陵与沅叔相聚二十五日，二十日登舟还皖，体中尚适。余与沅叔蒙恩晋封侯伯，门户太盛，深为祇惧。尔在省以谦敬二字为主，事事请问意臣、芝生两姻叔，断不可送条子，致腾物议。十六日出围，十七八拜客，十九日即可回家。九月初在家听榜信后，再起程来署可也。择交是第一要事，须择志趣远大者。此嘱。

七月二十四日旧县舟次

87. 人人须以勤俭二字自勉长保盛美

澄弟左右：

前接弟信，知已由李家送葬归来，具悉一切。

此间近状平安。沅弟之肝疾未平，湿毒更炽，克城封爵之后而郁抑之气并未稍减。余在金陵住二十余日，自六月二十五至七月初八、九，沅弟心神不怡，初十日到二十日，察沅心怀似稍开豁，病亦日减。近与余相隔二十余日，情复郁结，疾亦略增。余定于初一起程，再赴金陵，家眷亦于初间同去，并于二十一日具折，为沅弟告病开缺回籍调理。沅见归期已近，或可速痊。然起行总在十月，但能归家过年，不能赶十一月初三也。

纪鸿想已抵家，在署一年，已沾染贵公子气习否？吾家子侄，人人须以勤俭二字自勉，庶几长保盛美。观“汉书·霍光传”，而知大家所以速败之故。观金日磾、张安世二传，解示后辈可也。即问近好。

八月二十四日

88 奉母总以勤俭自惕接物出以谦慎

字谕纪泽、纪鸿儿：

余于初四日自邵伯开行后，初八日至清江浦。闻捻匪张、任、牛三股开至蒙、亳一带，英方伯雉河集营被围，易开俊在蒙城，亦两面皆贼，粮路难通。余商昌岐带水师由洪泽湖至临淮，而自留此待罗、刘率队至乃赴徐州。

尔等奉母在寓，总以勤俭二字自惕，而接物出以谦慎。凡世家之不勤不俭者，验之于内眷而毕露。余在家深以妇女之奢逸为虑，月二人立志撑持门户，亦宜自端内教始也。余身尚安，癖略甚耳。

涤生手示 闰五月初九日

89 后辈夜饭不荤亦养生之宜

字谕纪泽儿：

接尔十一、十五日两次安禀，具悉一切。尔母病已痊愈，罗外孙亦好，慰慰。

余到清江已十一日，因刘松山未到，皖南各军闹饷，故尔迟迟未发。雒河、蒙城等处日内亦无警信。罗茂堂等今日开行，由陆路赴临淮。余俟刘松山到后，拟于二十一日由水路赴临淮。身体平安。惟廛念湘勇闹饷，有弗戢自焚之惧，竟日忧灼。蒋之纯一军在湖北业已叛变，恐各处相煽，即湘乡亦难安居，思所以痛惩之之法，尚无善策。

杨见山之五十金，已函复小岑在于伊卿处致送。邵世兄及各处月送之款，已有一札，由伊卿长送矣。惟壬叔向按季送，偶未入单，刘伯山书局撤后，再代谋一安砚之所。该局何时可撤，尚无闻也。

寓中绝不酬应，计每月用钱若干？儿妇诸女，果每日纺绩有常课否？下次禀复，吾近夜饭不用荤菜，以肉汤炖蔬菜一二种，令其烂如泥，味美无比，必可以资培养(菜不必贵，适口则足养人)，试炖与尔母食之(星冈公好于日入时手摘鲜蔬，以供夜餐。吾当时侍食，实觉津津有味，今则加以肉汤，而味尚不逮于昔时)。后辈则夜饭不荤，专食蔬而不用肉汤，亦养生之宜，且崇俭之道也。颜黄门(之推)“颜氏家训”作于乱离之世，张文端(英)“聪训斋语”作于承平之世，所以教家者极精。

尔兄弟各觅一册，常常阅习，则日进矣。

涤生手示 清江浦 闰五月十九日

90 近日所看之书尽可自摭所见

字谕纪泽、纪鸿儿：

闰五月三十日由龙克胜等带到尔二十三日一禀，六月一日由驿递到尔十八日一禀，具悉一切。罗家外孙既系慢惊风，则极难医治。

余于二十五六日渡洪泽湖面二百四十里，二十七日入淮。二十八日在五河停泊一日，等候旱队。二十九日抵临淮。闻刘省三于二十四日抵徐州，二十八日由徐州赴援雒河。英西林于二十六日攻克高炉集。难河之军心益固，大约围可解矣。罗、张、朱等明日可以到此，刘松山初五六可到，余小住半月，当仍赴徐州也。毛寄云年伯至清江，急欲与余一晤。余因太远，止其来临淮。

尔写信太短。近日所看之书，及领略古人文字意趣，尽可自摭所见，随时质正。前所示有气则有势，有识则有度，有情则有韵，有趣则有味，古人绝好文字，大约于此四者之中必有一长。尔所阅古文，何篇于何者为近？可放论而详问焉。鸿儿亦官常常具禀，自述近日工夫。此示。

涤生手草 六月初一日

91 . 儿与幕僚诸友投缘否

字谕纪泽、纪鸿儿：

十五日接泽儿十一日禀，鸿儿无禀，何也？今日接小岑信，知邵世兄一病不起，实深伤悼。位西立身行己读书作文俱无差谬，不知何以家运衰替若此？岂天意真不可测耶？尔母之病，总带温补之剂，当无他虞。罗氏外孙及朱金权已痊愈否？

此间大水异常，各营皆已移渡南岸。惟余所居淮北两营系罗茂堂所带，二日内尚可不移。再长水八寸，则危矣。阴云郁热，雨势殊未已也。

邵世兄处，应送奠仪五十金，可由家中先为代出，有便差来营即付去。滕中军所带百人，可令每半月派一兵来，此不必定候家乡长夫送信。余托陈小浦买龙井茶，尔可先交银十六两，亦候下次兵来时付去。邵宅每月二十金，尔告伊卿照常致送否？须补一公牒否？尔每旬至李宫保处一谈否？幕中诸友凌晓岚等，相见契惬否？气势、识度、情韵、趣味四者，偶思邵子四象之说可以分配，兹录于别纸。尔试究之。

涤生手示 六月十九日

92 询沅叔病此时痊愈否

字谕纪泽儿：

二十三日接尔十七日禀，并汪刻“公羊”、陈刻“后汉书”、茶叶、腊肉等事具悉。二十四日接奉寄谕，知沅叔已简授山西巡抚。谕旨咨少泉宫保处，尔可借阅。沅叔闰五月初六至十四之病，不知此时痊愈否？余须寄信嘱其北上陛见之便，且至徐州兄弟相会。

陈刻“二十四史”颇为可爱，不知其错字多否？“几何原本”可先刷一百部。曾恒德无事，亦可来营。余又有取阅之书，可令滕中军派兵送来，录如别纸。

涤生手示 六月二十五日

“刘禹锡集”、“王昌龄集”、“张籍集”。右三种于全唐诗内抽出寄来（刘集有单行本否？试问子偲丈）。唐四家诗选（王、孟、韦、柳四本）。“易经纂言”、“诗经纂言”。右二种“吴文正公（澄）集”中有之，“通志堂经解”中亦有之。兹取吴集本。

93 古来文人均在气势上痛下工夫

字谕纪泽、纪鸿儿：

纪泽于陶诗之识度不能领会，试取“饮酒”二十首、“拟古”九首、“归田园居”五首、“咏贫士”七首等篇反复读之，若能窥其胸襟之广大，寄托之遥深，则知此公于圣贤豪杰皆已升堂入室。尔能寻其用意深处，下次试解说一二首寄来。

又问有一专长，是否须兼三者乃为合作。此则断断不能。韩无阴柔之美，欧无阳刚之美，况于他人而能兼之？凡言兼众长者，皆其一无所长者也。鸿儿言此表范围曲成，横竖相合，足见善于领会。至于纯熟文字，极力揣摩固属切实工夫，然少年文字，总贵气象峥嵘，东坡所谓蓬蓬勃勃如釜上气。古文如贾谊“治安策”、贾山“至言”、太史公“报任安书”、韩退之“原道”、柳子厚“封建论”、苏东坡“上神宗书”，时文如黄陶庵、吕晚村、袁筒斋、曹寅谷，墨卷如“墨选观止”、“乡墨精锐”中所选两排三迭之文，皆有最盛之气势。尔当兼在气势上用功，无徒在揣摩上用功。大约偶句多，单句少，段落多，分股少，莫拘场屋之格式。短或三五百字，长或八九百字千余字，皆无不可。虽系“四书”题，或用后世之史事，或论目今之时务，亦无不可。总须将气势展得开，笔仗使得强，乃不至于束缚拘滞，愈紧愈呆。

嗣后尔每月作五课揣摩之文，作一课气势之文。讲揣摩者送师阅改，讲气势者寄余阅改。四象表中，惟气势之属太阳者，

最难能而可贵。古来文人虽偏于彼三者，而无不在气势上痛下工夫。两儿均宜勉力。此嘱。

七月初三日

94 阅书即从有恒二字痛下工夫

字谕纪泽儿：

十二日接尔初八日禀，具悉一切。福秀之病，全在脾亏。余前信已详言之。今闻晓岭先生峻补脾胃，似亦不甚相宜。凡五脏极亏者，皆不受峻补也。尔少时亦极脾亏，后用老米炒黄，熬成极醜之稀饭，服之半年，乃有转机。尔母当尚能记忆。金陵可觅得老米否？试为福秀一服此方。开生到已数日，元征信接到，兹有复信，并邵二世兄信。尔阅后封口交去。渠需银两，尔陆续支付可也。义山集似曾批过，但所批无多。余于道光二十三四五年等，用胭脂圈批。唯余有不刻“史记”（六套在家否）、王刻韩文（在尔处）、程刻韩诗（最精本）、小本杜诗、康刻“古文辞类纂”（温叔带回，霞仙借去）、震川集（在季师处）、山谷集（在黄恕皆家）首尾完毕，余皆有始无终，故深以无恒为憾。近年在军中阅书，稍觉有恒，然已晚矣。故望尔等于少壮时，即从有恒二字痛下工夫。然须有情韵趣味，养得生机盎然，乃可历久不衰。若拘苦疲困，则不能真有恒也。

密禀悉，当细察耳。

涤生手示 七月十三日

正封缄间，又接泽儿初九日禀。小孩病尚未好。尔母泄泻，系脾虚火亏。昔年在京服重剂黄芪参术，此后不宜日日服药，服则补火补气。内银钱所房屋尽可退还佻山租钱。李宫保处宜旬一往，幕中陈、凌、蒋、陈等皆熟人也。

又示十四日申刻

95 余将为邵家书墓志

字谕纪泽儿：

接尔十二日禀，惊悉邵夫人于是日仙逝。家运之坏，乃至斯极，闻之酸鼻。现令其婿郑兴仪即日由临淮回金陵，与邵顺国共扶其母与兄之灵柩送到杭州安葬，并葬位西衣冠之柩，合为一冢。余以二百金交郑世兄带回，内以六十金为邵太太殓斂之资，以百四十金为船钱。余力作一墓志。郑世兄不能带家眷，只好接那小姐在余署宅小住二三月，待邵、郑回金陵后再移他处。尔先将各情告之李官保，余随后再当函托也。位西先生夫妇生卒年月及其他事实并子龄事实生卒，就邵二世兄所知者，尔问明写一节略寄来。此嘱。

涤生手示 七月十五日

郑世兄信寄去。

96 谈四妹成婚之地

字谕纪泽、纪鸿儿：

七月二十四日接泽儿十九日之禀、鸿儿十四日之禀并诗文一首。八月初二接泽儿二十八日一禁并郭云仙姻丈与尔之信，具悉一切。其二十六日专兵之禀尚未到也。

郭宅姻事，吾意决不肯由轮船海道行走。嘉礼尽可安和中度，何必冒大洋风涛之险？至成礼或在广东或在湘阴，须先将我家或全眷回湘，或泽儿夫妇送妹回湘，吾家主意走后，而后婚期之或迟或早可定，而后成礼之或湘或粤亦可走。

吾既决计不回江督之任，而全眷犹恋恋于金陵，不免武仲据防之嫌，是尔母及全眷早迟总宜回湘，全眷皆须还乡，四女何必先行？吾意九月间，尔兄弟送家属悉归湘乡。经过省城时，如吉期在半月之内，或尔母亲至湘阴一送亦可。如吉期尚遥，则纪泽夫妇带四妹在长沙小住，届期再行送至湘阴成婚。

至成礼之地，余意总欲在湘阴为正办。云仙姻丈去岁嫁女，既可在湘阴由意城主持，则今年娶妇，亦可在湘阴由意城主持。金陵至湘阴近三千里，粤东至湘阴近二千里。女家送三千，婿家迎二千，而成礼于累世桑梓之地，岂不尽美尽善？尔以此意详复筠仙姻丈一函，令崔成贵等由海道回粤。余亦以此意详致一函，由排单寄去，即以此信为定。喜期定用十二月初二日，全眷十月上旬自金陵启行，断不致误。如筠仙姻丈不愿在湘阴举行，仍执送粤之说，则我家全眷暂回湘乡，明年再商吉期可

也。

郭宅送来衣服、首饰及燕菜、马褂之类全数收领，途费四百则交来使带回，无庸收存。此间送女途费理应自备也。崔巡捕、杨仆各给银四十两，但用余名写书一封答之。其喜期之书帖，待湘阴成礼时再办。

鸿儿之文气势颇旺，下次再行详示。尔母须用伏苓，候至京之便购买。余以二十四日自临淮起行，十日无雨，明日可到临徐州矣。途次平安勿念。

涤生手示 八月初三日

再，尔复云仙姻叔之信，或将余此日之信抄一稿附去。或不抄，尔兄弟酌之。余决计不由海道行走，如必欲送粤，余不甚坚执也，但心以湘阴为宜耳。陈舫仙寄到在京见闻密件，兹抄寄尔阅。秘之。朱金权运来，似不便阻某来徐，只好听之。又示。

97 闺女在湘阴成婚日期不可更改

字谕纪泽儿：

八月十一日接尔七月二十五、八月初三日禀二件，知王长胜有中途被抢之事，不知初六又派人送信否？邵世兄开来行略等件收到，位西先生遗文亦阅一边。本月当作墓铭，出月当亲为书写，仍付金陵，交刻季公铭之张氏兄弟钩刻。大约刊刻拓印须三个月工夫，年底乃可成事。尔告邵子晋急急返杭料理葬事，以速为妙。此石不宜埋藏土中，将来或藏之邵氏家庙，或嵌之邵屋壁，或一二年后，于墓之址丈余另穿一小穴补行埋之亦无不可。此次不可待碑成再定葬期也。

科四进学在四十二名，其下尚有三名。余于八月六日送去贺礼银五十两，横批写格言一幅。尧阶之世兄贺仪二十两亦已付去。尔九叔祖母生日，不便由余处寄礼，由尔母寄去为妥。

潘文质即日坐舢板回金陵，此间有高丽参三斤带去，亦可用以配礼。余以初四抵徐，一切平安。九叔自闻抚晋之命已来过信三次，兹封寄尔等一阅。余不多及。

涤生手示 八月十三日

前初三日信全家回湘之说，尔母子议定否？若不愿速归，迅速具禀来商。郭家如应允在湘阴成婚，则当依其十二月初二日之期，不可更改。或全家同行，或仅尔夫妇送去，总须在重阳前定局也。又示。

袁勿需求挽联、书序，实无暇为之，尔婉辞之可也。

98 速寄《书经稗疏》等书以便刊刻

字谕纪泽儿：

兹因潘文质回金陵，寄去鹿胶二斤、高丽参三斤并冬菜、口蘑等物查收。又付《全唐诗》四本，即六月间取来者。恐其遗失，故寄回，归于全部之中。

王船山先生《书经稗疏》三本、《春秋家说序》一薄本，系托刘韞斋先生在京城文渊阁抄出者。尔可速寄欧阳晓岑丈处，以便续行刊刻。刘松山前借去鄂刻地图七本，兹已取回。尚有二十六本在金陵，可寄至大营，配成全部（此书金陵寓中尚有十余部，尔珍藏之，将来即以以前代之图用朱写于此图之上）。

《全唐文》太繁，而郭慕徐处有专集十余种，其中有《韩昌黎集》，吾欲借来一阅，取其无注，便于温诵也。又《文献通考》（吾曾点过田赋、钱币、户口、职役、征权、市余、土贡、国用、刑制、车地等门者），《晋书》、《新唐书》（要殿本，《晋书》兼取李芋仙送毛刻本）均取来，以便翻阅。《后汉书》亦可带来（殿本）。冬春皮衣均于此次舢板带来（缺衿者——裹圆者皆要，袍褂不要）。此囑。

涤生手示 八月十九日

99 奉谕旨晋驻许州

字谕纪泽、纪鸿儿：

二十日马得胜至，接尔十一日禀暨尔母一函、松生一函，均悉。家眷旋湘，应俟接筠仙丈复信乃可定局。余意姻期果定十二月初二，则泽儿夫妇送妹先行，至湘阴办喜事毕，即回湘乡，另觅房屋。觅妥后，写信至金陵，鸿儿奉母并全眷回籍。若婚期改至明年，则泽儿一人回湘觅屋，家妇及四女皆随母明年起程。

黄金堂之屋，尔母素不以为安，又有塘中溺人之事，自以另择一处为妥。余意不愿在长沙住，以风俗华靡，一家不能独俭。若另求僻静处所，亦殊难得，不如即在金陵多住一年半载亦无不可。泽儿回湘与两叔父商，在附近二三十里觅一合式之屋，或尚可得。星冈公昔年思在牛栏大丘起屋，即鲇鱼萧坝祠间壁也。不知果可造屋，以终先志否？又油铺里系元古公屋，梨头嘴系辅臣公屋，不知可买庄兑换或借住一二年否？富壤可移兑否？尔禀商两叔，必可设法办成。尔母既定于明年起程，则松生夫妇及邵小姐之位置，新年再议可也。

近奉谕旨，飭余晋驻许州。不去则违诏旨，又失民望；遽往则局势不顺，必无成功，焦灼之至。余不多及。

涤生手示

再，泽儿前寄到之“几何原本序”尽可用得，即由任叔处照刊，不必待批改也。末书某年月曾××，不写官衔，不另行

用宋字，不男写真行书。

八月二十一

100 . 既戒恼怒又知节啬 养生之道尽在我矣

字谕纪泽儿：

三十日成鸿纲到，接尔八月十六日禀。具悉尔十一后连日患病，十六尚神倦头眩，不知近已痊愈否？吾于凡事皆守“尽其在我，听其在天”二语，即养生之道亦然。体强者，如富人因戒奢而益富；体弱者，如贫人四节啬而自全。节啬非独食色之性也，即读书用心，亦宜俭约，不使太过。余大本匾中，言养生以少恼怒为本。又尝教尔胸中不宜太苦。须活泼泼地，养得一段生机。亦去恼怒之道也。既戒恼怒，又知节啬，养生之道，已尽其在我者矣。此外寿之长短，病之有无，一概听其在天，不必多生妄想去计较他。凡多服药饵，求祷神祇，皆妄想也。吾于医药、祷告等事，皆记星冈公之遗训，而稍加推阐，教示后辈。尔可常常与家中内外言之。尔今冬若回湘，不必来徐省问，徐去金陵太远也。朱金权于初十内外回金陵，欲伴尔回湘。

近日贼犯山东，余之调度，概咨少荃宫保处。澄、沅两叔信附去查阅，不须寄来矣。此嘱。

涤生手示

九月初一日

101 . 悬系纪泽儿之病

字谕纪泽、纪鸿儿：

自成鸿纲于八月杪来，接泽儿十六日一禀后，未接续信，不知尔病有翻复否？殊深悬系。

潘文质八月十九自徐回金陵，此时想已早到。炮船接衣服者不知起行北来否？日内已骤寒矣。山东之贼尚在郟城、巨野等处，潘军亦未开仗。临淮各营于初五日到此。张树珊军初六日自徐赴东。

余身体平安，公事较之在金陵时减去一半，稍得安闲。霞仙亲家于部议降调后，闻瑞、罗两星使别无贬词。舫山信中有一片，抄寄尔阅。余左辅上壮齿动摇，计将辞去矣。

涤生手示

九月初七日

102 . 欲翌年接家眷回湘乡

字谕纪泽儿：

重九日接尔二十六日一禀，并姜豆等物，具悉一切。专兵走信太慢，仍由清江一路坐船而来，无谓之至。凡督抚送要信之戈什哈专兵等，若发一护照牌，准用过经州县之驿马。则每日应走二百数十里，与折差相似。李宫保闰五月初六日专一人来，初八早便至宝应是也。即不准用驿马，每日亦应行百一二十里。由金陵至徐州不过限七八天到。笨重东西如木匣之类概不可带，惟小包袱可背负于马上者可带少许。以后再派其来，亦须与之订八日之限。否则，竟借李宫保官封为便。

尔病未痊愈，余日内深为系念。不服药极是。邓寅皆先生之不药不饭亦良法也。子佩处兹寄祭障一悬、贖仪二百金、回信一封，由二兵带归，尔交周少君手。南旋之说，待接得郭宅复信，如四女果于十二月二日成婚，则尔带三、四两妹先归，待新屋修妥后，明年早则三月，迟则七八月再接全眷还湘。澄叔信言富壤易商，则修葺亦易耳。尔岳丈业经降调，郭云丈亦有严旨申伤。顷奉寄谕，欲令李宫保赴河南之西路剿贼，大约一二月内局势又将变更。付去京报数本、王聂寄尔信件照收。余不多嘱。

涤生手示 九月初十夜

103 . 每月致送三十金于钱子密

字谕纪泽儿：

初十日一信交二兵带去，是日钱子密回金陵。渠以家口太众，薪资无余，求余札金陵粮台每月仍送渠家银若干，以佐菽水之需。余以幕友告假辞出者颇多，向无仍在粮台支银之例，未允给札，而许以私信，稍为饮助。既曰私助，则可不用公文。尔与伊卿商，或在家发或在台发(尔见子密即告之)，每月致送三十金(以五个月为率)，将来概由徐州寄还归款可也。子佩之二百，粤使之八十，地球之六十，均将由徐寄去。此外尚有应寄者否？沅叔寄尔及钱赵信、纪瑞呈余信寄去。方世兄地球图说，余与开生加签。兹付去，可转交也。此嘱。

涤生手示 九月十二日

104 . 令儿教匠人刻工之道

字谕纪泽儿：

二十四日接尔十一日禀，并耆、术、附子收到。此间有马谷山龙井茶十二瓶，陈小浦所买之茶应全留金陵。莫偲老带来之二瓶，如有便，拟带寄澄、沅叔也。精茗及各药物以后当交内银钱所收，辽参则交王芝圃收。贺胜臣现进京递折子，黄齐昂即日出处管带马队矣。

兹将邵位西墓铭付回。其兄之名空二字，尔可填写，交匠人钩摹刊刻。季公墓铭，匠人刻出太时俗；无深厚之意，余字尚不如是薄也。尔可教张氏二匠，用刀须略明行气之法。刀下无气，则顺修逆描，全失劲健之气矣。

《几何原本序》付去照收。余十九日复奏李公人洛、李丁迭迁一疏，尔可至李宫保署查阅。

此间带来之笔墨甚少，尔命曾文煜捡各种笔墨二十余支、十余笏，便中付来。此囑。

涤生手示 九月二十五日

105 . 惩忿窒欲为养生要诀

字谕纪泽、纪鸿儿：

二十六日接纪泽二十日排递之禀，纪鸿初六日舢板带来禀件、衣书，今日派夫往接矣。李老太太病势颇重，近日略愈否？深为系念。泽儿肝气痛病亦全好否？尔不应有肝郁之症。或由元气不足，诸病易生，身体本弱，用心太过。上次函示以节啬之道，用心宜约，尔曾体验否？张文端公英所著《聪训斋语》，皆教子之言。其中言养身、择友、观玩山水花竹，纯是一片太和生机，尔宜常常省览。鸿儿体亦单弱，亦宜常看此书。吾教尔兄弟不在多书，但以圣祖之《庭训格言》家中尚有数本，张公之《聪训斋语》（莫宅有之，申夫又刻于安庆）二种为教。句句皆吾肺腑所欲言。

以后在家则莳养花竹，出门则饱看山水，环金陵百里内外，可以遍游也。算学书切不可再看，读他书亦以半日为率。未刻以后，即宜歇息游观。古人以惩忿窒欲为养生要诀。惩忿即吾前信所谓少恼怒也，窒欲即吾立信所谓知节啬也。因好名好胜而用心太过，亦欲之类也。药虽有利，害亦随之，不可轻服。切囑。

此间派队于二十八日出剿，初二可以见仗。十九日折奉旨留中，暂无寄谕。尔可先告李宫保也。余不多及。

涤生手示 九月晦日

106 . 细览《聪训斋语》养生有益

字谕纪泽儿：

初三夜蒋大春到，接尔二十六日早一禀。具知李老太太病已痊愈，尔病亦好，慰慰。此间之贼于二十九日稍与徐郡派出之马队接仗，其夜即窜萧县，初一二日窜又渐远，现尚不知果窜何处。各兵既力求宽限，以后即限九日，以八百里之程，每日仅走九十里，并非强人所难，仍须立一课程：早到一日赏三百，早二日赏六百；迟一日打四十，二日打八十，革去。

张文端公《聪训斋语》兹付去二本，尔兄弟细心省览，不特于德业有益，实于养生有益。

余身体平安，惟精神日损，老景逐增，而责任甚重，殊为悚惧。余不多及。

涤生手示 十月初四日

107 儿暂不必来徐州

字谕纪泽、纪鸿儿：

十四日接尔初四日禀并贺寿各帖。具悉一切。邮封最慢，不如借李官保移封，或借雨亭、省三、眉生申封，皆可迅速。每次借十个，填写完毕，两月后再借可也。

贼自初三、四两日在丰县为潘军所败，仓皇四窜。行至宁陵，又为归德周盛波一军所败。据擒贼供称将窜湖北，不知确否。此间俟幼泉游击之师办成，除四镇大兵外，尚有两支大游兵，尽敷剿办。但求朱、唐、金军遣撤不生事变，则诸务渐有归宿矣。

泽儿身体复元，思来徐州省亲，余拟于今冬至曹、济、归、陈四府巡阅地势，现尚未定，尔暂不必来。如余不赴齐、豫，尔至十二月十五以后前来徐州，侍余度岁可也。彭笛仙在粮台，尔常相见否？其学问长处究竟如何？《聪训斋语》，余以为可却病延年。尔兄弟与松生、慕徐常常体验否？可一禀及。此嘱。

涤生手示 十月十七日

108 鸿儿应每旬书一禀帖

字谕纪泽、纪鸿儿：

十八日接泽儿十一夜裹并笔墨二包。余日内偶忘写信，故戎国治未得速归。二十二日又接尔十一日禀。余近日身体平安。捻匪自窜河南后，久无消息。十九日之折，顷接寄谕，业经照准。

明年寓中请师。顷桐城吴汝纶挚甫来此，渠以本年连捷，得内阁中书，告假出京。余劝令不必递尔进京当差，明年可至余幕中专心读书，多作古文。因拟请其父吴元甲号育泉者至金陵教书，为纪鸿及陈媵之师。育泉以廪生举孝廉方正，其子汝纶，系一手所教成者也。挚甫闻此言欣然乐从，归告其父，想必允许。惟澄、沅叔已答应将富埭让与我家居住，明岁将送全眷回湘，吴来金陵，恐非长久之局。挚甫由徐赴金陵，余拟派差官送之。尔可与之面商一切。沈戟门先生今冬可辞谢也。邵铭既难递刻，拟换写后年。琦、赛两名之下各添一公字，便中寄来。胜将薪水单阅过，可照此发。鸿儿每十日宜写一禀，字宜略大，墨宜浓厚。此嘱。

涤生手示 十月二十四日夜

109 . 盼儿腊月来营相见

字谕纪泽儿：

十一月初五宛庆荣至，接尔二十六日一禀，具悉一切。

彭官保尚在安庆，松生陪王益梧去，恐无所遇，抑别有何营耶？河南吴中丞疏称豫省情形万难，供职无状，请另简贤能。论旨又催移营，现四湖围一案关系极大，必须在徐料理，新年即将移驻河南之周家口。尔可于腊月来徐省亲，随同度岁。由金陵坐船至清江，清江雇王家营轿车至徐，余派弁至清江迎接。大约水陆不过十二三日程耳。季荃无病，何必托词不来？

《聪训斋语》俟觅得再寄。余前信欲乞慕徐斋头《全唐文》残本中韩文一种，尔曾与慕徐说及否？《明史》亦未带来。其时尔疾未痊，鸿儿看信或不细心。尔腊月来营，可将此二书带来。《明史》即将陈刻本带来亦可，王氏《广雅疏证》可附带也。

尔岳霞仙先生因杨厚庵代陕绅奏，仍抚奏中。金陵已见邸钞否？余不及。

涤生手示 十一月初六日申刻

110 . 水师章程十二月出奏

字谕纪泽儿：

二十日成巡捕来，接尔十月二十一日禀及尔母一函。二十四日接尔二十日禀，系善后局排单递来。二十八日接尔二十二日信，系蒋大春赍到，并《会典》正册、《明史》一册。国初提督尚文武兼用，厥后专用武职，不知始于何时。前明有挂印总兵，以总兵而挂平西将军、征南将军等印。国朝总兵亦间存挂印之名，而实无真印，不知何年并挂印之名而去之。尔试问刘伯山能记之否。水师章程定于十二月出奏。如其查不出，亦不要紧，凡办事不必定讲考据也。

薛世香业由徐州经过回豫。其祭障等，尔不必带来徐州，可交李宫保，托其寄长洲县蒯令转寄薛处。沈师放学时，可送八金以为节敬。渠明年既未定馆，尔可商之李宫保，求派入忠义局。容闳所送等件如在二十金以内，即可收留，多则璧还为是。尔来徐州，初十后即可起程。余于十二三派员至清江接护。北徐严寒，甚于金陵。尔最畏寒，宜有以筹备之。或谓洋绒作绵袄绵裤之里最暖，但绵不宜厚。尔至扬州买三四丈带来。余不悉。

涤生手示 十一月二十九日

111 尔母之病须熬党参膏终年调理

字谕纪泽儿：

十二月二日接尔十一月二十八日一禀，知尔母又患胃脘痛症。晓岑丈后果来否？轮船行走虽易，自瓜口至扬尚有五十里，亦不易行。尔母之病体略与尔祖母江太夫人相似，总不处姜、附、耆、术、丽参之属即可奏效。若熬党参膏终年调理，必有大益。尔初十以后起程来徐，系坐长龙否？寒衣似须增加，徐州之寒甚于金陵，今年雪极多且大也。余不悉告。

涤生手示 十二月初三日

112 . 凡事皆用困知勉行工夫

字谕纪鸿：

尔学柳帖《琅邪碑》，效其骨力，则失其结构，有其开放，则无其掬搏。古帖本不易学，然尔学之尚不过旬日，焉能众美华备，收效如此神速？余音学颜柳贴，临摹动辄数百纸，犹且一无所以。余四十以前在京所作之字，骨力间架皆无可观，余自愧而自恶之。四十八岁之后，习李北海《岳麓寺碑》，略有进境，然业历八年之久，临摹已过千纸。今尔有功未一月，遂欲遽跻神妙耶？余于凡事皆用困知勉行工夫，尔不可求名太骤，求效太捷也。困后每日习柳字百个，单日以生纸临之，双日以油纸摹之。临帖宜徐，摹帖宜疾，专学其开张处。数月之后，手愈拙，字愈丑，意兴愈低，所谓困也。因时切莫间断，熬过此关，便可少进。再进再困，再熬再奋，自有亨通精进之日。不特习字，凡事皆有极困极难之时，打得通的，便是好汉。余所责尔之功课，并无多事，每日习字一百，阅《通鉴》五页，诵熟书一千字（或经书或古文，古诗，或八股试帖，从前读书即为熟书，总以能背诵为止，总宜高声朗诵），三八日作一文一诗。此课极简，每日不过两个时辰，即可完毕，而看、读、写、作四者俱全。余则听尔自为主张可也。

尔母欲与全家住周家口，断不可行。周家口河道甚窄，与永丰河相似，而余住周家口亦非长局，决计全眷回湘。纪泽俟全行复元，二月初回金陵。余于初九日起程也。此嘱。

正月十八日

113 . 须认真讲求八股试帖

字谕纪鸿：

日内未接尔禀，想阖寓平安。余定以二月九日由徐州起程，至山东济衮、河南归陈等处，驻扎周家旧，以为老营。纪泽定于初一起程，花朝前后可抵金陵，三月初送全眷回湘。

尔出外二年有奇，诗文全无长进，明年乡试，不可不认真讲求八股试帖。吾乡难寻明师，长沙书院亦多游戏征逐之习，吾不放心。尔至安黄后，可与方存之、吴挚甫同伴，由六安州坐船至周家口，随我大营读书。李申夫于八股试贴最善讲说。据渠论及，不过半年，即可使听者欢欣鼓舞，机趣洋溢而不能自己。尔到营后，弃去一切外事，即看“鉴”、临帖、算学等事皆当辍舍，专在八股试帖上讲求。丁卯六月回籍乡试，得不得虽有命定，但求试卷不为人所讥笑，亦非一年苦功不可。

正月二十四日

114 . 苦求长进须勿忘而兼以勿助

字谕纪鸿：

凡作字总要写得秀，学颜、柳，学其秀而能雄；学赵、董，恐秀而失之弱耳。尔并非下等姿质，特从前无善讲善诱之师，近来又颇有好高好速之弊。苦求长进，须勿忘而兼以勿助，乃不致走入荆棘耳。

二月十八日兖州行次

115 养生之道皆应顺其自然

字谕纪泽、纪鸿儿：

二十日接纪泽在清江浦、金陵研发之信。二十二日李鼎荣来，又接一信。二十四日又接尔至金陵十九日所发之信。舟行甚速，病亦大愈为慰。老年来始知圣人教孟武伯问孝一切之真切。尔虽体弱多病，然后宜清静调养，不宜妄施攻治。庄生云：“闻在宥天下，不闻治天下也。”东坡取此二语，以为养生之法。尔熟于小学，试取在有二字之训诂体味一番，则知庄、苏皆有顺其自然之意。养生亦然，治天下亦然。若服药而日更数方，无故而终年峻补，疾轻而妄施攻伐强求发汗，则如商君治秦、荆公治宋，全失自然之妙。柳子厚所谓名为爱之其实害之，陆务观所谓天下本无事庸人自扰之，皆此义也。东坡游罗浮诗云：“小儿少年有奇志，中宵起坐存黄庭。”下一存字，正合庄子在宥二字之意。盖苏氏兄弟父子皆讲养生，窃取黄老微旨，故称其子为有奇志。以尔之聪明，岂不能窥透此旨？余教尔从眼食二端用功，看似粗浅，却得自然之妙。尔以后不轻服药，自然日就壮健矣。

余以十九日至济宁，即闻河南贼匪图窜出东，暂住此间，不逮赴豫。贼于二十二日已入山东曹县境，余调朱星槿三营来济获卫，腾出潘军赴曹攻剿。须俟贼出齐境，余乃移营西行也。

尔侍母西行，宜作还里之计，不宜留连鄂中。仕宦之家，往往贪恋外省，轻弃其乡，目前之快意甚少，将来之受累甚大。

吾家宜力矫此弊。余不悉。

涤生手示 二月二十五日

李眉生于二十四日到济宁相见矣。四叔、九叔寄余信二件
寄阅。他人寄纪泽信四件、王成九信一件查收。

116 . 观其言论风范再聘师

字谕纪泽：

全眷起行已定十七、二十六两日，当可从容料理。得沅叔二月十三日信，定于三月初间赴鄂履任、尔等到鄂，当可少为停留。贼在山东，余须留于济宁就近调度，不能遽至周家口。纪鸿儿过安庆时，不可轻赴周口，且随母至湖北，再行定计。尔过安庆，往拜吴挚甫之父穉泉翁，观其言论风范，果能大有益于鸿儿否？如其蔼然可亲，尔兄弟即定计请之，同船赴鄂，即在沅叔署中读书。若余抵周家口，距汉口八百四十里，纪鸿省亲尚不甚难。尔则奉母还乡，不必在鄂久住。

金陵署内木器之稍佳者不必带去，余拟寄银三百，请澄叔在湘乡、湘潭置些木器，送于富塿，但求结实，不求华贵，衙门木器等物，除送人少许外，余概交与房主姚姓、张姓，稍留去后之思。

三月初五日

117 . 要体会勤俭刚明忠恕谦浑八德

字谕纪泽、纪鸿：

顷据探报，张逆业已回甯，似有返豫之意。其任、赖一股锐意来东，已过汗梁，顷探亦有改甯西路之意。如果齐省一律肃清，余仍当赴周家口以践前言。

雪琴之坐船已送到否？三月十七果成行否？沿途州县有送迎者，除不受礼物酒席外，尔兄弟遇之，须有一种谦谨气象，勿恃其清介而生傲惰也。余近年默省之勤、俭、刚、明、忠、恕、谦、浑八德，曾为泽儿言之，宜转告与鸿儿，就中能体会一二字，便有日进之象。泽儿天质聪颖，但嫌过于玲珑剔透，宜从浑字上用些工夫。鸿儿则从勤字上用些工夫。用工不可拘苦，须探讨些趣味出来。

余身体平安，告尔母放心。此嘱。

济宁州 三月十四夜

118 . 儿断不可不切实用功

字谕纪泽、纪鸿儿

四月十日，接尔二人在裕溪口所发禀，二十二日接纪泽在安庆一信，二十四日接纪泽在九江所发信，知沿途清古为慰。此时想已安抵湖北。沅叔恩明谊美，必当全眷在湖北过夏。余意业已回籍，即以一直到家为妥。

富塿房屋如未修完，即在大夫府第借住。纪鸿即留鄂署读书。世家子弟既为秀才，断无不应科场之理。既入科场，恐诗文为同人及内外帘所笑，灿不可不切实用功。科六与黄宅生先生若来湖产，纪鸿宜从之讲求八股。湖北有胡东谷，是一时文好手。此外尚有能手否？尔可禀商沅叔，择一善讲者而师事之。

余尚不能遽赴周家口，申夫亦不能遽赴鄂中，道远而逼近贼氛。鸿儿不可冒昧来营，即在武昌沅叔左右苦心作诗文经策。

彭方四来，已留用矣。

涤生手示 四月二十五日济宁

119 儿侄宜专攻八股试贴

字谕纪泽、纪鸿儿：

前接泽儿四月二十一日信，兹又接尔二人二十七日禀，知尔九叔母率全眷抵鄂，极骨肉团聚之乐。宦途亲眷本难相逢，乱世尤难。留鄂过暑，自是至情。

鸿儿与瑞侄一同读书，请黄宅生先生看文，恰与吾前信之意相合。屡闻近日精于举业者，言及陕西路闰先生(德)“仁在堂稿”及所选仁在堂试贴、律赋、课艺无一不当行出色，宜古宜今。余未见此书，仅见其所著“怪花馆试贴”，久为佩仰。陕西近三十年科第中人，无不出闰生先生之门。湖北官员中想亦有之。纪鸿现瑞侄等须买“仁在堂全稿”“怪华馆试贴”悉心揣摩，如武汉无可购买，或折差由京买回亦可。

鸿儿信中拟专读唐人诗文。唐诗固宜专读，唐文除韩、柳、李、孙外，几无一不四六者，亦可不必多读。明年鸿、瑞两人宜专攻八股试贴。选仁在堂中佳者，读必手抄，熟必背诵。尔信中言须能背诵乃读他篇，苟能践言，实良法也。读“怪华馆试贴”，亦以背诵为要。对策不可太空。鸿、瑞二人可将“文献通考”序二十五篇读熟，限五十日读毕，终身受用不尽。既在鄂读书，不必来营省亲矣。余详初六日所送四月日记及九叔信中日记。

涤生手示 五月十一夜

120 . 学祖父夜夜洗脚不轻服药

字谕纪泽、纪鸿儿：

五月十八日接泽儿四月二十八日禀函，二十一日又接初七日信各一件并诗文，具悉一切。

尔母患头昏泄泻，自是阴亏脾虚之症，宜以扶阳补脾为主。近日高丽参易照浮火，辽参贵重不可多得，不如多服党参，亦有效验而无流弊。道光二十八年，尔母在京大病，脾虚发泻，即系重服参、术、耆而愈。以大锅熬党参膏为君，每次熬十斤汁。芾村身体最强，据云不服它药，惟每年以党参二十余斤熬膏常服，日益壮盛，并劝余常服此药。纪泽于看书等事似有过人之聪明，而于医药等事似又过人之愚蠢。即如汗者，心之精液，古人以与精血并重。养生家惟恐出汗，有伤元气。泽儿则伤风初至即求发汗，伤风将愈尚求大汗。屡汗元气焉得不伤？腠理焉得不疏？又如服药以达荣卫，有似送信以达军营。治标病者似送百里之信，隔日乃有回信；治本病者似送三五百里之信，经旬乃有回信。泽儿则日更数方，譬之辰刻送信百里，午刻未回又换一信，酉刻未回再换一令。号令数更，军营将安所适从？方剂屡改，脏腑安所听命？以后于己病母病宜切记此二事。即沅叔脚上湿毒，亦宜戒克代之剂，禁屡换之方。余近年学祖父星冈公夜夜洗脚、不轻服药，日见康强。尔与沅叔及诸昆弟能学之否？

宋生香先生文笔圆熟，尽可从游。鸿儿之文笔太平直，全

无挂意。明年下场，深恐为同辈所笑。自六月以后，尔与纪瑞将各项工课渐停，专攻八股试帖，兼学经策。每月寄文六篇来营，断不可少。但求诗文略有可观，不使人讥尔兄弟案首是送情的，则余心慰矣。常仪阉治齿方无处检寻。余下悉。

涤生手示 五月二十五日

朱劭卿领批须院试入学后乃可放心，深为悬念。

121 . 泽儿只可协修湘乡县志

字谕纪泽、纪鸿儿：

六月六日接纪泽五月十七、二十六日两禀，具悉一切。沅叔足疼痊愈，深可喜慰。惟外毒遽瘳，不知不生内疾否？

唐文李、孙二家，系指李翱、孙樵。八家始于唐荆川之文编，至茅鹿门而其名大定，至储欣同人而添孙、李二家。御选《唐宋文醇》，亦从储而增为十家。以全唐皆尚骈俪之文，故韩、柳、李、孙四人之不骈者为可贵耳。湘乡修县志，举尔纂修。尔学未成，就文甚迟钝，自不宜承认，然亦不可全辞。一则通系公事，吾家为物望所归，不得不竭力赞助；二则尔惮于作文，正可借此逼出几篇。天下事无所为而成都是极少，有所贪有所利而成者属其半，有所激有所逼而成者属其半。尔篆韵抄毕，宜从古上用功。余不能文，而微有文名，深以为耻，尔文更浅而亦获虚名，尤不可也。或请本县及外县之高手为撰修，而尔为协修。

吾友有山阳是鲁一同通父，所撰“邳州志”“清河县志”（下次专人寄回），即为近日志书之最善者。此外再取有名之志为式，议定体例，俟余核过，乃可动手。

纪鸿前文申夫改过，并自作一文三诗，兹寄去。申夫订于八月至鄂，教授一月，即行回川。渠善于讲说，而讲试帖尤为娓娓可听。鸿儿、瑞侄听渠细讲一月，纵八股不进，试帖必有长进。鸿儿文病在太元注意，以后以看题及想注意为先务。

余于十五日自济宁起程，顷始行二十余里。身体尚好，但觉疲乏耳。此谕。

涤生手示 六月十六日

122 . 家之兴衰人之穷通皆于勤惰卜文

字谕纪泽、纪鸿儿：

十六日寄信与沅叔，载十五日遇风舟危之状，想已到鄂。余自近三月以来，每月发家信六封：澄叔一封，专送沅叔三封，尔等二封。皆排递鄂署，均得达否？在临淮住六七日，拟由怀远入涡河，经蒙、亳以达周家口，中秋前必可赶到。届时沅叔若至德安，当设法至汝宁、正阳等处一会。

余近来衰态日增，眼光益蒙。然每日诸事有恒，未改常度。尔等身体皆弱，前所示养生五诀，已行之否？泽儿当添不轻服药一层，共六诀矣。既知保养，却宜勤劳。家之兴衰，人之穷通，皆于勤惰卜之。泽儿习动有恒，则诸弟七八人皆学样矣。鸿儿来禀太少，以后半月写禀一次。泽儿六月初三日禀亦嫌太短，以后可泛论时事，或论学业也。

此谕。

涤生手谕 七月二十日

123 作文以思路宏开为佳

字谕纪泽、纪鸿儿：

接纪泽六月二十三、七月初三日两禀，并纪鸿及瑞侄禀信、八股。两人气象俱光昌，有发达之概，惟思路未开，作文以思路宏开为必发之品。意义层出不穷，宏开之谓也。

余此次行役，始为酷热所困，中为风波所惊，旋为疾病所苦。此间赴周家口尚有三百余里，或可平安耳。尔拟于“明史”看毕，重看《通鉴》，即可便看王船山之“读通鉴论”，尔或间作史论或作咏史诗。惟有所作，则心自易入，史亦易熟，否则难记也。余近状详日记中。到周口后又专人送信。此示。

涤生手谕 八月初三日早间所食之盐姜已完，近日设法寄至周家口。吾家妇女须讲究作小菜，如腐乳、酱油、酱菜、好醋、倒笋之类，常常做些寄与我吃。”内则”言事父母舅姑，以此为重。若外间买者，则不寄可也。

124 . 若胸襟开扩弗药可愈

字谕纪泽、纪鸿儿：

旬日以来接泽儿七月十五、二十四、八月初三日等禀，鸿儿八月初二日禀并诗文各二首。余近况及八月上旬日记已于十二日寄沅叔矣。现在外病虽去，惟用心辄汗，近四日已不看书。眼蒙且疼，齿痛亦甚。盖元气亏而有虚火，且有肝郁，但平日调养得宜，不久或可复元。

鸿儿背痛微热等症，医者或即以滞病日之，切不可误信危言深论轻于服药。鹿胶太滞，高丽参系硫磺水浇种，均不可轻服。昔晓岑之子功甫高云亭深语不传之秘，终无效验。彭有十于壬子冬在余家，刘蓝舟诊之，危言告余曰：“右非峻补，难过明夏。”彭以无钱谢之。今蓝舟已逝十年，而有十至今无恙。凡医生危言深语，切弗轻信，尤不可轻于服药，调养工夫全在眠食二字上。观鸿儿此次禀信、诗文，似无病者。或聪明未开，才不能赴其所志，胸襟稍觉郁郁。或随母回湘，或采周口侍奉余侧，胸襟开扩，弗药可愈。叶亭甥侍此一年，胸襟日畅，文与字均长进也。

回家馈赠，除澄叔三家从厚外，余可不必优厚。尔外祖母宜送百金，此外辅臣公后裔各家、王氏四家、江氏三家、牧清一家、姊妹各家听尔母子商酌分送，极多者亦不过四十金耳，或请沅叔一酌。宋生香处亦宜酌送脩金。尔待康侯起程，当在秋抄，计申夫八月中旬必达鄂省。彼急于回蜀，论文不能久耳。

此谕。

涤生手示 八月十四日

125 . 欣慰鸿儿生男之喜

字谕纪泽、纪鸿儿：接尔等八月初十日禀，知鸿儿生男之喜。军事棘手，衰病集灼之际，闻此大为喜慰。排行用浚、哲、文、明四字。此儿乳名浚一，书名应用广字派否，俟得沉叔回信再取名也。

九月初十后，泽儿送全眷回湘，鸿儿要来周家口侍奉左右。明年夏间，泽儿来营侍奉，换鸿儿回家乡试。余病已痊愈，惟不能用心。偶一用心，即有齿痛出汗等患，而折片不肯假手于人。责望太重，万不能不用心也。

朱子“纲目”一书，有续修宋元及明合为一编者，白玉堂忠愍公有之，武汉买得出否？若有而字大明显者，可买一部带来。此谕。

涤生手示 八月二十二日

126 贵好而知其恶恶而知其美

字谕纪泽、纪鸿：

接泽儿八月十八日禀，具悉。择期九月二十日还湘，十月二十四日四女喜事，诸务想办妥矣。凡衣服首饰百物，只可照大女二女三女之例，不可再加。纪鸿于二十日送母之后，即可束装来营，自坐一轿，行李用小车，从人或车或马皆可，请沅叔派人送至罗山，余派人迎至罗山。

淮勇不足恃，余亦久闻此言，然物论悠悠，何足深信。所贵好而知其恶，恶而知其美。省三、琴轩均属有志之士，未可厚非。申夫好作识微之论，而实不能平心细察。余所见将才杰出者极少，但有志气，即可予以美名而奖成之。

余病虽已愈，而难以用心，拟于十二日续假一月，十月奏请开缺，但须沅弟无非常之举，吾乃可徐行吾志耳。否则别有波折，又须虚与委蛇也。此谕。

九月初九日

127 . 十三日具片续假一月将来请开各缺

字谕纪泽、纪鸿：

余病大致已好，惟不甚能用心。自度难任艰巨，已于十三日具片续假一月，将来请开各缺。纵不能离营调养，但求事权稍小，责任稍轻，即为至幸。欲求平捻功成从容引退，殆恐不能，即求免于谤议，亦不能也。捻匪窜过沙河、贾鲁河之北，不知已入鄂境否。若鸿儿尚未回湘，目下亦不必来周口，恐中途适与贼遇。

盐姜颇好，所作椿麸子腌菜亦好。家中外须讲求葑蔬，内须讲求晒小菜，此足验人家之兴衰，不可忽也。此谕。

九月十七日

128 . 读古文当先认其貌后观其神

字谕纪泽儿：

九月二十六日接尔初九日禀，二十九、初一日接尔十八、二十一日两禀，具悉一切。二十三如果开船，则此时应抵长沙矣。二十四之喜事，不知由湘阴舟次而往乎？抑自省城发喜轿乎？

尔读李义山诗，于情韵既有所得，则将来于六朝文人诗文，亦必易于契合。

凡大家名家之作，必有一种面貌、一种神态，与他人迥不相同。譬之书家羲、献、欧、虞、褚、李、颜、柳，一点一画，其面貌既截然不同，其神气亦全无似处。本朝张得天、何义门虽称书家，而未能尽变古人之貌。故必如刘石庵之貌异神异，乃可推为大家。诗文亦然。若非其貌其神回绝群伦，不足以当大家之目。渠既回绝群伦矣，而后人读之，不能辨识其貌，领取其神，是读者之见解未到，非作者之咎也。尔以后读古文古诗，惟当先认其貌，后观其神，久之自能分别蹊径。今人动指某人学某家，大抵多道听途说，扣盘扞烛之类，不足信也，君子贵于自知，不必随众口附和也。余病已大愈，尚难用心，日内当奏请开缺。近作古文二道，亦尚入理，今冬或可再作数首。

唐镜海先生没时，其世兄求作墓志，余已应允，久未动笔，并将节略失去。尔向唐家或贺世兄处(庶农先生子，镜海女婿也，)索取行状节略寄来。罗山文集年谱未带来营，亦向易芝

先生(渠求作碑甚切)索一部付来，以便作碑，一赏夙诺。

纪鸿初六日自黄安起程，日内应可到此。余不悉。

涤生手示 十月十一日

129 . 莫作代代做官之想须作代代做士民之想

字谕纪泽儿：

十二月初六日接尔十一月二十一日排递之信，十八日接二十七日专勇之信，具悉一切。

余自奉回两江本任之命，十七、初三日两次具疏坚辞，皆未谕允，训词朏挚，只得遵旨暂回徐州接受关防，令少泉得以迅赴前敌，以慰宸廑。兹将初九日寄谕、二十一日奏稿抄寄家中一阅。余自揣精力日衰，不能多阅文牒，而意中所欲看之书又不肯全行割弃，是以决计不为疆吏、不居要任。两三月内，必再专疏恳辞。

军务极为棘手。二十一日有一军情片，二十二日有与沅叔信，兹抄去一阅。

朱金权利令智昏，不耐久坐，余在徐州已深知之。今年既请彭芳六照管书籍、款接人客，应将朱金权辞绝之，并请澄叔专信辞谢，乃有凭据。

余近作书箱，大小如何廉舫八箱之式。前后用横板三块，如吾乡仓门板之式。四方上下皆有方木为柱为匡，顶底及两头用板装之。出门则以绳络之而可挑，在家则以架乘之而可累两箱三箱四箱不等。开前仓板则可作柜，并开后仓板则可边风。当作一小者送回，以为式样。吾县木作最好而贱，尔可照样作数十箱，每箱不过费钱数百文。读书乃寒士本业，切不可有官家风味。吾于书箱及文房器具，但求为寒士所能备者，不求珍

异也。家中新居富奥，一切须存此意，莫作代代做官之想，须作代代做士民之想。门外挂匾不可写侯府相府字样。天下多难，此等均未必可靠，但挂宫太保第一匾而已。

吾明年正月初赴徐，纪鸿随往。二月半后天暖令鸿儿坐炮船至扬州，搭轮船至汉口，三月必可到家。郭婿读书何如？详写告我。此信呈澄叔一阅。

涤生手示 十二月二十三日

130 . 余将不积银钱留与儿孙

字谕纪泽儿：

二月初九日王则智等到营，接澄叔及尔母腊月二十五日之信并甜酒、饼粬等物。十二日接尔正月二十一日之禀，十三日接澄叔正月十四日之信，具悉一切。

富塿修理旧屋，何以花钱至七千串之多？即新造一屋，亦不应费钱许多。余生平以大官之家买田起屋为可愧之事，不料我家竟尔行之。澄叔诸事皆能体我之心，独用财太奢与我意大不相合。凡居官不可有清名，若名清而实不清，尤为造物所怒。我家欠澄叔一千余金，将来余必寄还，而目下实不能速还。

尔于经营外事颇有才而精细，何不禀商尔母暨澄叔，将家中每年用度必不可少者逐条开出，计一岁除田谷所入外，尚少若干，寄营余核定后以便按年付回，袁微生入泮，此间拟以三百金贺之。以明余屏绝榆生，恶其人非疏其家也。余定于十六日自徐起行回金陵。近又有御史参我不肯接印，将来恐竟不能不作官。或如澄叔之言，一切遵旨而行亦好。兹将折稿付回。曾文煜到金陵住两三月，仍当令其回家。余将来不积银钱留与儿孙，惟书籍尚思买耳。

沅叔屡奉寄谕产加诘责。幼官之事中外多不谓然。湖北绅士公呈请留官相，幸谭抄呈入奏时朝廷未经宣布。沅叔近日心绪极不佳，而捻匪久蹂鄂境不出，尤可闷也。此信呈澄叔阅，不另致。

涤生手草 二月十三日

131 . 虑后辈读书天分平常又无良师善讲者教之

字谕纪泽儿：

二月十六日接正月初十禀，二十一日又接二十六日信。得知是日生女，大小平安，至以为慰。儿女早迟有定，能常生女即是可生男之征，尔夫妇不必郁郁也。李宫保于甲子年生子已四十二矣。惟元五殇亡，余却深为虞系。家中人口总不甚旺，而后辈读书天分平常，又无良师善讲者教之，亦以为虑。

科一作文数次，脉理全不明白，字句亦欠清顺。欲令其归应秋闱，则恐文理纒繆，为监临以下各官所笑；欲不令其下场，又恐阻其少年进取之志。拟带至金陵，于三月初八、四月初八学乡场之例，令其于九日内各作三场十四艺，果能完善无笑语，五月再遣归应秋试。科一生富贵，但闻谀颂之言，不闻督责鄙笑之语，故文理浅陋而不自知。又处境太顺，无困横激发之时，本难期其长进。惟其眉宇大有清气，志趣亦不庸鄙，将来或终有成就。余二十岁在衡阳从汪师读书，二十一岁在家中教澄、温二弟，其时之文与科一目下之文相似，亦系脉不清而调不圆。厥后癸巳、甲午间，余年二十三、四聪明始小开，至留馆以后年三十一、二岁聪明始大开。科一或禀父体，似余之聪明晚开亦未可知。拟访一良师朝夕与之讲“四书”、经书、八股，不知果能聘请否？若能聘得，则科一与叶亭及今为之未迟也。

余以十六日自徐州起行，二十二日至清江，二十三日过水闸，到金陵后仍往姚宅行合。此间绅民望余回任甚为真切，御

史阿凌阿至列之弹章，谓余不肯回任为骄妄，只好姑且做去，祸福听之而已。澄叔正月十三、二十八之信已到，暂未作复，此信送澄叔一阅。

涤生手示 二月二十五日宝应舟中

徐寿衡之长子次子皆殇，其妻(扶正者)并其文亦丧，附及。

132 . 焦虑鸿儿之病

字谕纪泽儿：

三月初十日罗登高来，接尔二月初六之信。十五日接二月十九日禀，具悉一切。余以初六日至金陵，初八日专差送信与澄叔，此外常有信与沅叔，不知尔常得知其详否？

鸿儿自今年以来常有小病，自二月二十六七以后常服清润之药。三月初八九作三文一诗，十一二日作经文五道，盖欲三四月试考二次，令五月回家乡试也。十四日作策三道，是夜即病。初意料其用心太过，体弱生疾。十五日服熟地等滋阴之剂。是日竟日未起。十六日改服参、耆、术、附等补阳之剂。不料壮热大作，舌有芒刺，竟先伏有外感疫症在内。十七日改服犀角、生地等清凉之剂，亦未大效。现在遍身发红，疹子热尚未退。鸿儿之意因数日吃药太繁，自请停药一日。余向来坚持不药之说，近亦不敢力主，择众论之善者而从之。鸿儿病不甚重，惟体气弱，又适在考试用心太过之后，殊为焦虑。

尔母信来，欲带眷口仍来金陵。余本欲留尔母子在富塿立家作业，不令再来官署。今因鸿儿抱病，又思接全家来署，免得两地挂心。或早接或迟接，或令鸿儿病痊速归，旬日内再有确信。

余身体平安，但以见客太多为苦。鄂省军事日坏。杏南殒难，春霆又两次奏请开缺，沅叔所处极艰，吾实无以照之。甲五侄处，余近日作信慰之。尔六叔母所须绶、书温印等物，亦

于下次专人寄回。此信呈澄叔一阅，不另书。
涤生手示 三月十八日

133 . 泽儿之情韵趣味皆由天分中得之

字谕纪泽儿：十八日寄去一信，言纪鸿病状。十九日请一医来诊。鸿儿乃天花痘喜也。余深用忧骇，以痘太密厚，年太长大，而所服十五六七八九等日之药，无一不误。阖署惶恐失措，幸托痘神佑助，此三日内转危为安。兹将日记由鄂转寄家中，稍为一慰。再过三日灌浆，续行寄信回湘也。

尔与澄叔二月二十八日之信顷已接到。尔七律十五首圆适深稳，步趋义山，而劲气倔强处颇似山谷。尔于情韵、趣味二者皆由天分中得之。凡诗文趣味约有二种：一曰诙诡之趣，一曰闲适之趣。诙诡之趣，惟庄、柳之文，苏、黄之诗。韩公诗文，皆极诙诡。此外实不多见。闲适之趣，文惟柳子厚游记近之，诗则韦、孟、白傅均极闲适。而余所好者，尤在陶之五古、杜之五律、陆之七绝，以为人生具此高淡襟怀，虽南面王不以易其乐也。尔胸怀颇雅淡，试将此三人之诗研究一番，但不可走入孤僻一路耳。余近日平安，告尔母及澄叔知之。

涤生手示 三月二十二日

134 . 望变柔为刚化刻为厚

字谕纪泽儿：

接尔三月十一日省城发禀，具悉一切。鸿儿出痘，余两次详信告知家中。此六日尤为平顺，兹钞六日日记寄沅叔转寄湘乡，俾全家放心。

余忧患之余，每闻危险之事，雨心如沸汤浇灼。鸿儿病痊后，又以鄂省贼久踞白口、天门，春霆病势甚重，焦虑之至。尔信中述左帅密劾次青，又与鸿儿信言闽中谣歌之事，恐均不确。余闻少泉言及闽绅公禀当左帅，幼丹实不与闻。特因官阶最大，列渠首衔。左帅奏请幼丹督办轮船厂务，幼已坚辞。见诸廷寄矣。余于左、沈二公之以怨报德，此中诚不能无芥蒂，然老年笃畏天命，力求克去褊心忮心。尔辈少年，尤不宜妄生气，于二公但不通闻问而已，此外着不得丝毫意见。切记切记。

尔禀气太清。清则易柔。惟志趣高坚，则可变柔为刚；清则易刻，惟襟怀闲远，则可化刻为厚。余字汝曰劼刚，恐其稍涉柔弱也。教汝读书须具大量，看陆诗以导闲适抱，恐其稍涉刻薄也。尔天性淡于荣利，再从此二事用功，则终身受不尽矣。

鸿儿全数复元。端午后当遣之回湘。此信呈澄叔一阅，不另具。

涤生手示 三月二十八日

135 . 鸿儿出痘大致极为平顺

字谕纪泽儿：

四月八日接尔三月十九省城发禀，具悉一切。

云仙以并未降调之巡抚无故降三级而补运使，自难免于牢骚。精采既好，尚不至大捐一和，即是好事。霞仙三月二十二日自汉口南归，计日内已到家矣。依永诗字俱佳，计八股亦必不恶，大慰大慰。

鸿儿痘症已满二十八日，大致极为平顺。身上痂已落尽，头面尚有小半未落，体气虚弱，尚未下床。论者多谓须静养百日乃可出门。余察看情形，或令满两个月回湘，或满三个月再回，总以全数复元为度。其乡试入场与否，亦须视身体之耐劳与否，六月杪再行定局。

正月寄回之书箱样子，现在金陵试做数十号，家中无庸再做。余详此旬日记中，已嘱沅叔转寄湘乡矣。此信并呈澄叔一阅。

涤生手示 四月十二日

136 . 惟久不下雨人心惶惶

字谕纪泽儿：

初八日接尔四月十六日禀，十二日潘文质到，接尔三月二十六日禀，具悉一切。

此间事颇平顺。惟久不下雨，人心惶惶，步祷已逾二旬，仅二十四日得而较大（在吾乡约称三泼水），其余初三、九及今十七日雨均甚小（不成泼）。稻秧不能栽插，尤恐运河无水，捻匪东窜。惟闻苏、松、徽、宁已得透雨，江西、浙江均有丰稔之象。湖北前虽苦旱，顷初九日亦得大雨。最早者惟淮、扬、江、镇、安、庐、凤七府，尚不甚宽耳。

叶亭已于十六日北上乡试。纪鸿定于五月底南归。先至家中小住，再赴长沙乡试。尔前寄呈之诗，候批出交鸿儿带去。丽参、鹿胶等物，亦候届时带归。顷沅叔寄到澄叔五月初二日信，知湘乡哥老会聚众滋事，元七腹泻体瘦，殊切廛系。余近心虽焦急，而身体无恙，鸿儿尤壮健可慰。余不一一。

涤生手示 五月十七日

137 鸿儿当进场应试

字谕纪泽、纪鸿儿：

高名扬来，接六月二十六日两禀，知鸿儿平安到家。顷又接鸿儿七月八日禀，知后来省寓居黄宅矣。余六月十六之信引温叔因病不能终场，陶少云因病不能终卷，嘱尔到家不必再出赴省。今即到省城，如身体尚可支持，自当进场应试。余不执成见也。”六经”及分类字锦此时无便可寄，亦非科场急需之书，将来觅便将局刻各书寄几分与诸侄可耳，泽儿中秋后前来金陵，即携纪渠同来，令其开豁眼界，长育德性。余不乐久居此官，尔不宜挈眷来也。袁漱六所送北宋本(不论是淳化本景佑本)”前汉书”，尔可带来。余昔年阅过之”通鉴”，亦须带来。段”说文””读书杂志””经义述闻”均带来。今年奇热，余度夏甚苦，然看书未甚间断。家中造楼藏书，本系应办之事，然木料非常之难，果能办否？此谕。

涤生手示 七月二十二夜

138 告之各处存银及用途

字谕纪泽儿：

吾以初六日午刻至扬州，初八日巳刻即将起行。运司派曾德麟解到缉私经费二千余金，吾令其解金陵后路粮台，而在藩署借印批回。吾之银存于雨亭署内者，系养廉(已有万八千余)，尔尽可取用。存于作梅台中者，系运司缉私经费及扈关月送公费(现闻近三万金)，为余此次进京之用(连来往途费恐近二万)，其下余若干(尔临北上时查明确数)姑存台中，将来如实窘迫，亦可取用。否则散去可也(凡散财最忌有名。)

余日内平安。尔母及儿妇痊愈否？署中一切须时时照摄，十一可搬家否？如实不能，则十九搬移，不可再迟。至嘱至嘱。

涤生手示 十一月初八日巳刻

139 . 曹植为诗家之宗师

字谕纪泽儿：

初八日寄去一缄，由澄叔之便带往，想早达矣。余以十三日至清江，料捡二日，十六日可以就道。桂未谷“说文”一部，途次不便携带。兹付至金陵，明年与后运之书同带可也。”曹集铨评“四本系山阳丁俭卿所撰，余许以发金陵书局代为刊刻。子建为诗家不祧之祖，亦不可无专集，尔可送缙云先生处发刻，并言明补校。莫子偲、张廉卿送至高邮，议于廉卿四十金，既而悔其太少，以渠往返途费不资也。本日寄信于下雨生，请其补送三十金于廉卿(张即日至苏州)，而别由此间寄银还之。此示。

涤生手示 十一月十四日清江

再，邵位西墓铭，余每以在徐州写者不称意为歉，常欲更书一通。今日砚冻笔又不住，勉强写毕，其不称意如故也。尔可即以此上石，由余家出钱刻成，以碑石归之邵家。文中间有改字，均照原本略好(十一月十四夜清江舟上。雪大，拟十六启行，恐须改期。)

140 . 家中妇女近年好享福而全不辛劳余深以为虑

字谕纪泽儿：

河间途次奏稿箱到，接尔禀函。顷又由良乡送到十二月初二日一禀，具悉尔母目疾日剧，不知尚可医否？尔母性急而好体面，如其失明，即难久于存活。余尝谓享名太盛，必多缺憾，我实近之；聪明太过，常鲜福泽，尔颇近之；顺境太久，必生波灾，尔母近之。余每以此三者为虑。计惟力行孝友，多吃辛苦，少享清福，庶几挽回万一。家中妇女近年好享福而全不辛劳，余深以为虑也。

洋人电气线之说断不宜信，目光非他物可比。所恶于智者，为其凿也。不如服药，专治本病，目光则听其自然。穆相一生患目疾，尝语余云：“治目宜补阳分，不可滋阴，尤不可服凉药。”如彼之说，则熟地大有碍于目矣。试详参之。

余十三日进京，十四五六日召见。应酬纷烦，尚能耐劳。拟正月灯节前后出京。兹将初一至十六日记寄南，尔可将十四五六日另出交子密转与各契好一看，但不可传播耳。此次日记，余另抄一份寄澄、沅叔矣，尔不转寄亦可。此嘱。

涤生手示 十二月十七日

141 . 商议安顿家眷之事

字谕纪泽儿：

出京后，二十二日在固安途次发信一封，到否？接尔正月十七日禀（初七信先到），尔母目能辨光暗，不能分别人物，则已失明矣。以去秋之病象，似无生理，今果得无碍于寿数，则虽失明犹为不幸之幸。惟须请良医诊脉，究竟无意外之虞否？亦须尔母自行默揣，不至有大变否。二者果然可靠，则于三月初八日北来，由水路至济宁州。若二者不甚可靠，则不如竟回湘乡。回家有两不便处：一则湘中与保定两处搅用，无骨肉团聚之乐；二则尔专管家务，恐荒学业，纪鸿亦不免南北奔驰。来直亦有两不便处：一则余又无久官斯土之志，虽全家抵此，仍非安土深固之象，恐暂聚而旋散；一则恐尔母病重。四层之中惟末一层最为紧要。尔与尔母熟商决之，我不能遥断也。余于初三日派占琦回江接眷。兹先排递此函，俾尔早为审度。其余正月日记及在京用数均交施占琦带回。余定初二已刻接印。官相有初九回京之说。渠神象已衰，不似六年春扬州相见时矣。此谕。

涤生手示 二月初一夜

再，余在清江所写邵位西墓志铭，系高丽纸，每页宽五寸许，长八寸许，包好夹于桂未谷“说文”之内，“说文”用皮纸分作三包包之，不知尔曾折过否？其皮箱交长龙带去，“说文”在箱内，想已收到。箱中尚有他物，今忘之矣。带至此间

来刻亦可，但恐更贵耳。昭忠祠湘军碑已钩毕上石否？可催香亭速为之。

142 . 余派人至济宁迎家眷

字谕纪泽儿：

初二日由驿递去一缄，兹派施占琦回江接着。尔一面将各书籍由金陵运沪，由沪运津，派施占琦押运。一面送眷由水路至济宁州，余派人至济宁迎接。余去冬与应敏斋面商，派恬吉轮船押海运之使，即解余书籍赴津。此次又于复调甫信中之言，尔再连函。此间或天平或恬吉，先至金陵接书赴沪，再行押米到津。余签押房桌椅等可酌带几件前来。至眷口由舟北上，可求昌岐、健飞派船送至济宁、张秋等处。铭军刘子务(盛藻)扎在张秋，车马甚多，送过二百余里再在临清上船，或竟由陆路至保定，均方便也。

周正林有银千二百两(湘平)兑存余内银钱所，尔可于养廉中取千二百金交作梅处归款。兹将余寄调甫信抄阅。江西所欠养廉已解到否？尔带数千金作北上途费，其余万数千金寄存江宁藩库，为余还山终老之资，已为苟完苟美，切不可不知足也。后路粮合所存缉私经费。除在京兑用二万外，计尚有万余金，即存台作为报销部费。除雨亭、作梅、少岩外，另不使一人知之，最不着迹。此外淮北公费尚有应解余者(十月间书办会拟札稿去提，余未判行)，将来亦作报销部费。余奏调七人中或有缺途费者，在其中提送若干。请雨、梅酌度(多者不得过二百)。此外不更动用丝毫矣。尔母目疾近日何如？如其病重脉险，则以回湘为是。昨信已详言之矣。在京所用银钱，抄一约

略大数寄江，尔可将帐并此信寄澄、沅两叔一阅。余详正月日记中。此谕。

涤生手示 二月初三日

143 . 君子之道以知命为第一要务

字谕纪泽儿：

初二日接印，初三日派施占琦至江南接着，寄去一缄并正月日记，想将到矣。初八日纪鸿接尔正月二十七日信，知三孙女乾秀殇亡，殊为感恼，知尔夫妇尤伤怀也。然吾观儿女多少成否，丝毫皆有前定，绝非人力所可强求。故君子之道、以知命为第一要务、不知命无以为君子也。尔之天分甚高，胸襟颇广，而于儿女一事不免沾滞之象。吾观乡里贫家儿女愈看得贱愈易长大，富户儿女愈看得娇愈难成器。尔夫妇视儿女过于娇贵。柳子厚“郭橐驼传”所谓旦视而暮抚、爪肤而摇本者，爱之而反以害之。彼谓养树通于养民，吾谓养树通于养儿。尔与家妇宜深晓此意。庄子每说委心任运听其自然之道，当令人读之首肯，思之发省。东坡有目疾不肯医治，引“庄子”曰：“闻有宥天下，不闻治天下也。”吾家自尔母以下皆好吃药，尔宜深明此理，而渐渐劝谏止之。

吾自初二接印，至今半月，公事较之江督任内多至三倍。无要紧者，皆刑名案件，与六部例稿相似，竟日无片刻书读之暇。做官如此，真味同嚼蜡矣。纪鸿近日习字颇有长进，温“左传”亦尚易熟，稍为慰意。此谕。

涤生手示 二月十八日保定

144 今精力日衰难了素志

字谕纪泽儿：

接尔十六日禀，知二月一日去函已到，施占琦费去之函尚未接到，尔母旧病痊愈，决计暂不归湘，北来从官。若三月中旬起行，则四月初可抵济宁，余日内派人沿途察看。济宁至临清三百余里(由济宁至张秋百余里水路，由张秋至临清二百余里旱路)，可请铭军代统刘子务照料。自临秋以下，笨重之物可由舟载至大泽(下水)，再由津雇舟送至保定(距省三十里登岸，余现开挖省河，则可径抵南门)，眷口及随身要物则由济宁登陆。此间地气高燥，上房宽敞，或可却病。惟车行比之舟行，则难易悬殊耳。

余近日所治之事，刑名居其大半。竟日披阅公牒，无复读书之暇，三月初一二日始稍翻“五礼通考”。昔年每思军事粗毕即当解组还山，略作古文，以了在京之素志。今进退不克自由，而精力日衰，自度此生断不能偿夙愿。日困簿书之中，萧然寡欢。思在此买一妾服侍起居，而闻京城及天津女子性情多半乖戾，尔可备银三百两交黄军门家，请渠为我买一妾。或在金陵，或在扬州、苏州购买皆可。事若速成，则眷口北上即可带来。若缓缓买成，则请昌岐派一武弃用可靠之老妈附轮舟送至天津。言明系六十老人买妾，余死即行遣嫁。观东坡朝云诗序，言家有数妾，四五年相继辞去，刚未死而遣妾，亦古来老人之常事。尔对昌岐言，但取性情和柔、心窍不甚蠢者，他无

所择也。

直督养廉银壹万五千两，盐院入款银近二万两，其名目尚不如两江缉私经费之正大。正刘印渠号为清正，亦曾取用。会计每年出款须用二万二三千金，除养廉外，只须用盐院所入七八千金，尚可剩出万余金，将来亦不必携去，则后路粮合所剩缉私一款断不必携来矣。尔可告之作梅、雨亭两君，余亦当函告耳。此囑。

涤生手示三月初三日

145 . 尔诸事宜节省

字谕纪泽儿：

前派周正林至济宁等处查明水陆道路，兹又派王庆云、孙福二人前往济宁迎接眷属。孙福在京多年，上房差事亦熟。王庆云则照料外事尚为得力。带去后挡车一辆、轿车一辆。尔母之轿必在金陵带来，此间派轿头带去轿夫一班，余夫则由州县加派。两班八人，轿夫有换班车者，系最廓之规模，余在途用之，尔母似可不用，州县亦未必肯供应也（余系用周正林之车）。凡州县不愿支应之事切弗勉强，概行自出钱文办理。妇女等以三套车，由后开门为最便。纪鸿前坐此车，因轮轿矮骡高不便，仍改由前开门。后于途中见江西文方伯由后开门甚平且便，乃知纪鸿之车两旁用木架玻璃，前用高骡，因过于讲究，反不便也。

吾家因带兵太久，规模太廓，余虽力求收敛，尚觉用费过多。尔诸事宜从简省处着想。王庆云亦可备询问耳。刘子务盛藻所统铭军在张秋驻扎，尔可托渠代为照料。余已托振轩写信与刘，令其派马二十匹护送。此外凡派护送者，宜辞谢之。二月日记附去收阅。余不多嘱。

涤生手示 三月二十四日

146 . 念百姓遭旱殆无生计

字谕纪泽儿：

二十九日阅尔清江所寄纪鸿信，知二十二夜船上火灾，尔所抄之“说文”“广韵”化为灰烬。凡书籍字画太多者太精者，则遭水火之劫。尔所抄书，亦太精之亚也。

吾于四月初一日出省，来永清、固安一带查阅永定河工。天气亢旱，麦稼既已全坏，而稷粱不能下种，加以每日大风，羊角盘绕，轿中极凉。吾体中不适，又念百姓遭此旱灾，殆无生理；又念尔送全眷在运河，水浅风阻，必难速行；又念施占琦书箱在海，尚无抵津信息，恐为大风所坏。公私种种索念，不胜焦灼。吾派施占琦、周正林南行时，皆第一日折回，次日乃果成行。吾乡旧俗，以此占事多阻滞之处。如途中处处阻滞，亦只可安心任运，徐待事机之转。

王庆云、孙福等二十五日由保定赴济宁，约计十日要到。途中派马队二十匹护送，已由振轩函托子务矣。此嘱。

涤生手示四月初三夜永清之惠家庄

147 余将赴天津一行

字谕纪泽、纪鸿儿：

十三早接泽儿十二申刻禀信。侯医专主补剂，与余意相合。若果能受鹿茸，此病乃有转机。今日恰有折以弁进京，余已寄百金托马松甫买茸。若马已出京，即托敖金甫购买。折差十八日可回保定，可试用也。久烧防其成癆，吾亦尝与尔母言及。候生在江西接儿，吾已忘之，其论病则均近理也。

吾今日午后始自固安来。北四下汛昨日虽已合龙，本日已刻，始克闭气，乃为放心。

余本不愿在外久留，然既至下口，恐不能不至天津一行。计回署当在二十后矣，余不多及。

涤生手示 十月十三日北四下汛五里许

乡村

148 富贵气太重亦非佳象

字谕纪泽、纪鸿儿：

余于二十日自天津起行百一十里，夜宿信安镇。二十一日行九十里，夜宿孔家码头。计二十二夜住客城县，二十三乃可抵省，昨日未得包封，今早黎明始接尔十九日之禀，想尚绕由固安、天津四百余里而来也。

竹舫方相安，甚慰，然以能进饭食乃是真效。丸药收到。如是珍养，富贵气太重。亦非佳象耳。余不多及。

涤生手示 十月二十一申刻孔家码头

149 . 凡事谦谨为宜

吏部咨文一角尔带去，问要投递否。如不须投，则径自具呈矣。见客俱代我寄声请安，凡事谦谨为嘱。

涤生手示

150 . 尔在京宜节饮食慎调养

字谕纪泽儿：

初六日王元回，接尔一禀。后无续信，余甚惦念。余右目病如故，后又因亢旱焦急之至。今早寅正起头忽大眩晕，立即躺倒，脚若朝天，床若旋绕，心不能主持，如是者四次，终不能起坐。请竹聆开方，服大滋阴之剂。顷至辰未始勉强起坐，进饭碗许。以后如有危症，当专差进京接尔归来；如从此平顺，则由信行寄信一二次告尔。尔不必速归也。

考荫有定期否？若在五月上半月，自宜等候，考毕再回，若为期太远，则先回一次亦可。听尔自酌。仙屏差旋，若过保定，余当送程仪百金。是星使过境，有交谊者酬赠之常例。今余未寄程仪，而渠乃先寄接礼，悚仄之至。今付去百金，尔可面交。余因病未另写亲笔信，并为我道歉忱也。尔在京宜节饮食慎调养，由沈廉处常常寄信。此嘱。

涤生手示四月十六日巳刻

151 . 亢旱焦灼甚忧于病耳

字谕纪泽儿：

十六日余患眩晕之症，比以函告尔。十七、十八日病状如常，登床及睡起则眩晕旋转，睡定及坐定之时则不甚眩晕，仍似好人。十八日药内有人参，病似增剧。十九日黎、谢处方有知母、黄柏，余嫌其太凉，拟空一日不服药。三数日内拟具折请假一月。尔在京考荫，须于写作二字用心读求，不可草率了事。署中若有危急之症，乃写信专足告尔；若无急足，必系平安之状，尔不须惦念也。

周荇翁索“船山遗书”，亦交沈廉带去，尔可转交。仙屏曾得“船山全书”否？若未也，下次亦即带去(此次已带，尔可面交。)余不多及。亢旱焦灼，其忧有甚于病耳。此嘱。

涤生手示 四月十九日

152 尔考荫事宜细心料理

字谕纪泽儿：

十九日沈廉带去一缄并船山书二部。二十日黎、谢及徐道奎诊余脉，皆言肝火太旺，宜服凉药，因服龙胆草之类。二十一日脉已平，眩晕亦愈。大约尚须凉药二三剂，乃能尽平肝火而去眩晕之症，乃能渐服补剂而冀复元。今日具折请假一月，特书数行令尔放心。尔考事宜细心料理，不可草率。此嘱。

涤生手示 四月二十二日

153 天津教案拟于二十三日奏结

字谕纪泽儿：

接尔十七八九等日禀，具悉一切。

极日内胃口甚好，腿软尚未痊愈，左目亦报昏蒙。尔母目疾，李家邀请可不必去，即至亲如李中堂亦可不必接见。目既残废，又系内眷，自以全不应酬为是。丁雨帅以空青为治目神药，用重价在苏州购得一具，专不取来，特以见治，厚意可感。视之黑石，大如鸡卵，摇之中作水响。据云一石可医七八盲人，只要瞳人尚存，眼未封闭者均可复明，但须有良医曾经阅历者乃能取出点注。应否另配他药，渠拟再到苏州请医来治。余试之后，尔母尚可试也。天津教案拟于二十三日奏结。第一批应斩凶犯现定十五人，流徒等犯二十余人，又限于九月二十日以前奏结第二批。其修堂、恤银等事均于第二次完案，不知洋人允准否。

《史记》《三国志》由江南带来者，尔可寄津。余将分饷京中诸老，内择宽长者一部送李中堂。西间之两汉书宽大者，本系余自留之物，亦可割以送李中堂。初印精纸者，余父子三人共有两部，亦云多矣。

男妇等有喜，不能坐辆车，自以雇骡轿为是。虽与肩舆之价不甚悬远，然肩舆因人者究嫌奢靡，尔可速觅骡轿。闻榜信数日后家眷可起行，粗物分两批：一由运河，一寄荃相处托由海运亦无不可，然终以运河为正。盐吏占费将余千金，余不欲

以之肥私，可以四百捐育婴堂，余分给诸人(五巡捕各五十，内戈什各三十，外戈什及上房仆婢酌分)。李佛生难带之南行，当力荐之荃相耳。此嘱。

涤生手示 八月二十一日

154 . 琐事如麻父子均须用心

字谕纪泽儿：

初一日接尔二十九日禀并家信等件。满妹之千金既由蒋宅兑回九叔处，将来即须在湘成婚，不能招赘矣。大、二、三女各家皆苦，今冬拟每家寄三百金。四女虽较裕，而遭依永之变，亦拟以此数寄之。趁余家景况好时济之，以后恐难继矣。

谢旭亭初一到此为余诊脉，与五月略同。余自膝以下浮肿，膝以下酸软无力。人多谓由受湿，谢以为肾虚也。

津案拟于十三四日将第二批奏结，请觐之疏亦于尔时拜发，恐十八九日即须进京。全眷过津时将错过，不得一见。若奉旨无庸进京，则与眷属同南下矣。余进京应用衣服，如棉袍褂、小毛中毛袍褂之类，可命王庆云清出，与王瑞征同于初六日起行来津，或将余之衣箱及随身书籍全交王庆云先行带来。余进京断不久住，总在十月十一以前出京。署中料理一切，如欠得力之人，余当令贺俊林回省一行。

余目光日蒙，丁中丞力劝全不写字看书，并不阅公文。言之总恳切深至，日内即当从之。旭亭言尔病由于思虑伤脾，亦当为戒也。但琐事如麻，父子均不能不用心。二十八日密片抄寄尔看，或送作梅先生一阅，余亦行知省局矣。此嘱。

涤生手示 九月初二日

155 . 圣上赏六十生辰之物

字谕纪泽、纪鸿儿：

接纪泽十一二日禀，知十二日申刻全眷皆已登舟，想十三日已开行矣。闻省雇之船甚小，兹在津雇略大二号，派戈什哈徐大治带往迎接，若原来之船尚可坐，即不必换，以免耽搁。若原船太小，则换坐此船可也。

余以十三日将津案第二批奏结，十六日拟具折请觐，十八日可奉批旨。若无庸进京，则余与全眷一同南行。否则，余北觐，尔等先南可耳。

赏六十生辰之物已于十二日颁到：匾一方、福寿字各一张、佛一尊、如意一柄、吉绸十卷、线绉十卷。十六当具折谢恩。此囑。

涤生手示 九月十四日

纪鸿虽未中，然观其场中之作胜于窗下，将来当为科名中人，不必焦急。

156 . 每日须有静生养神发愤用功之时

字谕纪泽、纪鸿儿：

余十三夜宿燕子矶船厂侧，今日东北逆风，仅行二十余里，至划子口住宿。右脚着有眼之洋袜，左脚着洋绒袜，不知果能消肿否？竹龄之方现尚未服，廉昉言到扬代觅佳茸，或当服之。折差汪正清、梁廷超先后进京，可买百余金之茸一试。或在京买(似是打磨厂天会号，再问)，或在祁州买，尔自酌之。

织造处送程仪百金，外加五十金水礼(书在外)预备。江表弟归，于六十金之外或加二十千更妥。以渠用费不资，恐未足偿之也。

尔辈身体皆弱，每日须有静坐养神之时，有发愤用功之时。一张一弛，环循以消息之，则学可进而体亦强矣。余俟续及。

涤生手示 八月十四日夜

157 . 吾初抵扬州

字谕纪泽、纪鸿儿：

纪泽十五六七八等日禀，纪鸿十八日禀均已接到。

余十五六日均停阻划子口。十七午刻始开行，夜宿泗源沟之小河。十八申刻抵扬州。十九日因泥泞未阅操，而应酬极烦，疲乏之至。

接沅叔信，知牧云于八月一日仙逝。凌云有寄星泉信，余拟暂不寄去，而先寄一信于李相，报牧云之病，请其催星泉速归。兹将原信付尔兄弟一览。

李道三回鄂，可送渠洋三十元。竹林订定至扬州止，不再前进。蒋鉴海事可令叶亭拟一稿函致石泉，并拟复芑泉信稿一同付来。彭霖穷乏，却无事可找。庐入洋务局，唐子明帮保甲局，事属可行。余脚肿已消十之龙，亦未服药。余俟续告。

涤生手示 八月二十早

沅叔信一厚封，欧宅讷信在内。

158 . 凌云不能强留则送百金

字谕纪泽儿：

戈什哈来，言凌云必欲于此次搭丁中丞轮舟至湖口。尔舅氏来此，曾未少加款洽，余思陪同一餐亦尚未办。尔可强留少住数日，与尚斋一同返鄂，并为我致意留之。如万不肯留，则送菲仪百金，外船费二十两，袍褂料一付，星泉船费三十两，必于今日上灯以前赶至下关乃可。如其能留，则更妙矣。

荐差事之说，只能写信与筱泉(即日排单发)。去年叶亭之差，系少泉所荐也。

涤生手示 九月初旬

159 . 年老尤憾平生学术无成

字谕纪泽儿：

十一日接尔初七日禀，十二日接到初八、九日两禀。星泉业到金陵接得诂函，想已飞轮西上矣。

余在徐州阅兵，十一日起行南旋。感冒痊愈，脚肿亦未再发。惟目光似更昏蒙，或以船轿中看书稍多之故。余以生平学术百无一成，故老年忧思补救一二。尔兄弟总宜在五十以前将应看之书看毕，免致老大伤悔也。

余十五日可达清江，十九、二十应可南渡阅看镇、常。兹有寄澄、沅两叔信，并刘毅斋信，尔速寄去。七月底所寄之信，湘中久未接到，何也？酱蟹剔粪后似须着生姜花椒乃行捆缚，偶忘，试一询之。此谕。

涤生手示 九月十二夜旧邳州

160 . 十五日抵清江身体痊愈

字谕纪泽儿：

十四日接尔初十、十一两禀，十五日又接十二日禀，具悉一切。

余十一日自徐州起行，按程行走，十五已抵清江。惟末一日下雨，余皆平畅，身体痊愈。并未服药，惟此七日未吃夜饭，亦食馒头烧饼之类，酒席则未尝耳。

王逸梧以主考过此，余应送百金。叶亭赴鄂，尽可即行。筠仙有信一件，或请叶拟稿复之。途次接霞仙信。偶寻未见，不知包封夹回署中否？余本欲托尚斋买川笋（长约二寸余，圆围约比茶碗略小），今叶甥赴鄂，即交银五六两，托其带佳者若干斤。此外如有函稿，令其开单寄叔耘办可也。定枚得扬州局差，不无小补。牧云兄处拟寄五十金及挽联、挽障，十一月专差送亲族年礼再行汇寄。下心斋事处置尚可。余不一一。

涤生手示

九月十五夜清江舟次

再，余带来“通鉴”十一本，系一百四十八卷至一百八十三卷止。其中缺少一百七十八九、百八十之三卷，系少一本，不知在家中否？其书系而生中水所赠，另有一直箱存于签押房之西一间。尔试往一检查。如寻出，即将此本寄来。并添寄百八十四卷以下八本（合现带者为共二十本）；若寻不出，则将托苏州书局补刷矣。又及。

161 . 望儿致力于好学养生二事

字谕纪泽、纪鸿儿：

迭接纪鸿二十二日，纪泽二十三四五日研发各禀，具悉一切。

余于二十二日未刻抵常州。二十三日看操。二十四五边无锡、常熟，二十六日在福山看操。二十七日季君梅、杨滨石及府县请游虞山二专。二十八申刻抵苏州，将上岸小住三日。初二日计可离苏赴松。

二十五六七三日皆连夜行船，体尚平安。惟眼蒙较甚于在署时，到上海当一找张石谷，然内障总无治法也。吾望尔兄弟殚心竭力，以好学为第一义，而养生亦不宜置之第二。吾近日寄澄、沅两叔信甚稀，纪泽宜常寄禀，以十日一次为率。壬秋、星泉二十五果成行否？宝秀果痊愈否？常常挂念。署中用度宜力行节俭。近询各衙门，无如吾家之靡费者，慎之。此谕。

涤生手示 九月二十八日闾门外

162 . 身体粗健惟眼蒙日甚

字谕纪泽儿：

初三夜接三十及十月初一日禀，具悉。

余于二十八日抵苏后，二十九竟日拜客，夜宴张子青中丞处。三十日在家会客，织造及质堂、眉生、季玉公请戏酒。初一日在恽次山家题主，后接见候补百六十余人，司道府县公请戏酒。初二日早看操，夜湖南同乡公请戏酒。初三日下河赴松江，仅行三十里即泊宿，约计明日初五可抵松江，初八当可抵上海，十一日当可抵吴淞，归署在十四五矣。

身体粗健，惟眼蒙日甚，恐左目又将蹈右目之辙。苏抚送魁将军入川程仪二百两，藩百两，皋百元。余与抚军事同一律，亦须送二百两。尔问明藩及道各送若干，即封二百金送去。江龙三来署，闻其病未痊愈，当于十一月令其旋湘。阮叔有一信由镜初封内来者，具道纪寿入学事，兹寄汝阅看，余不一一。

涤生手示 十月初四年初昆山舟中

163 . 诸官为余祝寿

字谕纪泽儿：

接尔十月初四、五、六、七等日来禀，具悉一一。澄叔及纪瑞、纪官各信亦均阅过。乡二十四都进学五名之多，洵为从来所未有。

吾自松江初七起行，申刻即至上海。应酬三日，毫无暇晷。

初十日，各官备音尊为余预祝，十一日又将备音尊正祝。余力辞之，而自备酒面款接各客。内厅抚、提、藩等二席，外厅文武印委等二十席。虽费钱较多，而免得扰累僚属，此心难安。巳正席散，即登舟起行，傍夕抵吴淞口。十二日可看水陆操演。十三再看半日，即驾轮舟西还，计十四可达金陵。

彤云以轮船三号送我。如魁将军尚未起身，当以恬吉一号送之赴鄂。第冬令水涸，九江以上节节浅阻。彤云深恐轮舟能往而不能返，坚请到鄂不停留一日，即放该船回沪。尔可与将军订定。若将军十五后再行，则程仪可待余归再送。第此信到宁，恐余已先到耳。余不一一。

涤生手示 十月十一夜吴淞口舟中

164 . 应以慎独主敬求仁习劳相勉

一曰慎独则心安。自修之道，莫难于养心。心既知有善知有恶，而不能实用其力，以为善去恶，则谓之自欺。方寸之自欺与否，盖他人所不及知，而已独知之。故“大学”之“诚意”章，两言慎独。果能好善如好好色，恶恶如恶恶臭，力去人欲，以存天理，则“大学”之所谓自谦，“中庸”所谓戒慎恐惧，皆能切实行之。即曾子之所谓自反而缩，孟子之所谓仰不愧，俯不作，所谓养心莫善于寡欲，皆不外乎是。故能慎独，则内省不疚，可以对天地质鬼神，断无行有不慊于心则馁之时，人无一内愧之事，则天君泰然，此心常快足宽平，是人生第一自强之道，第一寻乐之方，守身之先务也。

二曰主敬则身强。敬之一字，孔门持以教人，春秋士大夫亦常言之，至程朱则千言万语不离此旨。内而专静纯一，外而整齐严肃，敬之工夫也；出门如见大祭，使民如承大祭，敬之气象也；修己以安百姓，笃恭而天下平，敬之效验也。程子谓上下一于恭敬，则天地自位，万物自育，气无不和，四灵毕至。聪明睿智，皆由此出。以此事天飨帝，盖谓敬则无美不备也。吾谓敬字切近之效，尤在能固人肌肤之会筋骸之束。庄敬日强，安肆日偷，皆自然之征应，虽有衰年病躯，一遇坛庙祭献之时，战阵危急之际，亦不觉神为之悚，气为之振，斯足知敬能歛人身强矣。若大无众寡，事无大小，一一恭敬，不敢懈慢，则身体之强健，又何疑乎？

三曰求仁则人悦。凡人之生，皆得天地之理以成性，得天地之气以成形，我与民物，其大本乃同出一源。若但知私己，而不知仁民爱物，是于大本一源之道已悖而失之矣。至于尊官厚禄，高居人上，则有拯民溺救民饥之责。读书学古，粗知大义，即有觉后知觉后觉之责。若但知自了，而不知教养庶汇，是于天之所以厚我者辜负甚大矣。

孔门教人，莫大于求仁，而其最切者，莫要于欲立立人、欲达达人数语。立者自立不惧，如富人百物有余，不假外求；达者四达不悖，如贵人登高一呼，群山四应。人孰不欲己立己达，若能推以立人达人，则与物同春矣。后世论求仁者，莫精于张子之“西铭”。彼其视民胞物与。宏济群伦，皆事天者性分当然之事。必如此，乃可谓之人，不如此，则曰悖德，曰贼。诚如其说，则虽盖立天下之人，尽达天下之人，而曾无善劳之足言，人有不悦而归之者乎？

四曰习劳则神钦。凡人之情，莫不好逸而恶劳，无论贵贱智愚老少，皆贪于逸而惮于劳，古今之所同也。人一日所着之衣所进之食，与一日所行之事所用之力相称，则旁人韪之，鬼神许之，以为彼自食其力也。若农夫织妇终岁勤动，以成数石之粟数尺之布，而富贵之家终岁逸乐，不营一业，而食必珍馐，衣必锦绣，酣蒙高眠，一呼百诺，此天下最不平之事，鬼神所不许也，其能久乎？

古之圣君贤相，若汤之昧旦丕显，文王日昃不遑，周公夜以继日坐以待旦，盖无时无不勤劳自励。”天逸”一篇，推之于勤则寿考，逸则夭亡，历历不爽。为一身计，则必操习技艺，磨炼筋骨，困知勉行，操心危虑，而后可以增智慧而长才识。为天下计，则必己饥己溺，一夫不获，引为余辜。大禹之周乘四载，过门不入，墨子之摩顶放踵，以利天下，皆极俭以奉身，

而极勤以救民，故荀子好称大禹、墨翟之行，以其勤劳也。

军兴以来，每见人有一材一技、能耐艰苦者，无不见用于人，见称于时。其绝无材技、不惯作劳者，皆唾弃于时，饥冻就毙。故勤则寿，逸则夭，勤则有材而见用，逸则无能而见弃，勤则博济斯民，而神抵钦仰，逸则无补于人，而神鬼不歆。是以君子欲为人神所凭依，莫大于习劳也。

余衰年多病，目疾日深，万难挽回，汝及诸侄辈身体强壮者少，古之君子修己治家，必能心安身强而后有振兴之象，必使人悦神钦而后有骈集之样。今书此四条。老年用自做惕，以补昔岁之愆；并令二子各自勩勉，每夜以此四条相课，每月终以此四条相稽，仍寄诸侄共守，以期有成焉。

金陵节署中日记

165 . 祖父善于调停解危

祖父大人万福金安：

四月十一日由折差发第六号家信，十六日折弁又到。孙男等平安如常，孙妇亦起居维慎。

曾孙数日内添吃粥一顿，因母乳日少，饭食难喂，每日两饭一粥。今年散馆，湖南三人皆留，全单内共留五十二人，仅三人改部属，三人改知县。翰林衙门现已多至百四五十人，可谓极盛。

琦善已于十四日押解到京。奉上谕派亲王三人、郡王一人、军机大臣、大学士、六部尚书会同审讯。现未定案。

梅霖生同年因去岁咳嗽未愈，日内颇患咯血。同乡各京官宅皆如故。

澄侯弟三月初四在县城发信已经收到，正月二十五信至今未接。兰姊以何时分娩？是男是女？伏望下次示知。

楚善八叔事，不知去冬是何光景。如绝无解危之处，则二伯祖母将穷迫难堪；竟希公之后人，将见笑于乡里矣。孙国藩去冬已写信求东阳叔祖兄弟，不知有补益否？此事全求祖父大人作主。如能救焚拯溺，何难嘘枯回生！伏念祖父平日积德累仁，救难济急，孙所知者，已难指数。如廖品一之孤、上莲叔之妻、彭定五之子、福益叔祖之母及小罗巷、樟树堂各庵，皆代为筹划，曲加矜恤。凡他人所束手无策、计无复之者，得祖父善为调停，旋乾转坤，无不立即解危，而况楚善八叔同胞之

亲、万难之时乎？孙因念及家事，四千里外杳无消息，不知同堂诸叔目前光景。又念家中此时亦甚艰窘，辄敢冒昧饶舌，伏求祖父大人宽有无知之罪。楚善叔事如有说法之处，望详细寄信来京。

兹逢折便，敬禀一二、即跪叩祖母大人万福金安。

四月十七日

166 . 儿在京自知谨慎

男国藩跪禀父亲大人万福金安：

自闰三月十四日在都门拜送父亲，嗣后共接家信五封：十五日接四弟在涟滨所发信；系第二号，始知正月信已失矣；二十二日接父亲在二十里铺发信；四月二十八日刻接在汉口寄曹颖生家信；申刻又接在汴梁寄信；五月十五接父亲到长沙发信，内有四弟信、六弟文章五首。诸悉祖父母大人康强，家中老幼平安，诸弟读书发奋；并喜父亲出京一路顺畅，自京至省，仅三十余日，真极神速。

男于闰月十六发第五号家信，四月十一发六号，十七发七号，不知家中均收到否？迩际男身体如常。每夜早眠，起亦渐早。惟不耐久思，思多则头昏。故常冥心于无用，优游涵养，以谨守父亲保身之训。

九弟功课有常。”礼记”九本已点完，“鉴”已看至三国，“斯文精萃”诗、文各已读半本。诗略进功，文章未进功，男亦不求速效。观其领悟，已有心得，大约手不从心耳。

甲三于四月下旬能行走，不须扶持，尚未能言。无乳可食。每日一粥两饭。家妇身体亦好，已有梦熊之喜。婢仆皆如故。

今年新进士龙翰臣得状元，系前任湘乡知县见田年伯之世兄。同乡六人，得四庶常、两知县。复试单已于闰三月十六付回，兹又付呈殿试朝考全单。同乡京官如故。郑莘田给谏服阙来京。梅霖生病势沉重，深为可虑。黎樾乔老前辈处，父亲未

去辞行，男已道达此意。广东之事，四月十八得捷音，兹将抄报付回。

男等在京自知谨慎，堂上各老人不必挂怀。家中事，兰姊去年生育，是男是女？楚善事如何成就？伏望示知。即请母亲大人万福金安。

男谨稟 五月十八日

167 . 国荃甲三已病愈孙

男国藩跪禀祖父大人万福金安：

五月十八日，孙在京发第八号家信。内有：六弟文二篇，广东事抄报一纸，本年殿试朝考单一纸，寄四弟、六弟新旧信二封，绢写格言一幅，孙国荃寄呈文四篇，诗十首，字一纸，呈堂上禀三纸，寄四弟信一封。不审已收到否？六月初五日接家信一封，系四弟四月初十日在省城发。得悉一切，不胜欣慰。

孙国藩日内身体平安。国荃于二十三日微受暑势，服药一帖，次日即愈。初三日复患腹泻，服药二帖即愈。曾孙甲三于二十三日腹泻不止，比请郑小珊诊治，次日添请吴竹如，皆云系脾虚而兼受暑气。三日内服药六帖，亦无大效。二十六日添请本京王医，专服凉药，渐次平复。初一二两日未吃药，刻下病已全好。唯脾元尚亏，体尚未复。孙等自知细心调理。观其行走如常，饮食如常，不吃药即可复体，堂上不必挂念。家孙妇身体亦好，婢仆如旧。

同乡梅霖生病于五月中旬日日加重，十八日上床，二十五日子时仙逝，胡云阁先生亦同日同时同刻仙逝。梅霖生身后一切事宜，系陈岱云、黎樾乔与孙三人处理。戊戌同年赠仪共五百两。吴甄甫夫子(戊戌总裁)进京，赠赠百两。将来一概共可张罗千余金，计京中用费及灵柩回南途费不过用四佰金，其余尚可周恤遗孤。

自五月下旬以至六月初，诸事殷繁，荃孙亦未得读书。六

弟前寄文来京，尚有三篇，孙未暇改。广东事已成功，由军功升官及戴花翎、蓝翎者共二百余人。将上谕抄回前半节，其后半载升官人名未及全抄。昨接家信，始知楚善大叔竹山湾田已于去冬归祖父大人承买。八叔之家稍安，而我家更窘迫，不知祖父如何调停？去冬今年如何说法？望于家信内详示。

孙等在京别无生计，大约冬初即须借帐，不能备仰事之资寄回，不胜愧悚。吴春冈分发浙江，告假由江南回家，七月初起程。

余容续禀。即禀祖父祖母大人万福金安。

孙跪禀 六月初七日

168 谢买寿材及问婶母病

侄国藩敬禀叔父大人侍下：

本年家信三号，正月一号，至今尚未收到。由彭九峰寄之信，七月初九收到。七夕所发之信，八月十四收到。欣悉家中一切。

三月之事，本侄分所当为，情所不得已，何足挂齿。前年跪托之事，蒙在渣前买得顶好料一具，侄谨率弟国茶南望拜谢，感抃难名。更求再买一具，即于今冬明春请木匠办就。其所需之钱，望写信来京，侄可觅便付回。一切经营费心，何能图报！

婶母之病全愈，不知是何光景，曾否服药？尚有不时言笑？若有信来，望详细示知为幸。

肃此恭请叔父母大人万福金安。

侄率弟国茶谨禀 八月十七日

169 . 不解九弟迫思南归

男国藩跪禀父母亲大人万福金安：

八月十四接家信三件，内系得父亲信一，叔父信一，丹阁叔信一。十八日男发家信第十二号，不知已收到否？

男等在京，身体平安，甲三母子如常。惟九弟迫思南归，不解何故。自九月初间即言欲归，男始闻骇异，再四就询，终不明言。不知男何处不友，遂尔开罪于弟，使弟不愿同居。男劝其明白陈辞，万不可蕴藏于心，稍生猜疑。如男有不是，弟宜正容责之，婉言导之，使男改过自赎。再三劝谕，弟终无一言。如男全无过愆，弟愿归待定省，亦宜写信先知父亲。待回信到时，家中谕令南归，然后择伴束装，尚未为晚。男因弟归志已决，百计阻留，劝其多住四十天。而弟仍不愿，欲与彭山岷同归。彭会试罢屈，拟九月底南旋，现在尚少途费，待渠家寄银来京。男目下已告匱，九弟若归，途费甚难措办。

英夷在浙江滋扰日甚。河南水灾，豫楚一路，饥民甚多，行旅大有戒心。胡咏芝前辈扶柩南归，行李家眷，雇一大船，颇挟重资。闻昨已被抢劫，言之可惨。九弟年少无知，又无大帮作伴，又无健仆，又无途费充裕，又值道上不甚恬谧之际，兼此数者，男所以大不放心，万万不令弟归。即家中闻之，亦万万放心不下。男现在苦留九弟在此。弟若婉从，则读书如故，半月内男又有禀呈；弟若执拗不从，则男当责以大义，必不令其独行。

自从闰三月以来，弟未尝片语违忤，男亦从未加以词色，兄弟极为湛乐。兹忽欲归，男寝馈难安，辗转思维，不解何故。男万难辞咎。父亲寄谕来京，先责男教书不尽职、待弟不友爱之罪，后责弟少年无知之罪，弟当翻然改悟。男教训不先，鞠爱不切，不胜战栗待罪之至。伏望父母亲俯赐惩戒，俾知悛悔遵守，断不敢怙过饰非，致兄弟仍稍有嫌隙。男谨稟告家中，望无使外人闻知，疑男兄弟不睦。盖九弟不过坚执，实无丝毫怨男也。

男谨稟 九月十五日

170 . 九弟始愧悔读书

男国藩跪禀父母亲大人万福金安：

十月十七日接奉在县城研发手谕，知家中老幼安吉，各亲戚家并皆如常。七月二十五由黄恕皆处寄信，八月十三日由县附信寄折差，皆未收到。男于八月初三发第十一号家信，十八发第十二号，九月十六发第十三号，不知皆收到否？

男在京身体平安。近因体气日强，每天发奋用功。早起温经，早饭后读二十三史，下半日阅诗、古文。每日共可看书八十页，皆过笔圈点。若有耽搁，则止看一半。

九弟体好如常，但不甚读书。前八月下旬迫切思归，男再四劝慰，询其何故。九弟终不明言，惟不读书，不肯在上房共饭。男因就弟房二人同食，男妇独在上房饭。九月一月皆如此。弟待男恭敬如常，待男妇和易如常，男夫妇相待亦如常，但不解其思归之故。男告弟云“凡兄弟有不是处，必须明言，万不可蓄疑于心。如我有不是，弟当明争婉讽。我若不听，弟当写信禀告堂上。今欲一人独归，浪用途费，错过光阴，道路艰险，你又年少无知，祖父母、父母闻之，必且食不甘味，寝不安枕，我又安能放心？是万万不可也”等语。又写书一封，详言不可归之故，共二千余字。又作诗一首示弟。弟微有悔意。而尚不读书。十月初九，男及弟等恭庆寿辰。十一日，男三十初度，弟具酒食、肃衣冠，为男祝贺。嗣是复在上房四人共饭，和好无猜。

昨接父亲手谕，中有示荃男一纸，言境遇难得，光阴不再等语，弟始愧悔读书。男教弟千万言，而弟不听；父亲教弟数言，而弟遽惶恐改悟。是知非弟之咎，乃男不能友爱，不克修德化导之罪也。伏求更赐手谕，责男之罪，俾男得率教改过。幸甚。

男妇身体如常。孙男日见结实，皮色较前稍黑，尚不解语。男自六月接管会馆公项，每月收房租大钱十五千文，此项例听经管支用，俟交卸时算出，不算利钱。男除用此项外，每月仅用银十一二两。若稍省俭，明年尚可不借钱。比家中用度较奢华，祖父母、父母不必悬念。男本月可补国史馆协修官，此轮次挨派者。

英夷之事，九月十七大胜。在福建、台湾生擒夷人一百三十三名，斩首三十二名，大快人心。

许吉斋师放甘肃知府。同乡何宅尽室南归，余俱如故。同乡京官现仅有十余人。敬呈近事，余容续禀。

男谨禀 十月十九日

又，呈附录诗一首云：

松柏翳危岩，葛藟相钩带。兄弟匪他人，患难亦相赖。行酒烹肥羊，嘉宾填门外。丧乱一以闻，寂寞何人会？维鸟有鹑鹑，维兽有狼狽。兄弟审无猜，外侮将予奈？愿为同岑石，无为水下瀨。水急不可砥，石坚犹可磕。谁谓百年长，仓皇已老大。我迈而斯征，辛勤共粗粝。来世安可斯，今生勿玩愒！

171 . 孙妇已产一女

孙男国藩、国荃跪禀祖父母大人万福金安：

十一月初二日，孙家发信第十五号，外小鞋四双，由宝庆武举唐君带至湘乡县城罗宅，大约新正可到。

十五日戌刻，孙妇产生一女。是日孙妇饮食起居如故，更初始作势，二更即达生，极为平安。寓中所雇仆妇，因其刁悍，已于先两日遣去，亦未请稳婆。其断脐、洗三诸事，皆孙妇亲自经手。

曾孙甲三于初十日伤风，十七日大愈，现已复元，系郑小珊医治。

孙等在京身体如常。同乡李碧蜂在京，孙怜其穷苦无依，接在宅内居住，新年可代伊找馆也。

谨禀 十一月十九日

172 . 闻家无负债可喜

男国藩跪禀父母亲大人万福金安：

十一月十八，男有信寄呈，写十五日生女事，不知到否？昨十二月十七日奉到手谕，知家中百凡顺遂，不胜欣幸。

男等在京，身体平安。孙男孙女皆好。现在共用因人。荆七专抱孙男，以春梅事多，不能兼顾也。孙男每日清早与男同起，即送出外，夜始接归上房。孙女满月，有客一席。九弟读书，近有李碧峰同居，较有乐趣。男精神不甚好，不能勤教，亦不督责。每日兄弟语笑欢娱，萧然自乐，而九弟似有进境。兹将昨日课文原稿呈上。

男今年过年，除用去会馆房租六十千外，又借银五十两。前日冀望外间或有炭资之赠，今冬乃绝无此项。闻今年家中可尽完旧债，是男在外有负累，而家无负累，此最可喜之事。岱云则南北负累，时常忧贫。然其人忠信笃敬，见信于人，亦无窘迫之时。

同乡京官俞岱青先生告假，拟明年春初出京，男便附鹿肉托渠带回。杜兰溪、周华甫皆拟送家眷出京。岱云约男同送家眷，男不肯送，渠谋亦中止。

彭山岷出京，男为代借五十金，昨已如数付来。心斋临行时，约送银二十八两至勤七叔处转交我家，不知能践言否？

嗣后家中信来，四弟、六弟各写数行，能写长信更好。

男谨禀 十二月二十一日

173 . 望家中附茶叶大布至京

男国藩、荃跪禀父亲大人万福金安：

去年十二月二十一日，发平安信第十七号，内里家中信六件，寄外人信九件，不知已收到否？

男与九弟身体清吉，家妇亦平安。孙男甲三体好，每日吃粥两顿，不吃零星饮食，去冬已能讲话。孙女亦体好，乳食最多，合寓顺适。

今年新正，景象阳和，较去年正月甚为暖烘。兹因俞岱青先生南回，付鹿脯一方，以为堂上大人甘旨之需。鹿肉恐难寄远，故熏腊附回。此间现熏有腊肉、猪舌、猪心、腊鱼这类，与家中无异。如有便附物来京，望附茶叶、大布而已。茶叶须托朱尧阶清明时在永丰买，则其价亦廉，茶叶亦好。家中之布附至此间，为用甚大，但家中费用窘迫，无钱办此耳。

同县李碧峰苦不堪言。男代为张罗，已觅得馆，每月学俸银三两。在男处将住三月，所费无几，而彼则感激难名。馆地现尚未定，大约可成。

在京一切，自知谨慎。即请父母亲大人万福金安。

正月初七日

174 . 九弟意欲病愈归家

男国藩跪禀父母亲大人万福金安：

新正初七日，男友第一号家信，并鹿脯一方，托俞岱青先生交彭山岷转寄，不知到否？去年腊月十九发家信，内共信十余封，想已到矣。初七日信，系男荃代书。

初八早，男兄弟率合寓上下焚香祝寿。下半日荃弟患病，发热畏寒，遍身骨节痛，胁气疼痛。次早请小珊诊，系时疫症。连日服药，现已大愈。小珊云凡南人体素阴虚者，入京多患此症。从前彭棣楼夫妇皆患此症，罗苏溪、劳辛阶、郑小珊、周华甫亦曾有此病。男庚子年之病，亦是此症。其治法不外滋阴祛邪，二者兼顾。九弟此次之病，又兼肝家有郁，胃家有滞，故病势来得甚陡。自初八至十三，胁气疼痛，呻吟之声震屋瓦。男等日夜惶惧，初九即请吴竹如医治。连日共请四医，总以竹如为主，小珊为辅。十四日胁痛已止，肝火亦平。十五日已能食粥，日减日退。现在微有邪热在胃。小珊云再过数日，邪热祛尽，即可服补剂，本月尽当可复体还元。

男自己亥年进京，庚子年自身大病，辛丑年孙儿病，今年九弟病，仰托祖父母、父母福荫，皆保万全，何幸如之！因此思丁酉春祖父之病，男不获在家伏侍，至今尚觉心悸。九弟意欲于病起复体后归家，男不敢复留。待他全好时，当借途费，择良伴，令其南归。大约在三月起行。

英逆去秋在浙滋扰，冬间无甚动作。若今春不来天津，或

来而我师全胜，使彼片帆不返，则社稷苍生之福也。黄河决口，去岁动工，用银五百余万，业已告竣。腊月又复决口。湖北崇阳民变，现在调兵剿办。当易平息。

余容续禀。

男谨呈 正月十八日

175 . 考运不好不必挂怀

男国藩跪禀父母大人万福金安：

六月二十八日接到家书，系三月二十四日所发。知十九日四弟得生子，男等合室相庆。四妹生产虽难，然血晕亦是常事，且此次既能保全，则下次较为容易。男未得信时，常以为虑；既得此信，如释重负。

六月底，我县有人来京捐官(王道隆)。渠在宁乡界住，言四月县考时，渠在城内并在彭兴岐(云门寺)、丁信风两处面晤四弟、六弟。知案首是吴定五。男十三年前在陈宗祠读书，定五才发蒙作起讲，在杨畏斋处受业。去年闻吴春冈说定五甚为发奋，今果得志，可谓成就甚速。其余前十名及每场题目，渠已忘记。后有信来，乞四弟写出。

四弟、六弟考运不好，不必挂怀。俗语云：“不怕进得迟，只要中得快。”从前邵丹畦前辈(甲名)，四十三岁入学，五十二岁做学政，现任广西藩台。汪朗渠(鸣相)于道光十二年入学，十三年点状元。阮芸台(元)前辈于乾隆五十三年县、府试皆未取头场，即于是年入学、中举，五十四年点翰林，五十五年留馆，五十六年大考第一，比放浙江学政，五十九年升浙江巡抚。些小得失，不足患，特患业之不精耳。两弟场中文若得意，可将原卷领出寄京；若不得意，不寄可也。

男等在京平安。纪泽兄妹二人体甚结实，皮色亦黑。

逆夷在江苏滋扰，于六月十一日攻陷镇江，有大船数十只

在大江游弋。江宁、扬州二府颇可危虑。然而天不降灾，圣人在上，故京师人心镇定。同乡王翰城(继贤、黔阳人，中书科中书)告假出京。男与陈岱云亦拟送家眷南旋。与郑莘田、王翰城四家同队出京(郑名世任，给事中，现放贵州贵西道)。男与陈家本于六月底定计，后于七月初一请人扶乩(另纸录出大仙示语)，似可不必轻举妄动，是以中止。现在男与陈家仍不送家眷回南也。

同县谢果堂先生兴峣来京，为其次子捐盐大使。男已请至寓陪席。其世兄与王道隆尚未请，拟得便亦须请一次。

正月间俞岱青先生出京，男寄有鹿脯一方，托找彭山岷转寄。俞后托谢吉人转寄。不知到否？又四月托李昺冈(荣灿)寄银寄笔。托曹西垣寄参，并交陈季牧处，不知到否？前父亲教男养须之法，男仅留上唇须，不能用水浸透。色黄者多，黑者少。下唇拟待三十六岁始留。

男每接家信，嫌其不详，嗣后更愿详示。

男谨稟 七月初四日

176 . 详述九弟思归之意孙

男国藩跪禀祖父母大人万福金安：

七月初五发第九号信，内言六月二十四后，孙与岱云意欲送家眷回南，至七月初一谋之于神，乃决计不送。

初五日发信后，至初八日九弟仍思南归，其意仍坚，不可挽回。与孙商量，孙即不复劝阻。九弟自从去年四月父亲归时，即有思归之意。至九月间，则归心似箭。孙苦苦细问，终不明言其所以然。年少无知，大抵厌常而喜新。未到京则想京，既到京则思家，在所不免。又家中仆婢，或对孙则恭敬，对弟则简慢，亦在所不免。孙于去年决不许他归，严责曲劝，千言万语，弟亦深以为然。几及两月，乃决计不归。今年正月病中又思归，孙即不敢复留矣。三月复元后，弟又自言不归。四、五、六月读书习字，一切如常。至六月底，因孙有送家眷之说，而弟之归兴又发。孙见其意，是为远离膝下，思归尽服事之劳。且逆夷滋扰，外间讹言可畏。虽明知蕞尔螳臂，不足以当车辙，而九弟既非在外服官，即宜在家承欢，非同有职位者，闻警而告假，使人笑其无胆，骂其无义也。且归心既动，若强留在此，则心如悬旌，不能读书，徒废时日。兼此数层，故孙比即定计，打发他回，不复禁阻。恰好郑莘田先生名世任，长沙人，癸酉拔贡，小京官，由御史升给事中，现放贵西兵备道将去贵州上任，迂道走湖南省城，定于十六日起程。孙即将九弟托他结伴同行。此系初八九起议，十四日始决计。即于数日内将一切货

物办齐，十五日雇车。

郑宅大车七辆(渠已于十三日雇定)，九弟雇轿车一辆，价钱二十七千文(时价轿车本只要二十三千，孙见车店内有顶好官车一辆，牲口亦极好，其车较常车大二寸，深一尺，坐者最舒服，故情愿多出大钱四千，恐九弟在道上受热生病)。雇底下人名向泽，其人新来，未知好歹。观其光景，似尚有良心者(昨九弟出京七日，在任邱县寄信来京，云向泽伺候甚好)。十六日未刻出京，孙送至城外二十里。见道上有积潦甚多，孙大不放心，恐路上有翻车陷车等事，深为懊悔。二十三日接到弟在途中研发信，始稍放心。兹将九弟原信附呈。孙交九弟途费纹银三十二两整(先日交车行上脚大钱十三千五百文及上车现大钱六千文两项在外)，外买货物及送人东西另开一单(九弟带回)。外封银十两，敬奉堂上六位老人吃肉之资(孙对九弟云，万一少途费，即扯此银亦可，若到家后，断不可以他事借用此银。然途费亦断不至少也)。向泽订工费大钱二千文，已在京交楚。郑家与九弟在长沙分队，孙嘱其在省换小船到县，向泽即在县城开销他。向泽意欲送至家，如果至家，留住几日打发，求祖父随时斟酌。

九弟自到京后，去年上半年用功甚好。六月因甲三病，耽搁半月余。九月弟欲归，不肯读书，耽搁两月。今春弟病耽搁两月。其余工夫，或作或辍，虽多间断，亦有长进。计此一年半之中，惟书法进功最大。外此则看“纲鉴”三十六本，读“礼记”四本，读“周礼”一本，读“斯文精萃”两本半(因“周礼”读不熟，故换读“精萃”)，作文六十余篇，诗文三十余首。父亲出京后，孙未尝按期改文，未尝讲书，未能按期点诗文。此孙之过，无所逃罪者也。读文作文全不用心，凡事无恒，屡责不改。此九弟之过也。好与弟谈伦常、讲品行，使

之扩见识，立远志，目前已颇识为学之次第，将来有路可循。此孙堪对祖父者也。待兄甚敬，待侄辈甚慈，循规蹈矩，一切匪彝（卜滔）淫之事毫不敢近，举止大方，性情挚厚。此弟之好处也。弟有最坏之处，在于不知艰苦。年纪本轻，又未尝辛苦，宜其不知；再过几年，应该知道。

九弟约计可于九月半到家。孙恐家中骇异，疑兄弟或有嫌隙，致生忧虑，故将在京出京情形，述其梗概。至琐细之故，九弟到家详述，使堂上大人知孙兄弟绝无纤介之隙也。

孙身体如常，惟常耳鸣，不解何故。孙妇及曾孙兄妹二人皆好。丫环因其年已长，其人太蠢。已与媒婆兑换一个（京城有官媒婆，凡买妾买婢，皆由他经纪），彼此不找一钱。此婢名双喜，天津人，年十三岁。貌比春梅更陋，而略聪明。寓中男仆皆如故。

同县谢果堂先生为其子捐盐大使，王道隆（王恒信之侄）捐府经历，黄鉴之子捐典史，以外无人。

孙在京一切自宜谨慎，伏望堂上大人放心。

孙谨稟 八月初一日

177 遵手谕节劳节欲节饮食

男国藩跪禀父母亲大人万福金安：

十月二十二奉到手谕，敬悉一切。

郑小珊处小隙已解。男从前于过失，每自忽略。自十月以来，念念改过，虽小必惩。其详具载示弟书中。耳鸣近日略好，然微劳即鸣。每日除应酬外，不能不略自用功，虽欲节劳，实难再节，手谕示以节劳节欲节饮食，谨当时时省记。

肖辛五先生处，寄信不识靠得住否？龙翰臣父子已于十月初一日到京，布匹线索俱已照单收到，惟茶叶尚在黄恕皆处。恕皆有信与男，本月可到也。

男妇等及孙男女皆平安，余详与弟书。

谨禀 十月十六日

178 每年须漆寿具

男国藩跪禀父母亲大人万福金安：

十二月十四奉到十月初七手谕，敬悉一切。

芝妹又小产。男恐其气性太躁，有伤天和，亦于生产有碍，以后须平心和气。伏望大人教之。

朱备之世兄任宝庆同知。其人浑朴，京师颇有笑其憨者，实则笃厚君子也。龙见田年伯来京，男请酒，渠辞不赴，意欲再请翰臣，待明春始办席也。在省未送程仪，待见面可说明。

漆寿具既用黄二漆匠亦好，男断不与此等小人计较，但恐其不尽心耳。闻瓷灰不可多用。多用则积久易脱，不如多漆厚漆，有益无损。不知的否？以后每年四具必须同漆一次，男每年必付四两银至家，专为买漆之用。九弟前带回银十两，为堂上吃肉之费，不知已用完否？男等及孙男女身体俱如常。今年用费共六百余金，绝不窘手，左右逢源，绰有余裕。另有寄弟信详言之。正月祖父大人七十大寿，男已做寿屏两架。明年有便，可付回一架。

今年京察(京城各衙门京察，堂官出考语，列等第，取一等者即外放道府)，湖南惟黎樾乔得一等。翰林未满三年俸者，例不京察。

同乡黄蕻卿兄弟到京，收到茶叶一篓，重二十斤，尽可供二年之食，惟托人东西太大，不免累赘，心实不安，而渠殊不介意也。在京一切自知谨慎。

男谨稟 十二月二十日

179 . 恭庆祖父母双寿

男国藩跪禀父母亲大人万福金安：

正月八日恭庆祖父母双寿，男去腊做寿屏二架。今年同乡送寿对者五人。拜寿来客四十人。早面四席，晚酒三席。未吃晚酒者，于十七日、二十日补请二席。又请人画椿萱重荫图，观者无不称羨。

男身体如常。新年应酬太繁，几至日不暇给。媳妇及孙儿女俱平安。

正月十五接到四弟、六弟来信。四弟欲偕季弟从汪觉庵师游，六弟欲偕九弟至省城读书。男思大人家事日烦，必不能常在家塾照管诸弟；且四弟天分平常，断不可一日无师，讲书改诗文，断不可一课耽搁。伏望堂上大人俯从男等之请，即命四弟、季弟从觉庵师。其束脩银，男于八月付回，两弟自必加倍发奋矣。六弟实不羁之才，乡间孤陋寡闻，断不足以启其见识而坚其志向；且少年英锐之气不可久挫。六弟不得入学，既挫之矣；欲进京而男阻之，再挫之矣；若又不许肄业省城，则毋乃太挫其锐气乎？伏望堂上大人俯从男等之请，即命六弟、九弟下省读书。其费用，男于二月间付银二十两至金竺虔家。

夫家和则福自生。若一家中，兄有言弟无从不，弟有请兄无不应。和气蒸蒸而家不兴者，未之有也；反是而不败者，亦未之有也。伏望大人察男之志，即此敬禀叔父大人，怒不另具。六弟将来必为叔父克家之子，即为吾族光大门第，可喜也。

谨述一二，余俟续禀。

正月十七日

180 . 兄弟和虽穷之民小户必兴

兄弟不和虽世家宦族必败

男国藩跪禀父母亲大人万福金安：

正月十七日，男友第一号家信，内呈堂上信三页，复诸弟信九页，教四弟与厚二从汪觉庵师，六弟、九弟到省从不秩臣，谅已收到。二月十六日接到家信第一号，系新正初三交彭山峒者，敬悉一切。去年十二月十一，祖父大人忽患伤风，赖神灵默佑，得以速痊，然游子闻之，尚觉心悸。六弟生女，自是大喜。初八日恭逢寿筵，男不克在家庆祝，心尤依依。

诸弟在家不听教训，不甚发奋。男观诸弟来信，即已知之。盖诸弟之意，总不愿在家塾读书。自己亥年男在家时，诸弟即有此意，牢不可破。六弟欲从男进京，男四散馆去留未定。故彼时未许。庚子年接家眷，即请弟等送，意欲弟等来京读书也。特以祖父母、父母在上，男不敢专擅，故但写诸弟，而不指定何人。迨九弟来京，其意颇遂，而四弟、六弟之意尚未遂也。年年株守家园，时有耽搁，大人又不能常在家教之：近地又无良友，考试又不利。兼此数者，佛郁难申，故四弟、六弟不免怨男，其可以怨男者有故。丁酉在家教弟，威克厥爱，可怨一矣；己亥在家未曾教弟一字，可怨二矣；临进京不肯带六弟，可怨三矣；不为弟另择外傅，仅延丹阁叔教之，拂厥本意，可怨四矣；明知两弟不愿家居，而屡次信回，劝弟寂守家塾，可

怨五矣。惟男有可怨者五端，故四弟、六弟难免内怀隐衷。前次含意不申，故从不写信与男。去腊来信甚长，则尽情吐露矣。

男接信时，又喜又惧。喜者，喜弟志气勃勃不可遏也；惧者，惧男再拂弟意，将伤和气矣。兄弟和，虽穷氓小户必兴；兄弟不和，虽世家宦族必败。男深知此理，故稟堂上各位大人俯从男等兄弟之请。男之意实以和睦兄弟为第一。

九弟前年欲归，男百般苦留，至去年则不复强留，亦恐拂弟意也。临别时，彼此恋恋，情深似海。故男自九弟去后，思之尤切，信之尤深。谓九弟纵不为科目中人，亦当为孝悌中人。兄弟人人如此，可以终身互相倚倚，则虽不得禄位，亦何伤哉！

恐堂上大人接到男正月信必且惊而怪之，谓两弟到衡阳，两弟到省，何其不知艰苦，擅自专命？殊不知男为兄弟和好起见，故复缕陈一切；并恐大人未见四弟、六弟来信，故封还附呈。总愿堂上六位大人俯从男等三人之请而已。

伏读手谕，谓男教弟宜明言责之，不宜琐琐告以阅历工夫。男自忆连年教弟之信不下数万字，或明责，或婉劝，或博称，或约指，知无不言，总之尽心竭力而已。

男妇孙男女身体皆平安，伏乞放心。

男谨稟 二月十九日

181 详禀大考之况

孙男国藩跪禀祖父母大人万福金安：

四月二十日，孙发第五号家信，不知到否？五月二十九接到家中第二号信，系三月初一发。六月初二日接第三号信，系四月十八发的。具悉家中老幼平安，百事顺遂，欣幸之至。

六弟下省读书，从其所愿，情意既畅，志气必奋，将来必大有成，可为叔父预贺。祖父去岁曾赐孙手书，今年又已半年，不知目力何如？下次信来，仍求亲笔书数语示孙。大考喜信，不知开销报人钱若干？

孙自今年来身体不甚好，幸加意保养，得以无恙。大考以后全未用功。五月初六日考差，孙受帖完卷，虽无毛病，亦无好处。首题“使诸大夫国人皆有所矜式”，经题“天下有道，则行有枝叶”，诗题“赋得角黍”得“经”字。共二百四十一人进场。初八日派阅卷大臣十二人，每人分卷二十本。传闻取七本，不取者十三本。弥封未拆，故阅卷者亦不知所取何人，所黜何人。取与不取一概进呈，恭候钦定。外间谣言某人第一，某人未取，俱不足凭。总待放差后，方可略测端倪。亦有真第一而不得，有真未取而得差者，静以听之而已。同乡考差九人，皆妥当完卷。六月初一，放云南主考龚宝莲（辛丑榜眼）、段大章（戊戌同年）、贵州主考龙元僖、王桂（庚子湖南主考）

孙在京平安，孙妇及曾孙兄妹皆如常。前所付银，谅已到家。高丽参目前难寄，容当觅便寄回。六弟在城南，孙已有信

托陈尧农先生。同乡官皆如旧。黄正斋坐粮船来，已于六月初三到京。余容后禀。

孙跪禀 六月初六日

182 . 托带闰墨等物归乡

四位老弟左右：

前黄仙垣归，托带四川闰墨四十部，共二包，无家信。顷欧阳小岑归，托带大皮箱一口，内银五百十两、衣服一单，单存箱内。又长包一个，内袍褂料及毡子诸物，亦有单存包内，有家信数行。外又寄霞仙信一件、书一包，共十套。不知仙垣、小岑二君到时，诸弟尚在省城否？

兹安化梁录庄同年(献廷)南还，又托带四川闰墨四十部，共一包。有一名系油纸封的，内装钉闰墨二十部、彭王姑墓志铭一幅(内业误叶、悚误粟)、龙翰臣写散馆卷三开、自写白折一本(试笔写的，故大小不均)。又布包鹿胶一包重三斤。又乡试录题名录共一包照收。并附大挑单一纸。

其进十题名录及散馆录随后交折差带回，统俟后信详述。

兄国藩手草 四月二十四日

183 . 总期不自满为要

男国藩跪禀父母亲大人万福金安：

六月二十三日男友第七号信交折差，七月初一日发第八号交王仕四手，不知已收到否？

六月二十日接六弟五月十二日书，七月十六接四弟、九弟五月二十九日书，皆言忙迫之至。寥寥数语，字迹潦草，即县试案首前列皆不写出。同乡有同日接信者，即考古考老生皆已详载。同一折差也，各家发信迟十余日而从容，诸弟发信早十余日而忙迫，何也？且次次忙迫，无一次稍从容者，又何也？

男等在京大小平安，同乡诸家皆好。惟汤海秋于七月八日得病，初九未刻即逝。六月二十八考教习，冯树堂、郭筠仙、朱啸山皆取。湖南今年考差，仅何子贞得差，余皆未放。惟陈岱云光景最苦。男因去年之病，反以下放为乐。王仕四已善为遣回。率五大约在粮船回，现尚未定。渠身体平安，二妹不必挂心。叔父之病，男累求详信直告，至今未得，实不放心。甲三读《尔雅》，每日二十余字，颇肯率教。

六弟今年正月信，欲从罗罗山处附课，男甚喜之。后来信绝不提及，不知何故？所付来京之文，殊不甚好。在省读书二年，不见长进，男心实忧之而无如何，只恨男不善教诲而已。大抵第一要除骄傲气习。中无所有而夜郎自大，此最坏事。四弟、九弟虽不长进，十出山亦不自满。求大人教六弟，总期不自满足为要。余俟续呈。

男谨稟 七月二十日

184 . 无日不看书虽万事丛忙亦不废正业

男国藩跪禀父母亲大人万福金安：

八月二十九日男发第十号信，备载二十八生女及率五回南事，不知已收到否？

男身体平安。家妇月内甚好，去年月里有病，今年尽除去。孙儿女皆好。初十日顺天乡试发榜，湖南中三人，长沙周荐农中南元(原名康立。)率王之归，本拟附家心斋处。因率五不属坐车，故附陈岱云之弟同坐粮船。昨岱云自天津归，云船不甚好，男颇不放心。幸船上人多，应无可虑。

诸弟考试后，尽肄业小罗巷庵，不知勤惰若何？此时惟季弟较小，三弟俱年过二十，总以看书为主。我境惟彭薄墅先生看书略多，自后无一人讲究者，大抵为考试文章所误。殊不知看书与考试全不相碍，彼不看书者，亦仍不利考如故也。我家诸弟此时无论考试之利不利，无论文章之工不工，总以看书为急。不然则年岁月长，科名无成，学问亦无一字可靠，将来求为塾师而不可得。或经或史或诗集文集，每日总宜看二十页。男今年以来无日不看书，虽万事丛忙，亦不废正业。

闻九弟意欲与刘霞仙同伴读书。霞仙近来见道甚有所得，九弟若去，应有进益。望大人斟酌行之，男不敢自主。此事在九弟自为定计。若愧奋直前，有破釜沉舟之志，则远游不负；若徒悠忽因循，则近处尽可度日，何必远行百里外哉？求大人察九弟之志而定计焉。余容续呈。

男谨稟 九月十九日

185 . 禀皮货保养收藏之法

孙国藩跪禀祖父母大人万福金安：

十月二十一日发十二号家信，想已收到。孙在京平安，孙妇及曾孙男女四人皆好。曾孙最好写字，散学后则在其母房中多写，至初更犹不肯睡，骂亦不止。目下天寒墨冻，脱手写多不成字，兹命之写禀安帖寄呈，以博堂上大人一欢笑而已。

上半年所付黑狸皮褂，不知祖父大人合身否？闻狸皮在南边易于回潮，黑色变为黄色，不知信否？若果尔，则回潮天气须勤勤检视，又凡收皮货，须在省城买潮老。其色如白淮盐，微带黄色。其气如樟木。用皮纸包好，每包约寸大，每衣内置三因包。收衣时，仍将此包置衣内。又每年晒皮货，晒衣之日，不必折收，须过两天，待热气退尽乃收。

江西家受恬明府昨有信来，云此银今冬必付到，不知近来接到否？如未接，则立即写信来京，再去催取。兑银之难，往往如此。

同乡唐镜海先生三年以来连生三子，而长者前以病殇，幼者昨又以痘殇，仅存次子，尚未周岁，良可悼叹。

现在京官甚少，仅二十二人，昨十月二十五日谢恩赴宫门叩头者，仅到三人，尤非盛时气象。兹将谢折付回呈览。

王率五到家，须即寄一信。仕四已于八月初到省，不知曾到我家否？母亲生日，京中仅客一席，待明年当付寿屏回。家中有所需之物，须写信来，明年会试后寄归。

孙谨稟十一月二十一日

186 . 祖母葬事谨遵天理

澄侯、子植、季洪三弟左右：

二月十一日接到三弟正月初旬手书，俱悉一切。澄侯以腊月二十三至岳州，余见罗艺皋已知之。后边湖又阻风，竟走七十余天始到。人事之难测如此！吾弟此后又添了阅历工夫矣。黎樾乔托带之件，当装车时，吾语弟曰：“此物在大箱旁边恐不妥，弟明日到店，须另安置善地。”不知弟犹记得我言否？出门人事事皆须细心。今既已弄坏，则亦不必过于着急。盖此事黎樾乔与弟当分任其咎。两人皆粗心，不得专责弟一人也。

祖大人之病久不见效，兄细思之，恐有火，不宜服热药，盖祖父体赋素强，丁酉之春以服补药之故，竟成大病。后泽六爷以凉药治好。此次每日能吃三中碗饭，则火未甚衰，恐医者不察，徒见小便太数，则以为火衰所致，概以热药投之，亦足误事。兄不明医理，又难遥度，而回忆丁酉年之往事，又闻陶云汀先生为补药所误之说，特书告家中。望与名医细商，不知有可服凉药之理否？兄自去年接祖母卜后，即日日思抽身南归。无如欲为归计，有三难焉：现在京寓欠帐五百多金，欲归则无钱还帐，而来往途费亦须四百金，甚难措办。一难也。不带家眷而归，则恐我在家或有事留住，不能遽还京师，是两头牵扯；如带家眷，则途费更多，家中又无房屋。二难也。我一人回家，轻身快马，不过半年可以还京。第开缺之后，明年恐尚不能补缺，又须在京闲住一年。三难也。

有此三难，是以踌躇不决。而梦寐之中，时时想念堂上老人，望诸弟将兄意详告祖父及父母。如堂上有望我回家之意，则弟书信与我，我概将家眷留在京师，我立即回家。如堂上老人全无望我归省之意，则我亦不敢轻举妄动。下次写信，务必详细书堂上各位老人之意。祖母之葬事既已办得坚固，则不必说及他事。日前所开山向吉凶之说，亦未可尽信。山向之说，地理也；祖父有命而子孙从之，天理也。祖父之意已坚，而为子孙者乃拂违共意，而改卜他处，则祖父一怒，肝气必郁，病势必加，是已大逆天理；虽得吉地，犹将变凶，而况未必吉乎？自今以后不必再提改葬之说。或吉或凶，听天由命；即朱尧阶、易敬臣亦不必请他寻地（尧阶二人如看得有妥地，亦不妨买）。四弟则在家帮父亲、叔父管家事，时时不离祖父左右。九弟、季弟则专心读书。只要事事不违天理，则地理之说，可置之不论不议矣。

吾身之癖，春间又发，特不如去岁之甚。面上颈上则与弟出京时一样，未再发也。六弟近日颇发愤，早间亦能早起。纪泽《诗经》尚未读完，现系竹屋教，总多间断，将来必要请一最能专馆之人。

黎樾乔御史报满引见，回原衙门行走。黄正斋之长子于正月初间失去，至今尚未归来。邓星阶就正斋之馆，李希庵就杜兰溪之馆，系我所荐。同县刘九爷、罗邹二人及新科三人皆已到京，住新馆。江岷樵住张相公庙，去我家甚近。郭筠仙尚未到。袁漱六于正月二十四到京，现在家眷住北半截胡同。周符农尚未到。杨春皆于正月二日生一子。刘药云移寓虎坊桥，其病已全好。赵崧原之妻子正月仙逝。舒伯鲁二月出都。我家碾儿胡同房东将归，三四月必须搬家。黄秋农之银已付来，加利息十两，兄意欲退还他。

九弟、季弟读书，开口便有自画之意。见得年纪已大，功名无成，遂有懒惰之意。此万万不可。兄之乡试座师徐晓屯、许吉斋两先生，会试房师季仙九先生，皆系二十六七入泮，三十余岁中举，四十余岁入词林。诸弟但须日日用功，万不必作叹老嗟卑之想。譬如人欲之京师，一步不动而长吁短叹，但曰京师之远，岂我所能到乎？则旁观者必笑之矣。吾愿吾弟步步前行，日日不止，自有到期，不必计算远近而徒长吁短叹也。望澄侯时时将此譬喻说与子植、季洪听之，千万千万！无怠无怠！

九弟信言诸妯娌不甚相能，尤望诸弟修身型妻，力变此风。若非诸弟痛责己躬，则内之气象必不改，而乖戾之致咎不远矣。望诸弟熟读《训俗遗规》、《教女遗规》，以责己躬，以教妻子。此事全赖澄弟为之表率，关系至大，千万千万！不胜嘱切之至！伏惟留心自反为幸。

兄国藩手草 二月十二日

187 . 能勤能敬未有不兴

澄、温、沅、季老弟左右：

湖北青抚台于今日入省城。所带兵勇，均不准其入城，在城外二十里扎营，大约不过五六千人。其所称难民数万在后随来者，亦未可信。此间供应数日，即给与途费，令其至荆州另立省城。此实未有之变局也。

邹心田处，已有札至县撤委。前胡维峰言邹心田可劝捐，余不知其即至堂之兄也。昨接父大人手谕始知之，故即札县撤之。胡维峰近不妥当，亦必屏斥之。余去年办清泉宁征义、宁宏才一案，其卷已送回家中，请澄弟查出，即日付来为要。

湖北失守，李鹤人之父(孟群，带广西水勇来者)想已殉难。鹤人方寸已乱，此刻无心办事。日内尚不能起行，至七月初旬乃可长征耳。余不一一。

诸弟在家教子侄，总须有勤敬二字。无论治世乱世，凡一家之中能勤能敬，未有不兴，不勤不敬，未有不败者。至切至切。余深悔往日未能实行此二字也，千万叮嘱。澄弟向来本勤，但不敬耳。阅历之后，应知此二字之不可须臾离也。

兄国藩手草 六月十八日

188 . 总须始终如一毋怠毋荒

沅浦九弟左右：

二十日胡二等归，接弟十三夜书，俱悉一切。

所论兄之善处，虽未克当，然亦足以自怡，兄之郁郁不自得者，以生平行事有初鲜终，此次又草草去职，致失物望，不无内疚。

朱尧阶于初九日来家。刘霞仙侍其叔父镜湖于十三日来家，悉心诊视。先用开痰之剂，旋服解郁之方，日有效验。镜叟于十九日归去，以二十五日为季子完娶也。霞仙亦于二十三日归去。

长傲，多言二弊，历观前世卿大夫兴衰及近日官场所以致祸福之由，未尝不视此二者为枢机，故愿与诸弟共相鉴诫。第能惩此二者，而不能勤奋以图自立，则仍无以兴家而立业。故又在乎振刷精神，力求有恒，以改我之旧辙而振家之丕基。弟在外数月，声望颇隆，总须始终如一，毋怠毋荒，庶几于弟为初旭之升，而于兄亦代为桑榆之补。至嘱至嘱。

次青奏赴浙江，以次青之坚忍，固宜有出头之一日，而咏公亦可谓天下之快人快事矣。

弟劝我与左季高通书问。此次暂未暇作，准于下次寄弟处转递。此亦兄长傲之一端。弟既有言，不敢遂非也。

家中四宅小大平安。纪泽尚未归，闻二十一日在省起行。韩升二十二日来家，渠二人当酌派一人前赴弟营。余不一一，

顺问近好，统惟心照。

兄国藩手草 三月十三日

189 . 保养之法慎饮食节嗜欲不在多服药

澄侯四弟左右：

十六日接弟十一月二十三日手书，并纪泽二十五日禀，俱悉。弟病日就痊愈，至慰至幸。惟弟服药过多，又坚嘱泽儿请医守治，余颇不以为然。

吾祖星冈公在时，不信医药，不信僧巫，不信地仙。此三者，弟必能一一记忆。今我辈兄弟亦宜略法此意，以绍家风。今年白玉堂做道场一次，大夫第做道场二次，此外禱祀之事，闻亦常有是不信僧巫一节，已失家风矣。买地至数千金之多，是不信地仙一节，又与家风相背。至医药，则合家大小老幼，几于无人不药，无药不贵。迨至补药吃出毛病，则又服凉药以攻代之，阳药吃出毛病，则又服阴药以清润之，辗转差误，不至大病小弱不止。弟今年春间多服补剂，夏末多服凉剂。冬间又多服清润之剂。余意欲劝弟稍停药物，专用饮食调养。泽儿虽体弱，而保养之法，亦惟在慎饮食节嗜欲，断不在多服药也。洪家地契，洪秋浦未到场押字，将来恐仍有口舌。地仙、僧巫二者，弟向来不甚深信，近日亦不免为习俗所移。以后尚祈卓识坚定，略存祖父家风为要。天下信地、信僧之人，曾见有一家不败者乎？北果公屋，余无银可捐。己亥冬，余登山踏勘，觉其渺茫也。

此间军事平安。左、鲍二人在鄱阳尚未开仗。祁门、黟县之贼，日内并未动作。顺问近好，并贺新喜。

国藩手草 十二月二十四日

190 . 自己不立志虽日与尧舜汤同住

亦彼自彼我自我矣

四位老弟足下：

自七月发信后未接诸弟信，乡间寄信较省城百倍之难，故余亦不望也。

九弟前信有意与刘霞仙同伴读书，此意甚佳。霞仙近来读朱子书大有所见，不知其言语容止、规模气象如何？若果言动有礼，威仪可则，则直以为师可也，岂特友之哉！然与之同居，亦须真能取益乃佳，无徒浮慕虚名。人苟能自立志，则圣贤豪杰何事不可为？何必借助于人！”我欲仁，斯仁至矣。”我欲为孔孟，则日夜孜孜，惟孔孟之是学，人谁得而御我哉？若自己不立志，则虽日与尧舜禹汤同住，亦彼自彼，我自我矣，何与于我哉！去年温甫欲读书省城，吾以为离却家门局促之地，而与省城诸胜己者处，其长进当不可限量。乃两年以来看书亦不甚多，至于诗文，则绝无长进，是不得归咎于地方之局促也。去年余为择师不君叙忠，后以丁君处太远，不能从，余意中遂无他师可从。今年弟自择罗罗山改文，而嗣后查无信息，是又不得归咎于无良友也。日月逝矣，再过数年则满三十，不能不趁三十以前立志猛进也。

余受父教，而余不能教弟成名，此余所深愧者。他人与余交，多有受余益者，而独诸弟不能受余之益，此又余所深恨者

也。今寄霞仙信一封，诸弟可抄存信稿而细玩之。此余数年来学思之力，略具大端。

六弟前嘱余将所作诗录寄回。余往年皆未存稿。近年存稿者不过百余首耳，实无暇抄写，待明年将全本付回可也。

国藩草 九月十九日

191 . 议次女婚配之事

澄侯四弟、子植九弟、季洪二弟左右：

二月十一接到第一、第二号来信。三月初十接到第三、四、五、六号来信，系正月十二、十八、二十二及二月朔日研发而一次收到。家中诸事琐屑毕知，不胜欢慰。

祖大人之病竟以服沉香少愈，幸甚。然予终疑祖大人之体本好，因服补药太多，致火壅于上焦，不能下降。虽服沉香而愈，尚恐非切中肯綮之剂。要须服清导之品，降火滋阴为妙。予虽不知医理，窃疑必须如此，上次家书亦曾写及。不知曾与诸医商酌否？丁酉年祖大人之病，亦误服补剂，赖泽六爷投以凉药而效。此次何以总不请泽六爷一诊？泽六爷近年待我家甚好，即不请他诊病，亦须澄弟到他处常常来往，不可太疏，大小喜事宜常送礼。

尧阶即尤为我觅妥地，如其觅得，即听渠买。买后或迁或否，仍由堂上大人作主，诸弟不必执见。

上次信言予思归甚切，嘱弟探堂上大人意思如何。顷奉父亲手书，责我甚切。兄自是谨遵父命，不敢作归计矣。

郭筠仙兄弟于二月二十到京。筠仙与其叔及江岷樵住张相公庙，去我家甚近。翊臣即住我家。树堂亦在我家入场。我家又添二人伏侍李、郭二君。大约榜后退一人，只用一打杂人耳。

筠仙自江西来，述岱云母子之意，欲我将第二女许配渠第二子，求婚之意甚诚。前年岱云在京，亦曾托曹西垣说及，予

答以缓几年再议。今又托筠仙为媒，情与势皆不可却。岱云兄弟之为人与其居官治家之道，九弟在江西一一目击。烦九弟细告父母，并告祖父，求堂上大人吩咐。或对或否，以便回江西之信。予夫妻现无成见。对之意有六分，不对之意有四分，但求堂上大人主张。

九弟去年在江西，予前信稍有微词，不过恐人看轻耳。仔细思之，亦无妨碍，且有莫之为而为者，九弟不必自悔艾也。

碾儿胡同之屋，房东四月要回京，予已看南横街圆通观东间壁房屋一所，大约三月尾可移寓。此房系汪醇卿之宅(教习门生汪廷儒)比碾儿胡同狭一小半，取其不费力易搬，故暂移彼。若有好房，当再迁移。

黄秋农之银已付还，加利十两，予仍退之。用子佩于三月三日喜事。正斋之子竟尚未归。黄蕙卿、周韩臣闻皆将告假回籍，蕙卿已定十七日起行。刘盛唐得疯疾，不能入闱，可悯之至。袁漱六到京数日，即下园子用功。其夫人生女仅三日即下船进京，可谓胆大。周荇农散馆，至今未到，其胆尤大。曾仪斋(宗逵)正月二十六在省起行，二月二十九日到京。凌笛舟正月二十八起行，亦二十九到京，可谓极快。而澄弟出京，偏延至七十余天始到。人事之无定如此！新举人复试题“人而无恒”二句，赋得“仓庚鸣”得“鸣”字。四等十一人，各罚会试二科，湖南无之。

我身癣疾，春间略发而不甚为害。有人说方，将石灰澄清水用水调桐油擦之，则白皮立去，如前年擦铜绿膏。予现二三日一擦，使之不起白皮，剃头后不过微露红影(不甚红)，虽召见亦无碍。除头顶外，他处皆不擦，以其仅能济一时，不能除根也。内人及子女皆平安。

今年分房，同乡仅怨皆，同年仅松泉与寄云大弟，未免太

少。余虽不得差，一切自有张罗，家中不必挂心。今日予写信颇多，又系冯、李诸君出场之日，实无片刻暇，故予未作楷信禀堂上，乞弟为我说明。

澄弟理家事之间，须时时看“五种遗规”，植弟、洪弟须发愤读书，不必管家事。

兄国藩草 三月初十

192 择聘子侄之师

澄侯、温甫、子植、季洪四位老弟足下：

胡二等于初一日到营，接奉父大人手谕及诸弟信，具悉一切。

兄于二十日自汉口起行，二十一日至黄州，二十二日至堵城。以羊一豕一，为文祭吴甄甫师。二十三日过江至武昌县。二十四在巴河晤郭雨三之弟，知其兄观亭在山西，因属邑失守革职，雨三现署两淮盐运使。二十九日至蕲州，是日水师大战获胜。初一、初四、初五陆军在田家镇之对岸半壁山大战获胜。初九、初十水师在蕲州开仗小胜。十三日水师大破田家镇贼防，烧贼船四千余号。自有此军以来，陆路杀贼之多无有过于初四之战，水路烧船之多无有过于十三之役。现在前帮已至九江，吾尚驻田家镇，离九江百五十里。陆路之贼均在广济、黄梅一带，塔、罗于二十三日起行往剿。一切军事之详，均具奏报之中。兹并抄录寄回，祈敬呈父大人、叔父大人一览。

刘一、良五于二十日至田家镇。得悉家中老幼均吉，甚慰甚悉。魏荫亭先生既来军中，父大人命九弟教子侄读书，而九弟书来坚执不肯，欲余另请明师。余意中实乏明师可以聘请。日内与霁、次及幕中诸君子熟商，近处惟罗研生兄是我心中敬仰之人。其学问具有本原，说文、音学、舆地尤其所长，而诗、古文辞及行楷书法亦皆讲求有年。吾乡通经学古之士，以邹叔绩力最，而研生次之。其世兄现在余幕中，故请其写信，聘

研生至吾乡教读。研兄之继配陈氏，与耦庚先生为联襟，渠又明于风水之说，并可在吾乡选择古地。但不知其果肯来否？渠现馆徐方伯处，未知能辞彼就此否？若果能来，足开吾邑小学之风，于温甫、子植亦不无裨益。若研兄不能来，则吾心中别无人，植弟坚不肯教，则乞诸弟为访择一师而延聘焉为要。甲三、甲正可同一师，不可分开。科一、科三、科四亦可同师。余不一一，诸俟续布。

兄国藩手草 十月二十二夜

193 . 凡事皆应 ” 久而敬之 ”

沅浦九弟左右：

久未接弟安报，不知近况何如？余在兰溪发一信，由湖北寄左季翁转致，不知得到否也？兰溪初九日与迪、希别，十一日至九江一祭塔公祠，十二日至湖口。厚庵近日体气稍逊。雪琴则神采奕奕，在湖口新修水师昭忠祠，土木之工，一一皆亲手经营，嘱余奏明。迪庵在九江修塔公祠，亦嘱余一奏。余似会杨、李衔奏之。迪庵又欲与湘乡立忠义祠，亦将一会奏也。

胡中丞之太夫人(姓汤)于十一日辰刻仙逝。水陆数万人皆仗胡公以生以成，一旦失所依倚，关系甚重。余拟送嶂一、联一、银二百，皆书余与温、沅名。玉班兄丁艰，弟如何致情？望速示。顺问近好，余详日记中不另。

兄国藩手具 七月十四日于湖口水营

再，兄于近日受暑，夜间又或受风露，体中小有不适。请焦听堂诊治，服药两帖，已愈矣。闻弟病症，不知全愈否？罗逢元言尚未愈，韩升之兄言服成章鉴之方，已十愈八九。澄侯信言十六日全好，则尚未悉后有反复也。七月以来，不审全复元否？体气素弱，不宜多服克伐之剂，而有病在身，又不宜服补剂，殊为惦念。吉安克复尚无把握，千万不可焦急，日慎一日，以求其事之济。一怀焦愤之念，则恐无成耳。千万忍耐！千万忍耐！”久而敬之”四字，不特处朋友为然，即凡事亦莫不然。至嘱。

国藩再墨 七月十四日

194 乱世居华屋广厦非所宜

澄侯、沅浦、季洪三弟左右：

十二月二十三日接澄、沅初十、十一日信，除夕又接十六日信，敬悉叔父大人身体气渐好，不致成中痰之症，如天之福，至幸至幸！两弟缄中所言各事，兹分条列复如左：

一、先考妣改葬事决不可缓。余二年、七年在家主持葬事，办理草草，去冬今春又未能设法改葬，为人子者第一大端，问心有疚，何以为人？何以为子？总求沅弟为主，速行改葬，澄弟、洪弟帮同办理，为我补过。至要至禱！洪夏争地，果可用否？吾不得知。兹亲笔写二信与洪、罗二处，以冀或有所成。

一、张凯章于十八日至景德镇附近地方，十九日分两路进。王（钤峰）、吴走西路，凯章走东路。王、吴挫败，义营亡百人，吉左营九人，副湘营三十七人，营务处十二人。在行仗则已为大伤，幸凯章全军未与其事。现尚扎崖角岭，去景德镇二十余里，势颇岌岌。兹札调朱南桂、朱惟堂飞速来军，望即专人送去。又王人树一信亦速送去。涤岑信，弟阅后封寄。

一、季弟决计出外，不知果向何处？今日办事之人，惟胡润之、左季高可与共事。此外皆若明若昧，时信时疑，非季弟所能俯仰迁就也。沅弟宜再三开导，令季弟择人而事，不可草草。或沅、季同来吾营，商定后再赴他处亦可。

一、沅弟所画屋样，余已批出。若作三代祠堂，则规模不妨阔大；若另起祠堂于雷有湾，而此仅作住屋，则不宜太宏丽。

盖吾邑带勇诸公，置田起屋者甚少，峙衡家起屋亦乡间结构耳。我家若太修造壮丽，则沅弟必为众人所指摘，且乱世而居华屋广厦，尤非所宜。望沅弟慎之慎之，再四思之。祠堂样子，余亦画一个付回，以备采择。

一、科一喉痛，系先天火亏之症，宜服参茸姜附等药，庶可一劳永逸，切不可服凉药，千万记之。余不一一，顺问近好。

兄国藩手草 元旦

195 . 读弟信不动心者必不友

沅、季弟左右：

二十夜接弟十九日信。知援贼已到后濠之外，弟乃因南岸之事十分焦灼。余不能派兵援救弟处，反以余事分弟心思，损弟精神。此兄之大错。北当援贼围逼，后壕十分紧急之时，不顾自己之艰危，专谋阿兄之安全，殷殷至数千言。昔人云：“读‘出师表’而不动心者，其人必不忠；读‘陈情表’而不动心者，其人必不孝。”吾谓读弟此信而不动心者，其人必不友。余定于二十四日拔管起程。二十九日准至东流，即在舟次居住，以答两弟之意。弟从此安心做事，不可挂念南岸也。闻盛南表弟于十八夜回营，此心略慰。十九夜之黑，二十早之雾，殊为可虑。过此两日，守事当少有把握。枞阳坝成后，桐城之贼由练潭来，尚隔水否？

此间各路，平安之至。景德镇之贼业已退净，不知其全由婺源回徽乎？抑尚在乐平与左、鲍相持乎？然该镇贼退，则祁门粮路业已通矣。两弟千万放心。兄移驻东流，祁、黟、休各军仍留此间紧守不动，不能多带兵勇救援弟处，惟弟应该之，亦实无强兵可带也。顺问近好。

来勇二人各赏翎一支、银四两，留此少停片时，此信另派亲兵及云岩亲兵送去。

三月二十一日辰刻

196 . 痛悉兰姊仙逝

澄弟左右：

二月初十日，在金陵沅弟营中接弟正月二十日信，痛悉兰姊于十四日仙逝。同产九人，二月之内，连遭季弟与伯姊之戚，从此只存吾等四人。抚今追昔，可胜伤恸。又闻临三外甥哀毁异常。其至孝可敬，其体弱又可怜。怕姊遗命不令长子入营，自当谨遵。吾即日当寄银二百两，料理伯姊丧事，即以为临三、临八甥家用之一助。

余于二月初六日抵金陵，在沅弟管中住五日，十一日仍回舟次。沅弟送至舟中，同住三日。俟风息即行西旋，周历芜湖、金柱关、无为州等处，再行回省。鲍春霆于二月初一日大战，将围管之贼击退，乘胜攻克西河、小淮窑、湾沚等贼巢十余处。自去秋以来，奇险万状，竟得转危为安，各军稳如泰山，国之福也。

余身体平安，齿痛全愈。目下惟李世忠九洑洲、二浦危急，余无可虑。

二月十四日于金陵大胜关舟次

197 送家信赠品于弟

沅弟左右：

三日未接弟信，想各营均平安也。二日与南坡翁畅谈，其精神尚胜于吾辈，拟在此将米盐互市局章程议定即赴金陵。其江西办盐，余定之新章，南翁以为甚妥。昨日到家信一包，兹专人付弟处，又附送燕菜二匣，筠仙在浦口时所送物也。顺问近好。

国藩手草 九月初九日

198 告弟检点以杜小人之谗口

沅弟左右：

二十日接十五日酉刻信，二十一日接十七日信，具悉一切。弟于此等有畏慎而无怫郁，极慰极慰！老弟之意量运矣，先世之气脉长矣。

鲍军宜进东坝，二朱不宜进花津，均是均是。杜小舫文澜往年经郭雨三专函力保，去年又经晏彤甫函保，故余一见即器重之，许以驻汉口办督销局务。近日与南坡亦极水乳，南亦请以汉口督销局委之。南又与舫面订一切，虽未下札，然已不可反悔。其品望虽未必果翕舆论，然亦当稍优于金、许也。此次不回泰州，则系余面留之等候南坡，非渠恐破面皮也。许之条陈多有可采，候与南坡商之。

杨守炮船一事，弟之公牒甚为婉逊，即照弟所拟办理。末世好以不肖之心待人，欲媒孽老弟之短者，必先说与阿兄不睦。吾之常常欲弟检点者，即所以杜小人之谗口也。

何铣罚款断不放松，幸毋听谣言而生疑。上海兵骄而贼多，余深以为优。昨寄少荃信抄付弟阅。即问近好。

国藩手草 九月二十二日

199 . 兄弟皆处高明之地惟倍增敬慎

沅弟左右：

十一二日连接初六、初九等日信，具悉一切。

南坡翁至弟处，吾意必盘桓终旬，何以仅住一日即行，岂议论偶有不合邪？吾十二日奏留南翁一片，措语极为平淡，不知何以上干谴责？南翁声名之坏，在浙江夷务、吉安军务之时，其在江苏州县并无所谓狼藉，而近日亦无所谓贪横。人言可畏，动彻天听。乃不发于寄云保三品卿之时，而发于余奏留之时，颇不可解。古诗云“美服患人指，高明逼神怒”，吾兄弟皆处高明之地，此后惟倍增敬慎而已”

湖熟、岔镇处处得手，高淳、东坝次第克复，广德亦有投诚之信，事机甚为顺利。而各省将帅似存意见，此中消息，恐终无灭贼之期。

皖岸盐务，即照弟所拟札刘履祥专办。惟每年四十三万二千串十八万两，必须销七万引，殊无把握。

弟两次信称解到银钱感激涕零，措辞大为失当。万庆来此，所送之礼过厚。兄弟中无璧还之理，以后望弟莫多送，宜崇俭也。顺问近好。

兄国藩手草 十月十三日

200 慰贺纪梁侄新入仕途

澄、沅弟左右：

十二月二十一日胡正九到，接两弟信，系十一月二十七八所发，具悉一切。沅信言二十七日有函至省，托排单驿递，却未见到。腊月二十五日接沅腊八日省排递之信，得悉纪瑞侄业已完娶，新妇高大，各宅清吉，东阳公亦已安葬，极慰极慰。

此间诸事平安。秦淮挑浚，年内或可毕工。两主考差囊各三竿外，户部例发途费五百亦在此支领，一切均从其厚。定于明日二十六起程。正主考回京，副主考请假回浙省基。昭忠祠亦于年内修毕，新岁开祭。周稚威所兑百金，业交周世澄领去。

纪梁侄新入仕途，可慰可贺。拟写古人格言挂屏一付，以作贺礼，不知正月可交卷否。如贺礼太迟，可函催也。顺贺新祺。

十二月二十五日

201 . 勿让人讥笑吾家势利

澄弟左右：

日内未接来信，想各宅平安。为兄自二十五日奉入京陛见之命，二十六日寄一信，今纪泽儿来营，随侍进京。初三日因渠体气素弱，道途太远，又寄一信上之，令其无庸来豫。想两信皆呈弟览矣。

近日军情，西股张总愚城陕西二华一带。余檄霆军赴秦，又调老湘营驻防陕、洛。东股已过沙河，将由光、固窜鄂。现调淮军跟追，冀与鄂兵夹击，不知果有裨否。

得弟十月初三之信，知初二申刻上岸，竟得免于大难。吉人天相，万事命喧，世上纷纷争夺，果何益哉？纪渠之事，花银未免太多，当具呈之时，曾否禀告弟处？渠意以为不具一呈，则将来纪渠进京之时，部中必将谕旨瞒住，皇上必不认帐耶。若并未与弟说明，此人似不能不参责示惩。纪泽等在省，何以须避贺家妇女？余意贺家昔盛今衰，吾家姻事虽断，似不可过于冷落，使人讥为势利之见。弟以为然否？余详十月日记中。顺问近好。

十一月初五日

202 询弟仍修家谱否

澄、沅弟左右：

连接四月二十一、八日来书。金另有复信。兹有商者：江西义宁州武宁县有本家曰曾承恩曰崇实曰位兰曰启祥曰维新者，自江西二千里来此，携有湖南省曾氏谱局公启一纸，令渠等携谱至余处呈览(启旧金陵家大人处)，限五月至局修谱云云。其启不知发自何人(系刻的，余抄一份寄弟看)？其局设于何处？岂宁乡衍咏公之后人至今尚领谱局耶？曾承恩等意欲至湖南一寻宗支而笃族谊。余不知局之所在，只得写信与弟。弟可将谱局指示，听渠等前去。联谱与否，由渠自酌而已。余亦无以相赠，写匾一方、对二付，聊答远来之意。

余家修谱已三十年，近日须续修否？如再续修，则为字辈宜仍旧不改，不可使兴字辈与兴字辈混，孙夺祖名也。上字改毓字，国字改传字，则无不可耳。余不多及，即问近好。

兄国藩手具 五月初十日

203 为弟书铭旌闻檀香甚烈殊为可异

沅弟左右：

南云已抵无为州，自无遽回金陵之理。春霆至黄麻渡，回高祖山老营。据报黄麻渡之下小淮窑地方被贼占据，水运又已不通，恐其再窜三山、繁昌，梗我陆运，则大局去矣云云。余以鲍军久困该处，军心涣散，逃亡相继，实深忧灼。拟令南云三营再由无为南渡，会合周、吴、罗、朱等营痛剿一次，或剿湾沚，或剿石。两处能打开一处，鲍军乃有生机。临阵打仗，则以刘南云为主；事前布置，则以厚庵为主。不知办得到否？赶得及否？望弟细心筹度，与厚庵、南云、竹庄及诸将商之。

昨日为季弟写铭旌，自外入室，闻檀香甚烈，意戈什哈等焚之，以致诚敬。乃至写毕一间，并无人焚香者，殊为可异。

阅邸钞，何根云已正法。本日接寄谕，胜克斋又革职拿问矣。

十二月初一日

204 遣散勇次序不可凌乱

沅弟左右：

初七日接正月二十六日来缄，初九日接初五夜一缄，具悉一切。

连日风雨严寒，气象愁暗，便似咸丰十年二月光景，深为疑悚，不知弟体气何如？各营近状何如？城贼出外猛扑否？上游窜江西之贼，虽经席、韩迭获胜仗，闻有一小股由铅山之湖坊内窜，恐遂将窜扰抚、建，殊为焦虑。

麓轩于初九日上轮船，拟在河下等候二日，以待鹤侪之至。南城叟初二日辞行，而至今未开，则为风所阻也。

金陵果克，弟之部曲断不能全数遣散。一则江西是管辖之境，湖南是桑梓之邦，必派劲旅防御保全。二则四五万人同时遣撤，必无许多银钱。而坐轿者愿息，抬轿者不肯，其中又有许多人情物理层次曲折。勇退是吾兄弟一定之理，而退之中次序不可凌乱，痕迹不可太露。待兄弟相见，着着商定，再行办理。

近奉一寄谕，似宜稍密，抄寄弟阅。吴道代理宁藩。吴有一咨，乔却未先禀也。顺问近好。

国藩手草 二月十一日

205 诸事清妥余兄弟进退有余裕

澄、沅弟左右：

余经手事件，只有长江水师应撤者尚未撤、应改为额兵者尚未改暨报销二者未了而已。今冬必将水师章程出奏，并在安庆设局办理报销。诸事清妥，则余兄弟或出或处，或进或退，绰有余裕。

近四年，每年寄银少许与亲属三党，今年仍循此例。惟徐州距家太远，勇丁不能携带，因写信与南坡，请其在盐局兑汇，余将来在扬州归款。请两弟照单封好，用红纸签写菲仪等字，年内分送。千里寄此毫毛，礼文不可不敬也。

十一月十六日

206 精于八股兼善讲解者请教训子弟

澄、沅弟左右：

二十一日复沅弟信一件，二十二日接沅四月初五之信，二十三日接澄弟三月二十四由县驿递之信，具悉一切。

鲍军由黄梅赴光、固，路险而远，不如由巴河赴光之便，已分别咨行矣。弟或函邀春霆赴省一会，其部落则禁之上省。鄂省饷本极绌，然奏拨霆军之每月二万却不可少，望弟与官相竭力图之。

吾邑考棚增修，可多坐千人，甚善甚慰。富塿兴工，何以须至重阳始毕？得无太华丽否？纪泽母子等若以五六月到家，应即在大夫第同住，以符沅弟之初议。若纪瑞侄母子赴鄂，则全行借住，听两弟示知纪泽遵办。全眷回湘后，纪鸿儿留鄂读书。黄宅生若偕瑞侄至鄂。尤可共事一塾，目下总以操习墨卷试帖为第一义。科一、科四均作秀才，岂可昧于八股一道？沅弟博访两湖有精于八股兼善讲解者，不妨多请一位教训子弟。湖北有胡东谷孝廉，八股好手，可否请入鄂署？乞酌之。

此间贼情，本日有一折一片另行咨达。澄弟所寄茶叶收到，谢谢。顺问近好。

四月二十五日

207 . 弟勿有拒谏之意

沅弟左右：

四月二十八日接十一日来信，五月初二日又接四月十八之函，具悉一切。纪泽母子已到阳逻，纪瑞母子十二日已自湘起程。兄弟宦游在外，眷属得以团聚，亦足喜也。

此间写信尚甚稀。但自到济宁，每月仅有专勇信一次，遂觉比往时大减。以后如弟来缄之指，每隔十日寄日记一次并信排递弟署，而每月初四仍专勇送信并日记至湘乡，俾两处皆知余起居之详。弟信亦不必太密，仍以十日一封为率，或有他事则加一封，无事亦不可减。不仅说军务饷务之大政，即幕友、家不及亲友、相从将弁、投效者多说几句，司道风气、属僚贤否亦可略述一二，以广见闻。余之日记详于小而略于大，弟则互有详略可也。

弟现募步队万二千人、马队千余人，与余初次函商相符，以后不必再行添募，恐饷项不继。所裁官相之勇仅发数成，所添弟部之勇必须作饷，一撤一招之际，厚薄悬殊，相形见绌，营头太多，必生怨望。厚庵之优待楚勇，薄视甘兵，逐有三月三日之变，可为前车之鉴。

四月十五研发进扎应山一折，字句间有不妥。以后宜请一二人斟酌，非十分虚心，人不肯轻说一字。四月十一日弟函颇有拒谏之意。施之于兄，兄当如常规诲；施之于他人，则拒人千里矣。慎之慎之。复问近好。

正封缄间，接云仙信，并抄渠与左信及保举人才一疏。其与左信，计筠老必另抄寄弟处，兹将筠信并荐疏抄去一览。意臣所拟咨稿可照发也。又行。

五月初三日

208 泽儿何必急于乡试

澄侯、温甫、子植、季洪四位老弟足下：

正月初八接到十二月初旬父大人所发二信，皆系在县城发者，不胜忻慰。纪泽儿订婚之事，予于十二月连发二信，皆言十月十二所发之信言嫌贺女庶出之说系一时谬误，自知悔过，求诸弟为我敬告父亲大人，仍求作主，决意对成，以谐佳偶。不知此二书俱已到家否？细思贺家簪纓门弟，恐闻有前一说，惧其女将来过门受气，或因此不愿对亦未可知，果尔，则澄弟设法往省城，坚托罗罗山、刘霞仙二君将内人性情细告贺家，务祈成此亲事，不致陷我于不孝之咎。

澄弟与朱尧阶结亲，余甚欢喜。我朋友最初之交无过于尧阶者，盖今日姻缘，已决于二十年以前矣。魏家亦我境第一诗书人家，魏栋尚未到京，容当照拂一切也。植弟买笔事，总在春间寄南，以备科考之用。若科考不在前三名，则不宜考优，无使学政笑我家太外行也。《关帝觉世经》刷五百张，须公车回南乃可付归，《阴鹭文》《感应篇》亦须公车南去乃可带。澄弟戒烟正与阿兄同年，余以壬寅年戒烟，三十二也，澄弟去年亦三十二也。戒酒似可不必，三两杯以养血未始不可，但不宜多耳。去年带回父大人之干尖子皮褂，不知已做成否？若未做，可即做成，用月白缎子为面。今年当更寄白风毛褂回来，敬送与叔父大人。若父、叔二大人同日出门，则各穿一件；若不同出门，则薄寒穿干尖子，盛寒穿白风毛。予官至二品，而

堂上大人衣服之少如此，于孝道则未尽，而弥足以彰堂上居家之俭德矣。

京寓大小平安。癖疾未发。文任吾先生(希范)于正月六日上学。其人理学甚深，今年又得一贤师。植弟劝我教泽儿学八股，其言甚切至有理，但我意要《五经》读完始可动手。计明年即可完经书，做时文尚不过满十四岁，京师教子弟十四岁开笔者甚多。若三年成篇，十七岁即可作佳文。现在本系萌生，例不准赴小考。拟令照我之样，二十四岁始行乡试，实可学做八股者十年。若稍有聪明，岂有不通者哉？若十九、二十即行乡试，无论万万不中，即中得太早又有何味？我所以决计令其明秋始学八股，二十四始乡试也。九弟为我禀告父大人，实不为迟，不必挂虑。

余近来常思归家，今年秋间实思挈眷南旋，诸弟为我禀告堂上大人，春间即望一回信。九弟进京之说，暂不必急急。同乡诸家如故。余容后日续寄。

兄国藩手草 正月初九日

209 出殡之事一切皆从俭约

字谕纪泽儿：

予自在太湖县闻讣后，于二十六日收家信一号，托陈岱云交安徽提塘寄京；二十七日写二号家信，托常南陔交湖北提塘寄京；二十八日发三号，交丁松亭转交江西提塘寄京，此三次信皆命家眷赶紧出京之说也。八月十三日在湖北发家信第四号，十四日发第五号，二十六日到家后发家信第六号。此三次信皆言长沙被围，家眷不必出京之说也。不知皆已收到否？

余于二十三日到家，家中一切皆清吉，父亲大人乃叔父母以下皆平安。余癖疾自到家后日见痊愈，地方团练，我曾家人人皆习武艺，外姓亦多善打者，土匪决可无虞。粤匪之氛虽恶，我境僻处万山之中，不当孔道，亦断不受其蹂躏。现奉父亲大人之命，于九月十三日权厝先妣于下腰里屋后山内，俟明年寻有吉地再行改葬。所有出殡之事，一切皆从俭约，惟新做大杠，六十四人异请，给费钱十余千，盖乡间木料甚贱也。请客约百余席，不用海菜，县城各官一概不请。神主即请父亲大人自点。

丁贵自二十七日已打发他去了，我在家并未带一个仆人，盖居乡即全守乡间旧样子，不参半点官宦习气。丁贵自回益阳，至渠家住数日，仍回湖北为我搬取行李回家，与荆七二人同归。孙福系山东人，至湖南声音不通，即命渠由湖北回京，给渠盘缠十六两，想渠今冬可到京也。

尔奉尔母及诸弟妹在京，一切皆宜谨慎。目前不必出京，

待长沙贼退后余有信来。再行收拾出京，兹寄去信稿一件，各省应发信单一件，尔可将信稿求袁姻伯或庞师照写一纸发刻。其各省应发信，仍求袁、毛、黎、黄、王、袁诸老位妥为寄去。余到家后，诸务丛集，各处不及再写信，前在湖北所发各处信，想已到矣。

十三日申刻，母亲大人发引，戌刻下窆。十二日早响鼓，已刻开祭，共祭百余堂。十三日正酒一百九十席，前后客席甚多。十四日开口，客八人一席，共二百六十余席。诸事办得整齐。母亲即权厝于凹里屋后山内，十九日筑坟可毕。现在地方安静。闻长沙屡获胜仗，想近日即可解围，尔等回家，为期亦近矣。罗邵农(芸皋之弟)至我家，求我家在京中略有分润渠兄。我家若有钱，或十两、或八两。可略分与芸皋用。不然，恐同县留京诸人有断炊之患也。书不能尽，余俟续示。

涤生手示 九月十八日

210. 凡谕旨章奏付至家中者务宜好为藏去

澄、温、沅、季老弟左右：

初九日芝三到省，接奉父大人手谕及澄、季、芝生各信，具悉一切。余于初八日具折谢恩，并夹片三件，兹一并抄录付回。凡谕旨、章奏等件付至家中者，务宜好为藏去。我兄弟五人，无一人肯整齐好收拾者，亦不是勤俭人家气象。以后宜收拾完整，可珍之物固应爱惜，即寻常器件亦当汇集品分，有条有理。竹头木屑，皆为有用，则随处皆取携不穷也。温弟在此住旬余，心平气和，论事有识，以后可保家中兄弟无纷争之事，余在外大可放心。

李筱泉之家眷欲寄居湘乡。一则省城虽防守甚严，而时时有寇至之虑，一则寓公馆比之居乡其奢俭相去甚远。渠托江采五在中沙等处，又托余在二十三四都等处寻觅住居（渠遣一人来乡同觅，先至江采五处，后至我家）。澄弟等为之留心。或在离我家二三十里之区择一善地，以省俭为主，渠光景甚窘也。余再三辞之，言我家尚难自保，且迁徙而避，又焉能庇及他人？渠意总欲居乡，缓急尚可藏匿山穴；至土匪抢劫，渠本无可抢云云。余不能再辞，澄弟可一为照拂之。

鲍提军于初八日出省至辰州住，塔智亭初十拟至岳州。余不一一，即请近佳。

兄国藩手草 五月初四日巳刻

211. 勤则兴懒则败

澄侯、温甫、子植、季洪老弟足下：

父大人自县还家后，又接一信，知合家清吉，甚慰甚慰。

此间发探卒数十人至常德，龙阳探听，均言常德已于十六日失守，省局及各处探信众口一词，而桃源二十三日尚有请兵禀帖来省。桃源去常六十里，不应郡城失陷一无所闻，大约常德此时尚未失守。现在遣周凤山带道州新四勇一千六百前往，李辅朝带楚勇一千、胡咏芝带黔勇六百、新宁赵令带楚勇千人驰往，合之贵州兵一千，并常德本城二千，共六七千之多，兵力实不为单。唯中隔河水四渡，不知各兵能过至常否？

澧州西接荆之贼，南接常德之贼，而蒋家之富久为贼所垂涎，实属可危。塔提军于二十二日在新墙打一胜仗，夺获贼船四十七支，夺得木城一座。现驻扎新墙之北，离岳州尚五十里，通城之贼与江老四之楚勇相持月余。林秀三因声名不好(人人言其勇骚扰异常)撤回省城，自通城、平江之官绅庶民及省城之官员，无不說秀三坏话者。毁誉之至，如飘风然，蓬蓬然起于北海，蓬蓬然入于南海，而不知其所自，人力固莫能挽回也。

水师战船，省河所修葺及衡城所新造者，皆精坚可爱，比去年者好得三倍，拟于初十间令褚、夏、杨、彭起行赴常德剿办，是为头帮；余待广西水勇到，一同起行为二帮；陈镇台七月初起行为三帮。现在发往各处者兵勇共二万人，饷项十分支绌，幸广东解银十二万，近日可到，略有生机。罗罗山初三可

到省。芝生之信，罗山一到即交，当可速耳。

儿侄辈总须教之读书，凡事当有收拾，宜令勤慎，无作欠伸懒漫样子。至要至要。吾兄弟中惟澄弟较勤。吾近日亦勉为勤敬。即令世运艰屯，而一家之中勤则兴，懒则败，一定之理。愿吾弟及吾儿侄等听之省之。付回参茸丸一瓶，即颜翼臣、王仲山所作者。父大人能服更好，若不相宜，叔父及家中相宜者服之可也。

国藩手草 六月初二日

212. 三女许字意欲择一俭朴耕读之家

澄侯四弟左右：

初六日俊四等来营，奉到父大人谕帖并各信件，得悉一切。

弟在各乡着团阅操，日内计已归家。家中无人，田园荒芜，堂上定省多阙，弟以后总不宜常常出门。至嘱至嘱。罗家姻事，暂可缓议。近世人家，一入宦途即习于骄奢，吾深以为戒，三女许字，意欲择一俭朴耕读之家，不必定富室名门也。杨子春之弟四人捐官者，吾于二月二十一日具奏，闻部中已议准，部照概交南抚。子春曾有函寄雪芹，似已领到执照者，请查明再行市闻。

长夫在大营，不善抬轿，余每月出门不过五六次，每出则摇摆战栗、不合脚步。兹仅留刘一、胡二、盛四及新到之俊四、声六在此，余俱遣之归籍。以后即雇江西本地轿夫，家中不必添派人来也。

此间军务，建昌府之闽兵昨又挫败，而袁州克复，大局已转，尽可放心。十月内饷项亦略宽裕矣。

十一月初七日

213. 沅弟之字不可抛荒

澄侯、沅浦、季洪三弟左右：

二十八日发第五号信，告温弟寻获遗骸事。三十日玉四等来，得澄、沅两弟及纪泽三信，得知一切。叔父大人病势稍加，得十三日优恤之旨，不知何如？顷又接十九日来缄，知叔父病已略愈，欣慰欣慰！然温弟灵柩到家之时，我家祖宗有灵，能保得叔父不添病，六弟妇不过激烈，犹为不幸中之一幸耳。

此间兵事，凯章在景镇相持如故，所添调之平江三营、宝勇一营均已到防，或可稳扎。浚川在南康之新城墟打一胜仗，夺伪印四十三颗、伪旗五百余面，皆解至建昌，甚为快慰！惟石达开尚在南安一带，悍贼亦多，不知究能扫荡否？吉中营以后常不离余左右，沅弟尽可放心起屋起祠堂。

沅弟言“外间訾议，沅自任之”。余则谓外间之訾议不足畏，而乱世之兵燹不可不虑。如江西近岁凡富贵大屋无一不焚，可为殷鉴。吾乡僻陋，眼界甚浅，稍有修造，已骇听闻，若太闳丽，则传播尤远。苟为一方首屈一指，则乱世恐难幸免。望弟再斟酌，于丰俭之间妥善行之。改葬先人之事，须将求富求贵之念消除净尽，但求免水蚁以安先灵，免凶煞以安后嗣而已；若存一丝求富求贵之念，必为造物鬼神所忌。以吾所见所闻，凡已发之家，未有续寻得大地者。沅弟主持此事，务望将此意拿得稳、把得定。至要至要！

纪泽姻事，以古礼言之，则大祥后可以成婚(再期为大祥)；

以吾乡旧俗言之，则除灵道场后可以成婚。吾因近日贼势尚旺，时事难测，颇有早办之意。牧云定五月二十七，外姑又以毒月为嫌，则改至六月为妥。盖以先考妣神主尚在中厅供饭，不便行礼也。纪泽前两稟请心壶抄奏折，尽可行之，吾每月送脩金二两可耳。应抄之奏，不知家中有底稿否？每抄一篇，可寄目录来一查，注明月日。纪泽之字近日大退，较之七年二三月间远不能逮。大约握笔宜高，能握至管顶者为上，握至管顶之下寸许者次之，握至毫以上寸许者亦尚可习得好字出；若握近毫根，则虽写好字，亦不久必退，且断不能写好字。吾验之于己身，验之于朋友，皆历历可征。纪泽以后宜握管略高，纵低亦须隔毫根寸余。又须用油纸摹帖，较之临帖胜十倍矣。

沅弟之字不可抛荒，如温弟哀辞、墓志及王考妣、考妣神道碑之类，余作就后，均须沅弟认真书写。”宾兴堂记”首段未惬，待日内改就，亦须沅弟写之。沅弟虽优危忙乱之中，不可废习字工夫，亲戚中虽有漱六、云仙善书，余因家中碑版，不拟请外人书也。

玉四来时，曾纪芳、唐介文未到。安五、有四来此，余因未收留。本日接澄弟言玉四荒唐之事，已饬委员重责之矣。近地勇夫颇不易于约束，余音不欲多用，正为此故。胡长发亦未收作戈什哈，观其规矩太生，非戈什哈之才耳。顺问近好。

二月初三日

214. 戒傲戒惰保家之道也

澄侯四弟左右：

自十一月来奇险万状，风波迭起，文报不通者五日，饷道不通者二十余日。自十七日唐桂生克复建德，而皖北沅、季之文报始通。自鲍镇二十八日至景德镇，贼退九十里，而江西饶州之饷道始通。若左、鲍二公能将浮梁、鄱阳等处之贼逐出江西境外，仍从建德窜出，则风波渐平，而祁门可庆安稳矣。

余身体平安。此一月之惊恐危急，实较之八月徽、宁失守时险难数倍。余近年在外，问心无愧，死生祸福，不甚介意，惟接到英吉利、法兰西、美利坚各国通商条款，大局已怀，令人心灰。兹付回二本，与弟一阅。时事日非，吾家子侄辈总以谦勤二字为主，戒傲戒惰，保家之道也。即问近好。

国藩手草 十二月初四日

215. 惊悉鼎二侄殒逝

澄侯四弟左右：

二十七日接第十五日信，惊悉鼎二侄殒逝，不胜悼惜！后辈尚只九人，正嫌太少，兹乃遽弱一个。三年之内，家中多故，殊难为怀。弟目下总理团务，万事辛劳之际，尚须宽心，加意保重。

此间派张凯章一军回援，二十六日在景镇拔营，至七月底始可还湘。九弟归家办改葬事，亦七月可到。吾拟于七月七日起程，由湖北至宜昌。季弟已由湖口经过，将由景镇来抚州。日内尚未到，颇不放心。幕府次青诸君多疟疾。吾眼蒙亦未愈，不能作小字。顺问近好。

六月三十日

216. 弟若不得志不妨来京广耳目豁心胸

男国藩跪禀父母亲大人万福金安：

六月二十一日，男友第八号家信，不审到否？所言头上生癣，身上生热毒云云。近日请医细看，头上亦非癣也，皆热毒耳。用生地煮水长洗，或用熬浓汁厚涂患处即愈，现在如法洗涤，大有效验。盖本因血热而起，适当郁蒸天气而发，生地凉血而滋润，所以奏功。特此告知，望大人放心。寓中大小平安。陈岱云之妾于二十二日到京。其幼子寄在男处养者，渠已于二十四日接归自养。同乡各家并皆如旧。

李双圃先生(象鹄)由贵州藩台进京，奏旨以三品京堂候补。虽在渠为左迁，而湖南多一京官，亦自可喜。

今年考试，想四位老弟中必有人洋者。然而事正难逆料，万一皆不得售，则诸弟必牢骚抑郁愤懑不平，此亦人之情也。如果郁忧，则问四弟、六弟、九弟三人中或有愿进京者，不妨来京一游。可以广耳目、豁心胸，可以叙兄弟之乐，亦男所甚望也。如诸弟不愿来，则不必强，恐其到京而急于思归也。如有一位入学者，则亦不必，恐家中既办印卷，又办途费，银钱艰窘也。如皆不进而诸弟又甚愿来，则望大人张罗途费，毋阻其发愤之志而遏其抑郁之气，幸甚。如季弟愿来，则须有一兄同来乃妥。

邓铁松病势日危，恐不复能回南。屡劝之勿服药，渠皆不听，今之病，皆药误之也。

去年大人教男写字不宜斜脚，男近日已力除此弊。自去年六月起，无论行楷大小字皆悬腕悬肘，是以力足而不精致，伏求大人教训。

男谨稟 七月初一

217. 纪泽颇思南归

男国藩跪禀父母亲大人万福金安：

十一月初一发十六号家信，内有覃恩条例单，不知收到否？男头上疮癣至今未愈。

近日每天洗二次，夜洗药水，早洗开水。本无大毒，或可因勤洗而好。闻四弟言家中连年生热毒者八人，并男共九人，恐祖坟有不洁净处，望时时打扫，但不可妄为动土，致惊幽灵。

四弟、六弟及儿孙妇男女等皆平安。男近与同年会课作赋，每日看书如常，饮食起居如故。四弟课纪泽读，师徒皆有常程。六弟文章极好，拟明年纳监下场，但现无银，不知张罗得就否。

同乡唐镜海先生已告病，明春即将回南。所著《国朝学案》一书，系男约同人代为发刻，其刻价则系耦庚先生所出。前门内有义塾，每年延师八人，教贫户子弟三百余人。昨首事杜姓已死，男约同人接管其事。亦系集腋成裘，男花费亦无几。

纪泽虽从四弟读书，而李竹屋先生尚在男宅住。渠颇思南归，但未十分定计耳。

诰封二轴，今年不能用玺，明年乃可寄回。

肖辛正处，已寄鹿胶一斤、阿胶半斤与他。家中若需鹿胶、阿胶，望付信来京，以便觅寄。

男谨禀 十一月二十日

218. 赴圆明园正大光明殿考试

男国藩跪禀父母亲大人万福金安：

四月十七日，男发第八号家信，言男一定考差。五月初二日赴圆明园，初六日在正大光明殿考试，共二百七十人入场，湖南凡十二人。首题“无为小人儒”，次题“任官惟贤才”一节，诗题“灵雨既零”得“霑”字。男两文各七百字，全卷未错落一字。惟久病之后两眼朦胧，场中写前二开不甚得意，后五开略好。

今年考差，好手甚多，男卷难于出色。兹命四弟誉头篇与诗一首寄回，伏乞大人赐观。如男在场中不敢了草，则知男病后精神毫无伤损，可以放心，知男考卷不得意，则求大人不必悬望得差。堂上大人不以男病为忧，不以得差为望，则男心安恬矣。

男身上癖疾，经张医调治，已愈十之七矣。若从此渐渐好去，不过闰月可奏全效。寓中大小平安。男妇有梦熊之喜，大约八九月当生。四弟书法日日长进。冯树堂于五月十七到京，以后纪泽仍请树堂教，四弟可专心读书。六弟捐监，拟于本月内上兑，填写三代履历，里邻户长一切，男自斟酌，大人尽可放心。纪泽书已读至“浩浩昊天”，古诗已读半本，书皆熟。三孙女皆平安。

同乡各家皆如常，惟湘阴易问斋(文浚)丁限。湖南在京小考入学者六人，皆系好手。黄玉斋小京官六年报满，三月已升

主事。杜兰溪四月升员外郎，今年亦与考差。

京师今年久旱，屡次求雨，尚未优渥，皇上焦思。未知南省年岁何如也？

男谨禀 五月十七日

219. 仰承祖上余荫六弟成就功名

男国藩跪禀父母亲大人万福金安：

五月十八日发第九号家信，内有考差诗文。男自考差后，癖疾日愈，现在头面已不甚显矣。身上自腰以上亦十去七八，自腿以下尚未治。万一放差，尽可面圣谢恩。但如此顽病而得渐好，己为非常之道，不敢复设妄想矣。

六弟捐监，于五月二十八日具呈，闰月初兑银，二十一日可领照，六月初一日可至男子监考到，十五即可录科。仰承祖父、叔父之余荫，六弟幸得成就功名，敬贺敬贺。

男身体平安，现补气服汤药，内有高丽参、焦术。男妇及孙男女四人并如常。四弟自树堂来教书之后，四弟功课益勤。六弟近日文章虽无大进，亦未荒怠。余俟续呈。

男谨禀 闰五月十五日

220. 用吹手执事接诰封数里

男国藩跪禀父母亲大人万福金安：

闰五月二十六日，男发家信第十一号，想已收到。邹云陔出粤西差，男寄有高丽参半斤、鹿胶一斤，膏药三十个、眼药三包、张湘纹金顶一品。大约七月初可到省城，家中月半后可接到也。

六弟六月初一日在国子监考到，题“视其所以”，经题“闻善以相告也”二句。六弟取列一百三名。二十五日录科，题“齐之以礼”，诗题“荷珠”得“珠”字，六弟亦取列百余名。两次皆二百余人入场。

男等身体皆平安，男妇及孙男女皆安泰。今年诰封轴数甚多，闻须八月始能办完发下。男于八月领到，即恳湖南新学院带至长沙。男另办祖父母寿屏一架，华山石刻陈搏所书寿字一个，新刻诰封卷一百本，共四件。皆交新学院带回，转交陈岱云家。求父亲大人于九月二十六七赴省。邹云陔由广西过长沙不过十月初旬。渠有还男银八十两，面订交陈季牧手。父亲或面会云陔，或不去会他，即在陈宅接银亦可。十月下旬新学院即可到省。渠有关防，父亲万不可去拜他，但在陈家接诰轴可也。若新学院与男素不相识，则男另觅妥便寄回。亦在十月底可到省。最迟亦不过十一月初旬。父亲接到，带归县城，寄放相好人家或店内，至二十六日令九弟下县去接。二十八日夜，九弟宿贺家坳等处。二十九日祖母大人八十大寿，用吹手执事

接诰封数里。接至家，于门外向北置一香案，案上竖圣旨牌位，将诰轴置于案上，祖父母率父母望北行三跪九叩首礼。

寿屏请肖史楼写。史楼现未得差，若八月不放学政，则渠必告假回籍，诰轴托渠带归亦可也。一切男自知裁酌。兹寄回黄芽白菜子一包查收。余俟续呈。

男谨稟 七月初三日

221. 特命四弟专程送诰

男国藩跪禀父母亲大人万福金安：

九月十九日发第十七号信，十月初五发十八号信，谅已收到。十二三四日内诰轴用宝，大约十八日可领到。同乡夏阶平吏部(家泰)丁内艰，二十日起程回南。男因渠是素服，不便托带诰轴，又恐其在道上拜客，或有耽搁。祖母大人于出月二十九大寿，若赶紧送回，尚可于寿辰迎接诰轴。是以特命四弟束装出京。专送诰轴回家，与夏阶平同伴，计十一月十七八可到汉口。汉口到岳州不过三四天，岳州风顺则坐船，风不顺则雇轿，五天可到家。四弟到省即专人回家，以便家中办事，迎接诰命。

第凡事难以逆料，恐四弟道上或有风水阻隔，不能赶上祖母寿辰亦未可知。家中做生日酒，且不必办接诰封事。若四弟能到，二十七日有信，二十八办鼓手香亭，二十九接封可也。若二十七无四弟到省之信，则二十九但办寿筵，明年正月初八接封可也。倘四弟不归而托别人，不特二十九赶不上，恐初八亦接不到。此男所以特命四弟送归之意耳。

四弟数千里来京，伊意不愿遽归。男与国子监祭酒车意圆先生商议，令四弟在国子监报名，先交银数十两，即可给予顶戴。男因具呈为四弟报名，先缴银三十两，其余俟明年陆续缴纳。缴完之日，即可领照。男以此打发四弟，四弟亦欣然感谢，且言愿在家中帮堂上大人照料家事，不愿再应小考。男亦颇以

为然。

男等在京身体平安，男妇生女后亦平善。六弟决计留京。九弟在江西有信来，甚好。陈岱云待之如胞弟，饮食教诲，极为可感，书法亦大有长进，然无故而依人，究似非官，男写书与九弟，嘱其今年借郭筠仙同伴回家，大约年底可到家。男在京一切用度自有调停，家中不必挂心。

男谨稟 十月十五日

222. 欲迁祖母之坟

孙男国藩跪禀祖父大人万福金安：

去年十二月十七发第二十二号信并挽联一包，朱心泉诰命一轴，交徐玉山太守带交肖辛五处。想三月可到。又于二十日发第二十三号信交折弁，想二月可到。新正十五日，接到家中十一月十九所发信，敬悉大人之病已愈大半。不知近日得痊愈否？孙去冬信言须参用化痰之药，不知可从否？

祖母已于十二月初十安葬，甚好甚好，但孙有略不放心者。孙幸蒙祖父福佑，忝居卿大夫之末，则祖母坟茔必须局面宏敞。其墓下拜扫之处须宽阔，其外须建立诰封牌坊，又其外须立神道碑。木斗冲规模隘小，离阿太近，无立牌坊与神道碑之地。是以孙不甚放心，意欲从容另寻一地，以图改葬。不求富贵吉祥，但求无水蚁无凶险，面前宏敞而已。不知大人以为何如？若可，则家中在近境四十里内从容寻地可也。余俟续具。

孙谨禀 正月十七日

223. 只要天不管地不管伏案用功而已

男国藩跪禀父母亲大人礼次：

正月十五日接到父亲、叔父十一月二十所发手书，敬悉一切。但摺弁于腊月二十八在长沙起程，不知四弟何以尚未到省？

祖母葬地，易敬臣之说甚是。男去冬已写信与朱尧阶，请渠寻地。兹又寄信与敬臣。尧阶看妥之后，可请敬臣一看。以尧阶为主，而以敬臣为辅。尧阶看走后，若毫无疑义，不再请敬臣可也；若有疑义，则请渠二人商之（男书先寄去，若请他时，四弟再写一信去）。男有信禀祖父大人，不知祖父可允从否？若执意不听，则遵命不敢违拗。求大人相机而行。

大人念及京中恐无钱用。男在京事事省俭，偶值阙乏之时，尚有朋友可以通挪。去年家中收各项约共五百金，望收藏二百勿用，以备不时之需。丁、戊二年不考差，恐男无钱寄回。男在京用度自有打算，大人不必挂心。

此间情形，四弟必能详言之。家中办丧事情形，亦望四弟详告。共发孝衣几十件，殓祭几堂？远处来吊者几人？一一细载为幸。

男身体平安。一男四女，痘后俱好。男妇亦如常。

闻母亲想六弟回家，叔父信来，亦欲六弟随公车南旋。此事须由六弟自家做主，男不劝之归，亦不敢留。家中诸务浩繁，四弟可一人经理。九弟、季弟必须读书，万不可耽搁他。九弟、季弟亦万不可懒散自弃。去年江西之行，已不免为人所窃笑，

以后切不可轻举妄动。只要天不管地不管，伏案用功而已。男在京时时想望者，只望诸弟中有一发愤自立之人，虽不得科名，亦是男的大帮手。万望家中勿以琐事耽搁九弟、季弟，亦望两弟鉴我苦心，结实用功也。

男之癖疾近又小发。但不似去春之甚耳。同乡各家如常。刘月槎已于十五日到京。余俟续呈。

男谨稟 正月十八日

224. 万望总持大纲以细微事附之四弟

男国藩跪禀父母亲大人膝下：

十六夜接到六月初八日所发家信，欣悉一切。祖父大人病已十愈八九，尤为莫大之福。六月二十八日曾发一信，言升官事，想已收到。冯树堂六月十七日出京，寄回红顶、补服、袍褂、手钏、笔等物，计八月可以到家。贺礼耕七月初五日出京，寄回鹿胶、丽参等物，计九月可以到家。

四弟、九弟信来，言家中大小诸事皆大人躬亲之，未免过于劳苦。勤俭本持家之道，而人所处之地各不同。大人之身，上奉高堂，下荫儿孙，外为族邻乡里所模范。千金之躯，诚宜珍重。且男忝窃卿贰，服役已兼数人，而大人以家务劳苦如是，男实不安于心。此后万望总持大纲，以细微事附之四弟。四弟固谨慎者，必能负荷，而大人与叔父大人惟日侍祖父大人前，相与娱乐，则万幸矣。

京寓大小平安，一切自知谨慎，堂上各位大人不必挂念。余容另禀。

七月十八日

225. 近得次孙郭雨三欲妻之以女

男国藩跪禀父母大人礼安：

三月二十日，男发第五号家信。内言及长孙纪泽与桂阳州李家定亲之事，不审已收到否？男等身体平安。次孙于二十四日满月，送礼者共十余家。是日未请客，陆续请酒酬谢。男妇生产之后，体气甚好，所雇乳母最为壮健。华男在黄正斋家馆，诸凡如恒。

祖大人之病未知近日如何？两次折弁皆无来信，心甚焦急。兹寄加辽东人参五枝，重一两五钱。在京每两价银二十四两，至南中则大贵矣。大约高丽参宜用三钱者，用辽参则减为一钱；若用之太少，则亦不能见功。祖父年高气衰，服之想必有效。男前有信托江岷樵买全虎骨，不知已办到否？闻之医云，老年偏瘫之症，病右者，以虎骨之右年体熬胶医之；病左者，以骨之左半体熬胶医之，可奏奇效。此方虽好，不知祖大人体气相宜否？当与刘三爷商之。若辽参则醇正温和，万无流弊。

次孙体气甚壮。郭雨三（沛霖）欲妻之以女。雨三戊戌同年，癸卯大考二等第三，升右赞善。其兄用宾，壬辰翰林，现任山西蒲州府知府。其家教勤俭可风。其次女去年所生，长次孙一岁。与之结婚，男甚愿之，不审堂上大人以为何如？下次信来，伏祈示知。

又寄回再造丸二颗，系山东杜家所制者，杜家为天下第一有福之家，广积阴德。此药最为贵重，有人参、鹿茸、蕲蛇等

药在内，服之一无流弊，杜氏原单附呈，求照方用之。

欧阳沧溟先生谋衡阳书院一席，男求季仙九先生写信与伍府尊，求家中即遣人送至岳家为要。同乡周华甫(扬之)、李梅生(杭)皆于三月仙逝，余俱如故。男等在京，一切自知谨慎，伏乞堂上大人放心。

男谨稟 四月十四日

226. 气势团聚山水环抱者乃可寻地

男国藩跪禀父母亲大人礼安：

四月底接家中二月二十六所发书，五月初八又接三月二十九所发书，具悉一切。祖父大人病体未愈，不知可服虎骨胶否？

男在京身体如常。华男在黄家就馆，端节后仍于初八日上学。纪泽读“告子”至“鱼，我所欲也”，书尚熟。次孙体甚肥胖。四孙女俱平安，长孙女“论语”已读毕。家妇亦好。其余眷口俱如常。

前叔父信言知广彭姓山内有地有干田十亩。男思好地峰回气聚，其田必膏腴，其山必易生树木，盖气之所积，自然丰润。若饶田童山(山无草木曰童)，气本不聚，鲜有佳城，如庙山宗祠各山之童涸，断无吉穴矣。大抵凡至一处，觉得气势团聚山水环抱者，乃可以寻地，否则不免误认也。知广之地不知何如，男因有干田十亩之说，故进此说。祖母葬后，家中尚属平安，其他或尚可用。如他处买地，不必专买丈尺。若附近田亩在三四百千内者，京中尽可寄回。京中欠帐已过千金，然张罗尚为活动，从不窘迫，堂上大人尽可放心。余容续禀。

男谨禀 五月初十日

227. 竞相以女配纪泽

侄国藩谨禀叔父母大人福安：

八月十六日发第十三号家信，不审已收到否？九月初十日接到四弟、九弟、季弟等信，系八月半在省城所发者。知祖大人之病又得稍减，九弟得补廪，不胜欣幸！

前劳辛亥廉访八月十一出京，侄寄去衣包一个，计衣十件，不知已到否？侄有银数十两欲寄回家，久无妙便。十月间武冈张君经赞回长沙，拟托渠带。闻叔父为坍上公屋加工修治，侄亦欲寄银数两，为叔父助犒赏匠人之资。罗六(嘉秬)所存银二十二两在侄处。右三项皆拟托张君带归。

前欧阳沧溟先生馆事，伍太尊已复书于季仙九先生。兹季师又回一信于伍处，托侄便寄。家中可送至欧阳家，嘱其即投伍府尊也。牧云又托查万崇轩先生选教官之迟早，兹已代为查出，写一红条，大约明冬可选。此二事，可嘱澄侯写信告知牧云。

侄等在京身体平安。西席宋湘宾九月十一出京。是日即聘庞君(名际云，号省三，直隶人)。曹西垣初十挈眷出都。黎樾乔十六出京。江岷樵于初八到京，严仙舫初十到京。余同乡俱如旧。

常南陔先生欲以其幼女许配纪泽，托郭筠仙说媒。李家(即贲予之妹)尚未说定，两家似皆可对。不知堂上大人之意若何？望示知，下次家信来，望寄酒药研成末，封信内寄京，以

便酿酒为要，余容续具。

侄谨禀 九月十二日

228. 家中改屋便利为要

澄侯、温甫、子植、季洪四弟左右：

十一月十四发第十四号家信，不知收到否？十二月初九接到家中十月十二一信(内有酒药)、十一月初一日一信、初十日一信，具悉一切。

家中改屋，有与我意见相同之处。我于前次信内曾将全屋画图寄归，想已收到。家中既已改妥，则不必依我之图矣。但三角丘之路必须改于檀山嘴下，而于三角丘密种竹木。此我画图之要嘱，望诸弟禀告堂上，急急行之。家中改房，亦有不与我合意者，已成则不必再改。但六弟房改在炉子内，此系内外往来之屋，欲其通气，不欲其闷塞，余意以为必不可，不若以长横屋上半节间断作房为妥(连间两隔。下半节作横屋客坐，中间一节作过道，上半节作房)。内茅房在石柱屋后，亦嫌太远，不如于季洪房外高墪打进去七八尺(即旧茅房沟对过之墪，若打进丈余，则与上首栗树处同宽)，既可起茅房，澡堂，而后边地面宽宏，家有喜事，碗盏、菜货亦有地安置，不至局促，不知可否？

家中高丽参已完，明春得便即寄。彭十九之寿屏，亦准明春寄到。此间事务甚多，我又多病，是以迟迟。

澄弟办贼，甚快人心。然必使其亲房人等知我家是图地方安静，不是为一家逞势张威，庶人人畏我之威，而不恨我之太恶。贼既办后，不特面上不可露得意之声色，即心中亦必存一

番哀矜的意思。诸弟人人当留心也。

罗芸皋坐东皋，求我援引，此刻想已无及矣，我想写一信与师令及伍府尊，此次又赶不及。且如何援引之法，须写信告我。渠前年存银二十二两在我处，昨托张楠皆带交还渠。张言途中要借用，我已答应，嘱渠到家即办交邵阳彭筱房转寄芸皋，并作书告筱房矣，明春可问芸皋看收到否？征一表叔在我家教读甚好，此次未写信请安，诸弟为我转达。张豆付(和尚之称如此)写信寄南，殊为可恶！我付之不理，若并未接到此信者然，渠亦无如之何。同乡周苻农家之鲍石卿前与六弟交游，近因在妓家饮酒(十一月初六日苻农之母生日，席散鲍即出游)，提督府捉去交刑部革去供事。而苻农、获舟尚游荡不畏法，真可怪也！

余近日常有目疾，余俱康泰。内人及二儿四女皆平安，小儿甚胖大。西席庞公拟十一回家，正月半来，将请李笔峰代馆。宋芑宾在道上仆跌断腿(宋有与六弟信)，五十余天始抵樊城，大可悯也。余不一一。

国藩手草 十二月初十日

229. 贺澄弟生子

四位老弟足下：

去腊初十日发戊申第十八号家信，厥后二十六日接温弟在湖北所发信。正月初八日接诸弟腊月十五所发信，而温弟在河南托邹墨林转寄一信，则至今未到。澄弟十一月十九所发一信，亦至今未到也。

澄弟生子，庆贺庆贺。吾与澄弟去年报最，今年腊应温、植、洪三人报最矣。但植弟之妇，闻已有吉语，恐正成当在温弟之前，植弟未免疾行先长耳。四位弟妇，闻皆率母亲、叔母之教，能勤能俭，予闻之不胜欣喜。已办有材料，今春为四弟妇各制一衣，觅便即行寄回。

澄弟捐监执照，亦准于今年寄回。父亲名书呈祥，取麟趾呈祥之义也。前年温弟捐监，叔父名书呈材，取天骥呈材之义也。当时恐六弟尚须小试，故捐监填名略变，以为通融地步。而今温弟即一成不易，故用呈祥配呈材，暗寓麟字骥字于中。将来即分两房，曰呈祥房，曰呈材房，亦免得直写父、叔官名耳。

李子山、曾希六族伯托我捐功名，其伙计陈体元亦托捐。我丁酉年在栗江煤垆，此二人待我不薄。若非煤垆之钱，则丁酉万不能进京。渠来托我，不能不应，拟今岁为之办就。其银钱嘱渠送至我家，有便将执照付至家中。渠银钱一到，即发执照与渠可也；即未收全，亦可发也。丁酉年办进京盘费，如朱

文八、王燧三、燧六等皆分文不借，则曾、陈二人岂不可感也哉！现在乔心农(晋芳)放常德知府，二月出京。四弟监照与二人执照，大约可托渠带至湖南也。

去年年内各族戚之钱，不知如数散给否？若未给，望今春补给，免得我时时挂心，考试者十千及乞丐之十千，不审皆给否？务乞详以示我。

竹山湾找当价，不知比楚善叔一头原价何如？乞明告我。既买竹山湾，又买庙台上，银钱一空，似非所宜。以后望家中无买田，须略积钱，以备不时之需。

植弟诗才颇好，但须看古人专集一家乃有把握，万不可徒看选本。植弟则一无所看，故无把握也。季洪诗文难于进功，须用心习字。将来即学叔父之规模，亦有功于家庭。

纪泽儿自去腊庞先生归河间，请李笔峰来代馆，日加奖赞，悟性大进。一日忽自作四言诗一篇，命题曰“舜征有苗篇”。余始不信。次日余与黄燹吾面试之，果能清顺。或者得祖父德荫，小有成就亦未可知。兹命其誊出寄呈堂上，以博一笑。然记性不好，终不敢信其可造也。

兹寄回正月初一至初十日上谕及宫门钞，以后按月寄归。温弟所允肖辛五”搢绅”，当于乔心农处付渠。李竹屋思鹿胶、高丽参，亦俟乔公始寄。此次余欲写信与竹屋，实无少暇矣。

予身体平安，家中大小如常，二儿肥胖。余不一一。

兄国藩手草 正月初十日

梁俪裳兄弟到京，盛称澄弟之才。且言广东骗客帐以千万计，从无一人取回一文者，澄弟可谓破天荒也。

230. 奉寄纹银佳补

澄侯、温甫、子植、季洪足下：

二月二十六发家信第三号，想可早到。兹乘乔心农先生常德太守之便，付去纹银六十三两零，共六大锭。外又一小锭，系内子寄其伯母，乞寄阳牧云转交。又邓星阶寄银六两，亦在此包内，并渠信专人送去。又高丽参一布包。内顶上者一两，共十四枝，专办与祖父大人用。次等者三两，共五枝。又次等者白参半斤，不计枝。今年所买参，皆择其佳者，较往年略贵，略不甚多。又鹿胶二斤，共一布包。又一品补服四付，共一布包。前年所寄补服，内有打籽者，系一品服。合此次所寄，共得五付。补服不分男女，向来相传鸟嘴有向内向外之分，皆无稽之言也。一品顶带三枚，则置高丽参匣之内。望诸弟逐件清出，呈堂上大人。乔太守要由山西再转湖南，到长沙大约在闰四月底。

此信不详他事，容下次再详也。

国藩手草 三月初一日

231. 望查失信

澄侯、温甫、子植、季洪四位老弟足下：

五月十五日发家信第八号并京报一厚包，二十四日由广西主考孙渠田太史(锵鸣)处发第九号信，并澄弟监照户部照二纸，又今年主考车顺轨乡试文一篇、徐元勋会试文三篇共为一包，不审何日可到？孙太史于五月二十八在京起程，大约七月中旬可过长沙。待渠过去后，家中可至岱云处接监照也。

京寓近日平安。癖疾服邹墨林丸药方最为有效。内人腹泄七八天，亦服邹所开方而效。

昨日折弁到，又未接信。澄弟近日写信极勤且详，而京中犹时有望眼欲穿之时。盖不住省城，则折弁之或迟或早无由查问。正月十六第一号来信，至今尚未接到。予屡次以书告诸弟，又书告岱云，托其向提塘并肖辛正处确查。昨岱山回信内夹有肖辛五回片，写明正月十六之信已于二十一日交提塘王二手收。又言四月十四日周副爷维新到京，此信已交京提塘云云。予接辛五来片，比遣人去京提塘问明。据答云周维新到京，并无此信；若有，万无不送之理。且既系正月二十一交省提塘，则二月二十三有韩折弁到京，三月十八有张弁到京，何以两人俱未带而必待四月十四之周维新哉？今仍将辛五原片付回家中，望诸弟再到提塘细查，正月二十一辛五送到时，提塘曾挂收信号簿否？并问辛五兄，何以知二月之韩弁、三月之张弁俱未带此信而直待周维新始带？且辛正片称四月十四信交京提塘门上

收，系闻何人所言。何以至今杳然？一一查得水落石出，覆示为要。予因正月十六之信至为详细，且分为两封，故十分认真。若实查不出，则求澄弟再细写一遍，并告邓星阶家、曾厨子家，道前信已失落也。

纪泽儿读书如常。兹又付呈论数首，皆先生未改一字者。纪鸿儿体甚肥胖。前闻排行已列丙一，不知乙字一排十大何以遽满？乞下次示知。得毋以乙字不佳，遂越而排丙乎？予意不必用甲乙丙丁为排，可另取四字，曰甲科鼎盛，则音节响亮，便于呼唤。诸弟如以为然，即可遍告诸再从兄弟。

山西巡抚王兆琛，钦差申明各款，现奉旨革职拿问。将来不知作何究竟？此公名声狼藉，得此番镌示，亦足寒贪吏之胆。

袁漱六病尚未全好。同乡各家如常。季仙九先生放山西巡抚，送我绿呢车。现尚未乘，拟待一二年后再换。凌获舟、徐芸渠并考取军机，引见记名，黄正甫、张润农未记。余不悉具。

兄国藩手草 六月初一日

232. 在京祭祖父

澄侯、温甫、子植、季洪四弟左右：

十一月十五日接到祖父大人讣音，中肠惨痛。自以游子在外，不克佐父母襄办大事，负罪婴疚，无可赎挽。比于十八日折差之便，先寄银百零五两，计元宝二锭，由陈岱云宅专足送至家中，不知刻已收到否？

国藩于十六日成服，十七日托军机大臣署礼部侍郎何大人(汝霖)代为面奏，请假两月，在家穿孝。自十七以后，每日吊客甚多。二十九日开吊，是早祭奠。因系祖妣冥寿之期，一并为文祭告。开吊之日，不收赙仪。讣帖刻“谨遵遗命，赙仪概不敢领”二语，共发讣帖五百余分。凡来者不送银钱，皆送祭幛、挽联之类，甚为体面。共收祭文八篇、祭幛七十五张、挽联二十七对、祭席十二桌、猪羊二副。其余香烛纸钱之类，不计其数。送礼物来者，用领谢帖；间有送银钱来者，用“奉遗命璧谢”帖。其原封上粘帖红签璧去，签上刻“旋吉”二字。兹将讣帖等印发者，付回样子与家中一看。纪梁侄名一时偶忘，遂刻作纪沅。

各处送祭幛来者，哈喇大呢甚多，亦有缎布江绸者。余意欲将哈喇作马褂数十件，分寄家中族戚之尤亲者(另开一单于后，乞诸弟斟酌柁添或减，以书覆我)。盖南中老人考终，往往有分遗念之说。或分衣，或分银钱，重五伯祖曾以貂皮马褂一件与王高七作遗念衣，即其证也。

各处寄布，既多且精，令我歉然难安。诸弟先代我趋谢，并言往后万不可如此。盖京中买布甚易，而家中纺纱织布，则难于登天，我受之甚抱愧也。

澄弟之信，劝我不可告假回家。所言非不是，余亦再四思维，恐难轻动。惟离家十年，想见堂上之心，实为迫切。今祖父大事既已办过，则二亲似可迎养。然六旬以上之老人，四千有余之远道，宿聚之资既已不易，舟车之险尤为可畏，更不敢轻举妄动。烦诸弟细细商酌，稟知父母亲及叔父母，或告假归省，或迎养堂上，二者必居其一，国藩之心乃可少安。父母亲近来欲见国藩之意，与不愿国藩假归之意，孰缓孰急？望诸弟细细体察，详以告我。祷切望切。

国藩草 十二月初三日

233. 父母来京男不胜欣喜

男国藩跪禀父母大人礼安：

潢男三月十五到京，十八日发家信一件，实系五号，误写作四号，四月内应可收到。

藩男十九日下园子，二十日卯刻恭送大行皇太后上西陵。西陵在易州，离京二百六十里。二十四下午到，二十五辰刻致祭。比日转身，赶走一百二十里。二十六日走百四十里，申刻到家。一路清吉，而昼夜未免辛苦。二十八日早覆命。

数日内作奏折，拟初一早上具折。因前奏举行日讲，圣上已允，谕于百日后举行，兹折要将如何举行之法切实呈奏也。

二十九日申刻，接到大人二月二十一日手示，内六弟一信、九弟二十六之信、并六弟与他之信一并付来。知堂上四位老人康健如常，合家平安，父母亲大人俯允来京。男等内外不胜欣喜，手谕云起程要待潢男秋冬两季归，明年二月潢男仍送两大人进京云云。男等敬谨从命。叔父一二年内既不肯来，男等亦不敢强。潢男归家，或九月，或十月，容再定妥。男等内外及两孙、孙女皆好，堂上老人不必悬念。余俟续禀。

三月三十日

234. 澄弟出京归家

温甫、沅浦、季洪三弟左右：

二月初二日接到第一、二号家信，一系正月二十发，一系二月十二发，具悉一切。日内极挂念沅弟，得沅弟一红纸片，甚欣慰也。

澄弟已于二月二十六出京。诰轴须四月用宝，澄弟不能待矣，将来另托人带归。澄弟与安化张星垣(奎)、衡山陈谷堂(墀悼)二大令同行。至保定，又约杨毓楠之弟同行。鹅毛管眼药、贴毒膏药，澄弟未带。将来托魏亚农带归，黄生之胞侄也。梁同年(献廷)托请诰封之事，将来必为办妥。渠之银，弟尽可收用。京寓大小平安。癖疾微发，尚不为害。

陈岱云之如夫人歿于安徽。顷接其信，甚为凄惋。同乡周辅亭得御史。常世兄、劳世兄两荫生皆内用。将来为光禄专署正，可分印结，亦善地也。

兰姊多病，予颇忧虑。下次书来，尚乞详示。

父大人命予家书中不必太琐琐，故不多及。

国藩草 三月初四日

235. 纪泽订婚尚待商酌

澄侯、温甫、子植、季洪四弟足下：

九月二十六日发家信第十三号，想已收到。十月初十日，接到家中闰月二十八所发信及九月初二、九月十四所发各件。十二夜又于陈伯符处接到父亲大人闰八月初七所发之信，系交罗罗山托转寄者。陈伯符者，贺耦庚先生之妻舅也。故罗山托其亲带来京。得此家书四件，一切皆详知矣。

纪泽聘贺家姻事，观闰八月父亲及澄弟信，已定于十月订盟；观九月十四澄弟一信，则又改于正月订盟。而此间却有一点挂碍，不得不详告家中者。京师女流之辈，凡儿女定亲，最讲究嫡出庶出之分。内人闻贺家姻事，即托打听是否庶出，余以其无从细询，亦遂置之。昨初十日接家中正月订盟之音，十一日即内人亲至徐家打听，知贺女实系庶出，内人即甚不愿。余比晓以大义，以为嫡出庶出何必区别，且父亲大人业已喜而应允，岂可复有他议？内人之意，以为为夫者先有嫌妻庶出之意，则为妻者更有距跼难安之情，日后曲折情事亦不可不早为虑及。求诸弟宛转禀明父母，尚须斟酌，暂缓订盟为要。陈伯符于十月十日到京，余因内人俗意甚坚，即于十二日夜请贺礼庚、陈伯符二人至寓中，告以实情，求伯符先以书告贺家，将女儿不必遽送，俟再商定。伯符已应允。明日即发书，十月底可到贺家。但兄前有书回家，言亲事求父亲大人做主。今父亲欢喜应允，而我乃以妇女俗见从而扰惑，甚为非礼。惟婚姻百

年之事，必先求姑媳夫妇相安，故不能不以此层上读。即罗山处，亦可将我此信抄送一阅，我初无别见也。夏阶平之女，内人见其容貌端庄，女工极精，甚思对之。又同乡陈奉曾一女，相貌极为富厚福泽，内人亦思对之。若贺家果不成，则此二处必有一成，明春亦可订盟，余注意尤在夏家也。京城及省城订盟，男家必办金簪、金环、玉镯之类，至少亦须花五十金。若父亲大人决意欲与贺家成亲，则此数者亦不可少。家中现无钱可办，须我在京中明年交公车带回。七月间诸弟乡试晋省之便再行订盟，亦不为晚。望澄弟下次信详以告我。

祖父佛会既于十月初办过，则父母叔父母四位大人现已即吉，余恐尚未除服，故昨父亲生日，外未宴客，仅内有女客二席。十一，我四十晋一，则并女客而无之。

朱百樵为官竟如此之好，实可佩服！至于铄砂伤其面尚勇往前进，真不愧为民父母。父亲大人竭力帮助，淘大有造于一邑。诸弟苟可出力，亦必尽心相扶。现在粤西未靖，万一吾楚盗贼有乘间窃发者，得此好官粗定章程，以后吾邑各乡自为团练，虽各县盗贼四起，而吾邑自可安然无恙，如秦之桃花源，岂不安乐？须将此意告邑之正经绅耆，自为守助。

牧云补廩，烦弟为我致意道喜。季弟往凹里教书，不带家眷最好，必须多有人在母亲前，乃为承欢之道。季洪十日一归省，亦尽孝之要也。而来书所云寡欲多男之理，亦未始不寓乎其中。甲五读书，总以背熟经书、常讲史鉴为要（每夜讲一刻足矣）。季弟看书不必求多，亦不必求记，但每日有常，自有进境，万不可厌常喜新，此书未完，忽换彼书耳。

兄国藩手草 十月十二日

236. 拟绕道返家

字谕纪泽：

十三日在湖北省城住一天，左思右想，只得仍回家见吾父为是。拟十四日起行，由岳州、湘阴绕道出沅江、益阳以至湘乡，大约须半个月，沿途自知慎重。如果遇贼，即仍回湖北省城。陆续有家信寄京，不必挂念。家眷既不出京，此将书捡存箱内，搬一房子，余物概不必动。余行李皆存常大人署中，留荆七、孙福看守，自带丁、韩二人回南。常又差四人护送。可以放心。

涤生字 八月十三日夜在湖北省城
并呈尔舅尔母。京中寄家信概亦交湖北抚台常为妥。

237. 发谢署湖北巡抚之恩折

澄、温、沅、季四弟左右：

昨日遣刘一、齐三送信回家。十三日酉刻发谢署湖北巡抚之恩折，十四早接到三十日续奏襄河烧船胜仗折朱批及廷寄一道，兹并抄寄回家。余日内癖疾频发，精神不甚好，然尚可敷衍办事也。余俟续具。

兄国藩 九月十四日书于汉口舟中

238. 纪泽须多写来信

澄侯、沅浦、季洪三弟左右：

九月初二日刘一来江西，奉父亲大人、叔父大人手谕，敬悉家中平安。而澄弟在永丰，沅弟在省，季弟居稍远，均无安信，纪泽儿亦未写信，则殊不可解。自瑞、临道梗，不通音问者已八月。此次刘一等回家，纪泽该惊喜异常，写详禀以告家中之琐事，以安余之心，即今年新婚一节，亦应将喜事之首尾、新妇之贤否缕晰禀告，何竟无一字上陈耶？嗣后每次长夫来营，纪泽必写详禀一封，细述家中及亲邻之琐事，并陈己身及诸弟之学业，每次以一千字为率，即以此当问视之子职可也。温甫病已痊愈，眠食均皆复归，惟脚力略软，是以尚留省城再调养。

余于初三日自省起程，初五日到瑞州。见刘峙衡营务整肃，治全军如治一家，每日皆饭毕始近黎明，深堪佩服。普承尧宝勇营亦队伍整齐。吴竹庄彪勇现已分出进省，另剿东路广信之贼。省兵五营在瑞者，亦尚有规矩。余驻瑞数日，即行回省，令温弟来瑞也。

沅弟在长沙招勇，不知系代南坡兄办就后即交他人管带？抑系亲自统辖与周凤山并为一军乎？抑各树一帜乎？此间有凤新虎三营千七百人，周凤山之旧部也，益以渠在长沙所招之千五百人、王吉昌投效之八百人，已足自成一军，皆永州道、新宁、江西属之人，即不收王吉昌之勇，亦尚有伍化蛟等营可

以合并，沅弟所招之湘勇似不必与周合。如来瑞州，则与峙衡合可也，与宝勇合亦可也；如来吉安，则须另觅一军合之。沅弟与黄南兄、夏憩兄熟商后，望专人飞速寄信来江。安五在营浮躁，不甚守规矩，兹遣之送信回，以后不可令渠来营。余俟续布。

书于瑞州营次 九月初十日

239. 宜在家尽温清之职

澄侯四弟左右：

胡二等来，知弟不在家，出看本县团练。吾兄弟王人，温、沅皆出外带勇，季居三十里外，弟又常常他出，遂无一人侍父亲膝下，温亦不克遽归侍奉叔父，实于“论语”远游、喜惧二章之训相违。余现令九弟速来瑞州与温并军，庶二人可以更番归省。澄弟宜时常在家以尽温清之职，不宜干预外事。至嘱至嘱。

李次青自抚州退保崇仁，尚属安静。惟败勇之自抚回省者，内在中丞署中闹请口粮，与三年又一村之局相似，实为可虑。

明年延师，父大人意欲请曾香海，甚好甚好。此君品学兼优，吾所素佩，弟可专人作书聘请，稍迟旬日，吾再手缄请之。其馆金丰俭，则父大人酌定，吾自营寄归可也。

俊四归，带回福字荷包，祈查收。不一一。

兄国藩手具 十月初二日

240. 家中应种蔬养鱼养猪栽竹

澄、季两弟左右：

兄于十二日到湖口，曾发一信，不知何时可到？胡蔚之奉江西耆中丞之命接我晋省，一行于十七日至湖口。余因于二十日自湖口开船入省，北风甚大，二十一日可抵章门也。杨厚庵送至南康，彭雪琴径送至省。诸君子用情之厚，罕有伦比。浙中之贼，闻已全省肃清，余到江与耆中丞商定，大约由河口入闽。

家中种蔬一事，千万不可怠忽。屋门首塘养鱼，亦有一种生机。养猪亦内政之要者。下首台上新竹，过伏天后有枯者否？此四事者，可以觇人家兴衰气象，望时时与朱见四兄熟商。见四在我家，每年可送束脩钱十六千。余在家时，曾面许以如延师课读之例，但未言明数目耳。季弟生意颇好，然此后不宜再做，不宜多做，仍以看书为上。余在湖口病卧三日，近已痊愈，尚微咳嗽。癖疾久未愈，心血亦亏，甚颇焦急也。久不接九弟之信，极为悬系。见其初九日与雪琴一信，言病后元气未复，想比已全痊矣。甲五近来目疾何如？千万好为静养。在湖口得见魏荫庭，近况尚好。余详日记中，顺问近好。

兄国藩手草 七月二十日于江西省河下

241. 在兰溪舟次为长男四女订庚

澄侯、季洪两弟左右：

莘田叔来，接澄老信，旋又接二十一日缄，藉悉一切。兄日来行踪全在日记簿中，抄回一本，巨细咸知。

七月初六日在兰溪舟次为长男及四女订庚。长男媒人请彭雪琴方伯、唐义渠廉访，四女媒人请李希庵、孙筱石两观察。四人中三人皆巴图鲁，亦胜会也。庚书俟有妥便再行付回。又兄前在湘潭买地一所，地契亦俟便付回。四女出抚与洪弟，系奉先大夫之命，庚帖到家，即请洪弟存放。拜帖二分，一继父名一本，生父名从权宜也。余不一一。

兄国藩草 七月初七日兰溪舟中

242. 洪弟在家可留心学习

澄侯、沅浦、季洪三弟左右：

兹因莘田叔赴吉、彭芳六归家之便寄来庚帖二分，即前在兰溪所订者。又地契一纸，系欧阳小岑代买湘潭周家之地，刘为章所看者。沅弟若克复吉安之后乞假归家，便中可至该处一看。

先大夫、太夫人葬地实不放心。澄弟向不信风水之说，洪弟在家无事，可留心学习。为二亲求一佳城，不必为子孙富贵功名，但求山环水抱，略有生气，俾二亲之体魄少安，即子孙之福荫亦未始不在其中。余于亲在日不克笃一日之孝养，亲没之后又不克求一善地安妥先灵，诸弟若能尽心竭力肩任此事，则余寸心之疚可少释耳。

余于初八日至河口。莘田叔因赴沅弟之约急往吉安，芳六因屡病请归，此信沅弟阅后再付家也。芳六自六月初七起至八月三十日止，每月给银八两，此次又给途费十六两。莘田叔薪水拾二两，亦至八月晦止，此次途费十两。余不一一，顺问近好。

兄国藩手草 八月初十日

243. 后辈子侄宜教之以礼

澄侯、季洪两弟左右：

八月十九曾象五来营，二十一日蒋得胜来，接两弟初一、二、三等日之信，具悉家中四宅平安，不胜忻慰。

余于八月初八日至河口，本拟即日入闽，由铅山进捣崇安，十二日已拜折矣，其折稿寄吉安转寄至家。因闽贼出窜江西，连破泸溪、金溪、安仁三县，不得已派张凯章回剿。十八日抵安仁。十九日大战获胜，克复县城，杀贼约四千余，追至万年、乐平等县，尚未收队。待张军归来，余即率以入闽也。

刘星槎尚未到营。以后家信不可交投效之人带来，渠或中途率计忽归，或投别处军营；即果到，亦迟而又迟。莫如交省城左季高处最为便捷。

家中养鱼、养猪、种竹、种蔬因事，皆不可忽。一则上接祖父以来相承之家风，二则望其外有一种生气，登其庭有一种旺气，虽多花几个钱，多请几个工，但用在此四事上总是无妨。澄弟在家教科一、厚七、旺十习字极好，不特学生有益。亦可教学相长。弟近年书法远逊于昔，在家无事，每日可仍临帖一百字，将浮躁处大加收敛。心以收敛而细，气以收敛而静。于字也有益，于身于家皆有益。明年请师，仍请邓寅皆先生，人品学问，皆为吾邑第一流人。若在我家教得十年，则子侄皆有成矣。葛覃山先生前言愿来余营，不知其计已决否？若不果来，可仍请之教科四、科六。若渠决来军，则科四、六亦可请邓先

生教之。

左头横屋配房二间甚好，但嫌其不甚光亮，又嫌由阶基至帐房(即韩升等住房)须由地坪绕入耳。思云馆之外、染坊架子之下尚须添种王瓜竹，夏月思云馆中可生凉风。牛路之内须筑墙一道。田塘上田一丘，秋冬可作菜园。此皆余在家时与澄弟熟商者，望即行之。

季弟远隔紫甸，余总不放心。汤家屋场之业及各处田业，余皆不愿受。若季弟能在近处居住，或在老屋之上新屋之下中间择买一屋，与季弟安居，我则愿寄钱文至家办成此事。否则，余守旧规不敢少改也。

后辈子侄，总宜教之以礼。出门宜常走路，不可动用车马，长其骄惰之气。一次姑息，二次、三次姑息，以后骄惯则难改，不可不慎。顺问近好。

兄国藩手草 八月二十二日弋阳行营

244. 同游麻源

沅弟左右：

余今下午往太平桥、万年桥看东岸形势，弟同往否？黄荫山请游麻源，余定期十二，弟可多住一日，同游麻源，十三日归去也。

涤字 十月初十日

245. 宜和睦尽孝道

澄侯、沅、洪老弟左右：

十三日专吉字营勇送信至家，十七日接澄弟初二日信，十八日接澄弟初五日信，敬悉一切。三河败挫之信，初五日家中尚无确耗，且县城之内毫无所闻，亦极奇矣！

九弟于二十二日在湖口发信，至今未再接信，实深悬系。幸接希庵信，言九弟至汉口后有书于渠，且专人至桐城、三河访寻下落。余始知沅浦弟安抵汉口，而久无来信，则不解何故。岂余近日别有过失，沅弟心不以为然耶？当此初闻三河凶报、手足急难之际，即有微失，亦当将皖中各事详细示我。

今年四月，刘昌储在我家请战。战初到，即判曰：“贼得偃武修文，得闲字（字谜败字）。”余方讶败字不知何指，扎判曰：“为九江言之也，不可喜也。”余又讶九江初克，气机正盛，不知何所为而云。然战又判曰：“为天下，即为曾宅言。”由今观之，三河之挫，六弟之变，正与“不可喜也”四字相应，岂非数皆前定耶？

然祸福由天主之，喜恶由人主之。由天主者，无可如何，只得听之，由人主者，尽得一分算一分，撑得一日算一日。吾兄弟断不可不洗心涤虑，以求力挽家运。第一，贵兄弟和睦。去年兄弟不和，以致今冬三河之变。嗣后兄弟当以去年为戒。凡吾有过失，澄、沅、洪三弟各进箴规之言，余必力为惩改，三弟有过，亦当互相箴规而惩改之。第二，贵体孝道。推祖父

母之爱以爱叔父，推父母之爱以爱温弟之妻妾儿女及兰、蕙三家。又，父母坟域必须改葬。请沅弟做主，澄弟不可过执。第三，要实行勤俭二字。内间妯娌不可多写铺帐。后辈诸儿须走路，不可坐轿骑马。诸女莫太懒，官学烧茶煮菜。书、蔬、鱼、猪，一家之生气；少睡多做，一人之生气。勤者生动之气，俭者收敛之气。有此二字，家运断无不兴之理。余去年在家，未将此二字切实做工夫，至今愧恨，是以谆谆言之。余详日记中，不赘。

十一月二十三日

246. 每遇得意时便有失意相随

澄侯、沅浦、季洪老弟左右：

十三日写信，专人回家。十五日接澄、沅冬月二十九、三十两缄，得悉叔父大人于二十七患病，有似中风之象。

吾家自道光元年即处顺境，历三十余年均极平安。自咸丰年来，每遇得意之时，即有失意之事相随而去，壬子科，余典试江西，请假归省，即闻先太夫人之讣。甲寅冬，余克武汉田家镇，声名鼎盛，腊月二十五甫奉黄马褂之赏，是夜即大败，衣服、文卷荡然无存。六年之冬、七年之春，兄弟三人督师于外，瑞州合围之时，气象甚好，旋即遭先大夫之丧。今年九弟克复吉安，誉望极隆，十月初七接到知府道衔谕旨，初十即有温弟三河之变。此四事者，皆吉凶同域，忧喜并时，殊不可解。现在家中尚未妄动，受慎之至！余在此则不免皇皇。所寄各处之信，皆言温弟业经殉节，究欠受慎，幸尚未入奏。将来拟俟湖北奏报后再行具疏也，家中亦俟奏报到日乃有举动。诸弟老成之见，贤于我矣。

叔父大人之病，不知近状何如？兹专法六归，送鹿茸一驾，即沅弟前此送我者。此物补精血远胜他药，或者有济。

迪公、筱石之尸业经收觅，而六弟无之，尚有一线生理。若其同尽，则六弟遗骸必去迪不远。意者其已逃出，如潘兆奎；或暂降，如葛原五乎？家中分用钱项，澄弟意待各炊时再说，余亦无成见，听弟主张可也。沅弟信言家庭不可说利害话，此

言精当之至，足抵万金。余生平在家在外，行事尚不十分悖谬，惟说些利害话，至今悔恨无极。

霞仙请做嫁装，即祈澄弟代做，明年三、四、五月可办婚事。即问近好。

兄国藩手草 十二月十六日

247. 折奏温弟殉节事

澄侯、沅浦、季洪老弟左右：

初二日专人送一缄，初八盛四归又付一缄，想次第将到。初十日接胡中丞信，迪庵及温弟已奉旨优恤，迪公饰终之典至隆极渥。其灵柩二十五日到湖北，二十六日宣读恩旨，二十九日请官中堂题主，正是初三日起行还湘，备极哀荣。温弟与之一同殉难，而遗骨莫收，气象迥别。予于十一日具折奏温弟殉节事，盖至是更无生还之望矣。恻哉！家中此刻已宣布否？若尚未宣布，则请更秘一月，待二月间杨镇南等归来，我折亦奉批转来。如实寻不得，则招魂具衣冠以葬。余上无以对祖考妣及考妣，下无以对侄儿女。自古皆有死，死节尤为忠义之门。奕世有光，本无所憾，特以骸骨未收，不能不抱憾终古。

沅弟近日出外看地否？温弟之事，虽未必由于坟墓风水，而八斗冲屋后及周璧冲三处皆不可用，子孙之心，实不能安。千万设法，不求好地，但求平妥。洪夏之地，余心不甚愿。一则嫌其经过之处山岭太多，一则既经争讼，恐非吉壤。地者，鬼神造化之所秘惜，不轻予人者也。人力所能谋，只能求免水、蚁、凶煞三事，断不能求富贵利达。明此理，绝此念，然后能寻平稳之地。不明此理，不绝此念，则并平稳者亦不可得。沅弟之明亮能了悟。余在建尚平安，惟心绪郁悒，不能开怀，殊褊浅耳！

正月十三日

248. 寻得温弟无头之骸

澄侯、沅浦、季洪三弟左右：

正月二十三日发第四号家信，并福字、手卷等件，想出月初间可到。二十七日亥刻接胡润公专丁来信，知温甫弟忠骸业经寻获，是犹不幸中之一幸。惟先軫丧元，又幸中之一大不幸。计胡中丞亦必有专信另达舍间，沅弟此时自不便遽出，应觅地两所。一面改葬先考妣，一面安厝温弟。润公待我家甚厚，温弟灵柩归舟，想必妥为照料。吾即派杨名声等三弁送湘乡，建昌不另派人，以赶不上也。墓志铭作就，再行专丁送归。胡信及霍山王令信，杨信附去一觅。顺问近好。

正月二十八日

249. 望沅弟速来

澄侯、沅浦、季洪三位老弟左右：

三月二十五日王长清等来营，接澄弟一信、沅弟一信、纪泽一信，二十七日王贵和等来营，接澄、沅各一信，具悉一切。

洪弟坠马，不知近日全好否？吾自七年见澄弟坠马，即有戒骑马之意，曾与澄弟言之。因乡间有马较便，故未果戒之。闻三七治跌打伤最好，不知乡间办得出否？邱恩（足拜）子法水已退，不可用。以后须物色一个极好法水，不特我家可防不测之患，即亲族地方偶有跌打损伤，亦可行方便，即远在邻县衡、清、邵阳、宁乡等处，我家去请亦尚易为力。或熬三七膏，以待不虞之需，与人方便，自己亦方便也。

温弟归棹，族戚地方迎接者多，足征祖父、叔父感人之深。吾前请孙芝房作温弟墓志。顷接芝房信，乃垂死告别之词，以后事托我。发信后，芝房死矣。孙氏家运之坏，可悯可叹！二杨、张、朱四人，即照沅弟所拟，归南安案内保之。迪步瀛诸人，待杨、张回营，再议所以酬之。由庵之忠骸，即系刘步瀛所觅得，胡公必已酬之，此间略缓无碍也。沅弟谢恩折本不甚好。次青之稿，吾未甚改。叔父封典谢恩折、纪寿引见谢恩折，似尚妥协。诸弟以为何如？吾身体尚好，惟眼蒙日加，此后恐难多看书耳，顺问近好。

沅弟似宜速来，吉营望之极切也。张凯章于二十八日获一胜仗。又行。

四月初三日

250. 拟改葬考妣之墓

澄、沅两弟左右：

六月十八日刘得一归，寄一信。二十四派吉中营二人送信。计皆当有复信，而至今未到，颇为悬系。伍少海人来，接澄老十七夜信，知宝庆解围，团勇当撤，贼窜祁、衡，吾邑遂可驰防乎？

余在湖口住十日，八月初一日开至浔阳。因等候送者耽搁二日，初四五本可开行，又以阻风不克成行。好在上游无事，贼不入蜀，余行虽迟滞，尚不误事。日内守风此间，可游览庐山近处胜景。朱品隆等各营已由陆路先至黄州。季弟奉胡中丞札，募勇千人，闻初四日身黄州起行归湘矣。吉字中营之饷，到黄州再派人起解；如已开船北来，则不远解亦可。

先考妣改葬之期已近，果办得到否？须略置墓田，令守墓者耕之。凡墓下立双石柱，方柱圆首。柱高而远不刻字者，谓之华表；柱矮而刻字者，谓之阙。四柱平立，上有横石二条，谓之坊。凡神道，有上覆以亭者（陵上圣德神功碑之亭，四面皆有拱门，民间亦有用此式者）；有左右及后面皆以此砖石贴砌，上盖圆筒瓦者（北道上多有）；有露立全无覆盖者（不耐风日）。三者随弟斟酌。要之上用螭首，下用龟跗，则一定之式，不可改易。公卿大夫之家有隆礼者，于墓门之南（专指向南者言之）立墓表碑（上刻文章），又于极面远处立神道碑（上刻大字，某官某人神道碑。不刻文）。稍简者仅立一碑。二者听弟

斟酌。要之宜立于墓门之外。江西立于坟堆之趾，湖南立于罗匡之头，皆非古法，亦欠大样，不可学也。至筑坟结顶，上年周璧冲结顶最合古法。今京师王公贝勒及品官之家坟茔多用此式，勿以其为吾乡所创见骇闻而不用也。吾之所见如此，望弟细心详酌。

吾于祖父坟墓祠庙皆未尽心，实怀隐疚。今沅弟能力办之，澄弟能玉成之，为先人之功臣，即为余脉此阙憾，且慰且感。余此次在外专了从前未了之事，而弥缝过失，亦十得七八耳。顺问近好。

兄国藩手草 八月初八日于九江舟次

去年曾托雪琴一保胡维峰，以答其数年之殷殷，兹雪琴禀官帅保举。原札寄归，望交维峰也。又行。

251. 温弟奉追赠为太常寺卿

澄侯四弟左右：

九月二十一日接初七日一缄，具审一切。泽儿姻事改为十六。五十侄女喜期，前缄亦是十六，不知何时改为十九？江南老名士今年亦极忙矣！湘乡防堵，以曾沅浦第一，朱岚轩第二，岂老名士反居第三耶？阅卷大臣似亦不甚公平。

余近尚有腹泄之疾，每日一二次不等，幸不甚剧。寅皆先生明年仍请之教书。余去岁信中谓当连请五年，盖其端坐有恒，可即为法。甲五近在书房听讲否？甲五颇有外才，只要笔下水路清楚，则将来到处去得。温甫弟奉部议追赠太常寺卿，可望得溢。余身体平安，足慰远念。顺问近好。

此信于二十五早发后，长夫行至汉口翻船，失去信件，兹命下人再抄一通寄家。

九月二十四日

252. 悼叔父

澄侯、沅浦两弟左右：

初五日接来信，痛悉叔父大人于十九日戌刻弃世，哀痛易极！自八年十一月闻温弟之耗，叔父即说话不圆，已虞其以忧伤生。叔父生平外面虽处顺境，而暗中却极郁抑，思之伤心。应复各事，条列如左：

一、余请陈作梅先生赴湘乡看地，请阳牧云陪之。二月中旬自宿松起行，三月初可至家。叔父葬地如已寻地，可俟作梅来定葬期，或在三月之杪，或闰三月可也。一、叔生平最好体面，此次一切从丰，两弟自有权衡。六十四人大辇、诰封亭二事必不可少。丧礼以哀为主，丧次以肃静为主。丁未年于此二者未能讲求，至今愧恨，望两弟留意。

一、余于闻叔讣之第二日进公馆设位成服，拟素食七日，素服十四日，仍行撤灵入营。季弟拟请假回籍，余信嘱其来宿松灵前行礼，早来迟来现尚未定。一、沅弟言及朱惟堂一事。此人余不深知，但闻尧阶与季高赞之，人树、凯章亦颇称之。余屡札朱南桂、惟堂来，而至今杳然，未接沅弟信之前三日尚办一札去也，此后决不再札矣。尧阶又荐朱贤来，云可当营官，则欺我之言耳。近来细看尧阶之言多不可信。往岁余托尧觅父母葬地，其后全不留心。此人虽系至亲，似宜疏而不宜密。

一、沅弟言新大夫第不敢再求惬意，自是知足之言，但湿气一层不可不详察。若湿气太重，人或受之则易伤脾。凡屋高

而天井小者，风难入，日亦难入，必须设法祛散温气，乃不生病。至嘱至嘱。余俟作梅兄赴湘详布。顺问近好。

二月初八日

253. 以八字诀为治家之道

澄侯四弟左右：

二十七日刘得四来，接弟十三日信，欣悉各宅平安，“沅弟”是日申刻到，又得详问一切，敬知叔父临终毫无抑郁之情，至为慰念。

余与沅弟论治家之道，一切以星冈公为法，大约有八个字诀。其四字即上年所称书、蔬、鱼、猪也，又四字则曰早、扫、考、宝。早者，起早也；扫者，扫屋也；考者，祖先祭祀，敬奉显考、王考、曾祖考，言考而妣可该也；宝者，亲族邻里，时时周旋，贺喜吊丧，问疾济急，星冈公常曰人待人无价之宝也。星冈公生平于此数端最为认真。故余戏述为八字诀曰：书、蔬、鱼、猪、早、扫、考、宝也。此言虽涉谐谑，而拟即写屏上，以祝贤弟夫妇寿辰，使后世子孙知吾兄弟家教，亦知吾兄弟风趣也。弟以为然否？顺问近好。

国藩手草 闰三月二十九日

254. 乱世婚嫁宜早

澄弟左右：

十二日易汉山等来，接弟九月二十夜一缄、二十二早一缄。又朱凤四、唐界山等先后到营，接纪泽母子三缄，系九月二十、二十五日所发者。均悉一切。

大女与袁家喜期，即定腊月初三，即可不必再改。大乱之世，婚嫁宜及时早办。六十侄女、七十侄女喜期已定否？二女儿喜期，余托沅弟在长沙与陈世兄面定也。诸女及儿妇所做鞋等件收到，均尚适用。鞋底若不用牛皮，更合用耳。

此间军事平安。鲍春霆已到五日，将以月底进攻宁国、石埭之贼。初七八复破羊栈岭。闻业经逐击而出，不知确否。余身体平安。惟疮久不愈，癖疾如常，夜间彻晓不寐，手不停爬。大多劝买一妾代为爬搔。季弟代买一婢，现置船上居住，余意尚未定。大约此是积年痼疾，非药饵所能愈，亦非爬搔所能愈也。十一日全未见客，心绪常不免郁闷，幸办事尚不间断耳。

纪泽所作“张良李泌论”，命意极好，措词多不圆稳。功名之地，古人所畏，余亦常存临深履薄之念。

沅弟已到家否？余本日发一奏片，兹先行抄回。顺问近好。

国藩手草 十月十四日

255. 哀恸季弟溘逝

沅弟左右：

接第十八日辰刻信，知季弟溘逝，哀恸曷极！应商之事，条列于左：

一、余准于三日起行赴金陵，本月内准到。一则与弟商季弟后事及营中各事，一则亲接季弟灵柩由金陵护送至安庆。载灵柩之船不必大，取其轻便易行者。余坐一长龙船，季柩载一民船，各用数号舢板拖带，席上水稳而且快。至安庆后，应否另换大船，俟与弟面商。

一、季弟请恤事，应请少荃出奏。上海现在有威林密轮船在此，二十六七日可过金陵，余信弟信，均可由该船带沪。

一、季弟部下五千人，自当归并弟处统领；若另有可分统之人，俟余与弟相见后再行下札。弟久劳之后，继以忧伤，务当强自宽懈。余于兄弟骨肉之际，夙有惭德，愧憾甚多。弟则仁至义尽，毫无遗憾，千万莫太悲伤。

一、弟信须洋药等物，余自带洋药万斤、洋帽二十万、洋枪四百杆，亲交弟处。白齐文在上海大闹，兹将筠仙原信付阅。该军断不来矣，只要春霆站得住，军务尚可支持也。

十一月二十二日

256. 商季弟灵柩迎置事宜

沅弟左右：

昨日发两信，定于二十四日起程前赴金陵，坐威林密船以行，而此间官绅上下，纷纷谏阻。今早接弟信并与澄侯一信，知季弟之灵柩，拟于二十四日开船上行，余若坐轮船以往，必在中途错过。余即不赴金陵，留此迎接季棨，而请峰山到金陵一行，代余慰视老弟。应商事宜，再行条列于后：

一、余署附近有一大屋，将买为湖南会馆，季弟灵柩即迎置其中。一切开吊行礼，俱甚方便。加漆多则七次，少则五次，每次必须三日，不可草率。湘潭既不上岸，不可加漆，不如即在安庆停二十天，尽漆六七次。一切丧礼应行之仪，皆在安庆行之。余昨与峰山商，拟令季棨仍进曹禾冲，再行开堂发引。今弟意令季棨由此港登岸，舁葬马公塘，则是湘潭固不上坡，紫田亦不进屋，宜在安庆备行诸礼，而加漆尤为要务，在此停留两旬无疑。

一、刘南云三营，宜仍留金陵，兹派戈什哈持令箭公牒至中途截令折回。无为洲有树字五营，尽足坚守。吾又派萧、毛七千人从无为进兵，更可放心。李幼荃有才，与少荃相等，将来必成伟器。穆海航德优而才亦并不劣。幼与海水乳交融。吾以无为付之二君，尚属付托得人。其城存钱米，俟闭城断接济时再行支放。火药余已解到万斤，弟不可疑余与幼、海毫无准备也。弟谓余用人往往德有余而才不足，诚不免有此弊，以后

当留心惩改。然弟若疑幼、海为无才之人，所见差矣。

十一月二十三日

257. 议季弟安葬马公塘

沅弟左右：

季弟无生前合意之室庐，弟因定在北港登岸，径舁至马公塘，与叔父合葬。此议甚妥。余在安庆为之开另设奠，多漆几次。安庆系季立功之所，亦尚妥也。

十一月二十六日

258. 沅弟天性厚福泽无量

沅弟左右：

昨日发信后，接弟信并祭文一篇。至性至情，流溢纸上，有不可磨灭之状。观老弟天性之厚，将来福泽当有不可限量者。

季弟之主，明日可以毕工。主要栗木，匣用楠木。闻徽州漆甚好，已函请祁门粮台购买。

十一月二十八日

259. 入城治季弟丧

沅弟左右：

忠酋如果回苏，则江北与金陵之事或可渐松。严州既破，侍逆亦必旋浙。所虑者，专在春霆一路。吾优灼太久，只好委心以听天命之自然。

弟意季弟之榱不可久羁安庆，不必入城，亦有所见。惟此间公馆一切供张已备，又新做大杠、棺罩，同城官绅多有备礼者。入城治丧，亦世俗哀荣之一端，故京师刻讷闻者，做高脚牌者，均争此一节。本年周军门天受枢来安庆，力请入城，余许之。黎寿民枢求入城，余亦许之。杨镇魁枢求入城，余未之许，乃请一咨求入长沙城，其家因此生感。将来季榱入安庆城，设奠数日，但不久停耳。

十二月初二日

260. 登船迎接季弟灵柩

沅弟左右：

今日卯正，季弟灵柩至宝塔下。余登舟迎至盐河卡登岸，阖城官绅均在江滨迎接，进西门，入公馆。祭帏祭筵甚多。其中亦有全无瓜葛者，却之不情，受之有愧，颇难处置。拟停住数日，即送之登舟西归。船尚宽大，尽可在舟中加漆也。

十二月初九日

261. 撰书季弟挽联

沅弟左右：

两日未接弟信，不知金陵各营平安否？

季棨到此已一日，外间幛联颇多，联无十分称意者。余因书一联云：英名百战总成空，泪眼看河山，怜予季保此人民、拓此疆土；慧业多生磨不尽，痴心说因果，望来世再为哲弟、并为勋臣。亦不称意也。今日已漆一次，拟在此漆五次，二十日发引登舟。少荃信来，欲为季请谥请祠请加衔立传，恐已在官奏之后。兹将少荃信抄阅。

朱云岩因前调青阳之檄，已弃旌德城而回徽。宁郡四面皆贼，深恐难支。

十二月初十日

262. 季弟蒙恩追赠按察使

沅弟左右：

季弟蒙恩追赠按察使，照按察使军营立功后病故例议恤。

南云之三营营官、哨官皆已来见，武、朱三营之营、哨官尚未来见。关防六颗，皆已刻就。安庆存马，系副都统明兴所管，未便令其交出。

季弟恩旨抄阅。南云来打湾沚之说，且听厚庵裁夺。

十二月十三日

263. 弟尽可请本身夫妇诰轴

沅弟左右：

弟处气势渐旺，深以为慰。

宁郡、泾县二城之米，均可支至正月中旬。春霆营中之米，亦可支至腊底。若南云能帮打三山等处，则皖南亦必平稳。春霆于前招七千人外，又派人至三厅续招五千，于营中自备银一万六千带往，不支粮台东局之银，可谓尽心报国。其回籍治丧之意颇切，若能打开东坝，或须允准。

九月十二日恩诏，余与弟皆原官未曾升调，不能另为祖父请封。凡遇覃恩，既不为祖父请封，则亦不准贍封他人，但可为本身妻室请轴耳。弟尽可请本身夫妇诰轴，不必谦也。澄弟不肯受头品诰封，言乡间不便举动，亦颇近情理。或待其过五十后，弟再行贍封，亦无不可。

十二月十七日

264. 欲合葬季弟夫妇

澄弟左右：

接到排递一函，弟意拟将季棨权厝于修善堂屋后，从容再觅佳壤，合葬季弟夫妇。马公塘葬定未久，弟意不欲轻动，自有一番谨慎不得已之苦衷，余虽不明地理，而启土禁忌之说，亦不敢不小心遵信。一切即由弟做主，权厝修善堂屋后，俟寻得吉域，再东迁葬。余已寄信与沅，沅在三千里外，想亦不敢专主，当仍由弟做主也。

除日

265. 请遂沅弟之愿葬马公塘

澄弟左右：

萧开二来，接弟初五日信，具悉家中诸事平安。弟所陈二事，如紫田、曹禾冲不肯作邓升禄先生祖田，目下姑不必深争，且待沅弟与弟徐徐商酌。至季弟葬地，则请决计葬马公塘。既为季弟生前所深爱，又为沅弟平生所笃信，何必不从沅与逝者之意而勉强他卜葬马公塘。既为季弟生前所深爱，又为沅弟平生所笃信，何必不从沅与逝者之意而勉强他卜乎？同一兄弟也，分之亲疏相等，而情之浅深各殊。沅之爱季，其情更深于余，并深于澄弟。沅之看地，亦较余与澄稍精。若一切从沅，吾知季弟必含笑于九泉矣。至于开新坟无碍于鼎三，吾前信已详言之。余与沅之爱鼎三，与弟等也。沅弟近日肝气颇旺，恐因此而更加怫郁，余甚不放心，故再行飞寄此函，请弟决计葬季于马公塘。顺问近好。

兄国藩手草 正月二十一日

266. 决葬季弟于马公塘

沅弟左右：

昨日发信后，接弟十六日一信，具悉一切。

十五六日大风，季弟棹舟安泊得所否？余亦深为惦念。有水师哨官来，言初十日在逆口遇季舟正走大顺风，十一二三日天晴多南风，计季棹十五六尚未渡湖也。余今日写信与澄弟，决计葬季于马公塘，不知此信到家时季棹已先到否？澄肯依否？

春霆久无信来，殊为悬系。洋枪等物即日由台起解。余日内眼红微蒙，不敢多治事。顺问近好。

兄国藩手草 正月二十一日

267. 季弟灵柩已抵长沙

沅弟左右：

二月初二早安庆寄到第二十四日一缄，具悉一切。适接家中元旦及十二日信，兹并送弟阅。

澄弟接余第一次复信，知余不主决葬季于马公塘，故来信云云。若接弟两信与余后两次信，当不复执上要里屋后之议矣。惟季棹业于正月十八日抵长沙，家中二十外便须迎接，不知澄能幡然改图否？正月十五六七日大风雪，余方深以为虑，而季棹竟未停舟。甚矣，渠辈之不晓事也。兹将哨官吴大安信寄阅。顺问近好。

国藩手草 二月初二日于土桥下十里舟

次

268. 季弟得谥靖毅二字

沅弟左右：

初六日接初一日酉刻专丁来缄，具悉一切。

克复雨花台各石垒，本是极可喜之事，而多占守兵，又少杏南一支游击之师，亦是美中不足。至印子山石垒，余意尽可不必扼守。将来城池之克否，全不系乎印子山之有兵无兵也。

蒋、毛二十八日之战，阵亡哨长及有官阶者二十四员，伤亡至五百余名。据称苗逆队中有四眼狗旧部四千人在内。寿州之围固不能解。且恐蒋、毛败挫，贼窜六安，故余檄周厚斋改赴六安，维则仍留守巢县一带。现仅春霆、南云进攻二浦、九袱洲，窃恐地大城坚，难以得手。余意总思留杏南带五千人助攻二浦，江北多一营有一营之好处，弟意雨花台多一营有一营之好处。此两端者，兄弟各执一端，未识大舜用何者为中也。

折弁自京归。季弟得谥靖毅二字，皆优等谥法，远胜温弟。予季身后之荣，真无遗憾。予之三次诰轴，科四之荫生执照皆已带回，即日当专人送归。惟诰轴错误甚多，如伯祖父祖母误书伯父伯母之类，不一而足。许仙屏、刘韞翁、王孝风各有信寄弟，兹带去查收。靴二双、京报并付去。洋火已解去五十万，余俟另牒续解。顺问近好。

国藩手草 五月初七日辰刻

正封缄间，又接初三早来信。贼于初二三日由北岸过江南者极多，此间有轮船经过见之。湘后左右营之新勇竟不肯拆队

分散，将来回至安庆又难处置。赵惠甫今日来辞行，订八月回皖一次，或久居或暂居，弟与之相处一月便可定夺。其人识高学博，文笔俊雅，志趣不在富贵温饱，是其所长；藐视一切，语少诚实，是其所短。弟坦白待之，而不忘一敬字，则可久矣。又行。

269. 派人送诰命回家

澄弟左右：

兹派盛四送诰命九轴及荫生执照回家，请弟敬谨收藏，或藏先大夫新祠，或藏各家，均听弟酌。纪鸿侍母及兄嫂姊妹来营，八月当可成行，此间另派大船至湘潭迎接。寅皆先生即可不必同来，明年若无馆，余可代为荐馆也。云亭妹夫家、尧阶兄弟各有信并礼物数件。重五、中和二公之轴亦有信与丹阁叔，兼配微礼。望弟一一查明，照单分送。顺问近好。

国藩手草 七月十二日

270. 派人船回湘接着属

澄弟左右：

十八日萧开二等到，接弟七月初四日信，具悉一切。

纪鸿送眷属于八月十九日起程，时候极好，此间已于十三日遣盛四回湘迎接。又张德富所管余之大座船，定于二十日自安庆起行至湘，大约八月申旬可抵湘潭。外有张德富与盛四照料，内有纪鸿照料，又有炮船护送，尽可放心，不须再请郑寅翁、欧阳牧翁护送。盖此二公皆不可远离家者，牧云之老亲新愈，尤不宜也。特此寄缄，请寅、牧二公无庸东来。余之座船本大(人称为长江第一船)，若再雇一大船，则官气太重矣。若须添雇，只雇倒扒可也。至嘱。即问近好。

国藩手草 七月十八日

271. 家中之事概由老弟主持

澄弟左右：

十七日接九月初二日县城一信，具悉一切。

十月初六日入主之事尽可照办。余本不善择日，又去家太远，断不遥制。家中之事，概由老弟主持可也。兹特排递一函。不知初六以前可到否？丹阁叔帮助之数，计须若干，弟便中为我一筹，却不必先许愿也。顺问近好。

国藩手草 九月十七日

272. 力教家中勤俭为主

澄弟左右：

八月初一接弟在长沙排单一信，知已得见科一，并在胡宅演戏三日。初二日又接弟十三在家研发之信，具悉一切。

余在金陵二十日起行，二十八日至安庆，内外小大平安。门第太盛，余教儿女辈惟以勤俭谦三字为主。自安庆以至金陵，沿江六百里大小城隘皆沅弟所攻取。余之幸得大名高爵，皆沅弟之所赠送也，皆高曾祖父之所留始也。余欲上不愧先人，下不愧沅弟，惟以力教家中勤俭为主。余于俭字做到六七分，勤字则尚无五分工夫。弟与沅弟于勤字做到六七分，俭字则尚欠工夫。以后各勉其所长，各戒其所短。弟每周一钱，均须三思，至嘱。

李宅二万金，上年十一月曾由东征局解去二千，此次应行扣除，顷已补札东局矣。余详日记中。即问近好。

八月初四日

273. 作寿诗遥贺沅弟生辰

沅弟左右：

昨日一信，便寄兰泉书。今日乃弟四十一大庆，吾未得在金陵举樽相祝，遂在皖作寿诗，将写小屏幅带至金陵，以将微意。一则以纪泽寿文不甚惬意，一则以近来接各贺信，皆称吾兄弟为古今仅见。若非弟之九年苦战，吾何能享此大名？故略采众人所颂者，以为祝诗也。东坡有寿子由诗三首，吾当过之耳。顺贺寿祺。

八月二十日

274. 温恒两弟又奉恩命

沅弟左右：

二十四日贺光五归，具述弟疾日减，二十日周旋众客，精神照应得到，与七月十一二等日对客略同。至以为慰。曾恒德等今日自京归。温、恒两弟又奉恩命，兹将谕旨抄寄弟阅。朝廷待忠勋之家有加无已，但愿吾家丁口日繁，子弟读书勤俭稍有成立，则弟之功所以垂裕后昆者远矣。余俟船到。准初一日成行。顺问近好。

八月二十六日

275. 奏请沅弟开缺回籍调养

澄弟左右：

接弟八月中旬信，内有尧阶贺信，具悉一切。余于八月十八九间深以沅弟之病为虑，厥后二十四日光五自金陵归，见沅弟二十日宴客百余席，应酬周到，精神完足，余始放心。顷接沅二十九日之信，湿毒亦已大愈。余于二十七日奏请沅弟开缺回籍调养，不知能邀谕允否？

朱金权之孙溺死，可悯之至。兹送去银三十两。以二十四两作本年之薪水，谢渠照料屋宇之资，以六两为其孙超度之费。黄金堂附近一带，近年溺人颇多，或当以俗见整治之。余身体平安，全家内外清吉。到金陵后，拟以初十进署。盛南表弟，闻已自金陵起行，十月当可到家。顺问近好。

九月初四日于铜陵舟中

276. 宜自知爱惜保养不可过劳

澄弟左右：

九月十七日接弟八月二十九日信，系在县城所发者。二十二三日连接弟九月初七、八日两缄，具悉一切。

弟为送科一之考两次晋省，实觉过于勤劳，兄闻之深抱不安。且弟于家庭骨肉之间劳心劳力已历三十余年，今年力渐老，且宜自知爱惜保养，不特为家庭之际，不可过劳也。

吾入金陵署中已半月，大小平安。隔日至沅弟处看病。沅之湿毒未愈，尚尔疼痛，而肝郁少减，大约十月初登舟起行。其温毒与我二十五六年之病相似，而我之病似更重。余劝沅不必吃药敷药，此等皮肤之疾，终可不治自愈，惟夜不成寐，却是要紧之症，须用养心和平之法医之。褚一帆事，不能请谥。盐局之事，全依次帅与黄、郭之言，断不掣肘。顺问近好。

九月二十四日

277. 寄谕沅弟进京陛见

澄、沅弟左右：

初二日接奉寄谕，飭沅弟迅速进京陛见。兹用排单恭录谕旨咨至弟处。上年十二月，韞斋先生力言京师士大夫于沅弟毫无闲言，余即知不久必有谕旨征召，特不料如是之速。余拟于日内复奏一次，言弟所患夜不成寐之病尚未痊愈，赶紧调理，一俟稍痊，即行进京；一面函商臣弟国荃，令将病状详细陈明云云。沅弟奉旨后，望作一折寄至金陵附余发折之便复奏。

余意不寐屡醒之症总由元、二两年用心太过，肝家亦暗暗受伤。必须在家静养一年，或可奏效，明春再行出山，方为妥善。若此后再有谕旨来催，亦须稍能成寐，乃可应诏急出。不审两弟之意以为何如？

筱泉来抚吾湘，诸事尚不至大有更张。惟次山以微罪去官，令人怅怅，沅弟前函有长沙之行，想正值移宫换羽之际，难为情也。

三月初四日

278. 喜慰瑞侄考取县试之首

澄、沅弟左右

纪瑞侄得取县案首，喜慰无已。吾不望代代得富贵，但愿代代有秀才。秀才者，读书之种子也，世家之招牌也，礼义之旗帜也。谆嘱瑞侄从此奋勉加功，为人与为学并进，切戒骄奢二字，则家中风气日厚，而诸子侄争相濯磨矣。

吾自奉督办山东军务之命，初九、十三日两折皆已寄弟阅看。兹将两次批谕抄阅。吾于二十五日启行登舟，在河下停泊三日，待遣回之十五营一概开行，带去之六营一概拨队，然后解维长行。茂堂不愿久在北路，拟至徐州度暑后，九月间，准茂堂还湘。勇丁有不愿留徐者，亦听随茂堂归。总使吉中全军人人荣归，可去可来，无半句闲话惹人谈论，沅弟千万放心。

余舌尖蹇涩，不能多说话，诸事不甚耐烦，幸饮食如常耳。沅弟湿毒未减，悬系之至。药物断难奏效，总以能养能睡为妙。

五月二十五日

279. 沅弟自以再出为是

澄、沅弟左右：

本房连添二丁，尚有梦熊者五人，深为喜慰。星冈公之后，想亦必瓜瓞繁衍。吾近岁纯是老人情怀，专盼家中多添幼孩也。

鼎三体不甚弱，尤为欣慰。凡后天以脾为主。脾以谷气为本，以有信为用。望两弟常告鼎三，每日多吃饭粥，少吃杂物；无论正餐及点心，守定一个时辰，日日不差；若有小小病症，坚守星冈公之教，不轻服药。至要至要。

富塿本算一等屋场，弟若肯代为收拾，必是第一等妥当。乃必待纪泽母子到家看定再行修葺，且令先在大夫第小住，实属情文周至。手足至亲，不复言谢。

进退大吏伤易，余亦深以为虑。然少荃不果赴洛，霞仙不果去位，朝廷择善而从，不肯坚持自用，即恭邸大波亦不久即平，是非究不颠到。沅弟自以再出为是，下次再详论也。

十二月初六日

280. 纪泽母子至弟署不宜久住

沅弟左右：

四月三日接三月十八日来信，知弟于三月十六日抵鄂，十七接篆。所论治鄂之道，均与兄屡次去信相符，惟奏折朋友苦思不得其人。近日忆得倪豹岑(文蔚)，壬子庶常改归刑部，在外多年，仕途蹭蹬。严渭春曾保以湖北道员，未蒙谕允，亦曾充官相营务处，去夏四月进京供职。余以其祖母年近九旬，恐有承重大，故劝其不必北上，而许每年济以四百金。后余仓猝北征，仅送过一次百金而已。本年渠在金陵坐凤池书院，若请至弟署，令作奏折，必有可观。若写公事信函，则写作俱佳，几与意城相近。其人和平敦厚，相处最好。惟渠奉祖母侨居金陵，安土重迁，必不愿赴武汉。余拟函告李雨亭为之劝驾(李、倪与范云吉皆严所特保，皆良才也)。弟每月宜送以百金，将来仍许以保留鄂省。渠济目前之窘况，顾后来之出路，当可允许。

此间军事，前月二十一日两折业咨弟处。近日战状略具于张子青、刘印渠两信中，抄寄弟览。

纪泽母子至弟署，不宜久住，前信已言及之。纪瑞侄母子至鄂，亦不宜久署中。风水之说，亦有不得不信者，望细思之。明日派勇送日记、信，兹先草此递慰。顺问近好。

四月初三日

281. 告养生五事及治家之道

澄弟左右：

五月十八日接弟四月八日信，具悉一切。七十侄女移居县城，长与娘家人相见，或可稍解郁郁之怀。乡间谷价日减，禾豆畅茂，尤其是升平景象，极慰极慰。

此间军事：贼自三月下旬退出曹、郟之境，幸保山东运河以东各属，而仍蹂躏于曹、宋、徐、泗、凤、淮诸府，彼剿此窜，倏往忽来。直至五月下旬，张、牛各股始窜至周家口以西，任、赖各股始窜至太和以西，大约夏秋数月山东、江苏可以高枕无忧，河南、皖、鄂又必手忙脚乱。余拟于数日内至宿迁、桃源一带察看堤墙，即由水路上临淮而至周家口。盛暑而坐小船，是一极苦之事，因陆路多被水淹，雇车又甚不易，不得不改由水程。余老境日逼，勉强支持一年半载，实不能久当大任矣。因思吾兄弟体气皆不甚健，后辈子侄尤多虚弱，宜于平日讲求养生之法，不可于临时乱投药剂。

养生之法约有五事：一曰眠食有恒，二曰惩忿，三曰节欲，四曰每夜临睡洗脚，五曰每日两饭后各行三千步。惩忿，即余廬中所谓养生以少恼怒为本也。眠食有恒及洗脚二事，星冈公行之四十年，余亦学行七年矣。饭后三千步近日试行，自矢永不间断。弟从前劳苦太久，年近五十，愿将此五事立志行之，并劝沅弟与诸子侄行之。

余与沅弟同时封爵开府，门庭可谓极盛，然非可常恃之道。

记得己亥正月，星冈公训竹亭公曰：“宽一虽点翰林，我家仍靠作田为业，不可靠他吃饭。”此语最有道理，今亦当守此二语为命脉。望吾弟专在作田上用些工夫，而辅之以书、蔬、鱼、猪、早、扫、考、宝八字，任凭家中如何贵盛，切莫全改道光初年之规模。几家道所以可久者，不恃一时之官爵，而恃长远之家规；不恃一二人之骤发，而恃大众之维持。我若有福罢官回家，当与弟竭力维持。老亲旧眷、贫贱族党不可怠慢，待贫者亦与富者一般，当盛时预作衰时之想，自有深固之基矣。

凯章家事，即照弟信办一札照收。湘军各营俱不在余左右，故每月仅能送信一次，俟至周家口后即送三次可也。余详日记中。顺问近好。沅弟在鄂拆阅，均此。

六月初五日

282 . 内人之病已难挽回

沅弟左右：

顷接来信——澄弟之信，弟批五行，知弟已移居长沙。此后兄寄两弟信，仍各分写，两弟接信，彼此互阅。

内人之病，自二月十三起，今已一月零五日。初系大热，谵语不止，三月转变为右脚大肿，疼痛异常，呻吟至于号泣，服药无效。近已肿至小腹，左脚及两手亦微肿，但不甚耳。以余观其症象，已难挽回，而医者谓脉无败象，尚有一线可望。李少荃送建昌花板二付，交欧阳定果带来，昨已命工匠做成矣。

余于二月十三日发疴气疾，右肾坚肿下坠，近已消肿缩上，不甚为患。惟目疾日剧，右目久盲，左目亦极昏蒙，看文写字，深以为苦，除家信外，他处无一字亲笔。精神亦极衰惫，会客坐谈，即已渴睡成寐，核稿时亦或睡去，实属有玷此官。幸江南目下无甚难事，新中丞张子青心气平和，与友山漕帅皆易于共事。

省三丁艰，孙琴西署盐道亦属顺手。若无洋务突出变端，尚不至遽蹈大戾耳。闻倭相病势甚重。李相在津，众务毕兴。精神之衰旺固全视乎年齿，两弟年不甚高，不知近日精力究竟何如？便中详书告我。郑小山在清江请假养病，闻其将有退志，不知果否。

三月十七日

283. 家中奢靡入不敷出

澄、沅弟左右：

四月初一日发出一缄交信号寄，不知可速到否？黄南翁仙逝，三月申旬始由钱子密处交到讣书。唁信及联幛等办好，又苦无便可寄，兹命彭芳四送归。自十月后日记久未付去，此次将十一二、正、二、三五个月日记付去。弟观之亦足见余近来衰惫之状，但不可与外人看。老病如此，不知引退，亦可愧也。目光昏蒙日甚，较之右目之全盲者无甚区别。幸眠食如常，不似即亲近眼闭箱者。内人腿肿渐消，亦似不至遽死，殊非意料所及。

纪鸿之次子病白喉数日，今已痊愈。余合室小大平安。惟署中所用弁仆姬婢等太多，食口众，则用度浩繁。又兼治病医药，百端奢靡，入少出多，江督岁中进款竟不敷一岁之用。曩者尝怪澄弟日用太侈，不能节俭，以致欠债甚巨。今余亦因用度不俭，亦将欠债，深为可讶。今付甥女贺王氏处百金，黄南翁贖仪百金，皆嫌其轻，故将近状略告弟知，以明余不善经理也。

八年春在京用去一万金，九年冬在京用去万余金。在他人见为简啬，在余已筋疲力竭。近嘱戒纪泽等必须从上房、厨房两处节省，而后不至亏空。澄弟负累本重，沅弟亦无源之水，以后三家均须厉行节俭。余平日自誓不欲身后多留余财，亦不宜留债与后人耳。

扬州洋人近又与李世芯构衅，与陈国端构衅，并有因观剧观艺与士民争殴之事，不知能速了否。余有复总署信，抄寄两弟一阅。顺问近好。

国藩手具 四月初七日

284. 甚幸内人逃命不死

澄、沅弟左右：

四月二十日接初六日信，论敕书、养廉等事。五月初二日接洋局寄信，报岳崧侄案首之喜。初七日又连接二十一日之排递信、二十八日之洋行信——论李廷章剿办等事，具悉一一。鲁秋航带到好茶及前此寄来之早茶俱已收到，至情佳味，感谢感谢。纪寿早得入庠，足以少慰高轩公、愍烈公于地下，良为慰幸。惟府考院考尚须敬慎将事。

余昏眩之疾、疝气之症近皆未发，目光则昏蒙如常，无法挽回。内人右脚肿已全消，疼亦大减，能伸缩而不能行走。虽眼不光脚不健为极苦之境，而三月间势处必死，竟能逃出命来，亦不幸中之幸也。其余合室平安。

澄弟问余所作慎独、主敬等四条，兹抄一份寄去。澄与诸侄辈若能行之，于身心及治家俱大有益。”阅微草堂笔记”系纪文达公所著，多言狐鬼及因果报应之事。长沙如有可买，弟亦可常常阅之。

云仙极言有笔之劣，而筱泉则谓是老实人耳。究以何说为宜？朱唐洲、彭霖系何处人？”俟其至当优待之”。此间差事亦极难逢，瑞臣及厚九近始各得一差，已候半年矣！

封爵敕书同治四年领得。错字极多，令纪泽带至湖北呈弟处。弟回其错误一笑而未收，纪泽即带回湘乡。不知今尚在富厚堂否？拟到京换领，尚未果行。养廉有领与否？可在外省藩

库领否？须托人到京一查（余之爵廉未曾领过一次）。

“湖南文征”收到。研翁去年寄书，意欲余为伯宜作碑传等。语甚沉痛。余顷为作伯宜墓志。其“文征”之序，少迟亦当一件，俟作就一并寄南，请弟先告研翁。精力日衰，文笔日陋，则不能强者也。

两处设卡之详未到。鲁、秦二君既十分可靠，将来任以卡务亦无不可。此案余已具奏，思稍收回鄂岸引地，现交户部核议。部若议准，尚须筱泉肯略相助，不一力袒川，乃可期有起色。

任鹤年系何处人？现居何官？督销局向无会办，且姑待之。此间雨已沾足，本月下旬再得甘霖则丰收矣。顺问近好。

兄国藩手具 五月初十日

本日另有一信交江西曾姓五人。

285. 年迈纳妾岂不误人？

澄、沅弟左右：

久未寄函与弟，近日亦未接弟信，想各家皆清吉也。纪泽之子曰同儿者，于七月发慢惊风，二十三日酉刻便已殇亡。前此余不知其有病，甚至二十二日始闻其腹泻已近二十日，痰涌已历七日(十七日起)，因病状不甚要紧，未办医药。二十二日动风时，即已危险难治矣。此儿初生时，余观八字于五行中缺水缺火，与甲一儿之缺水缺木者相同，即已虑其难于长成，不料其如是之速。纪泽夫妇年逾三十，难免忧伤。然此等全凭天事，非人力所能主持，只得安命静听。余老年衰惫，亦畏闻此等事，强自排解，以惜余年，两弟尽可放心。

善长(即玉二)带一婢女来，云将为吾置笮，系昌明所办，而吾弟亦赞成之者。吾以精力太衰，理不久于人世，不欲误人子女，故不收纳，不久即当倩媒另行择配。

江境兵勇太少，缓急无可倚恃。现令章合才招湘勇三千东来，派朱唐州、李健斋为营务处，梅照庵为支应委员。薪水则朱六十金，李、梅各四十金，略为位置三人。此外谋差而无以位置者尚极多也。

余衰颓日甚，每日常思多卧多躺，公事不能细阅，抱愧之至。看书未甚间断，不看则此心愈觉不安。偶作古文。全无处。研生兄处文二篇，兹有一信寄渠，请弟转交。伊辅先生一篇，托弟交丁子开(骅)。前曾寄信，此次未写也。祖、考两处

墓表皆已作就，皆不称意，下次再行寄回。如其可用，则请沅弟书就刊刻。

左帅疏荐沅弟及芑泉，此间亦闻是说。其萌退志，则未尝闻之。章合才言其精神百倍，多酒健饭，现派刘省三出关剿新疆伊犁之贼。左帅平定甘肃之后，恐下文尚长，亦由天生过人之精力，任此艰巨也。

余拟于八月初出省大阅，大约两月后乃可旋省。此间岁事丰稔。高田间有伤旱之处，而亦可望七八分。涂朗仙放湖南臬司，本属有德，近更优于才，湖南之福也。此问近好。

兄国藩手具 七月二十六日

处世篇

1. 久未接弟信心极悬悬

沅浦九弟左右：

十七日在湖口寄书，并鹿茸片、参茸丸，专罗逢元勇丁专送吉安，不知何日可到？余十九日夜与温弟湖口分手。二十日寅刻自湖口开船，年初至吴城。二十一日申刻至江西省城，厚庵送我至南康，雪琴直送至省，用情可谓极厚。

久未接弟信，心极悬悬，不知近已复元否？再垂寄一缄。余在章门小住二日，亦即赴河口以次青会耳。顺问近好，不一。

兄国藩手草七月二十二夜二更书于江西省城陶家花园东厢

2. 望加意款待袁铁庵

澄侯四弟左右：

慈有袁漱六亲家之胞弟袁铁庵自松江归来，将我京中书籍概行带送湘乡，实为可感之至。前由京搬至松江，此次由松搬至湘乡，共万余里，吃尽辛苦。到我家时，望加意款待。至要至要！其书交建四先生及纪泽细心清理，此外尚有存松之书并营中之书，将来开单再清也。即问近好。

兄国藩手草 八月二十九日武昌

3. 知漱六亲家去世

澄侯四弟左右：

二月十日蔡宁祥来，接弟二十九夜县寓信，借悉一切。王孝一之缄今尚未到。季洪弟于初五到黄州，初八来巴河，初九早兄弟恭祭先大夫七十冥寿，尚属诚敬。毛寄云初九日来营，陈秋门先生亦来。日内应酬甚繁。余往年所欠京帐，今冬拟托寄云还清，不知家中尚有清单否？可于此次寄来。

初九日接松江信，知漱六亲家于九月初三日弃世，实可伤悼！其堂侄袁藻在余营当差，派其速行，往松料理一切。十一日起行，计十一月底可到。雨三、漱六连闻凶耗，何亲戚之多故也！即问近好。要事详沅弟信中。

兄国藩手草 十月初十日

4. 润帅事事推动让人虚良不可及

澄、沅两弟左右：

初八日专人送信回家，是夕季弟来宿松，兄弟畅叙五日，十三日季回太湖。此间日内吊客不少，十九满十四天之期，即拟撤去灵位，陈作梅先生待天晴起程入湘中一行，看毕诸地，尚须至益阳胡润帅家一行，闻润帅另有函告沅弟矣。

太湖报信折并列衔，由官帅处拜发，润帅主稿送去。润帅事事推功让人，其公虚良不可及。

王孝风所刻温弟哀辞，刻工及拓手俱佳，兹寄回十分(外迪庵祭文一分，系胡润帅作，周炳鉴书)。较之林君碑则刻工好，较之先严墓志(谓此次新拓者)则拓手好也。沅弟字秀劲可爱，以后更当日日临习，千万莫间断。即问近好。

兄国藩手草 二月十四日

5. 请让作梅先生找地

澄侯、沅浦两弟左右：

闰月十三接二十七日家书，得悉一切。沅弟既与作梅兄意见相合，则家中导地之事可留悔公多住一二月，以必得为期。过路塘、新安冲之地，余亦不甚惬意，是以酬庸之典迟迟未办。改葬本非好事，然既已屡改，则必求惬意而后止，倘沅弟业已起行，则澄弟与纪泽必坚留作梅先生寻觅一二处。至要至要。余非欲求地以徼富贵者，惟作梅以三千里外至吾乡，千难万难，不可错过。渠在吾乡，余于营中每月按送薪水，家中只须礼貌恭敬，不必另赠银钱。

澄弟所跋对联甚为妥协，服补药虽多，仍当常常静坐，不可日日外出，两脚流星不落地。一则保养身体，二则教训子侄。至嘱至嘱。此间至今未得进兵，实为迟滞。

近希庵至多公处，与之畅谈，针芥契合，相得益彰。大约数日后即可移营进逼桐城与怀宁矣。浙江克后，皖南又大震动。河南捻匪上窜，陕西及樊城戒严。四眼狗近赴全椒，思解金陵之围。

余身体平安。癖疾旨在腿以下，本是空闲地方，任其骚扰可也。即问近好。

三月十四日

6. 作挽联悼润帅

沅弟左右：

十三日接十一夜后，具悉一切。

调巡湖营由刘家渡拖入白湖大札，今日办好，即派人送去。吾所虑者，水师不能由大江入白湖，自湖不能通巢湖耳。今仅拖七八丈宽堤即入白湖，斯大幸矣。若白湖能通巢湖，则更幸矣。

沈令不尴不尬，亦意中事，暂无人可换，且姑听之。季弟今日辰刻到此，病已全好，昨日在船上微受风，今日禁口，当易愈耳。

余昨日作挽润帅一联，云：“逋寇在吴中，是先帝与苻臣临终憾事；荐贤满天下，愿后人补我公未竟勋名。季以为可望批首。拟日内送去，外奠仪二千金。弟与季弟可同送一份礼，余可作枪手，撰一挽联，弟自书之。奠仪不可太多，盖余已极丰矣。”

雪琴来信，寄弟一阅。马信阅过，此事大约可成，然吾辈仍专讲战守，不因此稍弛也。顺问近好。

九月十四日

7. 与人交际尚求其诚信素孚 求其协助当亮其力量能为

沅弟左右：

火药即日咨请湖北协解五万，不知见许否？凡与人交际，当求其诚信之素孚；求其协助，当量其力量所能为。弟每求人，好开大口，尚不脱官场陋习。余本不敢开大口，而人亦不能一一应付，但略亮我之诚实耳。四十万铁究竟有着落否？此时子弹亦极少也。

韩正国、程学启初七日开行，少荃初八早开行，轮船不过三四日可抵上海。余令开字营号补皖勇改淮勇，程云必待沅帅缄谕乃敢改换。亦足见其不背本矣。

广东全省厘厘专供江浙军饷一折，本日拜发。大约秋冬以后每月可添银二十万两，春夏则苦不堪言耳。

三月初八日

8. 余愧悔大负次青

沅、季弟左右：

湖南之米昂贵异常，东征局无米解来，安庆又苦于碾碓无多，每日不能舂出三百石，不足以应诸路之求。每月解子药各三万斤，不能再多，望弟量入为出，少操几次，以省火药为嘱。

札营图阅悉。得几场大雨，吟、昆等营必日松矣。处处皆系两层，前层拒城贼，后层防援贼，当可稳固无虞。

少泉代买之洋枪，今日交到一单，待物到即解弟处。洋物机括太灵多不耐久，宜慎用之。

次青之事，弟所进蔑规，极是极是。吾过矣！吾过矣！吾因郑魁十享当世大名，去年袁、翁两处及京师台谏尚累疏保郑为名将，以为不防与李并举，又有郑罪重李情轻，暨王锐意招之等语，以为比前折略轻。逮拜折之后，通首读来，实使次青难堪。今得弟指出，余益觉大负次青，愧悔无地。余生平于朋友中，负人甚少，惟负次青实甚。两弟为我设法，有可挽回之处，余不惮改过也。

六月初二日

9. 唐鹤九作佳联挽季弟

沅弟左右：

季弟墓志作就，不甚称意。唐鹤九所寄挽联极佳，云：秀才肩半壁东南，方期一战成功，挽回劫运；当世号满门忠义，岂料三河洒泪，又陨台星。余欲改成功二字为功成，改洒泪二字为痛定，似更妥协。

余仅派戈什哈一人送季梓，盖以弟所派诸人，凡事皆有道理，不必更派文武委员，反虞纷乱也。

十二月十八夜于湖南会馆

10. 香海不宜主东皋讲习

澄侯四弟左右：

日内未接家信，想俱平安。兰姊病已大愈否？季弟灵梓，闻腊月二十九日至黄州以上七十里之七矶滩，想未必能至汉口度岁，不知何时可抵长沙。沅弟坚欲葬季于马公塘，吾二人即可允从，不必各执己见。

此间军事尚平安。春霆于正月初六日在泾县大获胜仗，嗣后尚未开仗。余牙疼稍愈，身体如常。

弟前函询曾香海主东皋讲习，余意似觉非宜。大凡师道以专勤为第一义。香海近来亦办公事，未必能专；年逾六十，精力渐衰，未必能勤。且诸生志在举业，香海本非举贡出身，近于八股未免抛荒，恐不足以惬诸生之望，宜再酌之。罗老师不可兼书院之说，不知有专条定例否？余意中亦别无可请之人也。

恽次山超擢湖南方伯，未知文式岩作何下落，尚无明文。李筱泉调广东粮道，王钤峰擢赣南道并闻。顺问近好。

国藩手草 正月十四日

11. 罗教师掌教东皋书院通县悦服

澄弟左右：

二十一日接弟三月初八日在县城发信，具悉一切。

罗教师掌教新东皋书院，通县悦服。开张既好，以后书院必诸事顺遂，人文蔚起，可喜可庆。罗允吉婿从邓师读书甚好。业经成婚之后，欲将各书一一温熟，势必不能。惟求邓师将“五经”点一遍讲解一遍，正史约亦讲一遍，不求熟，不求记，但求经过一番而已。邓师辛苦一年，明年或另择师专教罗婿亦可。

事恒系照二品赐恤，并无一品字样。弟寄挽联，本请余评定前三名，何以未见寄到。茶叶极好。余去年一年未吃得好茶，此次始交运也。

兰姊处，余备奠仪二百两，今付回临三甥处，下次再作函慰之。

此间军事，石润埠自初三被围，十七日内外夹击大胜，立解重围。发逆上犯，围逼庐江。捻匪由鄂下窜，连陷宿松、太湖、潜。北岸处处吃紧，南岸徽、池群盗如毛。祁门久无信来，不知保得住否。余身体平安。欧阳凌云昨日到此。上海军事近极顺利，大约苏杭均可图也。顺问近好。

国藩手草 三月二十四日

12. 已换新衔何必辞谢？

沅弟左右：

接第十一、十二日两信，具悉一切。

辞谢一事，本可浑浑言之，不指明武职京职，但求收回成命。已请筱泉、子密代弟与余各拟一稿矣。昨接弟咨，已换署新衔，则不必再行辞谢。吾辈所最宜畏俱敬慎者，第一则以方寸为严师，其次则左右近习之人，如巡捕、戈什、幕府文案及部下营哨官之属，又其次乃畏清议。今业已换称新衔，一切公文体制为之一变，而又具疏辞官，已知其不出于至诚矣。欺方寸乎？欺朝廷乎？余已决计不辞，即日代弟具折。用四六谢折外，余夹片言弟愧悚思辞，请收成命。二十一二日专人赍京。弟须用之奏折各件，即由此次折弁带归。弟应奏之事暂不必忙。左季帅奉专衔奏事之旨，厥后三个月始行拜疏。雪琴得巡抚及侍郎后，除疏辞复奏二次后，至今未另奏事。弟非有要紧事件，不必专衔另奏，寻常报仗，仍由余办可也。

李子真尽可分送弟处。莫世兄年未二十，子偲不欲其远离。赵惠甫可至金陵先住月余，相安则订远局，否则暂订近局。五月杪以后之米，省局尽可支应。以三万人计之，每月需米万二千石（五百人一营者加夫一百八十名，每月需二百石）。弟部来此请米价及护票者已一万数千石，计六七月必到，不尽靠皖台也。顺问近好。

国藩手草 四月十六日

13. 弟保举贤才一疏何日拜发

沅弟左右：

十七日接十三日信，十九日接十四日信，具悉一切。

南云所札之石垒，据雪琴言壕极宽深，不知何以贼能越壕而登缺口？只要杏南痊愈，萧、陈无恙，南云假归应尚无碍。弟保举贤才一疏何日拜发？金眉生不必遽荐，大拂物议，非渠之利，云仙即日擎之入粤耳。申夫不知何人所密保，云仙与朱石樵则系王少鹤所保。湖南解谷米到此者并无刁难，不知弟有所闻否？上海月协四万，似蜀义不容辞。兹将少荃来信与此间十六复信抄寄一览。顺问近好。

国藩手草 七月十九日

计抄王少鹤折一件、云仙十三日来信一件、少荃与吾往来信各一件、家信二件。

14. 近世保人亦有多少为难处

沅弟左右：

初一日接弟七月二十四、六二信，具悉一切。

陈斌述及与鲍军门言改由七桥瓮(瓮桥)进孝陵卫，春霆欣然乐从，余已决从此策，日内即办公牒分别咨行。地道决不复开。七桥瓮(瓮桥)上流须用浮桥，容再由此间办竹木解去。前因花篱地道均非要务，故未饬知潜山县耳。左帅保筠仙，此间并无所闻。黄信之所谓季帅者，似即毛寄云也。毛密片余未得见，大约系保两郭、黄、李。筠公已擢粤臬，南翁有旨往粤办厘，惟意城保花翎三品卿未奉明文。

弟所保各员，均奉允准。惟金安清明谕不准调营，寄谕恐弟为人耸动。盖因金君经余两次纠参，朝廷恐余兄弟意见不合也。大抵清议所不容者，断非一口一疏所能挽回，只好徐徐以待其自定。又近世保人，亦有多少为难之处。有保之而旁人不以为然，反累斯人者；有保之而本人不以为德，反成仇隙者。余阅世已深，即荐贤亦多顾忌，非昔厚而今薄也。

景、河、婺、乐四卡，左帅业已归还余处。上海四万，余志在必得，恐不免大有争论。霞仙升陕抚，先办汉中军务。闻李雨苍系多帅所劾也。纪泽等今日往营省谒。父亲手泽六纸寄还。即问近好。

国藩手草 八月初二日

15. 弟贺万寿折业已代写

沅弟左右：

十六日接弟二月十三日信，具悉一切。

折差于十八日进京，弟贺万寿折业已代写一分，此外如彭、乔、鲍、万、马、何皆由余处代写。

乔中丞于十五日抵省，闻义渠亦将回省交印。麓轩未在金陵登岸，颇非意料所及。据称赶于十六吉辰接印，理或然与？窜江之贼枪炮甚少，避城池而不攻，避官兵而不战。席砚香赶至抚、建一带，当易得手。

何廉昉所陈厘务，多影响之谈。兹将余寄云吉、养素两信抄阅。周成民稟尚未到。顺问近好。

国藩手草 二月十七日

16. 春霆之病恐无救

沅弟左右：

炮位自协解直东晋豫后，现存六百尊，而可用者实已无几。顷饬伊卿带胡将等自往拣择三百尊，大约明后日可开船西上。民间修筑圩寨，不难在炮械，而难在修寨之费与守寨为主之人。虽有告示，非年余不能办出头绪。

春霆之病，恐无生理。顷各分统谭胜达、唐仁廉等公禀不愿归娄统而愿归宋统，由春霆转咨到此，既已不愿归附娄镇，若勉强令娄驰入霆军，恐生他变，自应留娄在苏皖另谋位置。惟宋公仁柔琐碎，断非能统此万五千人者。余意竟将霆军全行遣撤，另为招集。或令娄招五千，宋招五千，各打一路，不知弟意云何？此军素无条理，即使春霆幸而病痊。亦难保其无事。亢旱千里，金陵虽得雨，尚难插秧，弟又手疼异常，焦灼之至。

五月初一日

17. 澄弟有病可不必来

澄、温、植三弟左右：

澄弟有病，即可不必来此。此间诸事杂乱，澄弟虽来，亦难收拾，不如在家料理一切也。长夫来此者至六十名之多，澄弟于此等处不知节省，亦疏略也。兹一概遣归，仅留十三名在此。如不好，尚须再遣回。

昨夜褚太守带三营水师至靖江剿贼，不知能得手否？塔、周大胜仗归来，余赏银千两、功牌百张、猪十口、酒五百斤，颇觉鼓舞。现惟邓湘一营难于收辑耳。余不一一。

兄国藩顿首 三月二十五日

18. 周李大挫尤焦灼了

澄、温、沅、季四弟足下：

昨发一信后，罗山即于初三到省。是日二更得信：周风山、李辅朝之勇于二十九在龙阳得三胜仗，二十九日夜终宵鏖战不得休息，初一早，一战即已败溃。盖扎营城外沙洲之上，是夜涨水，侵入营盘。初一早，管内水深尺余，贼船三面环攻，共二千余号之多。此时逃出管外，途中无船可渡，淹毙至二三百人，军器全失。周、李皆健将，此番大挫，尤焦灼也。

家中长夫，春二、维五、芝三、明四等皆不愿远出，兹皆令其回里。其工钱每月三十日，并未扣一日耳。余不一一。

国藩手草 六月初四夜

19. 诸弟应勤俭耕读奉亲教子

澄侯、温甫、子植、季洪四位老弟左右：

十月十三县城专人来营，接到父亲大人手谕，同日成章鉴来，又接植弟十五、十八日二函，具悉一切。张德坚处寄书至今尚未到。温弟得生一女，母子平安。甚慰甚慰。闻其侧室亦有梦熊之兆，想当再索得男也。

唐萃洲父台恺侧慈祥，吾邑士民爱戴。此际去任，自必攀辕挽留，但仅有夏憩亭一信，不足为凭。夏此时并非湖南之官，私信干预，或者有之，断不能以公牒票告中丞。余若遽以书抵骆中丞，恐省城并无唐公调任之说，翻讶此言从何而来，则根究其由，无损于夏憩亭而转有损于唐父台。如果有调任之事，俟确信到日，沅浦以一书求左季高，可挽回也。留好官非干预公事可比，余之信所能止者，沅弟之信亦能止之，第不可早发，徒生疑窦耳。

澄弟带勇至朱州、株亭等处，此间亦有此信。兹得沅弟信，知系康斗山、刘仙桥二人，澄弟实未管带，甚好甚好。带勇之事，千难万难，任劳任怨，受苦受惊，一经出头，则一二三年不能离此苦恼。若似季弟吃苦数月便尔脱身，又不免为有识者所笑。余食禄有年，受国厚恩，自当尽心竭力办理军务，一息尚存，此志不懈。诸弟则当代处山林，勤俭耕读，奉亲教子，切不宜干涉军政，恐无益于世，徒损于家。至嘱至嘱。

罗山分军在濠头堡失利，彭三元、李否春殉难。有此一挫，

武汉恐不能即复。浔阳周凤山一军，湖口李次青一军及水军平安如故。茶陵贼匪窜至江西，安福、永新失守，吉安府城戒严。在次青处调平江勇千三百人往援，周臬台亦带千余人往剿，不知能迅速扑灭否？

余痲疾日痊，营务平善，无劳挂虑。诸弟为我禀告父亲大人、叔父大人，千万放心。不一一具。

兄国藩手草 十月十四日于南康府屏风

水营

20. 弟随南翁料理戎事足增长识力

沅浦九弟足下：

十七日李观察处递到家信，系沉浦弟在省城研发者。黄南兄劝捐募勇规复吉安，此豪杰之举也。南路又出此一支劲兵，则贼势万不能支。

金田老贼癸、甲两年北犯者既已只轮不返，而曾天养，罗大纲之流亦频遭诛殒，现存悍贼惟石达开、韦俊、陈玉成数人，奔命于各处，实有日就衰落之势。所患江西民风柔弱，见各属并陷，遭靡然以为天倾地圻，不复作反正之想。不待其迫协以从，而甘心蓄发助战，希图充当军师、旅帅，以讹索其乡人，掳掠郡县村镇，以各肥其私囊。是以每战动盈数万人，我军为之震骇。若果能数道出师，禽斩以千万计，始则江西从逆之民有悔心，继则广东新附之贼生疑贰，而江西之局势必转，而粤贼之衰象亦愈见矣。南兄能于吉安一路出师，合瑞、袁已列为三路，是此间官绅士民所祷祀以求者也，即日当先行具奏。

沅弟能随南翁以出，料理戎事，亦足增长识力。南翁能以赤手空拳于大事而不甚着声色，弟当留心仿而效之。

夏憩兄前亦欲办援江之师，不知可与南兄同办一路否？渠系簪纓巨室，民望所归，又奉特旨援江，自不能不速图集事。惟与南兄共办一枝，则众擎易举；若另筹一路，则独为难成。沉弟若见憩翁，或先将鄙意道及，余续有信奉达也。

周凤山现在省城，余飞札调之来江。盖欲令渠统一军，峙

衡统一军，__扎老营，一作游兵，不知渠已接札否？望沅弟催之速来。其现在袁州之伍化蛟、黄三清本系渠部曲，可令渠带来也。余俟续布。

国藩又及 九月十七日

21. 应听中丞及左季调度

沅浦九弟左右：

十月十五日接来缄并季公、筠公信，具悉一切。

攻吉攻瑞，二者俱无把握。瑞则纵筑长围，环攻数月，仍不能下，亦属意中之事；吉则初锐后顿，仍蹈袁、瑞之辙。守吉安者为周业春，绰号豆皮春，贼中颇有名迹。必谓我师能一至而举之，余则未敢深信。惟此军初起，劝捐皆以援吉为名，湘省官绅皆以援古为念，势之所在，余何能违众而独成其说？纵余欲违众，弟与梧冈之三千人者，岂敢违上而自定所向，无口粮而直赴瑞州乎？弟可从憩、南两兄，一听骆中丞、左季兄之命，敕东则东，敕西则西。其周梧冈一军，刻有禀来，余亦批其听候南抚院调度。周岐山败挫之管，余亦饬其回湘，归并梧冈一军，同赴吉安，以符湘省官绅之初议，而开江西上游之生面。

至沅弟之所处，则当自为审度。辱南翁青睞，代为整理营务，送至吉安，无论战之胜败，城之克否，即可敬谢速行。或来章门与余相见，或归里门待奉老亲，无为仆仆久淹于外也。此事登场甚易，收身甚难，锋镝至危，家庭至乐，何必与兵事为缘？李次青上年发愤带勇。历尽千辛万苦，日昨抚州一败，身辱名裂，不特官绅啧有烦言，即其本邑平江之勇亦怨管交加。兵犯火也，易于见过，难于见功。弟之才能不逮次青，而所处之位，尚不如次青得行其志，若顿兵吉安城下，久不自决，以

小战小胜为功，以劝捐办团为能，内乖脊令之义，外成骑虎之势，私情公谊，两无所取。弟之自计不可不审，与憩兄、南兄约不可不明也。

日内平江等勇，因口粮久缺拥闹衙署，兄情绪督乱，不克详陈，季翁、筠公两处，并不克作答，弟可婉告颠末，或即将此信一呈，亦足以稍见余之郁郁。余侯续布，不尽不尽。

十月初六日

22. 应专注陆路不必兼筹水师

沅浦九弟左右：

二十四日专人至，接来件，知接战获胜。水师虽未甚如意，然已夺船数号，亦尚可用。水师自近日以来法制大备，然其要全在得人。若不得好哨好勇，往往以利器资寇。弟处以全副精神注陆路，以后不必兼筹水师可也。

用绅士不比用官，彼本无任事之责，又有避嫌之念，谁肯挺身出力以急公者？贵在奖之以好言，优之以廩给，见一善者则痛誉之，见一不善者则深藏而不露一字。久久善者劝，而不善者亦潜移而默转矣。吾弟初出办事，而遂扬绅士之短，且以周梧冈之阅历精明为可佩，是大失用绅士之道也，戒之慎之。

余近发目疾，不能作字，率布数行。惟心照。

兄国藩手草 正月二十六日

23. 将回驻弋阳

沅浦九弟左右：

十三日在河口接弟专差初一日研发一信，借悉一切。

弟久病之后尚未复元，吉安克复之日，决计撤勇归田。此在外太久，身体积弱之故。弟于军旅之事十分认真，而应酬诸务又复丝丝入扣，彷徨周浹，宜其神以过劳而致敝、心以过虑而多汗。久病不痊，实职是故。余亦以用心太过，积年衰耗，又兼肝气郁抑，目光昏花。近得次青、意城、仙屏三人相助为理，凡公牍信缄，我心中所欲达，三人者之笔下皆能达之，稍觉舒畅。然意城有送至玉山即归之约。日内已萌归志，次青亦思归家觐母一次，吾与仙屏两人不克一一了办也。弟克城后还家住两个月，迅即来营帮办一切，替出次青得以归觐，则兄处之事，尚可判决如流耳。

余于十二日具奏遵旨援闽一折，言即日由分水关直捣崇安。是日申刻，闻闽贼回窜江西，楚勇败挫，沪溪、金溪、新城三县失守。十三早，凯章稟请回剿金溪。即时批准。十四早，凯军行矣。十五日，余亦当回驻弋阳，以便调度。余以援浙而来，改而援闽，今又改而剿办江西之贼，天下事固无定也。

胡恕堂新简浙江巡抚。晏中丞于全浙肃清之后忽得来京另候简用之命。不审何故？王人瑞现办营务处，勤勤恳恳，颇惬众心，次、意二公均极称之，或可相与有成。竹庄事，在章门并未与闻，以众论所不与，而弟与温老皆极不义之，未敢违人

而行臆私耳。

此次出来，尚未刻有功牌，日内即将刊刻。吉安如欲来领者，当可刷就，或就近领南省者亦可。弟到家之后，宜多服补剂。余在湖北，胡中丞送大鹿茸一架，顷黄南坡又专丁送来一架(信上有代购字，非赠送者，将来预备价银寄去)。将来余自留一架，寄一架至家与贤弟服之。弟阳虚之体，非此不足以补之也。久不接润之中丞信，不知果肯夺情否？莘田叔于十二日自河口起行，何日可到吉安？奏稿一本，阅后寄家。即问近好。

兄国藩手具 八月十四日于河口

再、次青一军欠饷二十万，断难弥补。次青乃设一绝妙之法，捐十万两请增广平江县文武学额各十名，又捐五万两请增广岳州府文武学额各五名。盖咸丰三年新例，捐银万两者，除各该捐生家给予应得议叙外，其本县准加文武学额各一名。去年今春，湖南办捐输加额一案：长、善、阴、浏、潭、醴六属各加学额十名(捐银至十万以上者，加额亦以十名为止)，湘乡加三名，平江加一名。盖湘乡仅捐三万，平江仅捐一万，为数甚少也。次青以此项应得之口粮银出捐，加县学十名、府学五名，真可俎豆泮宫，流芳百世。各勇闻可刊碑泐名于学宫，亦皆欣然乐从。此事若成，试为美举。前此咸丰三年，平江以团防出力，加文武学额各三名，系次青所办，余咨(抚学)而成者。五年，湘乡援平江之例亦加额三名。弟营现在欠饷若干？若欠至七八万以上，则与各哨弁勇熟商，令其捐出。捐得七万，可增文武学额各七名，合之今春新增之三名，亦为十名，与长、善、阴、刘、潭、醴六邑相等。合之五年特奏增额之三名，则共为十三名矣。弟若办成此事，亦可俎豆泮宫，流芳无既。若弟营不能捐出许多，则或倡捐二三万，余再劝迪、希、浚、凯、玉班诸君子各捐若干万两，凑成七万之数，亦可办成此事，不

让次青专美于平江也。次青稟稿现未在此，俟至玉山取来后，即专丁送至吉安，与弟阅看，以作蓝本。手此。再问日佳。

兄国藩又草 八月十四日

此次未寄家信，弟可将此二件寄家一阅。

24. 惦弟行路之苦

沅浦九弟左右：

十九日接十六早樟树一缄，二十一早接十七申刻一缄，均悉一切。今年病勇极多，此间日内又添一番病者。凯章一军本札令十七八拔营入闽，至今尚未起行，一为雨阻，一为病者所展也。连日夜雨不息，念吾弟行路甚苦，想不能不借住民村矣。仙屏因父病归去，日内冒雨而行，亦可怜念。弟寄温弟信，今日专人送江北也。复问近好。

兄国藩手草 九月二十一日辰刻

25. 特派哨官赴抚州迎弟

沅弟左右：

二十一早发一缄交来勇带去，计明日可接到。兹朱、唐两营各派夫六十名前往迎接，哨官二人、戈什哈大人赴抚州迎接。计二十三四兄弟可相见矣。岂胜欣慰！顺问近好。

兄国藩手草 九月二十一夜

26. 轿夫之难得甚于名将

沅浦九弟左右：

二十四日申刻承二十二日戌刻同源墟一缄，知二十三日乃到抚州也。此间二十三早派长夫百二十名、戈什哈十人往迎，争传弟于二十一日抵抚郡也。

凯章、钤峰等二十四日拔营由杉关入闽，吴翔冈军二十七日拔营往厂昌、石城一带以堵为进。凯章本思与弟一会，因二十四日期较佳，遂启行，不复候矣。

轿夫之难得，甚于名将。吾自弋阳至建昌，备历辛苦。刘得一耆宿，亦令其出队一次。吾弟比又尝此况味耶！二十六应可至此面罄。不一一。先此走问近好。

兄国藩手具 九月二十四申刻

再，此间于十七日派二人送信至六弟处，又于二十一日派二人至六弟处，即送弟寄信转递之件，而弟与迪庵之信乃忘未封去，可谓徙宅而忘其妻矣。待弟到后再专人去也。

兄又行 二十五日辰刻

27. 洪弟外出事尚须筹维

澄侯、沅浦、季洪三位老弟左右：

十二月初三日接澄弟十六、十六日两信，初七日接沅弟二十一、洪弟二十日两信，得悉家中四宅大小平安。吾于十月二十五日派安七、五四送信回家，不知何以至今未归营？已四十八日矣。初三日专人送信已得回报，十三日专人亦满一月，不知何以久延未到也？

此间一切平安。意城于二十八日归，大树于初三日归去，李小泉之弟少荃于初十来营，王壬秋初九来，次青初九日抵南昌，计日内亦可到矣。

温弟之事，家中不知如何举动？至今无手信，尚忍言哉？希庵接霍山王令信，言迪庵及筱石遗骸业经寻得，兹抄付归。不知我温弟尚能返葬首邱否？吾往年在外，与官场中落落不合，几至到处荆榛。此次改弦易辙，稍觉相安。去年在家，兄弟为小事争竞，今日温弟永不得相见矣。回首前非，悔之何及！

洪弟明年出外，尚须再三筹维。若运气不来，徒然愠气，帮人则委曲从人，尚未必果能相合，独立则劳心苦力，尚未必果能自立。如真能受委曲，能吃辛苦，则家庭亦未始不可处也，望与沅弟酌之。余详日记中。

再，此次寄银百两与刘峙衡之嗣子。我去年丁艰时，峙衡穿青布衣冠来代我治事，至今感之，故以此将意。或专使送去，或交纪泽正月带去，祈酌之。再，泽六老爷之孙葛培因昨归于

玉山解围案内保举主簿，兹将饬知付回。望专人送去，并望写一信，言明年不可再来投效，刚来决不再收。须切实言之，使通境皆闻也。古人言今日之恩羹即异日之怨门，其理深矣。澄、沅、洪三弟左右。

藩又行 十二月十三日

28. 昨冒雨赶至祁门

沅弟左右：

十一日接初八日午刻信，得悉近状。余于十一日冒雨赶至祁门。今日慈忌日，即不应酬也。宁国府告警甚迫。余奉到五月二十六日寄谕，有云“该署督现统兵力太单，未可轻率前进，宜加持重为要”等因，又鲍镇未至，朱镇未痊，自不可拨兵往援，已复谢之矣。余近怕热略好，而汗出殊甚，老态日增。陈作梅初七日至英山，若至雪琴水营，弟可邀之至安庆一行，此人有益于身心也。纪泽自长沙开船后无来信。朱、黄、刘三信壁还。

六月十二日